

TXOJ KEV SIB YUAV THIAB TSEV NEEG KEV SIB RAUG ZOO

PHAU NTAUV PAB COV NEEG KAWM HOOB NO



TXOJ KEV SIB YUAV
THIAB TSEV NEEG KEV SIB RAUG ZOO

PHAU NTAWV PAB COV NEEG KAWM HOOB NO

Luam tawm los ntawm
Yexus Khetos lub Koom Txoos ntawm Tsoom Haiv Neeg Ntseeg hauv Hnub Nyoog Kawg
Salt Lake City, Utah

Cov Lus thiab cov Tswv Yim

Peb yeej xav hnov nej cov lus thiab cov tswv yim txog phau kawm no.
Thov xa mus rau:

Curriculum Planning
50 East North Temple Street, Floor 24
Salt Lake City, UT 84150-3200
USA

Chaw E-mail: cur-development@ldschurch.org

Thov sau koj lub npe, chaw nyob, pawg ntseeg, thiab ceg txheem
ntseeg. Yuav tsum qhia tias koj hais txog phau kawm twg. Ces cia li hais
qhia tawm koj cov lus thiab cov tswv yim uas qhia tias phau kawm no
zoo li cas thiab koj xav tias yuav tau muab kho li cas.

© 2005 los ntawm Intellectual Reserve, Inc.

Ceev txhua txoj cai

Luam tawm hauv Teb Chaws Amelikas

Pub txhais ua lus Askiv: 8/97

Pub txhais ua lus Hmoob: 8/97

Kej txhais *Marriage and Family Relations: Participant's Study Guide*

Hmong

TEJ YAM UAS NYOB HAUV

“Tsev Neeg: Ib Zaj Lus Tshaj Tawm rau lub Ntiaj Teb”	iv
Lus Cev	v
Kev Tshab Hoob Kawm rau txoj Kev Sib Yuav thiab Tsev Neeg Kev Sib Raug Zoo	vii

KEM A: NTXIV DAG NTXIV ZOG RAU IB KHUB NIAM TXIV

1. “Tsev Neeg Yog lub Hauv Paus rau tus Tsim Txoj Hau Kev”	3
2. Ua Kom Niam Txiv Sib Koom Siab	8
3. Tu txoj Kev Hlub thiab Kev Ua Phooj Ua Ywg ntawm Ib Khub Niam Txiv	13
4. Kev Kho tej Teeb Meem ntawm Ib Khub Niam Txiv	17
5. Kev Kho tej Teeb Meem los ntawm Kev Sib Txuas Lus Zoo	20
6. Ntxiv Dag Ntxiv Zog Rau Ib Khub Niam Txiv los ntawm Kev Ntseeg thiab Kev Thov Vajtswv	24
7. Lub Hwj Chim ntawm Kev Zam Txim Uas Kho Tau Tib Neeg	29
8. Saib Xyuas Tsev Neeg tej Nyiaj Txiag	32

KEM B: NIAM TXIV TXOJ KEV LAV RIS YUAV TAU NTXIV DAG NTXIV ZOG RAU TSEV NEEG

9. “Me Nyuam Yog tej Paj Tshab uas tus Tswv Pub Rau Neeg”	39
10. Niam thiab Txiv txoj Ntiag Tug Hauj Lwm Dawb Ceev (Qhov 1: Leej Txiv txoj Hauj Lwm)	44
11. Niam thiab Txiv txoj Ntiag Tug Hauj Lwm Dawb Ceev (Qhov 2: Leej Niam txoj Hauj Lwm)	48
12. Qhia cov Me Nyuam los ntawm Yus tus Yam Ntxwv thiab Kev Qhuab Qhia	54
13. Qhia txoj Moo Zoo tej Ntsiab Cai rau cov Me Nyuam (Qhov 1)	61
14. Qhia txoj Moo Zoo tej Ntsiab Cai rau cov Me Nyuam (Qhov 2)	66
15. Cob Qhia cov Me Nyuam Thaum Lawv Txiav Txim Siab	73
16. Tsev Neeg Kev Thov Vajtswv, Tsev Neeg Kev Kawm Vaj Lug Kub, thiab Tsev Neeg Hmo Ua Ke	77

TSEV NEEG

IIB ZAJ LUS TSHAJ TAWM RAU LUB NTLAJ TEB

THAWJ PAWG THAWJ TSWJ HWM THIAB PAWG KAUM OB TUG THWJ TIM NTAWM
YEXUS KHETOS LUB KOOM TXOOS NTAWM TSOOM HAIV NEEG NTSEEG HAUV HNUB NYOOG KAWG

PEB, UAS YOG THAWJ PAWG THAWJ TSWJ HWM thiab Pawg Kaum Ob tug Thwj Tim ntawm Yexus Khetos lub Koom Txoos ntawm Tsoom Haiv Neeg Ntseeg hauv Hnub Nyooq Kawg, tshaj tawm tiag tiag hais tias txoj kev sib yuav ntawm ib tug txiv neej thiab ib tug poj niam yog raug tsa los ntawm Vajtswv thiab tias tsev neeg yog lub ntsiab ntawm tus Tsim lub tswv yim rau nws cov me nyuam txoj hmoov nyob mus ib txhis li.

TXHUA TXHIA TUS TIB NEEG—txiv neej thiab poj niam—raug tsim muaj yam ntxwv zoo li Vajtswv. Txhua txhia tus yog nkawm niam txiv saum ntuj ceeb tseeg ib tug tub ntsuj plig los yog ib tug ntxhais ntsuj plig uas nkawd hlub thiab xws li txhua tus yog li ntawd, txhua txhia tus muaj ib tug xeeb ceem thiab txoj hmoov los saum ntuj los. Txoj kev ua ib tug poj niam los sis ib tug txiv neej yog ib yam tseem ceeb ntawm ib tug neeg tus xeeb ceem thiab lub ntsiab, txawm hais tias nyob lub qub neej los yog, lub neej no los yog, lub neej nyob mus ib txhis li los yog.

NYOUB RAU LUB QUB NEEJ, tej tub ntsuj plig thiab tej ntxhais ntsuj plig tau paub thiab teev tiam Vajtswv ua lawv Leej Txiv uas Nyob Mus Ib Txhis Li thiab lawv tau txais yuav nws lub tswv yim uas npaj tseg hais tias nws cov me nyuam yuav tau ib lub cev nqaij daim tawv thiab yuav tau ib lub sij hawm saum ntiaj teb no kom xyaum tau ua neeg zoo tag nrho thiab thaum kawg ncav tau lawv txoj hmoov los saum ntuj los ua cov uas txais txoj sia nyob mus ib txhis ua lawv tug. Txoj kev zoo siab los saum ntuj los ua rau kev ua niam ua txiv, ua tub ua ntxhais, ua kwv ua tij, ua neej ua tsa nyob mus li dhau lub qhov ntxa. Tej kab ke tseem ceeb dawb ceev thiab tej kev cog lus uas muaj hauv tej tuam tsev dawb huv ua rau tib neeg rov qab mus nyob tau ntawm Vajtswv lub xub ntiag thiab ua rau tsev neeg nyob tau ua ke mus ib txhis li.

THAWJ LO LUS TXIB uas Vajtswv txib kom Adas thiab E-vas ua hais ntsig txog nkawd txoj kev ua niam ua txiv. Peb tshaj tawm hais tias Vajtswv lo lus txib uas hais kom nws cov me nyuam huaj vam mus puv tas lub ntiaj teb tseem muaj zog lawm. Tsis tas li ntawd xwb, peb tshaj tawm ntxiv hais tias Vajtswv tau txib kom tej hwj chim tseem ceeb dawb ceev ntawm txoj kev muaj tub muaj ki yuav tsum siv tsuas yog ntawm ib tug txiv neej thiab ib tug poj niam xwb, uas tau sib yuav raws li kev cai lij choj ua niam ua txiv.

PEB TSHAJ TAWM hais tias txoj hau kev uas yus tsim tau txoj sia hauv ntiaj teb no raug tsa los ntawm Vajtswv los. Peb pom zoo rau qhov uas ib tug neeg txoj sia yog ib yam tseem ceeb dawb ceev thiab uas nws tseem ceeb rau Vajtswv lub tswv yim nyob mus ib txhis li.

IB NKAWG NIAM TXIV twg muaj ib txoj kev lav ris tseem ceeb kom ib tug hlub thiab saib xyuas ib tug thiab kom hlub thiab saib xyuas nkawd cov me nyuam. ‘Me nyuam yog tej paj tshab uas tus Tswv pub rau neeg’ (Nkauj Qhuas Vajtswv

127:3). Niam txiv muaj ib lub luag hauj lwm tseem ceeb dawb ceev kom cob nkawd cov me nyuam raws li kev hlub thiab kev ncaj ncees, kom npaj muab raws li lawv toob kas ntawm sab nqaij daim tawv thiab sab ntsuj plig, kom qhia lawv sib hlub thiab sib pab, kom ua raws li Vajtswv tej lus txib thiab kom ua pej xeem uas ua raws li kev cai lij choj txawm nyob qhov twg los xij. Tej txiv thiab poj niam—niam tsev thiab txiv tsev—yuav tsum ceeb toom rau Vajtswv hais ntsig txog lawv txoj kev ua raws li tej kev lav ris no.

TSEV NEEG raug tsa los ntawm Vajtswv. Txoj kev sib yuav ntawm ib tug txiv neej thiab ib tug poj niam tseem ceeb heev rau Nws lub tswv yim nyob mus ib txhis li. Tej me nyuam tsim nyog yug los raws li txoj kev sib khi ntawm txoj kev sib yuav, thiab tsim nyog muaj niam muaj txiv, uas ua ib siab hawm tej lus cog tseg ntawm txoj kev sib yuav, cob lawv loj hlob. Ib tse neeg twg haj yam yuav ncav tau kev zoo siab hauv lawv lub neej thaum tus Tswv Yexus Khetos cov lus qhuab qhia ua lawv lub hauv paus. Tej kev sib yuav thiab tej tsev neeg uas kav ntev raug tsa thiab nyob mus li ntawm tej kev cai xws li kev ntseeg, kev thov Vajtswv, kev hloov siab lees txim, kev zam txim, kev sib hwm, kev hlub, kev hmov tshua, kev ua hauj lwm, thiab kev ua si uas tsim nyog ua. Los ntawm lub tswv yim los saum ntuj los, cov txiv tsev yuav tsum kav lawv tej tsev neeg los ntawm kev hlub thiab kev ncaj ncees thiab lav ris npaj muab tej yam toob kas ua neej thiab tej kev pov hwm rau lawv tsev neeg. Cov niam tsev txoj kev lav ris thib ib yog tu lawv cov me nyuam. Nyob rau tej kev lav ris tseem ceeb dawb ceev no, tej niam tsev txiv tsev yuav tsum sib pab xws li nkawd nyob sib txig. Tej zaum kev mob nkeeg, kev tuag, los yog lwm yam yuav ntxim ua txawv tej lus no. Thaum twg ib tse neeg toob kas kev pab nws tsim nyog tej kwv tij neej tsa cev tes mus pab thiab.

PEB CEEB TOOM hais tias cov neeg uas txhaum tej kev khi lus ntawm kev coj dawb huv, cov uas tsim txom lawv tus khub los yog lawv cov me nyuam, los yog cov uas tsis lav ris koob lawv tsev neeg yuav muaj ib hnub twg uas lawv yuav lav ris txog tej no rau ntawm Vajtswv lub xub ntiag. Hais txuas ntxiv, peb ceeb toom hais tias txoj kev puas tsuaj ntawm tsev neeg yuav coj tej kev kub ntxhov uas cov yaj saub yav thaum ub thiab niaj hnub nim no hais txog los rau saum tej tib neeg, zej zog, thiab teb chaws.

PEB NQUA HU kom cov pej xeem zoo thiab cov nom tswv ntawm tseem fww nyob txhua qhov txhia chaw txhawb nqa tej kev lis kev cai uas raug tsim kom yug thiab ntxiv dag zog rau tsev neeg kom thiaj ua tau lub xam khoos pawg neeg tseem ceeb tshaj plaws.

Thawj Tswj Hwm Gordon B. Hinckley tau nyeem zaj lus tshaj tawm no ua ib feem ntawm nws zaj lus hais nyob ntawm Koom Haum Niam Tsev lub Tuam Rooj Sib Ntsib uas muaj lub Cuaj Hlis Ntuj hnub tim 23, 1995, hauv Salt Lake City, Utah.

LUS CEV

Lub Hom Phiaj ntawm Hoob No

Txoj Kev Sib Yuav thiab Tsev Neeg Kev Sib Raug Zoo yog kom pab cov mej zeej ntawm lub Koom Txoos ntxiv dag ntxiv zog rau lawv txoj kev ua khub niam txiv thiab ua tsev neeg thiab nrhiav kev xyiv fab hauv tsev neeg txoj kev sib raug zoo. Nws muaj ob kem. Kem A, “Kev Ntxiv Dag Ntxiv Zog Rau Ib Khub Niam Txiv,” uas pab tau tej khub niam txiv thiab cov mej zeej uas tab tom npaj rau kev sib yuav. Kem B, “Niam Txiv txoj Kev Lav Ris yuav tau Ntxiv Dag Ntxiv Zog Rau Tsev Neeg,” uas pab niam thiab txiv thiab pog yawg thaum lawv pab “coj [cov me nyuam] loj hlob thiab ua raws li tus Tswv cov lus qhia” (Efaxaus 6:4).

Hoob no muaj cov lus qhuab qhia thiab tej ntsiab cai uas nyob hauv cov vaj lug kub thiab tej uas cov yaj saub thiab cov thwj tim niaj hnuv qhia tawm. Nws qhia ntau heev txog “Tsev Neeg: Ib Zaj Lus Tshaj Tawm rau lub Ntiaj Teb,” uas twb muab sau tseg hauv phab ntawv *iv* hauv phau kawm no.

Yog tias xav tshab xyuas tag nrho hoob no, saib phab ntawv *vii–viii*. Xyuas kev tshab xyuas no ntau zaus kom thiaj kawm tau tej lus qhuab qhia thiab ntsiab cai uas koj twb kawm lawm thiab npaj koj tus kheej rau tej zaj lus kawm rau yav tom ntej.

Mus Koom Hoob No Raws Li Koj tej Kev Xav Tau

Koj muaj cai mus koom hoob no raws li koj muaj kev xav tau. Piv xam hais tias, yog tias koj twb yuav txiv yuav poj niam tiam sis tsis tau muaj me nyuam, tej zaum koj yuav txiav txim siab tuaj koom thawj yim zaj lus qhia tiam sis tsis kawm yim zaj kawg. Yog tias koj tsis muaj txiv tsis muaj poj niam, tej zaum koj yuav xav kawm tej zaj lus qhia hauv kem B.

Txoj Kev Koom hauv Hoob No

Thaum koj txiav txim siab los koom hoob no, nov qhia tias koj xav ntxiv dag ntxiv zog rau koj tsev neeg. Xwv kom thiaj tau tej yam zoo ntawm hoob no, koj yuav tsum pab hais koj cov tswv yim thaum sib tham hauv hoob, siv phau kawm no, thiab sim nruab tej lus qhuab qhia thiab ntsiab cai uas koj kawm hauv no rau hauv koj lub neej.

Kev Ntxiv Tswv Yim rau tej Kev Sib Tham Hauv Hoob No

Thaum uas koj thiab lwm cov neeg ntxiv tswv yim rau tej kev sib tham hauv hoob no, koj yuav muaj cuab kav caw tus Vaj Ntsuj Plig Dawb Huv los nrog koj nyob thiab ib leeg txhawb nqa thiab qhia ib leeg. Tus Tswv hais tias, “Cia li xaiv ib tug los ua nej tus xib hwb, thiab nej tsis txhob hais lus zom zaws; tiam sis cia ib tug neeg hais lus thiab sawv daws mloog nws cov lus, xwv kom thaum uas sawv daws tau hais lus tas sawv daws tau kev tshoov siab, thiab txhua leej txhia tus tau muaj sij hawm hais lus” (Q&K 88:122).

Txhua tus neeg uas koom hoob no ib leeg kawm tau ntawm ib leeg, txawm tias yus tau sib yuav lawm los sis tau tu me nyuam los xij. Koj yuav kawm tau ntau heev hauv hoob no yog tias koj faib koj cov tswv yim rau nej hoob thiab ua tib zoo mloog luag hais thaum lawv hais lawv tej tswv yim. Thaum uas koj hais lus tim khawv txog tej kev tseeb, koj ntxiv tau dag zog rau koj zaj lus tim khawv thiab lwm tus neeg zaj lus tim khawv. Tiam sis, koj yuav tsum ceev faj thiab tsis txhob tham txog tej yam dawb ceev uas tsis zoo qhia hauv hoob no. Koj yuav tsum paub tias hoob no muaj ciam li cas thiab yuav tsum txawj xav txog tus xib hwb thiab lwm cov neeg uas koom hoob no.

Txoj Kev Siv Phau Kawm No

Lub lim tiam tom qab txhua zaj lus qhia, cia li siv phau kawm no kom thiaj tshab xyuas tej yam uas koj tau kawm lawm. Phau kawm no muaj “Cov Tswv Yim rau Kev Nruab Rau Yus Lub Neej,” uas yog tej tswv yim uas yuav pab koj ua neej nyob raws li cov lus qhuab qhia thiab tej ntsiab cai uas koj tau kawm hauv txhua zaj lus qhia. Tsis tas li ntawd xwb, muaj ib los sis ob zaj lus los ntawm cov Tuam Thawj Coj hauv lub Koom Txoos rau txhua zaj lus qhia. Yog tias koj twb yuav txiv yuav poj niam lawm, neb kawm tau tej yam zoo yog tias neb nyeem thiab sib tham txog cov lus no.

Tej zaj lus no yog ib co lus uas cov thawj coj tau hais hauv lub tuam rooj sab laj thiab lwm txoj kev sib ntsib, lwm zaj ces tau sau rau hauv lub Koom

Txoos tej phau ntawv xov xwm. Vim hais tias nyias los ntawm nyias phau ntawv, tau muab kho me ntsis kom thiaj haum tau phau kawm no. Piv xam hais tias, tau tshem cov lus uas lawv tau hais thaum lawv pib hais ib zaj lus hauv lub tuam rooj sab laj, thiab tau pauv tej ntawv piav lub ntsiab thiab lwm cov lus piav me ntsis. Tiam sis tej lus qhia tsis tau pauv li.

Nruab tej Lus Qhuab Qhia thiab Ntsiab Cai uas Koj Tau Kawm Rau Hauv Koj lub Neej

Tsis txaus yog tias kawm txoj moo zoo xwb. Yog tias txoj moo zoo yuav muaj qab hau hauv koj lub neej, koj yuav tsum ua neej nyob raws li koj tau kawm lawm. Thawj Tswj Hwm Harold B. Lee, tus Thawj Tswj Hwm Thib 11 hauv lub Koom Txoos, tau ntuas hais tias:

“Txhua txoj ntsiab cai thiab kab ke hauv txoj moo zoo tsuas yog txoj kev caw tib neeg los kawm txoj moo zoo thaum ua raws li tej kev qhia ntawd. Tsis muaj leej twg uas paub txoj ntsiab cai ntawm txoj kev cai them ib feem kaum txog thaum nws them ib feem kaum. Tsis muaj leej twg uas paub txoj ntsiab cai ntawm Lo Lus Txawj Ntse txog thaum nws ceev Lo Lus Txawj Ntse. Cov me nyuam, los sis cov neeg laus, tsis paub qhov tseeb txog kev them ib feem kaum, Lo Lus Txawj Ntse, kev ceev Hnub Caiv kom dawb huv, los sis thov Vajtswv thaum lawv hnov leej twg piav txog tej ntsiab cai no. Peb kawm txoj moo zoo thaum peb ua neej nyob li ntawd. . . .

“...Peb yeej tsis paub dab tsi txog txoj moo zoo txog thaum peb tau tej koob hmoov uas los rau yus

thaum yus ua raws li txhua txoj ntsiab cai” (*Stand Ye in Holy Places* [1974], 215).

Tej Ntaub Ntawv Ntxiv

Lub Koom Txoos cov ntaub ntawv qhia ntxiv txog tej yam uas koj yuav kawm hauv hoob no. Yus yuav tau cov no los ntawm lub Koom Txoos tej tsev xa khoom. Tej zaum koj yuav xav yuav cov ntaub ntawv no thiab siv hauv koj tsev.

- *Tsev Neeg Phau Ntawv Qhia Kev* (31180). Phau qhia kev no piav seb tsev neeg muaj txheej txheem li cas, qhia tej xov xwm txog txoj kev qhia txoj moo zoo tom tsev, thiab qhia seb yuav ua lub pov thawj hwj tej kab ke thiab koob hmoov li cas.
- Tej zaj lus txog kev sib yuav thiab tsev neeg hauv lub Koom Txoos tej ntawv.
- *Phau Ntawv Pab Kom Txawj Qhia* (34595). Phau qhia kev no muab tej tswv yim uas pab yus qhia thiab kawm txoj moo zoo.
- *Ntxiv Zog rau cov Tub thiab Ntxhais Hluas* (34285). Phau me me no qhia txog lub Koom Txoos tej kev cai txog kev tham hluas nkauj, kev hnav ris tsho thiab tu cev, kev ua phooj ua ywg, kev ua ncaj ncees, kev hais lus, kev saib yeeb yam, kev noj qab nyob zoo ntawm sab paj hlwb thiab sab cev nqaij tawv, kev mloog nkauj thiab ua los voos, kev coj dawb huv hais txog kev pw ua ke, tej yam zoo ua thaum Hnub Caiv, kev hloov siab lees txim, kev tsim nyog, thiab kev pab tib neeg.

KEV TSHAB HOOB KAWM RAU TXOJ KEV SIB YUAV THIAB TSEV NEEG KEV SIB RAUG ZOO

KEM A: NTXIV DAG NTXIV ZOG RAU IB KHUB NIAM TXIV

ZAJ LUS QHIA 1: “TSEV NEEG YOG LUB HAUV PAUS RAU TUS TSIM TXOJ HAU KEV”

Cov yaj saub ntawm lub caij nyoog kawg no tshaj tawm hais tias kev sib yuav thiab tsev neeg tseem ceeb npaum li cas rau lub neej nyob mus ib txhis.

Txoj kev sib yuav uas nyob mus ib txhis koj tau kev xyiv fab thiab tej koob hmoov zoo kawg los rau lub neej no thiab rau tas mus ib txhis.

Hoob kawm rau Txoj Kev Sib Yuav thiab Tsev Neeg Kev Sib Raug Zoo yuav pab peb nrhiav kev xyiv fab hauv peb tsev neeg txoj kev sib raug zoo.

Peb vaj peb tsev ua tau ib “qho chaw ntawm lub ntuj ceeb tsheej” thaum uas peb txhim tsa peb lub neej “nyob rau saum lub pob zeb uas yog peb tus Txhiv Dim.”

ZAJ LUS QHIA 2: UA KOM NIAM TXIV SIB KOOM SIAB

Tus Tswv tau txib kom cov txiv neej thiab cov poj niam koom ua ib lub siab.

Cov txiv neej thiab cov poj niam yuav tsum ib leeg saib ib leeg rau nqi li nkawd nyob sib txig.

Cov txiv neej thiab cov poj niam yuav tsum cia lawv tus cwj pwm thiab tej kev txawj ib leeg txhawb pab ib leeg.

Cov txiv neej thiab cov poj niam yuav tsum muab siab npuab ib leeg rau ib leeg.

ZAJ LUS QHIA 3: TU TXOJ KEV HLUB THIAB KEV UA PHOOJ UA YWG NTAWM IB KHUB NIAM TXIV

Cov txiv neej thiab cov poj niam yuav tsum tu nkawd txoj kev sib hlub.

Txoj kev hais tawm yus txoj kev hlub thiab ua siab zoo ua tau rau ib khub niam txiv muaj kev hlub thiab ua phooj ua ywg.

Txoj kev ua niam ua txiv thaum sib yuav lawm yog ib txoj kev qhia tawm yus txoj kev hlub.

Cov niam txiv yuav tsum muaj kev hlub tshua, uas yog kev hlub dawb pawg ntawm Khetos.

ZAJ LUS QHIA 4: KEV KHO TEJ TEEB MEEM NTAWM IB KHUB NIAM TXIV

Txhua txhua khub niam txiv yeej yuav muaj teeb meem.

Cov txiv neej thiab cov poj niam kho tau tej teeb meem no yog tias lawv xav tias txoj kev sib yuav yog ib txoj kev sib khi lus.

Thaum twg muaj teeb meem, peb yuav tsum xaiv los muaj lub siab ntev thiab kev hlub es tsis txhob chim siab los sis npau taws.

ZAJ LUS QHIA 5: KEV KHO TEJ TEEB MEEM LOS NTAWM KEV SIB TXUAS LUS ZOO

Txhua khub niam txiv yeej yuav tsis sib haum xeeb txhua lub sij hawm.

Cov txiv neej thiab cov poj niam yuav tsum nrhiav tej yam zoo ntawm lawv tus khub tus cwj pwm.

Txoj kev sib txuas lus zoo pab tiv thaiv thiab kho tej teeb meem.

ZAJ LUS QHIA 6: NTXIV DAG ZOG RAU IB KHUB NIAM TXIV LOS NTAWM KEV NTSEEG THIAB KEV THOV VAJTSWV

Cov txiv neej thiab cov poj niam yuav tsum sib koom tes kom nkawd txoj kev ntseeg Yexus Khetos loj hlob tuaj.

Cov txiv neej thiab cov poj niam tau koob hmoov thaum nkawd thov Vajtswv ua ke.

ZAJ LUS QHIA 7: LUB HWJ CHIM NTAWM KEV ZAM TXIM UAS KHO TAU TIB NEEG

Thaum uas ib tug txiv thiab tus poj niam ib leeg xav zam txim rau ib leeg yuav muaj kev thaj yeeb nyab xeeb thiab ib leeg yuav tso siab rau ib leeg.

Cov txiv neej thiab cov poj niam ib leeg yuav tsum zam txim rau ib leeg thaum twg ib tug twg ua yuam kev thiab ob leeg yuav tsum siv zog kho lawv lub neej kom zoo dua.

Cov txiv neej thiab cov poj niam ib leeg yuav tsum zam txim rau ib leeg.

ZAJ LUS QHIA 8: SAIB XYUAS TSEV NEEG TEJ NYIAJ TXIAG

Yuav tsum ua tib zoo saib xyuas nyiaj txiag kom thiaj muaj kev zoo siab ntawm ib khub niam txiv.

KEM B: NIAM TXIV TXOJ KEV LAV RIS YUAV TAU NTXIV DAG NTXIV ZOG RAU TSEV NEEG

ZAJ LUS QHIA 9: “ME NYUAM YOG TEJ PAJ TSHAB UAS TUS TSWV PUB RAU NEEG”

Leej Txiv Saum Ntuj Ceeb Tsheej muab Nws cov me nyuam ntsuj plig rau cov niam txiv hauv ntiag teb no.

Cov niam txiv yuav tsum pab saib xyuas lawv txhua tus me nyuam.

Cov me nyuam tsim nyog tau lawv niam txiv txoj kev hlub.

Txoj kev ua phem rau ib tug me nyuam yog ib txoj kev txhaum rau ntawm Vajtswv.

Cov me nyuam koj kev zoo siab los rau hauv lawv niam txiv lub neej.

ZAJ LUS QHIA 10: NIAM THIAB TXIV TXOJ NTIAG TUG HAUJ LWM DAWB CEEV (QHOV 1: LEEJ TXIV TXOJ HAUJ LWM)

Leej txiv thiab leej niam yuav tsum sib koom tes pab nkawd txhua tus me nyuam kom muaj ib daim npog uas yog kev ntseeg.

Leej txiv yuav tsum muaj kev hlub thiab ua ncaj nces thaum lawv ua tus koj kav.

Leej txiv yuav tsum pov hwm thiab pab muab tej yam khoom uas xav tau hauv lub neej no rau lawv tsev neeg.

ZAJ LUS QHIA 11: NIAM THIAB TXIV TXOJ NTIAG TUG HAUJ LWM DAWB CEEV (QHOV 2: LEEJ NIAM TXOJ HAUJ LWM)

Leej niam yeej pab ua Vajtswv tej hauj lwm.

Cov niam tsev txoj kev lav ris thib ib yog tu lawv cov me nyuam.

Tej niam tsev txiv tsev yuav tsum sib pab xws li nkawd nyob sib txig.

ZAJ LUS QHIA 12: QHIA COV ME NYUAM LOS NTAWM YUS TUS YAM NTXWV THIAB KEV QHUAB QHIA

Niam txiv muaj kev lav ris yuav tau qhia nkawd cov me nyuam.

Cov txiv neej thiab cov poj niam yuav tsum sib koom tes ua raws li tej ntsiab cai rau txoj kev saib xyuas nyiaj txiag.

Niam txiv txais tau kev tshoov siab uas pab nkawd qhia nkawd cov me nyuam.

Niam txiv qhia los ntawm nkawd tus yam ntxwv thiab kev qhuab qhia.

ZAJ LUS QHIA 13: QHIA TXOJ MOO ZOO TEJ NTSIAB CAI RAU COV ME NYUAM (QHOV 1)

Niam txiv tej kev qhuab qhia pab tau cov me nyuam muaj kev ntseeg ruaj khov.

Niam txiv yuav tsum qhia nkawd cov me nyuam txog thawj co ntsiab cai thiab kab ke ntawm txoj moo zoo.

Niam txiv yuav tsum “qhia lawv cov me nyuam kom thov Vajtswv, thiab ua tej yam ncaj rau ntawm tus Tswv.”

ZAJ LUS QHIA 14: QHIA TXOJ MOO ZOO TEJ NTSIAB CAI RAU COV ME NYUAM (QHOV 2)

Niam txiv qhia nkawd cov me nyuam tias nkawd hlub lawv thaum niam txiv qhuab qhia lawv.

Niam txiv yuav tsum qhia nkawd cov me nyuam kom muaj kev khuv leej thiab kev pab lwm tus neeg.

Niam txiv yuav tsum qhia nkawd cov me nyuam kom ua ncaj nces thiab saib tau luag tej cov khoom rau nqi.

Niam txiv yuav tsum qhia nkawd cov me nyuam tias lawv yuav tau nqi zog li cas thaum lawv ua hauj lwm zoo.

Niam txiv yuav tsum qhia nkawd cov me nyuam kom ua neeg dawb huv.

ZAJ LUS QHIA 15: COB QHIA COV ME NYUAM THAUM LAWV TXIAV TXIM SIAB

Cov me nyuam xav tau kev cob qhia thaum uas lawv txiav txim siab.

Niam txiv pab tau cov me nyuam thaum lawv siv lawv txoj kev ywj siab xaiv ua tej yam ncaj.

Niam txiv yuav tsum cia nkawd cov me nyuam kawm kev lav ris thaum uas lawv txiav txim siab tsis zoo.

Niam txiv yuav tsum muaj kev hlub tiag tiag rau cov me nyuam uas poob yuam kev.

**ZAJ LUS QHIA 16: TSEV NEEG KEV THOV
VAJTSWV, TSEV NEEG KEV KAWM VAJ LUG KUB,
THIAB TSEV NEEG HMO UA KE**

Tsev neeg kev thov Vajtswv thiab kev kawm vaj lug kub thiab tsev neeg hmo ua ke yuav tsum yog tej

yam tseem ceeb heev rau ib Tsoom Haiv Neeg Ntseeg hauv Hnub Nyoog Kawg txhua txhua yim neeg.

Tej yim neeg tau koob hmoov ntau thaum lawv thov Vajtswv ua ke.

Tsev neeg kev kawm vaj lug kub pab tej yim neeg txav los nyob ze Vajtswv.

Tsev neeg hmo ua ke pab tej yim neeg tawm tsam tej yam phem ntawm lub ntiaj teb.

**KEM A
NTXIV DAG NTXIV ZOG RAU
IB KHUB NIAM TXIV**



“TSEV NEEG YOG LUB HAUV PAUS RAU TUS TSIM TXOJ HAU KEV”

1

COV TSWV YIM RAU KEV NRUAB RAU HAUV YUS LUB NEEJ

Raws li koj xav tau thiab toob kas qhia, ua raws li ib los sis ob qho tswv yim no.

- Tshab xyuas “Tsev Neeg: Ib Zaj Lus Tshaj Tawm rau lub Ntiaj Teb” (phab *iv*). Txiav txim siab seb yuav ua li cas thiaj ua tau raws li cov yaj saub cov lus ntuas.
- Yuav ib daim ntawv txog “Tsev Neeg: Ib Zaj Lus Tshaj Tawm rau lub Ntiaj Teb” (35602 los sis 35538) los ntawm lub Koom Txoos ib lub tsev xa khoom. Muab dai cia hauv koj lub tsev.

KEV NYEEM NTAWV

Kawm zaj dab neeg nram no. Yog tias koj muaj poj niam muaj txiv, nyeem thiab nrog koj tus khub sib tham txog zaj no.

RAU LUB SIJ HAWM NO THIAB TAS MUS IB TXHIS

Txwj Laug Boyd K. Packer
Los ntawm Pawg Kaum Ob tug Thwj Tim

Txoj Kev Zoo Siab

Nyob zoo cov kwv tij thiab cov nkauj muam sawv daws, cov vaj lug kub thiab cov thwj tim thiab cov yaj saub tej lus qhuab qhia hais tias peb yog cov tub thiab cov ntxhais hauv lub neej ua ntej peb tau yug los, yeej yog Vajtswv cov me nyuam ntsuj plig.¹ Yeej tau muaj txiv neej thiab poj niam ua ntej yug los, thiab tsis yog tau pib muaj li no thaum yug los ua neeg xwb.²

Thaum muaj kev sib sab laj saum ntuj ceeb tsheej,³ peb tau kawm txog Vajtswv txoj hau kev:⁴ uas yog txoj kev cawm seej,⁵ txoj kev txhiv dim,⁶ txoj kev zoo siab.⁷ Txoj hau kev no yog ib txoj kev sim siab; txhua leej txhia tus yuav tsum xaiv ntawm qhov zoo thiab qhov phem.⁸ Nws txoj hau kev no muaj ib tug Txhiv Dim, ib txoj kev theej txhoj, txoj Kev Sawv Rov Los, thiab, yog tias peb mloog lus, peb yuav tau rov qab mus nrog Vajtswv nyob.

Ntxwng nyoog tau sawv los tawm tsam qhov ntawd thiab tau tsim nws ib txoj hau kev thiab.⁹ Tau txwv cov uas tau raws nws qab tsis pub lawv txais yuav ib lub cev nqaij daim tawv.¹⁰ Qhov uas peb nyob hauv no qhia tseeb tias peb tau pom zoo rau Leej Txiv txoj hau kev.¹¹

Luxifaws lub hom phiaj yog kom tawm tsam txoj kev zoo siab, tsim txom cov neeg dawb huv, tej yam zoo nkauj thiab tej yam zoo hauv lub neej no: uas yog kev sib tham, kev hlub, kev sib yuav, thiab ua niam ua txiv.¹² Ces kev tu siab thiab kev paub tias tau ua txhaum¹³ yuav raws nws qab. Tsuas yog kev

hloov siab nkaus xwb thiaj kho tau lub siab uas mob ntawd.

Vajtswv Txoj Hau Kev Yuav Tsum Muaj Kev Sib Yuav thiab Tsev Neeg

Txoj kev zoo siab yuav tsum muaj kev sib yuav ncaj ncees ntawm txiv neej thiab poj niam, ib tug txiv thiab ib tug niam.¹⁴ Cov lus qhuab qhia pab qhia peb tias peb yuav tsum ua li cas thiaj tswj kav tau tej kev xav uas ua rau peb xav pw ua ke.

Vajtswv tau tsim ib lub cev zoo ib yam li nws lub rau Adas,¹⁵ thiab nws tau los nyob hauv lub Vaj.¹⁶ Thaum xub thawj, Adas nyob nws ib leeg xwb. Nws tau tuav lub pov thawj hwj,¹⁷ tiam sis, nyob nws ib leeg xwb, nws ua tsis tau raws li tej lub ntsiab ntawm txoj kev tsim nws.¹⁸

Muaj tsis tau lwm tus txiv neej uas yuav pab tau nws. Txawm nyob nws ib leeg los sis muaj lwm tus txiv neej Adas yuav loj hlob tsis tau. Evas los loj hlob tsis tau yog tias nws tsuas muaj lwm tus poj niam. Yeej muaj li ntawd thaum ub. Niaj hnuv no tseem muaj li ntawd thiab.

Tau tsim Evas, ua tus pab nws. Txawm muaj kev sib yuav,¹⁹ vim Adas raug txib kom muab siab npuab *nws tus poj niam* (tsis yog rau *ib tug poj niam* xwb) thiab “tsis txhob muab siab npuab lwm tus neeg.”²⁰

Ces Evas txawm tau muaj ib txoj kev xaiv.²¹ Yuav tsum qhuas nws vim nws tau xaiv ib qho zoo. Ces “Adas tau poob xwv kom thiaj yuav muaj taus tib neeg.”²²

Txwj Laug Orson F. Whitney piav tias txoj Kev Poob muaj “ob yam kev—nqi mus hauv, tiam sis tseem mus tom ntej. Qhov ntawd tau coj tib neeg

los nyob hauv ntiaj teb no thiab tib neeg thiaj tau pib taug kev mus lawm yav tom ntej."²³

Vajtswv tau foom koob hmoov rau Adas thiab Evas "thiab tau hais rau nkawd tias: Neb cia li muaj tub muaj ki coob coob."²⁴ Ces thiaj txawm muaj tsev neeg.

Vajtswv Saib Txiv Neej thiab Poj Niam Rau Nqi Ib Yam Nkaus

Tsis muaj ib txoj kev tshwm sim twg uas hais tias Vajtswv saib tau txiv neej nqi ntau tshaj poj niam li, los sis tias Nws xav tias cov tub muaj nuj nqi ntau tshaj cov ntxhais.

Txhua yam kev tsim txiaj hauv vaj lug kub—kev hlub, kev xyiv fab, kev ntseeg, kev ua zoo li Vajtswv, kev hlub tshua—yog tej yam uas txiv neej thiab poj niam tib si muaj,²⁵ thiab txoj kab ke ntawm lub pov thawj hwj uas siab tshaj plaws yog muab rau txiv neej thiab poj niam ua ib ke xwb.²⁶

Tom qab txoj Kev Poob, tej kev cai yeej tswj kav kev yug los ua neeg. Yeej muaj tej yam uas Thawj Tswj Hwm J. Reuben Clark Jr. hais tias yog tej yam "txawv" hauv lub neej no,²⁷ uas ua kom muaj tej kev txawv txav, tej yam tsis zoo, thiab xiam tes taw. Txawm hais tias peb xav tias tej no tsis ncaj los, tej no pab tsim tus Tswv cov hom phiaj kom thiaj sim tau tib neeg lub siab.

Txoj kev ua raws li tej kev xav tau uas tsim nyog, txoj kev ua raws li tej kev ntshaw ncaj ncees, txoj kev ua niam ua txiv yeej muaj nyob rau hauv Yexus Khetos txoj moo zoo tej kev qhuab qhia thiab raug pov hwm los ntawm cov lus txib uas Nws lub Koom Txoos tau lawm.

Cov Txiv Neej thiab cov Poj Niam tej Hauj Lwm

Txawm tias Adas thiab Evas nyias txawv nyias, nkawd yeej muaj tub muaj ki thiab puv lub ntiaj teb tsis tau.²⁸ Nkawd tej kev sib txawv yeej sib haum kom thiaj muaj tau txoj kev zoo siab.

Tej hauj lwm yeej zoo rau txiv neej ua thiab lwm yam zoo rau poj niam ua. Cov vaj lug kub thiab tej yam ntawm lub ntiaj teb hais tias txiv neej yog tus uas pov hwm, tus uas saib xyuas.²⁹

Tej kev lav ris ntawm lub pov thawj hwj uas hais txog txoj kev coj khiav lub Koom Txoos yeej nyob sab nraum lub tsev. Vim lub ntuj tau txib lawm, cov txiv neej yuav tsum khiav tej hauj lwm no. Twb muaj li ntawd puag thaum chiv keeb los, vim tus Tswv tau qhia hais tias "twb tau muab lub pov thawj hwj rau leej txiv tus uas mam li muab rau leej tub...Tau ua raws li tus txheej txheem no thaum Adas ua neej nyob."³⁰

Ib tug txiv neej uas tuav lub pov thawj hwj yuav tsis tsim nyog dua ib tug poj niam thaum hais txog txoj kev tsa nto. Tus poj niam, tus cwj pwm, kuj zoo li Vajtswv vim nws nrog nws tsim tib neeg thiab yog tus uas tu nws cov me nyuam. Tej kev tsim txiaj thiab tej kev txawj uas yus xav tau kom thiaj ua neeg zoo tag nrho thiab txais tau txoj kev tsa nto yog tej yam uas poj niam txawj ua thiab yuav kho kom zoo dua thaum sib yuav thiab ua ib tug niam tsev.

Tsuas muab lub pov thawj hwj rau cov txiv neej uas tsim nyog tau kom lawv thiaj ua raws li peb Leej Txiv txoj kev zoo siab. Thaum tej kev cai hauv lub ntiaj teb thiab Vajtswv txoj lus sib haum xeeb, yuav pom tej yam zoo tshaj plaws tshwm los.

Lub pov thawj hwj muaj tej kev lav ris ntau kawg. "Tsis muaj ib lub hwj chim los sis txoj cai twg uas lub pov thawj hwj tswj *kav tau* los sis tswj hwm tau, tsuas yog dhau ntawm kev yaum, kev ua siab ntev, ua siab zoo thiab muaj siab mos siab muag, thiab muaj kev hlub tiag tiag; ua siab ncaj thiab paub txhua nrho."³¹

Yog tias ib tug txiv neej "tswj kav los sis quab yuam los sis tswj hwm...es muaj ib qho tsis ncaj qhov twg,"³² nws tab tom txhaum "txoj kev cog lus thiab kev khi lus ntawm lub pov thawj hwj."³³ Ces "lub ntuj ceeb tsheej yuav txav mus deb; thiab tus Tswv tus Ntsuj Plig tu siab nrho."³⁴ Es tsuas yog nws hloov siab lees txim xwb, nws yuav xiam nws tej koob hmoov.

Txawm tias lub ntuj xilethi-aus tau tshaj tawm tias cov txiv neej thiab cov poj niam muaj ntiag tug hauj lwm zoo li cas, es yuav pom tej ntawd hauv ib tse neeg lub neej.

Tsis ntev tas los lawm kuv tau hnov ib tug neeg hais lus hauv txoj kev sib ntsib noj lub cim nco txog nws yws yws vim hais tias nws tsis to taub vim li cas nws cov xeeb ntxwv pheej hais tias yuav mus tom *Pog* lub tsev, yeej tsis hais tias mus tom *Yawg* lub tsev li. Kuv txawm teb nws lo lus nug: *Yawg* yeej tsis ua khob noom rau lawv noj nev!

Tej Kev Cai ntawm Sab Cev Nqaij Daim Tawv thiab ntawm Sab Ntsuj Plig Nyob Mus Ib Txhis

Tej kev cai ntawm sab cev nqaij daim tawv thiab ntawm sab ntsuj plig uas kav lub neej no yeej muaj ua ntej ntuj tsim teb raug.³⁵ Tej no nyob mus ib txhis, thiab tej yam uas kawj thaum yus ua raws li los sis tsis ua raws li tej kev cai no yeej kav mus ib txhis thiab. Tsis tau tsa tej kev cai no rau li lub xam khoo lub siab nyiam los sis raws li kev kav teb kav chaws. Cov no pauv tsis tau. Tsis muaj dab tsi ua yuam tau, cam tau, los sis hloov tau tej no.

Ntau xyoo tas los lawm kuv tau saib xyuas cov neeg Khab cov tsev kawm vaj lug kub. Thaum kuv tau mus nram lub zos Albuquerque, tus nais rau lub tsev kawm ntawv tau qhia kuv txog lawv chav tsev rau cov uas kawm hoob ib.

Thaum lawv tab tom kawm, ib tug me nyuam miv khiav los rau hauv lawv chav tsev. Ces txawm koj tus miv los rau sawv daws tau pom.

Ib tug me nyuam txawm nug tias, "Puas yog ib tug maum los sis txiv miv?"

Tus xib hwb tsis tau npaj teb lo lus nug ntawd ces txawm hais tias, "Tsis ua li cas os; nws tsuas yog ib tug miv xwb."

Tiam sis cov me nyuam tsis tau tso tseg li, thiab ib tug tub hais tias, "Kuv paub tias yuav ua li cas thiaj paub tias puas yog ib tug maum los sis ib tug txiv miv."

Tus xib hwb pib txhawj, ces tau hais tias, "Ua li ces, koj sim piav seb peb yuav ua li cas thiaj paub tias yog ib tug maum los sis ib tug txiv miv."

Tus tub teb tias, "Peb mam li pov ntawv saib!"

Yeej muaj tej yam uas peb pauv tsis tau. Yeej pauv tsis tau cov lus qhuab qhia.

Thawj Tswj Hwm Wilford Woodruff tau hais tias, "Twb tau qhia tawm txog tej ntsiab cai uas yuav pab noob neej sawv daws dim txim thiab txais kev tsa nto...es yus ua tsis tau rau tej ntsiab cai ntawd puas tsuaj. *Tej no yog ib co ntsiab cai uas txiv neej [los sis cov poj niam] rhuav tsis tau li.* Tej no yog ib co ntsiab cai uas tsis txawj tuag...Tib neeg tsis muaj cuab kav tswj kav los sis ua tsis tau rau tej no puas tsuaj mus....Tsis muaj ib lub hwj chim hauv tag nrho ntiaj teb no uas ua tau rau tej ntsiab cai no puas tsuaj....Tsis muaj ib qho dab tsi ntawm cov ntsiab cai no uas yuav ploj mus li."³⁶

Thaum muaj kev Tsov Rog Thoob Ntiaj Teb Zaum II, cov txiv neej tau tawm mus ntaus rog. Thaum muaj xwm txheej li no, cov poj niam thiab tej leej niam txawm tawm mus ua hauj lwm. Ces qhov phem tshaj plaws ntawm kev tsov rog ntawd yog qhov uas tej tsev neeg tau puas tsuaj mus. Tseem pom muaj li no hauv tiam neeg no.

Muaj Tub Muaj Ki Coob Coob thiab Puv lub Ntiaj Teb

Thaum lub Kaum Hli Ntuj xyoo 1942 hauv lub tuam rooj sab laj, Thawj Pawg Thawj Tswj Hwm tau tshaj xov mus rau "Tsoom Haiv Neeg Ntseeg hauv txhua lub teb chaws thiab hauv txhua thaj teb," es lawv tau hais tias, "Vim hais tias peb cov uas yog Thawj Pawg Thawj Tswj Hwm hauv lub Koom Txoos muaj cai, peb tab tom ceeb toom peb cov neeg."

Thiab lawv tau hais tias: "Puag thaum ub tus Tswv tau txib Adas thiab Evas hais tias: 'Muaj tub muaj ki coob coob thiab puv lub ntiaj teb.' Nws twb txib peb li ntawd niaj hnub nim no thiab. Nws twb qhia tawm hauv lub caij nyoog kawg no tias, txoj ntsiab cai uas qhia tias kev sib khi lus ntawm kev sib yuav yeej yuav nyob mus ib txhis...."

"Tus Tswv tau qhia peb tias txhua tus txiv thiab tus poj niam yuav tsum ua raws li lo lus txib uas nws muab rau Adas kom muaj tub muaj ki coob coob thiab puv lub ntiaj teb, xwv kom cov ntsuj plig zoo uas tseem tos txais yuav ib lub cev yuav muaj caij los nyob hauv no thiab thawb mus tom ntej hauv Vajtswv txoj hau kev kom thiaj peem los ua neeg zoo tag nrho, vim hais tias yog lawv tsis txais yuav ib lub cev lawv loj hlob tsis tau raws li Vajtswv lub siab nyiam. Yog li ntawd, txhua tus txiv thiab tus poj niam yuav tsum peem los ua ib leej txiv thiab ib leej niam hauv Ixayees rau cov me nyuam uas yug los rau hauv txoj kev khi lus dawb huv uas kav mus ib txhis.

"Thaum koj cov ntsuj plig tseem ceeb no los nyob hauv ntiaj teb no, txhua leej txiv thiab leej niam txav los nyob ze tus ntsuj plig thiab rau tus Tswv Kiag vim lawv tau ua raws li Nws lub siab nyiam, uas yog ib txoj kev lav ris dawb ceev, vim hais tias tus ntsuj plig uas nyob mus txhis thiaj muaj caij los nyob hauv no, thiab tiag tiag mas tus ntsuj plig ntawd yuav tau koob hmoov los sis yuav raug txim li cas nyob ntawm seb niam txiv tu nws li cas, qhia nws li cas, thiab cob nws li cas hauv lub neej no.

"Tsis muaj ib tug niam los sis txiv twg uas dim tau kev lav ris ntawd, thiab thaum twg txog lub caij sib sab laj, tus Tswv yuav kom peb lav tej uas peb tau ua. Tsis muaj ib txoj hauj lwm tseem ceeb tshaj qhov no."

Keu Ua Leej Niam Yog ib txoj Hauj Lwm Dawb Huv

Hais txog tej leej niam, Thawj Pawg Thawj Tswj Hwm tau hais tias: "Kev ua leej niam yog ib txoj hauj lwm dawb huv, ib yam dawb ceev uas pab khiav tus Tswv tej hauj lwm, ib txoj hauj lwm kom pab tu thiab saib xyuas, uas yog kev tu lub cev, lub paj hlwb, thiab tus ntsuj plig, kev tu cov uas tau txoj koob hmoov thib ib thiab tau los nyob hauv ntiaj teb no rau lawv txoj koob hmoov thib ob es 'sim seb lawv puas yuav ua txhua yam uas tus Tswv lawv tus Vajtswv yuav txib kom lawv ua.' (Anplaham 3:25) Leej niam txoj hauj lwm yog kom koj lawv los rau lawv txoj koob hmoov thib ob, thiab 'cov uas ceev lawv txoj koob hmoov thib ob yuav tau yeeb koob ntxiv tas mus ib txhiab thiab ib txhis li.' [Anplaham 3:26]

“Tej leej niam nkaus xwb thiaj ua tau leej niam txoj hauj lwm dawb huv no. Faib txoj no tsis tau rau lwm tus neeg. Cov nais maum ua tsis tau; cov tsev zov me nyuam ua tsis tau; ntiav tsis tau neeg los ua—tsuas yog leej niam nkaus xwb, thaum ua leej txiv, cov kwv tij, nus muam los pab, thiaj saib xyuas tau lawv.”

Thawj Pawg Thawj Tswj Hwm ntuas tias “tus leej niam uas cia lwm tus neeg zov nws cov me nyuam, xwm kom nws thiaj ua tau lwm txoj hauj lwm, txawm tias yog vim nws xav khwv nyiaj txiag, los sis mus nto moo, los sis ua hauj lwm rau lub xam khoo los, yuav tsum nco qab ntsoov tias ‘ib tug me nyuam uas nyob nws ib leeg yuav ua rau nws niam txaj muag.’ (Paj Lug 29:15) Niaj hnuv nim no tus Tswv tau hais tias yog tias niam thiab txiv tsis qhia lawv cov me nyuam txog lub Koom Txoos cov lus qhuab qhia ces tej kev txhaum yuav nyob ntawm niam thiab txiv taub hau.’ (Q&K 68:25)

“Kev ua leej niam yog ua neeg zoo li Vajtswv. Nws yog txoj hauj lwm siab tshaj, dawb huv tshaj uas tib neeg ua tau. Tus uas ua txoj hauj lwm dawb huv no yeej nyob ze cov tim tswv.”³⁷

Niaj hnuv no peb haj yam xav tau Thawj Pawg Thawj Tswj Hwm txoj xov thiab lo lus ceeb toom ntawd. Thiab tsis muaj ib co lus ntawm ib lub koom haum hauv lub Koom Txoos uas tseem ceeb npaum Thawj Pawg Thawj Tswj Hwm cov lus.³⁸

Tej tus neeg uas tsis tau txoj koob hmoov uas yog kev sib yuav thiab ua niam thiab txiv, los sis tsis muaj txim txhaum tiam sis tseem tau nyob lawv ib leeg tu me nyuam thiab tseem tau ua hauj lwm txhawb pab lawv, tseem yuav tau tej koob hmoov uas kav mus ib txhis—yog tias lawv tseem ua raws li cov lus txib.³⁹ Xws li Thawj Tswj Hwm Lorenzo Snow cog lus tias, “Qhov ntawd muaj tseeb thiab yeej yuav muaj li ntawd tiag.”⁴⁰

Zaj Piv Txwv txog Pob Khoom thiab cov Yuam Sij

Kuv yuav xaus kuv cov lus thaum kuv hais ib zag piv txwv.

Tau muaj ib tug txiv neej uas tau ob tug yuam sij ua nws qub txeeg qub teg. Lawv qhia nws tias thawj tus yuam sij yuav qhib ib chav tsev uas nws yuav tsum ua tib zoo pov hwm. Tus yuam sij thib ob yuav qhib ib pob khoom hauv chav tsev ntawm uas muaj ib lub pov hum uas muaj nuj nqi heev. Nws yuav tsum mus qhib pob khoom no thiab siv cov pov hum ntawd. Lawv ceeb toom nws tias yuav muaj neeg coob uas yuav sim nyiaj nws qub txeeg qub teg. Nws tau lus cog tseg hais tias yog nws ua tib zoo

siv lub pov hum ces, yeej yuav muaj tas mus li thiab yuav tsis txawj ploj mus li, mus tas ib txhis. Nws yuav raug kev sim siab. Yog tias nws siv lub pov hum pab luag tes ces, nws cov koob hmoov thiab kev zoo siab yuav loj hlob tuaj mus.

Tus txiv neej tau nkag mus hauv chav tsev ntawd nws ib leeg xwb. Nws tau qhib lub qhov rooj. Nws tau siv lwm tus yuam sij sim qhib lub pob khoom, tiam sis nws yeej qhib tsis tau li, rau qhov twb muaj ob lub nruas phoos ntawm lub pob khoom. Nws tus yuam sij yeej qhib tsis tau li. Txawm nws sim ua li cas los, nws qhib tsis tau li. Nws xav tsis thooob li. Nws twb tau ob tug yuam sij lawm. Nws paub tias pob khoom ntawd yog nws li ntag. Nws twb ua raws li lawv txib nws, tiam sis nws qhib tsis tau lub pob khoom.

Nyob nyob ces ib tug poj niam los rau hauv chav tsev ntawd. Nws los muaj ib tug yuam sij thiab. Tus yuam sij ntawd yeej txawv tus txiv neej tus. Nws tus yuam sij haum lwm lub nruas phoos. Nws txawm muaj siab mos siab muag vim nws paub tias nws yuav tsis tau nws qub txeeg qub teg tsuas yog nws tau tus poj niam ntawd kev pab.

Nkawd tau sib khi lus tias nkawd mam li qhib pob khoom ntawd thiab, raws li nkawd raug txib kom ua lawm nws mam li saib xyuas thiab pov hwm chav tsev ntawd; es tus poj niam mam li saib xyuas lub pov hum. Tus poj niam tsis txhawj vim tus txiv neej muaj ob tug yuam sij, vim nws saib xyuas chav tsev, rau qhov nws txoj hauj lwm yog kom pov hwm tus poj niam thaum uas tus poj niam saib xyuas yam khoom uas muaj nuj nqi rau nkawd ob leeg tib si. Ua ke no nkawd tau qhib lub pob khoom thiab tau nkawd qhov qub txeeg qub teg. Nkawd muaj kev zoo siab, vim ib yam li nkawd tau kev cog lus lawm, qhov ntawd tau loj hlob tuaj mus.

Nkawd txawm muaj kev xyiv fab thaum nkawd pom tias nkawd faib tau lub pov hum no rau lawv me tub me nyuam; txhua tus yeej tau tag nrho thiab, tsis xiam ib qho hlo li mus txog tiam neeg kawg.

Tej zaum nkawd ib co xeeb leej xeeb ntxwv yuav nrhiav tsis tau ib tug khub uas muaj ib tug yuam sij uas haum lawv li, los sis ib tug uas tsim nyog thiab kam ua raws li tej kev khi lus rau pob khoom ntawd. Txawm yog li cas los puam chawj, yog tias nkawd tau ua raws li cov lus txib, nkawd yuav tau tag nrho txhua txoj koob hmoov.

Vim tias luag tej ntxias nkawd kom siv lub pov hum ua xyem ua xyav, nkawd tau ua tib zoo qhia nkawd cov me nyuam txog cov yuam sij thiab tej kev khi lus.

Nyob nyob ces, txawm muaj lawv ib co xeeb leej xeeb ntxwv uas raug kev ntxias los sis khih los sis qias dub me ntsis vim ib tug tau ob tug yuam sij thiab lwm tus tau ib tug yuam sij xwb. Cov qias dub nug hais tias, “Ua li cas, kuv siv tsis tau lub pov hum no raws li kuv lub siab nyiam xwb?”

Ib txhia tau sim kho lawv tus yuam sij kom zoo nkaus li lwm tus neeg tus yuam sij. Tej zaum lawv xav tias ua li ntawd nws thiaj yuav haum ob lub nruas phoos tib si. Ua li thiaj tau kaw chav tsev ntawd tsis pub lawv los li. Cov yuam sij uas lawv tau kho ntawd tsis muaj qab hau lawm, ces lawv tau xiam lawv qhov qub txeeg qub teg.

Cov uas tau muaj kev ris txiaj rau lub pov hum thiab tau ua raws li tej kev cai tau muaj kev xyiv fab uas tsis paub qhov kawg tas mus li thiab tas mus ib txhis.

Kuv hais lus tim khawv tias peb Leej Txiv txoj hau kev yog rau kev zoo siab, thiab hais lus tim khawv ntawm tus uas tau Theej Txhoj rau peb, kom thiaj yuav muaj li ntawd.

Los ntawm Txwj Laug Packer ib zaj lus qhia hauv lub Kaum Hli Ntuj xyoo 1993 lub tuam rooj sab laj hauv lub Koom Txoos (saib Conference Report, Kaum Hli Ntuj 193, 27-31; los sis *Ensign*, Kaum Ib Hlis Ntuj 1993, 21-24).

LUS CIM

1. Saib phau Lus Qhuab Qhia thiab Kev Khi Lus 76:24; kuj siab Teev Npe 16:22; Henplus 12:9.
2. Saib phau Lus Qhuab Qhia thiab Kev Khi Lus 132:63; Thawj Pawg Thawj Tswj Hwm, “The Origin of Man” (Kaum Ib Hlis Ntuj 1909, hauv James R. Clark, phau, *Messages of the First Presidency of The Church of Jesus Christ of Latter-day Saints*, 6 phau ntawv (1965–75), 4:203; kuj saib Spencer W. Kimball, “The Blessing and Responsibilities of Womanhood,” *Ensign*, Peb Hlis Ntuj 1976, 71; Gordon B. Hinckley, hauv Conference Report, Kaum Hli Ntuj 1983, 115; los sis *Ensign*, Kaum Ib Hlis Ntuj 1983, 83.
3. Saib *Teachings of the Prophet Joseph Smith*, tus uas xaiv yog Joseph Fielding Smith (1976), 348–49, 357, 365.
4. Saib Anplaham 3:24–27.
5. Saib Yaloos 1:2; Amas 24:14; 42:5; Mauxes 6:62.
6. Saib Yakhauj 6:8; Amas 12:25–36; 17:16; 18:39; 22:13–14; 39:18; 42:11, 13.
7. Amas 42:8.
8. Saib Amas 42:2–5.
9. Saib 2 Nifais 9:28; Amas 12:4–5; Hilamas 2:8; 3 Nifais 1:16; Phau Lus Qhuab Qhia thiab Kev Khi Lus 10:12, 23; Mauxes 4:3.
10. Saib *Teachings of the Prophet Joseph Smith*, 181, 297.
11. Saib *Teachings of the Prophet Joseph Smith*, 181.
12. Saib 2 Nifais 2:18; 28:20.
13. Saib Amas 39:5; Malaunais 9:9.
14. Saib phau Lus Qhuab Qhia thiab Kev Khi Lus 130:2; 131:2; 1 Kaulithaus 11:11; Efexaus 5:31.
15. Saib Mauxes 6:8–9.
16. Saib Mauxes 3:8.
17. Saib Mauxes 6:67.
18. Saib Mauxes 3:18.
19. Saib Mauxes 3:23–24.
20. Phau Lus Qhuab Qhia thiab Kev Khi Lus 42:22.
21. Saib Mauxes 4:7–12.
22. 2 Nifais 2:25.
23. *Cowley and Whitney on Doctrine*, tus kws sau Forace Green (1963), 287.
24. Mauxes 2:28; thiab kuj saib Chiv Keeb 1:28; 9:1.
25. Saib Kalatias 5:22–23; Phau Lus Qhuab Qhia thiab Kev Khi Lus 4:5–6; Amas 7:23–24.
26. Saib phau Lus Qhuab Qhia thiab Kev Khi Lus 131:2.
27. Saib “Our Wives and Our Mothers in the Eternal Plan” (ib zaj lus uas tau hais hauv Koom Haum Niam Tsev lub tuam rooj sab laj, hnuv tim 3 Kaum Hli Ntuj 1946), hauv *J. Reuben Clark: Selected Papers on Religion, Education, and Youth*, tus kws kho ntawv David H. Yarn Jr. (1984), 62.
28. Saib Chiv Keeb 1:28, qhov ntawv 28c.
29. Saib phau Lus Qhuab Qhia thiab Kev Khi Lus 75:28; 1 Timautes 5:8.
30. Phau Lus Qhuab Qhia thiab Kev Khi Lus 107:40–41; kuj saib phau Lus Qhuab Qhia thiab Kev Khi Lus 84:14–16.
31. Phau Lus Qhuab Qhia thiab Kev Khi Lus 121:41–42; tau ntxiv cov ntawv qaij hauv
32. Phau Lus Qhuab Qhia thiab Kev Khi Lus 121:37.
33. Phau Lus Qhuab Qhia thiab Kev Khi Lus 84:39.
34. Phau Lus Qhuab Qhia thiab Kev Khi Lus 121:37.
35. Saib *Teachings of the Prophet Joseph Smith*, 308, 367.
36. *The Discourses of Wilford Woodruff*, tus kws sau G. Homer Durham (1946), 25–26; tau ntxiv cov ntawv qaij hauv
37. Hauv Conference Report, Kaum Hli Ntuj 1942, 7, 11–12.
38. Saib phau Lus Qhuab Qhia thiab Kev Khi Lus 107:8–9, 22, 91.
39. Saib phau Lus Qhuab Qhia thiab Kev Khi Lus 137:7–9.
40. “Discourse by President Lorenzo Snow,” *Millennial Star*, 31 Yim Hli Ntuj 1899, 547.

UA KOM NIAM TXIV SIB KOOM SIAB

2

COV TSWV YIM RAU KEV NRUAB RAU HAUV YUS LUB NEEJ

Raws li koj xav tau thiab toob kas qhia, ua raws li ib los sis ob qho tswv yim no.

- Nyeem tej nqe vaj lug kub nram no uas hais txog kev sib koom siab: 1 Kaulithaus 1:9–10; Filipis 1:27; Mauxiyas 18:21; Phau Lus Qhuab Qhia thiab Kev Khi Lus 38:27. Ntsuam xav seb cov nqe no yuav pab ib tug txiv thiab nws tus poj niam li cas.
- Nrog koj tus poj niam los sis tus txiv sib tham seb neb yuav tau siv sij hawm ua dab tsi, kuj hais

txog kev mus ua si, kev khwv nyiaj txiag, kev ua hauj lwm hauv nroog, thiab tej hauj lwm hauv lub Koom Txoos. Sim to taub seb neb tus khub muaj kev xav tau li cas, thiab sib koom tes ua hauj lwm xwv kom yus tej hauj lwm yuav tsis tab qaum yus tus khub li.

KEV NYEEM NTAWV

Kawm zaj dab neeg nram no. Yog tias koj muaj poj niam muaj txiv, nyeem thiab nrog koj tus khub sib tham txog zaj no.

XWV KOM PEB THIAJ UA TAU IB LUB SIAB

Txwj Laug Henry B. Eyring
los ntawm Pawg Kaum Ob tug Thwj Tim

“Yog Tias Nej Tsis Koom Ib lub Siab Nej Tsis Yog Kuv Li”

Tus Cawm Seej rau lub ntiaj teb, Yexus Khetos, tau hais rau cov uas yuav nyob hauv Nws lub Koom Txoos tias: “Cia li koom ib lub siab, thiab yog tias nej tsis koom ib lub siab nej tsis yog kuv li” (Q&K 38:27). Thiab thaum nws tsim txiv neej thiab poj niam, tsis tau cia siab hais tias nkawd yuav sib koom siab; twb tau txib nkawd kom ua li ntawd! “Twb yog vim li ntawd tus txiv neej thiaj tso nws niam nws txiv tseg mus nrog nws tus poj niam nyob ua txij ua nkawm, nkawd thiaj koom ua ib tug” (Chiv Keeb 2:24). Peb Leej Txiv Saum Ntuj Ceeb Tsheej xav kom peb yuav koom siab koom ntsws ua ib ke. Txoj kev sib koom muaj kev sib hlub ntawd tsis yog ib qho uas yus xav tau xwb. Yeej yog ib yam uas yus yuav tsum muaj.

Qhov uas yuav tsum sib koom siab tsis yog rau lub neej no nkaus xwb. Nws tsis paub qhov kawg li. Tau muaj thawj txoj kev sib yuav thaum Vajtswv muab Adas thiab Evas ua ib khub niam txiv hauv lub vaj thaum nkawd tseem tsis txawj ploj tsis txawj tuag. Puag thaum chiv keeb nws ua rau txiv neej thiab poj niam xav nyob ua ke ua txij ua nkawm ua ib tse neeg, sib koom ua ke hauv kev ncaj ncees.

Nws tau ua kom Nws cov me nyuam muaj lub siab xav muaj kev thaj yeeb nyab xeeb nrog txhua leej txhia tus.

Tiam sis thaum muaj txoj Kev Poob txawm pom hais tias txoj kev sib koom siab yuav tsis yooj yim li. Tau muaj kev tu siab puag thaum ntxov. Kayees tau tua nws tus kwv, Anpees. Adas thiab Evas cov me nyuam twb tau raug Ntxwg Nyoog tej kev ntxias lawm. Ntxwg Nyoog yeej siv kev txawj ntse, kev ntxub, thiab kev dag kom thiaj ncau cuag nws cov hom phiaj. Nws lub hom phiaj yog qhov fab ntxeev ntawm peb Leej Txiv Saum Ntuj Ceeb Tsheej thiab tus Cawm Seej li. Nkawd xav kom peb yuav muaj kev sib koom siab thiab kev zoo siab uas kav mus ib txhis. Ntxwg Nyoog, uas yog nkawd thiab peb tus yeeb ncuab, twb paub txog txoj kev cawm seej txij puag thaum tseem tsis tau tsim ntuj tsim teb raug. Nws paub tias tsuas yog hauv lub neej nyob mus ib txhis tej tsev neeg dawb ceev yuav nyob ua ib ke. Ntxwg Nyoog xav tshem peb tawm ntawm cov uas peb hlub thiab xav kom peb yuav tu siab nrho. Thiab nws twb yog tus uas ua rau tib neeg muaj kev sib cav sib ceg vim nws cia siab tias peb yuav raug sib faib thiab sib ncaim mus li.

Peb txhua tus yeej paub tias kev sib koom siab thiab kev sib ncaim zoo li cas. Tej thaum yog hauv peb tsev neeg thiab tej thaum yog hauv lwm yam thaum lwm tus neeg tau xav txog lwm tus neeg ntau tshaj nws tus kheej, tau muaj kev hlub thiab kev txi. Thiab peb sawv daws pab me ntsis txog kev tu siab

thiab kev kho siab uas los rau yus thaum muaj kev sib ncaim thiab nyob yus ib leeg. Peb tsis tas muaj leej twg hais qhia peb tias peb yuav tsum xaiv li cas. Peb yeej paub. Tiam sis peb yuav tsum muaj kev cia siab hais tias peb yuav muaj kev sib koom siab hauv lub neej no thiab yuav tsum nyog tau qhov ntawd hauv lub ntiaj teb uas tseem yuav los. Thiab peb yuav tsum paub tias yuav ua li cas thiaj tau txoj koob hmoov ntawd peb thiaj ua tau tej yam ntawd.

Tus Cawm Seej Pab Kom Thiaj Muaj Tau Kev Sib Koom Siab

Tus Cawm Seej rau lub ntiaj teb tau hais txog txoj kev sib koom siab ntawd thiab peb yuav tsum pauv peb tus cwj pwm li cas kom thiaj ua tau li ntawd. Nws tau qhia meej meej hauv Nws zaj lus thov Vajtswv thaum Nws nrog Nws cov Thwj Tim sib ntsib ua ke ua ntej Nws tau tuag. Zaj lus thov Vajtswv zoo zoo ntawd muab sau tseg hauv Yauhas phau ntawv. Nws tab tom yuav raug kev txom nyem theej peb sawv daws kom thiaj yuav muaj txoj sia nyob mus ib txhis. Nws tab tom yuav ncaim cov Thwj Tim uas Nws tau tsa tes rau lawm, cov uas Nws hlub, thiab cov uas Nws yuav muab cov yuam sij rau kom lawv thiaj koj tau Nws lub Koom Txoos. Ces Nws thiaj thov rau Nws Leej Txiv, tus Tub zoo tag nrho hais rau Leej Txiv uas zoo tag nrho. Peb pom hauv Nws cov lus tias yuav ua li cas ib tse neeg thiaj yuav koom siab koom ntsws, thiab tag nrho peb Leej Txiv Saum Ntuj Ceeb Tsheej cov me nyuam uas raws tus Cawm Seej thiab Nws cov tub qhe qab:

“Kuv txib lawv mus qhia neeg ntiaj teb, ib yam li koj txib kuv los hauv ntiaj teb no.

“Twb yog vim kuv xav pab lawv, thiab xav kom lawv ua tau koj haiv neeg tiag tiag kuv thiaj zoo siab muab kuv lub cev huv tib si pub rau koj.

“Tsis yog kuv thov koj pab cov neeg no xwb, tiam sis kuv thov koj pab txhua tus uas hnov txoj moo zoo uas lawv qhia thiab los ntseeg kuv;

“Kuv thov koj pab kom lawv ua tau ib lub siab; Txiv es, kuv xav kom lawv nrog wb koom ib txog sia, ib yam li koj thiab kuv wb koom ib txog sia, thov koj pab kom lawv ua tau ib lub siab: neeg ntiaj teb thiaj li yuav paub qhov tseeb hais tias koj txib kuv los” (Yauhas 17:18–21).

Hauv cov lus ntawd Nws qhia meej tias Yexus Khetos txoj moo zoo ua li cas pab tib neeg koom ua ib lub siab. Nws qhia tias cov uas yuav ntseeg qhov tseeb yuav txais tau tej kab ke thiab tej kev khi lus uas Nws cov tub qhe uas muaj cai yuav muab rau lawv. Ces, thaum ua raws tej kab ke thiab kev khi lus ntawd, lawv tus cwj pwm yuav pauv. Yog li ntawd tus Cawm Seej txoj Kev Theej Txhoj pab tau tib neeg

ua neeg dawb huv. Peb thiaj koom tau ib lub siab, thaum uas peb muaj kev thaj yeeb nyab xeeb hauv lub neej no thiab nrog Leej Txiv thiab nws tib Leeg Tub nyob ua ke tas mus ib txhis.

Cov thwj tim thiab cov yaj saub tej kev ua hauj lwm qhuab qhia hauv lub caij ntawd, thiab niaj hnuv nim no, yog kom koj Adas thiab Evas cov me nyuam los koom tib txoj kev ntseeg Yexus Khetos. Lub ntsiab rau lawv tej kev qhia, thiab rau tej uas peb qhia, yog kom tej yim neeg sib koom siab: leej txiv, leej niam, cov me nyuam, cov xeeb leej xeeb ntxwv, cov poj koob yawm txwv, thiab thaum kawg tag nrho Adas thiab Evas tsev neeg yuav xaiv los ua li no.

Tus Ntsuj Plig Coj Neeg los Sib Koom Siab

Koj nco qab tias tus Cawm Seej tau thov hais tias, “Twb yog vim kuv xav pab lawv”—nws hais txog cov Thwj Tim—“thiab xav kom lawv ua tau koj haiv neeg tiag tiag, kuv thiaj zoo siab muab kuv lub cev huv tib si pub rau koj” (Yauhas 17:19). Tus Vaj Ntsuj Plig Dawb Huv pab kom tib neeg yuav dawb huv. Pab muaj tau nws ua peb tus khub vim hais tias tus Tswv tau muab lub Pov Thawj Hwj Mekhixedes txum tim rov qab los dhau ntawm tus Yaj Saub Yauxej Xamiv. Niaj hnuv no peb muaj lub pov thawj hwj cov yuam sij hauv lub ntiaj teb. Dhau ntawm lub hwj chim ntawd peb nrog nws sib khi lus kom peb thiaj tau tus Vaj Ntsuj Plig Dawb Huv los nrog peb nyob tas mus li.

Thaum tib neeg muaj tus Ntsuj Plig ntawd, lawv thiaj yuav sib haum xeeb. Tus Ntsuj Plig ua rau peb paub tias peb zaj lus tim khawv muaj tseeb, ces cov uas muaj tib zaj lus tim khawv ntawd yuav sib koom siab. Vajtswv tus Ntsuj Plig yeej tsis ua rau neeg sib cav sib ceg, (saib 3 Nifais 11:29). Nws yeej tsis ua rau tib neeg xav tias lawv sib txawv ces ua rau lawv muaj kev tsis sib haum xeeb (saib Joseph F. Smith, Gospel Doctrine, phau 5 [1939], 131). Qhov no ua rau yus muaj kev thaj yeeb nyab xeeb thiab nrog luag tej sib koom siab. Nws pab tib neeg nyob ua ib ke. Ib tse neeg uas koom ua ib ke, ib lub Koom Txoos uas koom ua ib ke, thiab ib lub ntiaj teb uas muaj kev thaj yeeb nyab xeeb yeej xav tau tib neeg uas koom ua ib ke.

Txoj Kev Ceev tej Kev Cog Lus hauv tej Zaj Thov Vajtswv Foom Koob Hmoov Rau lub Cim Nco Txog

Ib tug me nyuam yeej to taub tau tias nws yuav tsum ua li cas thiaj tau tus Vaj Ntsuj Plig Dawb Huv los ua nws tus khub. Zaj thov rau kev noj lub cim nco txog qhia peb paub. Peb hnov zaj thov ntawd txhua lub lim tiam thaum peb koom tej kev sib ntsib noj lub cim nco txog. Thaum muaj tej lub sij hawm dawb ceev ntawd peb rov qab khi lus tseg ib

yam li thaum peb tau ua kev cai raus dej. Thiab tus Tswv rov qab qhia peb txog tej kev cog lus uas peb tau thaum uas peb raug kev pom zoo ua mej zeej hauv lub Koom Txoos—txoj kev cog lus tias peb yuav txais tau tus Vaj Ntsuj Plig Dawb Huv. Nov yog cov lus rau zaj thov rau kev noj lub cim nco txog: “Lawv kam txais yuav Leej Tub lub npe, thiab nco ntsoov nws thiab ceev nws cov lus txib uas nws tau muab rau lawv; kom lawv thiaj tau nws tus Ntsuj Plig nrog lawv nyob” (Q&K 20:77).

Peb yuav muaj Nws tus Ntsuj Plig nrog peb nyob thaum peb ceev txoj kev khi lus ntawd. Qhov xub thawj, peb cog lus tias peb yuav txais yuav Nws lub npe. Nov txhais tau tias peb xav tias peb yog Nws cov neeg. Peb yuav tso Nws ua tus thawj hauv peb lub neej. Peb yuav xav ua raws li Nws lub siab xav thiab yuav tsis xav ua raws li peb lub siab nyiam los sis tej yam uas lub ntiaj teb xav kom peb ua. Thaum peb xub xav ua tej yam ntawm lub ntiaj teb, peb yuav tsis muaj kev thaj yeeb nyab xeeb li. Txoj kev xav tias tej yam khoom ntiaj teb yuav pab ib tse neeg los sis ib lub teb chaws yeej tsis yog lawm, thiab thaum kawg yuav muab ob qho ntawd sib faib. (saib Harold B. Lee, *Stand Ye in Holy Places* [1974], 97). Thaum peb ib leeg ua tej yam uas tus Tswv xav kom peb ua rau ib leeg, uas yog tej yam uas peb yuav xav ua thaum peb ris Nws lub npe, yeej pab tau peb sab ntsuj plig loj hlob tuaj ces peb yuav muaj me ntsis ntawm lub ntuj ceeb tsheej nyob hauv ntiaj teb no.

Qhov thib ob, peb cog lus tias peb yuav nco ntsoov txog Nws tas mus li. Peb yuav tsum ua li ntawd txhua txhua zaus uas peb thov Vajtsv hauv Nws lub npe. Thiab haj yam yuav tsum ua li ntawd thaum peb thov kom Nws yuav zam txim rau peb, peb yeej yuav tau ua li ntawd ntau zaus, peb yuav nco ntsoov txog Nws. Lub sij hawm ntawd peb nco txog Nws txoj kev txi uas pab kom peb thiaj hloov siab lees txim thiab txais tau kev zam txim. Thaum peb taij thov, peb nco txog Nws vim nws yog tus uas Tuaj Peb Tog nrog Leej Txiv. Thaum peb tau kev zam txim thiab kev thaj yeeb nyab xeeb lawm, peb nco txog Nws txoj kev siab ntev thiab Nws txoj kev hlub uas tsis paub qhov kawg. Txoj kev nco ntsoov ntawd ua rau peb lub siab lub ntsws muaj kev hlub puv npo.

Peb kuj ceev peb txoj kev cog lus tias peb yuav nco txog Nws thaum peb ua ib tse neeg thov Vajtsv thiab thaum peb nyeem cov vaj lug kub. Thaum ib tse neeg zaum ua ke noj tshais, tej zaum ib tug me nyuam yuav thov Vajtsv kom foom koob hmoov rau lwm tus thaum nws mus xeeb ntawv los sis ua ib qho yeeb yam. Thaum lawv tau txoj koob hmoov ntawd, tus me nyuam uas tau koob hmoov yuav nco txog txoj kev hlub uas nws tau hnov tag

kis sawv ntxov ntawd thiab yuav nco txog tus uas Tuaj Peb Tog uas tau thov hauv nws lub npe. Tej siab tej ntsws yuav muaj kev hlub puv npo.

Peb ceev peb txoj kev khi lus tias peb yuav nco txog Nws thaum peb sau peb tsev neeg los ua ib ke nyeem cov vaj lug kub. Tej ntawd ua tim khawv txog tus Tswv Yexus Khetos, vim hais tias cov yaj saub ib txwm qhia li ntawd. Tab txawm cov me nyuam tsis nco qab cov lus los, lawv yeej yuav nco qab txog tus Kws Sau Ntawv, tus uas yog Yexus Khetos.

Ua Raws Li Tag Nrho cov Lus Txib

Qhov thib peb, peb cog lus thaum peb noj lub cim nco txog tias peb yuav ceev Nws cov lus txib, txhua txhua lo. Thawj Tswj Hwm J. Reuben Clark Jr. thaum nws taij kom tib neeg yuav muaj kev sib koom siab hauv nws zaj lus uas nws tau hais hauv lub tuam rooj saj laj—nws twb thov kom muaj li no ntau zaus—nws tau ceeb toom kom peb tsis txhob xaiv seb peb yuav ua raws li tej lus txib twg. Nws tau hais li no hais tias: “Tus Tswv tsis tau muaj ib yam dab tsi rau peb uas tsis muaj qab hau los sis tsis tseem ceeb. Cov Vaj Lug Kub muaj tej yam uas peb yuav tsum ua kom peb thiaj tau kev cawm seej.”

Thawj Tswj Hwm Clark tau hais ntxiv tias: “Thaum peb noj lub Cim Nco Txog peb khi lus tias peb yuav ua raws li thiab ceev nws cov lus txib. Tsis muaj tej yam uas peb xyeej tau. Tsis muaj tej yam uas tsis tseem ceeb, los sis tej yam txawv txav” (hauv Conference Report, Plaub Hlis Ntuj 1955, 10–11). Thawj Tswj Hwm Clark tau qhia tias ib yam li peb hloov siab lees txim rau txhua txoj kev txhaum, tsis yog rau ib qho kev txhaum xwb, peb cog lus tias peb yuav ceev txhua txoj lus txib. Txawm tias zoo nkaws li qhov ntawd nyuaj nyuaj los, yus yeej to taub tau qhov ntawd. Peb cia li tso siab plhuav rau tus Cawm Seej txoj cai thiab cog lus tias peb yuav ua raws li Nws txib peb ua (saib Mauxiyas 3:19). Txoj kev tso siab plhuav rau Yexus Khetos txoj cai no cia peb raug muab khi ua ke ua ib tse neeg, ua ib lub Koom Txoos, thiab ua Leej Txiv Saum Ntuj Ceeb Tsheej cov me nyuam.

Tus Tswv muab txoj cai ntawd rau cov tub qhe uas txo hwj chim dhau ntawm Nws tus yaj saub. Txoj kev ntseeg ntawd ua rau peb txoj hauj lwm ua ib tug qhia tom tsev los sis ib tug mus saib xyuas tom tsev yog ib txoj kev txib los ntawm tus Tswv los tiag. Peb mus ua Nws txoj hauj lwm, raws li Nws tau txib lawm. Ib tug txiv neej xws luag thiab ib tug tub hluas mus hauv tej tsev ho xav tias tej hwj chim los saum ntuj los yuav pab kom nkawd tau xyuas tej tsev neeg kom lawv koom siab koom ntsws thiab xyuas kom tsis txhob muaj kev sib cav sib ceg, kev dag, kev taug xaiv, los sis kev ua siab phem. Qhov

uas tus Tswv hu cov tub qhe los yuav pab peb muaj kev ntseeg tias peb yeej ua tau txawm tias lawv thuam peb, rau qhov lawv yeej yuav ua li ntawd. Peb haj yam yuav pom tej yam zoo ntawm lawv tsis nco qab pom tej kev tsis txawj. Peb yuav tsis tshua muaj kev tu siab thiab yuav ris tus Xib Hwb uas tau hu lawv los txiaj.

Yuav Tsum Muaj Kev Hlub Tshua yog tias Yuav Muaj Kev Sib Koom Siab

Muaj tej lus txib uas, thaum tsis ua raws li tej ntawd, kev sib koom siab yuav puas tsuaj mus. Tej thaum yog vim tej yam uas peb hais thiab tej thaum yog vim peb ua li cas thaum luag tej hais lus rau peb. Peb yuav tsum tsis txhob hais tej yam tsis zoo txog leej twg li. Peb yuav tsum nrhiav kom tau tej yam zoo hauv lwm tus neeg thiab hais tej yam zoo txog lwm tus neeg (saib David O. McKay, hauv Conference Report, Kaum Hli Ntuj 1967, 4—11).

Tib lub sij hawm ntawd, peb yuav tsum sawv tawm tsam cov neeg uas hais lus phem txog tej yam dawb ceev, vim hais tias tej ntawd yuav tub qaug tus Ntsuj Plig thiab ces yuav muaj kev sib cav sib ceg thiab kev ntxhov siab. Thawj Tswj Hwm Spencer W. Kimball tau ua ib tug yam ntxwv zoo txog txoj kev tsis ua siab phem thaum nws tseem pw hauv ib lub txaj hauv lub tsev kho mob thiab ib tug nais maum tau siv tus Tswv lub npe ua dog ua dig nws tau hais tias: “Thov! Thov! Tus ntawd yog kuv tus Tswv es koj hais nws lub npe ua dog ua dig.’ Sawv daws tau nyob ntsiag to, ces nws tau hais lus ntxhis hais tias: “Thov txim”” (*The Teachings of Spencer W. Kimball*, tus kws kho ntawv Edward L. Kimball [1982], 198). Thaum tau kev tshoov siab, es muaj kev hlob cem ib tug neeg li no ces yuav muaj kev sib koom siab. Thaum tus Vaj Ntsuj Plig Dawb Huv txhib kom yus hais es yus tsis ua ces yuav muaj kev tsis sib haum xeeb.

Yog tias peb xav muaj kev sib haum xeeb, muaj tej lus txib uas peb yuav tsum ceev. Peb yuav tsum zam txim thiab tsis txhob ntxub cov neeg uas ua rau peb tu siab. Tus Cawm Seej tau ua ib tug yam ntxwv txog qhov no thaum nws nyob saum tus ntoo khaub lig: “Txiv es, thov koj zam txim rau lawv rau qhov lawv tsis paub hais tias lawv ua dab tsi” (Lukas 23:34). Peb tsis paub tias cov neeg uas ua rau peb tu siab lub siab ho xav li cas. Thiab peb los tsis paub yog vim li cas peb muaj tej kev chim siab thiab tu siab. Tus Thwj Tim Pov Lauj tab tom qhia peb tias peb yuav ua li cas thiaj muaj kev hlob hauv ib lub ntiaj teb uas muaj cov neeg tsis zoo tag nrho, kuj suav peb tus kheej, thaum uas nws hais tias, “Tus uas muaj lub siab hlob nws ua taus siab ntev, nws pab luag; nws tsis ntxub leej twg, nws tsis muab hlob; nws tsis khav txiv, nws paub cai, siab dawb

siab zoo, tsis muaj lub siab hlob, tsis chim sai, tsis cim ntsoov luag tej kev txhaum” (1 Kaulithaus 13:4—5). Thiab ces nws tau ceeb toom kom tsis txhob chim rau lwm tus neeg tej kev txhaum thiab tsis nco qab txog peb tej kev txhaum thaum nws sau hais tias, “Nim no peb pom Vajtswv zoo li peb ntsia mus hauv ib daim iav; ces yuav pom tim ntsej tim muag; nim no tej uas kuv kawm kuv tseem paub tsis tau txhij; tiam sis lwm hnuv kuv yuav paub tej ntawd tag nrho ib yam li...Vajtswv paub kuv” (1 Kaulithaus 13:12).

Ua Neeg Huv thiab Txhob Muaj Siab Hlob

Txhua lub lim tiam zaj lus thov rau kev noj lub cim nco txog yuav pab peb nco tias peb yuav tau kev sib koom siab thaum peb ua raws li tej kev cai thiab tej kab ke ntawm Yexus Khetos txoj moo zoo. Thaum peb ceev peb tej kev khi lus li txais yuav Nws lub npe, nco txog Nws tas mus li, thiab ceev tag nrho Nws cov lus txib, thaum ntawd ces Nws tus Ntsuj Plig yuav los ua peb tus khub. Qhov ntawd yuav ua rau peb muaj siab mos siab muag thiab pab peb sib koom siab. Tiam sis muaj ob lo lus ceeb toom uas nyob nrog cov lus cog tseg ntawd.

Qhov thib ib, tus Vaj Ntsuj Plig Dawb Huv tsuas nrog peb nyob yog tias peb ua neeg huv thiab tsis ntshaw tej yam ntawm lub ntiaj teb. Yog tias yus xaiv los ua neeg tsis huv ces tus Vaj Ntsuj Plig Dawb Huv yuav khiav deb. Tus Ntsuj Plig tsuas nyob nrog cov uas xaiv tus Tswv ua ntej lub ntiaj teb. “Ua neeg huv” (3 Nifais 20:41; Q&K 38:42) thiab hlob Vajtswv kawg koj “lub plawv,...koj lub dag lub zog, lub siab lub ntsws, thiab lub paj hlwb” (Q&K 59:5) tsis yog ib co lus zoo hais xwb tiam sis yog ib co lus txib. Thiab yuav tsum ua raws li no yog tias tus Ntsuj Plig yuav ua yus tus khub, yog tias peb tsis tau ces peb koom tsis tau ib lub siab.

Lwm txoj kev ceeb toom yog kom tsis txhob muaj hlob. Thaum ib tse neeg los sis ib haiv neeg yuav tau kev sib koom siab thaum tus Ntsuj Plig ua rau lawv muaj siab mos siab muag ces lawv yuav muaj hwj chim heev. Thaum lawv tau lub hwj chim ntawd lawv thiaj yuav nto moo hauv lub ntiaj teb. Txawm tias kev nto moo ntawd yuav muaj kev qhuas los sis kev khib los, tej tus yuav pib muaj hlob. Qhov ntawd yuav tub qaug tus Ntsuj Plig. Muaj ib yam dab tsi uas thaiv tau peb ntawm kev muaj hlob, qhov uas yuav ua rau peb tsis sib koom siab kiag li. Qhov ntawd yog kom peb paub tias tej koob hmoov uas Vajtswv muab rau peb tsis yog vim Nws nyiam peb xwb tiam sis nws xav kom peb sib koom tes mus pab lwm leej lwm tus thiab. Ib tug txiv neej thiab nws tus poj niam kawm kev sib koom siab thaum nkawd sib to taub thiab pom tias tej yam uas nyias txawv nyias yeej pab tau nkawd ib leeg ua hauj lwm

pab ib leeg thiab cov neeg uas nyob ib ncig lawv. Thaum ua li no, peb thiaj yuav nrog cov neeg uas tsis kam txais yuav peb cov lus qhuab qhia sib koom siab pab foom koob hmoov rau Leej Txiv Saum Ntuj Ceeb Tsheej cov me nyuam.

Peb thiaj peem los mus ua neeg uas tsim kev thaj yeeb nyab xeeb, kom thiaj tsim nyog tau koob hmoov thiab ua Vajtswv cov me nyuam (saib Mathais 5:9).

Vajtswv peb Leej Txiv muaj sia nyob. Nws Tib Leeg Tub, Yexus Khetos, yog tus thawj coj rau lub Koom Txoos no, thiab Nws xav muab rau txhua tus neeg uas kam txais yuav kev thaj yeeb nyab xeeb.

Los ntawm Txwj Laug Eyring ib zag lus rau lub Koom Txoos hauv lub tuam rooj sab laj thaum lub Plaub Hlis Ntuj 1998 (saib Conference Report, Plaub Hlis Ntuj 1998, 85–89; los sis *Ensign*, Tsib Hlis Ntuj 1998, 66–68).

TU TXOJ KEV HLUB THIAB KEV UA PHOOJ UA YWNG NTAWM IB KHUB NIAM TXIV

3

COV TSWV YIM RAU KEV NRUAB RAU HAUV YUS LUB NEEJ

Raws li koj xav tau thiab toob kas qhia, ua raws li ib los sis ob qho tswv yim no.

- Kawm Maulaunais 7:45–48. Sau cia hauv ib daim ntauwv seb kev siab hlub zoo li cas hauv nqe no. Cog lus rau koj tus kheej tias koj mam li muaj kev siab hlub ntau tshaj yav tas los lawm. Ntsuam xav seb tej no yuav ua li cas thiaj pab tau cov txiv thiab lawv tus poj niam tu lawv txoj kev hlub thiab kev ua phooj ua ywng.
- Nrog koj tus khub, teem sij hawm tseg rau neb tau nyob ua ke neb ob leeg xwb. Tej zaum yuav tau sau tej lub sij hawm uas neb tau teem tseg rau ntauwv ib daim ntauwv suav hnub los sis hauv ib phau ntauwv.

KEV NYEEM NTAWV

Kawm zaj dab neeg nram no. Yog tias koj muaj poj niam muaj txiv, nyeem thiab nrog koj tus khub sib tham txog zaj no.

KEV UA IB LUB SIAB HAUV IB KHUB NIAM TXIV

Thawj Tswj Hwm Spencer W. Kimball
Tus Thawj Tswj Hwm Thib 12 hauv lub Koom Txoos

Tiag tiag mas txhua leej txhia tus xav tau ib txoj kev ua ib khub niam txiv uas muaj kev sib hwm, kev zoo siab, thiab tau tej yam zoo. Txoj kev ua ib khub niam txiv yog txoj kev txiav txim loj tshaj plaws thiab yeej ua li cas rau txhua yam tsav hauv peb lub neej, rau qhov nws tsis yog rau yus txoj kev zoo siab hauv lub neej no xwb, tiam sis yeej yog rau kev zoo siab rau tas mus ib txhis. Nws tsis yog rau neb ob leeg xwb, tiam sis yog rau tsev neeg thiab rau lawv cov me nyuam thiab lawv cov me nyuam cov me nyuam thiab rau ntau ntau tiam neeg.

Thaum tab tom xaiv ib tug khub rau lub neej no thiab rau tas mus ib txhis, yus yuav tsum ua tib zoo npaj thiab ntsuam xav thiab thov Vajtswv thiab yoo mov xwv kom txoj kev txiav txim no yuav yog ib qho zoo, es tsis xaiv yuam kev li. Hauv ib txoj kev sib yuav tseeb tiag yuav tsum xav zoo ib yam thiab muaj kev sib koom siab koom ntsws. Yuav tsum tsis txhob xaiv raws li yus tej kev xav ntauwv nruab siab xwb, tiam sis yuav tsum seb koj lub paj hlwb thiab lub plawv ho xav li cas thiab, thiab yuav tsum ntxiv kev yoo mov thiab kev thov Vajtswv thiab ntsuam xav seb yuav ua li cas, ua li no yus thiaj nrhiav tau kev zoo siab hauv ib txoj kev sib yuav. Yuav tsum muaj kev tua theem, kev sib faib, thiab yuav tsum tsis txhob ua qias dub.

Ntau ntau zaj dab neeg hauv TV thiab tej dab neeg qhia tias ib txoj kev sib yuav kawg li no: “Thiab nkawd txawm ua neej nyob muaj kev zoo siab tas mus li.” Peb twb kawm tau hais tias thaum yus ua txoj kab tshoob kev kos tsis yog yus txawm yuav muaj kev zoo siab thiab ib khub niam txiv zoo xwb. Yus tsis tau kev zoo siab thaum yus nias ib lub khawm, zoo nkaus li thaum yus taw teeb; kev zoo siab yog ib yam uas los ntauwv yus lub siab los. Yuav tsum siv zog thiaj tau kev zoo siab. Nws tsis yog ib yam uas yus siv nyiaj yuav tau; tsis yog ib yam uas yus lam tau lam yuav xwb.

Tej tus neeg xav tias kev zoo siab yog thaum yus tau ib lub neej nrov, muaj nyiaj txiag, thiab pheej muaj kev lom zem; tiam sis ib txoj kev ua ib khub niam txiv tiag tiag yog thaum muaj kev zoo siab uas yeej ntau tshaj tej ntauwv, kev zoo siab los thaum yus muab, ua hauj lwm pab luag, sib faib, tua theem, thiab tsis ua qias dub.

Ob tug neeg uas nyias muaj nyias zaj keeb kwm kawm tau tsis ntev tom qab ua kab tshoob kev kos tias nkawd lub neej yuav txawv qhov uas nkawd xav tau. Tsis yog ib txoj kev npau suav; peb yuav tau tawm ntauwv cov huab los thiab sawv ntsug hauv ntiaj teb no. Yuav tsum ua raws li peb tej kev lav ris thiab ua tej hauj lwm tshiab. Tej zaum yus tau tso yus tej kev ywj pheej tseg, thiab kho yus lub neej me ntsis, txhob ua neeg qias dub lawm.

Tsis ntev tom qab sib yuav lawm yus kawm tau hais tias yus tus khub muaj tej kev qaug zog uas yus

tsis tau pom dua los sis nws tsis tau qhia tawm. Tej kev tsim txiaj uas yus tau pom thaum neb tseem sib tham txawm tsawg zuj zus mus, thiab tej kev qaug zog uas zoo nkaus li me me ais thiab tsis tseem ceeb pes tsawg thaum tseem sib tham txawm loj hlob tuaj mus. Ces thaum ntawd twb txog lub sij hawm kom ib leeg zam ib leeg, yus tau kuaj xyuas yus tus kheej, thiab txawj xav, ua neeg zoo, thiab npaj siab. Tsam no yus thiaj pom tej yam uas nws ib txwm ua; tej zaum yus tus khub yog neeg qias dub los sis tsis saib nyiaj txiag rau nqi, ua tub nkeeg los sis rau siab ua hauj lwm, rau siab ntseeg los sis tsis teev ntuj li; tej zaum nws yog neeg siab zoo thiab sib hlub los sis kus kes thiab neeg heev heev, quab yuam tib neeg los sis muaj siab loj thiab dav, neeg muaj hlob los sis khav theeb. Ces pom tias muaj teeb meem nrog neej tsa, thiab pom tias yus tus khub nrog cov neej tsa sib raug zoo npaum li cas.

Feem ntau ib co neeg tsis kam los nyob tsev thiab ua raws li lawv tej kev lav ris hauv tsev. Cov uas thaum i muaj muaj tsis kam pab txuag nyiaj, thiab cov neeg hluas pheej xav “muaj txhua tsav txhua yam uas cov zej zog muaj.” Tib neeg pheej tsis kam pauv lawv txoj kev siv nyiaj. Cov poj niam hluas pheej txib lawv tus txiv kom muaj vaj tsev zoo nkauj ib yam li lawv niam lawv txiv lub tsev. Ib txhia pheej xav ua hauj lwm khwv nyiaj kom thiaj tau ib lub neej muaj ub muaj no tom qab sib yuav lawm. Lawv thiaj tawm mus sab nraum tsev, tso tej kev lav ris ntawd tseg, mus ua hauj lwm los sis ua lag ua luam, ces thiaj khwv tau nyiaj txiag ntau ces yuav tseg tsis tau thaum muaj me tub me nyuam. Thaum ob leeg ua hauj lwm, tsev neeg ntawd yuav pib sib twv tsis sib haum lawm. Ob leeg ua hauj lwm sab heev los tsev muaj lub siab luv, tseem khav txiv, xav ua neej nyob yus ib leeg xwb, thiab ces pib muaj kev tsis sib nkag siab. Tej teeb meem me me txawm huam mus ua teeb meem loj.

Txawm tias txoj kev ua ib khub niam txiv nyuaj nyuaj, thiab neeg coob muaj kev tsis sib haum xeeb los, yus tseem nrhiav tau kev zoo siab, thiab kev ua ib khub niam txiv yuav muaj kev zoo siab ntau tshaj qhov yus xav tau. Txhua khub niam txiv, txhua leej txhia tus yeej muaj tau li no. “Cov neeg uas sib phim tag nrho” yeej tsis muaj thiab yog ib qho npau suav xwb; thiab txhua tus txiv neej thiab poj niam yuav rau siab nrhiav thiab thov Vajtsv kom tau ib tug khub uas yuav haum nws siab thiab muaj kev zoo siab, cov txiv neej zoo thiab poj niam zoo tseem muaj tau kev zoo siab thiab ib txoj kev ua ib khub niam txiv zoo yog tias nkawd ob leeg kam siv zog pab.

Yeej muaj ib tug qauv rau txhua khub niam txiv uas yuav ua kom nkawd muaj kev zoo siab thiab kev sib yuav nyob mus ib txhis; tiam sis zoo li txhua tus qauv, yuav tsum tsis txhob tshem tawm, tswj hwm,

los sis txiav ib qho tawm. Txoj kev xaiv ua ntej pib sib tham thiab tseem sib tham tom qab sib yuav lawm yog ob yam uas tseem ceeb heev, tiam sis ob qho no tsis tseem ceeb dua txoj kev sib yuav, thiab qhov ntawd tsuas zoo yog tias ob leeg tib si pab— tsis yog ib leeg xwb, yog ob leeg diam.

Nyob hauv ib khub niam txiv uas muaj lub hauv paus li tau hais saum toj no, yeej tsis muaj ib lub hwj chim twg uas ua tau rau nkawd puas tsuaj tsuas tshuav ib tug los sis ob leeg tib si ua li ntawd xwb; thiab nkawd ob leeg yuav tsum lav ris qhov no. Lwm cov neeg thiab cov koom haum pab tau qhov zoo thiab ua tau qhov phem rau nkawd. Nyiaj txiag, lub xam khoo, kev kav teb kav chaws, thiab lwm yam yeej ua li cas rau nkawd thiab; tiam sis ib khub niam txiv mus tau zoo npaum li cas nyob ntawm seb ob leeg ua li cas rau nkawd txoj kev sib yuav thiab muaj tau kev zoo siab thiab mus tau zoo yog tias nkawd rau siab ntso, tsis qias dub thiab ua ncaj ncees.

Tus qauv yeej tsis nyuaj; tsuas muaj ob peb yam yuav tau ua, tiam sis muaj ntau txoj kev ua ob peb yam ntawd.

Qhov xub thawj, yuav tsum xav zoo zoo ua ntej sib yuav, uas yog xav seb yuav xaiv tus khub uas zoo tshaj plaws ntawm txhua yam uas tseem ceeb rau yus ua ntej yus yuav tus ntawd ua yus tus khub. Thiab ces ob leeg ntawd yuav tsum los rau ntawm lub thaj hauv lub tuam tsev thiab paub nkawd yuav tsum siv zog ua hauj lwm sib koom ua neej nyob.

Qhov thib ob, yuav tsum txhob ua qias dub, tsis txhob nco qab txog yus tus kheej thiab ua txhua yam tsav rau yus tsev neeg kom thiaj tau ib tse neeg zoo, thiab tsis txhob qias dub ib qho hlo li.

Qhov thib peb, yuav tsum pheej sib tham li thaum ua hluas nkauj hluas nraug thiab qhia tawm yus txoj kev hlub, ua siab zoo, thiab txawj xav txog lwm tus xwv kom thiaj muaj kev hlub uas pheej loj hlob tuaj mus xwb.

Qhov thib plaub, yuav tsum ua raws nraim li tus Tswv cov lus txib raws li muab qhia hauv Yexus Khetos txoj moo zoo.

Thaum twg muaj plaub yam no thiab pheej ua raws nraim li tej no hais ces, yeej muaj tsis tau kev tsis zoo siab, muaj tsis tau kev tsis sib haum xeeb, los sis muaj tsis tau kev puas ntsoog. Cov kws lis choj uas ua tej kev sib nrauj yuav tau nrhiav lwm txoj hauj lwm thiab yuav muab cov tsev hais plaub rau kev sib nrauj kaw cia.

Ob leeg uas yuav sib yuav ntawm lub thaj yuav tsum paub hais tias thaum sib yuav raws li kev cai lawm xwb nkawd yuav tsis txawm muaj kev zoo siab, tiam sis yuav tsum tua theem, sib faib, thiab tso nkawd tej kev ywj pheej tseg. Yuav tsum ua tib zoo saib xyuas nyiaj txiag. Yuav tsum muaj cov me

nyuam uas yuav ua rau nkawd muaj teeb meem ntawm nyiaj txiag, muaj hauj lwm ntau, thiab muaj kev txhawj kev ntshai; tiam sis tej ntawd kuj yuav ua rau nkawd muaj kev zoo siab thiab tej kev xav tob kawg.

Ua ntej sib yuav, txhua tus neeg muaj cai mus thiab los raws li nws lub siab xav, npaj thiab ua neej nyob raws li nws lub siab nyiam, thiab txiav txim siab raws li nws tus kheej nyiam. Cov neeg uas sib hlub yuav tsum paub tias yuav tsum xub xav seb qhov twg yuav yog qhov zoo rau nkawd tsev neeg ua ntej xaiv qhov uas zoo rau ib leeg xwb. Ob leeg tib si yuav tau tshem qhov uas hais tias “kuv” thiab “kuv li” thiab muab pauv ua “wb” thiab “wb li”. Ua ntej txiav txim siab ua ib yam dab tsi yus yuav tsum paub tias txoj kev txiav txim ntawd yuav ua li cas rau neb ob leeg los sis coob tshaj ntawd. Thaum tus poj niam muaj tej kev txiav txim loj heev, nws yuav tsum xav seb qhov ntawd yuav ua li cas rau niam thiab txiv, cov me nyuam, lub tsev, thiab lawv sab ntsuj plig. Thaum tus txiv neej xaiv ib txoj hauj lwm, nws txoj kev ua si, nws cov phooj cov ywg, txhua yam nws nyiam ua nws yuav tsum xaiv seb qhov twg yuav zoo rau nws tsev neeg, yuav tsum xav txog tag nrho neb pawg neeg.

Tej zaum ib txoj kev ua ib khub niam txiv yuav tsis ncaj rau ob leeg los sis tsis muaj teeb meem, tiam sis yeej muaj tau kev thaj yeeb nyab xeeb. Ib khub niam txiv muaj tau kev txom nyem, kev mob kev nkees, kev poob siab, kev ua yuam kev, thiab kev tuag hauv ib yim neeg, tiam sis tej no yuav tsis tshem lawv txoj kev thaj yeeb nyab xeeb. Txoj kev sib yuav yeej yuav zoo yog tias tsis muaj kev qias dub li. Tej teeb meem thiab kev cov nyom yuav coj niam thiab txiv los sib koom siab yog tias tsis muaj ib qho kev qias dub hlo li. Thaum muaj kev txom nyem ntau kawg thaum xyoo 1930 tsis tshua muaj kev sib nrauj li. Kev txom nyem, kev ua yuam kev, kev poob siab—tej no tau muab niam thiab txiv khi ua ib ke. Kev cov nyom yuav kho tib neeg tej kev sib raug zoo tiam sis txoj kev vam meej ces txawj ua rau kev sib raug zoo ntawd puas tsuaj mus xwb.

Khub niam txiv uas muaj kev qias dub yeej yuav plam xwb xwb li. Tus uas yuav poj niam yuav txiv vim lawv yog neeg nplua nuj los sis nto moo los sis ua nom ua tswv yeej yuav poob siab. Tus uas yuav poj niam yuav txiv vim nws muaj hlob thiab khav theeb los sis kom lwm tus neeg khib tab tom ua ib qho tsis zoo rau nws tus kheej xwb. Tiam sis tus uas yuav poj niam yuav txiv kom muab tau kev zoo siab rau lwm tus neeg yeej yuav tau kev zoo siab rov qab los, thiab saib xyuas nkawd ob leeg thiab ces nkawd tsev neeg thaum muaj tub muaj ki ces feem ntau yuav muaj kev zoo siab ntawm nkawd txoj kev sib yuav.

Kev hlub zoo li ib re paj, thiab, zoo li lub cev, nws pheej xav tau mov noj. Yus lub cev nqaij daim tawv yuav yuag heev thiab tuag mus yog tias pheej tsis noj mov. Ib re paj yuav qhuav qhawv thiab tuag mus yog tias tsis tau dej thiab av. Thiab kev hlub kuj yuav tsis nyob mus ib txhis yog tias pheej tsis ntxiv kev hlub rau, uas yog kev saib tau thiab hwm, kev qhia tawm yus kev ris txiaj, thiab pheej tsis ua neeg qias dub.

Txoj kev tsis ua qias dub yuav pab kom muaj lwm yam zoo ntawm ib khub niam txiv. Yog tias yus pheej xav txog lwm tus kom nws xis nyob, nyob kaj siab lug, thiab muaj kev zoo siab, ces txoj kev hlub uas neb tau thaum neb tseem sib tham yuav nyob ruaj khov hauv neb txoj kev sib yuav thiab tseem yuav loj hlob mus xwb. Ntau ntau khub niam txiv cia nkawd txoj kev sib yuav cia nws nyob nws thiab nkawd txoj kev hlub txias txias zoo li ib co khob cij qhuav los sis kua qab uas txias tag. Tej yam zaub mov uas kev hlub xav tau yog kev txawj xav, kev ua siab zoo, ua zoo rau lwm tus, qhia tawm yus txoj kev hlub, qhia tawm yus txoj kev ris txiaj, hwm, hawm, ua ib khub, muaj siab loj, kev ntseeg, kev sib koom siab, nyob sib txig, thiab ib leeg vam ib leeg.

Yog tias ib khub niam txiv yuav muaj kev zoo siab tiag tiag, yus yuav tsum rau siab ntso ua raws li tus Tswv cov lus txib. Tsis muaj leeg twg, tsis hais tus uas tau yuav txiv yuav poj niam los sis tus uas tsis muaj khub, uas tau muaj kev zoo siab tsuas yog nws tau ua neeg ncaj ncees. Muaj tej kev zoo siab thiab tej yam uas nyob ib ntus xwb, tiam sis kev zoo siab uas nyob ruaj khov tsuas los dhau ntawm kev ua neeg huv huv thiab tsim nyog. Tus uas ua neej nyob raws li txoj kev teev ntuj yeej yuav muaj kev zoo siab. Lub siab pheej yuav txob yus, tsuas yog tsis muaj ib lub siab lawm, ces yog tias muaj li ntawd ces txoj kev sib yuav yeej yuav plam mus. Thaum yus lub siab pheej txob yus ces ua rau yus lub neej yuav nyob tsis tau li. Txoj kev tsis teev ntuj ua rau txoj kev ua ib khub niam txiv puas tsuaj, thiab haj yam muaj li ntawd thaum ob leeg tsis teev ntuj li tus i.

Tej kev teev ntuj uas sib txawv ua rau tib neeg muaj kev tsis sib haum thiab feem ntau yuav kho tsis tau tej teeb meem ntawd.

Kev sib yuav yog ib yam uas Vajtswv tsa los. Nws tsis yog ib txoj kab lig kev cai xwb. Yog tias tsis muaj ib txoj kev sib yuav zoo, ces tib neeg yuav tsis txais kev tsa nto. Cia li nyeem koj tus Tswv cov lus, uas hais tias kev sib yuav yog ib yam zoo thiab ncaj.

Yog li ntawd, tus neeg ntawm ib Tsoom Haiv Neeg Ntseeg hauv Hnub Nyoog Kawg uas txawj xav thiab txawj ntse yuav npaj nws lub neej xwv kom yuav tsis muaj dab tsi tab kaum nws. Thaum yus yuam kev loj heev, tej zaum yus yuav muaj tej yam uas

tshem tsis tau thiab tej ntawd yuav thaiv kev tsis pub yus txais txoj sia nyob mus ib txhis thiab ua neeg zoo li Vajtswv—uas yog peb lub hom phiaj. Yog tias ob tug neeg hlub tus Tswv ntau tshaj lawv tus kheej thiab ces ib leeg hlub lwm tus neeg ntau tshaj lawv tus kheej, sib koom siab ua raws li txoj moo zoo tej kev cai, ces nkawd yuav muaj kev zoo siab heev. Thaum ib tug txiv thiab ib tug poj niam mus rau lub tuam tsev dawb huv ua ke ntau zaus, txhos caug thov Vajtswv ua ib tse neeg hauv tsev, ua ke mus rau tej kev teev ntuj, ua neej nyob kom dawb huv—hais ntawm sab paj hlwb thiab sab cev nqaij daim tawv—xwv kom nkawd tej kev xav thiab tej yam nkawd xav tau thiab nkawd ob lub siab yuav los koom ua ib tug, nkawd tus khub, thiab ob leeg tib si pab txhim tsa Vajtswv lub nceeg vaj, ces nkawd thiaj yuav muaj kev zoo siab heev.

Tej thaum tej khub niam txiv yuav muab siab npuab rau lwm yam, txawm tias tus Tswv tau hais tias: “Nej yuav tsum hlub nej tus poj niam kawg siab kawg ntsws, thiab muab siab npuab rau nws ib leeg xwb” (Q&K 42:22).

Nov kuj txhais tau hais tias “nej yuav tsum hlub nej tus txiv kawg siab kawg ntsws thiab muab siab npuab rau nws ib leeg xwb.” Feem ntau tib neeg pheej yuav muab siab npuab rau lawv niam thiab lawv txiv thiab lawv cov phooj ywg. Tej thaum ib leeg niam yuav tsis kam tso lawv cov me nyuam, thiab cov txiv tsev thiab cov poj niam rov mus xyuas lawv niam lawv txiv kom tau lawv cov lus ntuas thiab cov lus qhia thiab hais qhia tawm tej yam uas nyob hauv lawv nruab siab, tiam sis lawv yuav tsum muab siab npuab rau lawv tus poj niam, thiab yuav tsum sib hlub thiab tsis txhob qhia tawm rau lwm tus neeg li.

Ib khub niam txiv yuav zoo siab dua yog tias nkawd nrhiav nkawd vaj tsev, tsis txhob nrog niam

txiv los sis niam tais yawm txiv nyob. Txawm tias lub tsev me me thiab dog dig xwb los, lub tsev tseem yog nkawd li. Neb yuav ua lub neej ua ib khub niam txiv yuav tsum nyob neb ob leeg ncaim ntawm niam txiv thiab niam tais yawm txiv. Neb yeej hlub lawv; neb xav tau lawv cov lus ntuas; neb nyiam nrog lawv sib raug zoo; tiam sis neb yuav tsum ua neb neej nyob, neb yuav tsum coj kav neb lub neej, ua tib zoo thov Vajtswv seb yuav txiav txim siab li cas tom qab lwm tus neeg tau pab ntuas neb. Txoj kev muab siab npuab tsis yog nyob hauv tib lub tsev xwb; nws txhais tau tias nyob sib ze heev, ib leeg hlub ib leeg:

“Yog li ntawd, nws yog ib qho zoo...yog tias nkawd koom tib lub cev, thiab ua li no xwv kom ua tau raws li lub ntsiab ntawm txoj kev tsim lub ntiaj teb;

“Xwv kom muaj neeg puv lub ntiaj teb, raws li txoj kev tsim tib neeg txij puag thaum ua ntej tsim ntuj tsim teb raug” (Q&K 49:16—17).

Kuv cov kwv tij thiab nkauj muam, kuv xav hais qhia nej paub tias nov yog tus Tswv cov lus. Qhov no tseem ceeb heev, thiab tsis muaj leej twg uas xav nrog tus Tswv sib cav sib ceg. Nws tau tsim lub ntiaj teb; Nws tau tsim tib neeg. Nws paub tias lub neej no zoo li cas. Nws tau tsa tej kev cai, thiab peb los yeej tsis txawj ntse txaus los sis tsis muaj cuab kav yuav nrog nws sib cav sib ceg kom thiaj tso tau tej yam tseem ceeb no tseg. Nws paub txhua yam tsav uas ncaj thiab tseeb.

Peb thov kom nej yuav xav txog tej no. Ua kom nej txoj kev sib yuav ua ib yam zoo. Ua kom tej yam ntawm nej tus kheej yuav ncaj rau nej txoj kev sib yuav.

Los ntawm Peb Hlis Ntuj 1977 *Ensign*, phab 3–5.

KEV KHO TEJ TEEB MEEM NTAWM IB KHUB NIAM TXIV

4

COV TSWV YIM RAU KEV NRUAB RAU HAUV YUS LUB NEEJ

Raws li koj xav tau thiab toob kas qhia, ua raws li ib los sis ob qho tswv yim no.

- Nyob hauv zaj lus nram no, Txwj Laug Lynn G. Robbins piav txog “ib tug qauv rau kev puas tsuaj.” Nyeem nws cov lus hauv phab ntawv no. Ces cia li tsim ib tug qauv rau txoj kev sib koom siab hauv tsev. Xyuas seb yuav muaj “tej yam dab tsi” hauv nej tus qauv ntawd.
- Cog lus rau nej tus kheej tias nej yuav ua siab ntev thiab muaj kev hlub thaum nej muaj teeb

meem es tsis txhob npau taws. Txiav txim siab seb nej yuav ua li cas thiaj qhia nej tus kheej txog kev cog lus no ntau zaus. Piv xam hais tias, nej tso tau ib lub npib nyiaj los sis lwm yam khoom me me sab hauv nej ib sab khau los sis tso ib daim ntawv rau hauv nej hnav ris.

KEV NYEEM NTAWM

Kawm zaj dab neeg nram no. Yog tias koj muaj poj niam muaj txiv, nyeem thiab nrog koj tus khub sib tham txog zaj no.

KEV YWJ SIAB THIAB KEV NPAU TAWS

Txwj Laug Lynn G. Robbins
Ntawm Pawg Xya Caum

Dab Ntxwg Nyoog Txhib kom Muaj Kev Npau Taws hauv tej Tsev Neeg

“Kuv muaj ib tse neeg hauv ntiaj teb no. *Lawv ua zoo rau kuv.*” Txhua tus me nyuam cia siab tias yuav muaj li no, cov lus no muaj sau tseg hauv peb ib zag nkauj (“Families Can Be Together Forever,” *Hymns*, naj npawb 300; tau ntxiv cov ntawv qaij).

Peb kawm tau hauv zaj lus tshaj tawm txog tsev neeg tias “tsev neeg yog lub hauv paus ntawm tus Tsim txoj hau kev” thiab tias “tus txiv thiab tus poj niam muaj kev lav ris tias ib leeg yuav tsum hlub thiab tu ib leeg” thiab tias “muaj ib txoj ntiag tug hauj lwm yuav tau tu nkawd cov me nyuam muaj kev hlub thiab ua ncaj ncees” (“Tsev Neeg: Ib Zaj Lus Tshaj Tawm rau lub Ntiaj Teb,” *Ensign*, Kaum Ib Hlis Ntuj 1995, 102).

Dab Ntxwg Nyoog kuj tsoom ntsoov rau tsev neeg thiab. Nws tab tom tawm tsam tej tsev neeg. Nws txawj ntse heev ces nws maj mam nyas los rau hauv peb tej vaj tej tsev thiab peb lub neej.

Nws ua rau tej tsev neeg puas tsuaj thiab piam sij sab hauv lawv vaj lawv tsev. Nws lub tswv yim yog kom txhib cov neeg hauv yus tsev neeg kom ib leeg *npau taws* rau ib leeg. Dab Ntxwg Nyoog yog “leej txiv ntawm txoj kev sib cav sib ceg, thiab nws txhib

neeg tej siab kom ib leeg sib cav *npau taws* rau ib leeg” (3 Nifais 11:29; tau ntxiv cov ntawv qaij). Lo lus *txhib* zoo nkaus li ib tug qauv rau kev puas tsuaj; Ua kom tib neeg muaj kev npau taws, cia li ntxiv ob peb lo lus tsis zoo, thiab kom nws haj yam npau; pheej muab sib do txog thaum tsis sib haum; cia sawv daws nyob twj ywm; ces cia sawv daws xav txog tej ntawd ob peb hnuv mus; ces rov qab ua dua; ua li no ntau zaus.

Peb Yeej Xaiv Tau kom Thiaj Tsis Txhob Npau Taws

Nws ib lub tswv yim yog kom tib neeg xav tias kev npau taws tsis nyob ntawm kev ywj siab xaiv, nws ua rau peb ntseeg tias peb muaj ib txoj kev xav uas peb tswj hwm tsis tau. Peb hnov tias, “Kuv tau xiam kuv txoj kev tswj kuv lub siab.” Txoj kev xiam yus txoj kev tswj yus lub siab yog ib co lus uas neeg coob hais. Kev “xiam ib yam dab tsi” txhais tau tias “tsis xav ua li ntawd,” lam tau lam ua,” “tswj tsis tau,” “tsis muaj kev lav ris”—tej zaum tsis zoo ua li ntawd tiam tsis “tsis tas lav ris qhov ntawd.”

“Nws ua rau kuv npau taws.” Nov yog lwm kab lus uas peb hnov luag hais, no kuj qhia tias tswj tsis tau los sis tsis muaj kev ywj siab xaiv. Yuav tsum qhia tias nov tsis muaj tseeb. Tsis muaj leej twg uas ua rau peb chim siab. Lwm tus neeg tsis ua rau peb npau taws. Txoj kev npau taws yog ib yam uas peb xaiv ua, ib txoj kev txiav txim; yog li ntawd, peb xaiv tau kom tsis txhob npau taws. *Peb* muaj kev xaiv!

Rau cov uas hais tias, “Tiam sis kuv tswj tsis tau kuv tus kheej,” tus kws sau ntawv William Wilbanks teb tias, “Qhov ntawd tsis muaj tseeb.”

“Kev ua heev heev,...tswj hwm kev npau taws, sib tham txog qhov ntawd, qw thiab nthe,” tej no puav leej yog tej yam uas peb ua thaum peb npau taws. “Peb yuav *xaiv* qhov uas tau pab peb yav tas los lawm. Nej puas pom tias peb tsis lam tau lam npau taws thaum peb tsis txaus siab rau peb tus nais, tiam sis feem ntau peb npau taws thaum peb tsis txaus siab rau peb cov phooj ywg los sis tsev neeg?” (“The New Obscenity, *Reader’s Digest*, Kaum Ob Hlis Ntuj 1988, 24; tau ntxiv cov ntawv qaij).

Thaum Wilbanks tseem ua tub hluas mus kawm ntawv nws tau mus ua si basketball. Thawj thawj hnuv uas lawv xyaum nws tus nais tau kom lawv ib leeg sim tiv thaiv ib leeg thaum sawv daws ntsia ntsoov lawv. Thaum nws pov lub pob yuam kev, nws npau taws thiab yws yws. Tus nais los hais rau nws hais tias, “Yog koj ua li ko ib zaug ntxiv koj yuav tsis nyob hauv peb pab li lawm.” Rau peb xyoo tom qab ntawd nws tau ua tib zoo tswj nws lub siab. Ntau xyoo tom qab ntawd, nws txawm ntsuam xav txog nws lub neej, ces pom hais tias hnuv ntawd nws tus nais ntawd tau qhia nws ib txoj ntsiab cai uas tau pauv nws lub neej; yus yeej tswj kav tau kev npau taws (saib “The New Obscenity,” 24).

Tus Tswv Cov Lus Qhia

Nyob hauv Yauxej Xamiv kev txhais lus rau Efexaus 4:26. Pov Lauj nug hais tias, “Nej puas yuav npau taws, thiab tsis ua txhaum?” Tus Tswv hais lus meej meej txog qhov no hais tias:

“Tus uas muaj tus ntsuj plig ntawm txoj kev sib cav tsis yog kuv li, tiam sis yog los ntawm tus dab, tus uas yog leej txiv ntawm txoj kev sib cav sib ceg, thiab nws txhib neeg tej siab kom ib leeg sib cav npau taws rau ib leeg.

“Saib seb, qhov no tsis yog kuv tej lus qhuab qhia, txhib kom neeg tej siab npau taws, ib leeg nkaug ib leeg; tiam sis qhov no yog kuv tej lus qhuab qhia, kom tsis txhob ua tej yam zoo li ntawd lawm” (3 Nifais 11:29–30).

Cov lus qhuab qhia los sis lus txib los ntawm tus Tswv no qhia tias peb muaj kev ywj siab xaiv thiab thov kom peb yuav ua tib zoo xaiv. Tus Tswv xav kom peb yuav xaiv kom *tsis txhob* npau taws.

Los sis tsis muaj dab tsi uas ua rau peb muaj cai kom npau taws. Hauv Mathais tshooj 5, nqe 22, tus Tswv hais tias, “Tiam sis nim no kuv qhia rau nej hais tias, tus uas chim rau nws ib tug kwv tij es *tsis muaj hauv paus hauv ntsis* rau kev chim ntawd, tus ntawd yuav raug plaub” (tau ntxiv cov ntawv qaij). Ib qho uas ua rau yus xav tsis thoob yog qhov uas kab lus “tsis muaj hauv paus hauv ntsis” yeej tsis

nyob hauv Yauxej Xamiv Kev Txhais Lus (saib Mathais 5:24), los sis hauv 3 Nifais 12:22 thiab. Thaum tus Tswv tshem kab lus “tsis muaj hauv paus hauv ntsis,” Nws ua rau peb tsis muaj lus keb. “Tiam sis qhov no yog kuv tej lus qhuab qhia, kom tsis txhob ua tej yam zoo li ntawd lawm” (3 Nifais 11:30). Peb yeej “tshem tau” kev npau taws, vim Nws twb tau qhia thiab txib kom peb ua li ntawd.

Kev Npau Taws yog Ua Raws Li Dab Ntxwg Nyoog lub Siab Nyiam

Kev npau taws yog ua raws li Dab Ntxwg Nyoog lub siab nyiam vim thaum ntawd peb tsis tswj peb lub siab lawm. Nws yog ib txoj kev txhaum hauv peb lub paj hlwb vim yus thiaj muaj tej kev xav tsis zoo los sis tsis ua tej yam zoo. Nws yog qhov uas ua rau yus chim siab thaum tsav tsheb, muaj kev sib cav sib ceg thaum ncaws pob, thiab ntaus poj niam me nyuam hauv tsev.

Thaum yus tsis tswj hwm, kev npau taws ua rau yus hais ib co lus phem thiab tsim txom cov neeg uas muaj siab mos. Tus Cawm Seej tau hais tias “tej lus uas tawm hauv neeg lub qhov ncauj ua rau neeg txhaum kev cai” (Mathais 15:11).

David O. McKay hais tias, “Cia tus txiv thiab tus poj niam tsis txhob hais lus ncav los sis nrov ib leeg rau ib leeg, “Tsuas yog lub tsev tab tom kub hnyiab xwb” (*Stepping Stones to an Abundant Life*, tus kws sau ntawv Llewelyn R. McKay [1971], 294).

Kev ntaus tib neeg yog kev npau taws xwb thiab tsis muaj ib lub ntsiab rau yus ua li ntawd thiab yeej yog ib qho tsis ncaj ncees.

Kev npau taws tsuas yog ib txoj kev kom lwm tus neeg xav tias lawv tau ua txhaum los sis ib txoj kev quab yuam tib neeg kom kho ib yam dab tsi. Ib txhia hais tias nws tsuas yog kev qhuab ntuas xwb tiam sis feem ntau qhov ntawd tsis pab li. Yog li ntawd phau vaj lug kub ceeb toom hais tias: “Nej txhua tus uas yog txiv, nyias yuav tsum hlub nyias tus poj niam, tsis txhob ua lim hiam rau nws,” thiab “Nej cov uas yog txiv tsis txhob ua rau nej tej me nyuam tsiv siab, nyob tsam lawv tsis pom qab yuav ua li cas (Khaulauxais 3:19, 21).

“Kuv Yeej Yuav Tsis Npau Taws Ib Zaug Ntxiv Li”

Kev xaiv thiab kev lav ris yog ob txoj ntsiab cai uas nyob ua ke. Vim hais tias kev npau taws yog ib txoj kev xaiv, yeej muaj lus ceeb toom hauv zaj lus tshaj tawm hais tias “cov neeg...uas tsim txom lawv tus khub los yog lawv cov me nyuam...yuav muaj ib hnuv twg uas lawv yuav lav ris txog tej no rau ntawm Vajtswv lub xub ntiag.

Thaum yus to taub tias kev ywj siab xaiv thiab kev npau taws sib txuas li cas peb thiaj yuav pib tshem kev npau taws tawm ntawm peb lub neej.

Peb xaiv tau kom tsis txhob npau taws. Thiab peb xaiv tau li ntawd hnuv no ntag, tam sim no: “Kuv yeej yuav tsis npau taws ib zaug ntxiv li.” Cia li sim xav txog qhov no.

Nyob hauv tshooj 121 hauv phau Lus Qhuab Qhia thiab Kev Khi Lus muaj ib co lus uas qhia peb txog tej ntsiab cai rau kev ua thawj koj. Tej zaum cov lus hauv tshooj 121 tseem ceeb tshaj plaws rau cov niam txiv thiab lawv tus khub. Peb yuav tsum koj peb tsev neeg nrog kev yaum tib neeg, ua siab

ntev, ua siab zoo, thiab ua siab mos siab muag, thiab muaj kev hluv tshua (saib Q&K 121:41—42).

Thov kom txhua tus me nyuam tau raws li lawv zaj npau suav uas yog kom muaj ib tse neeg hauv ntiaj teb no uas ua zoo rau lawv.

Los ntawm Txwj Laug Robbins zaj lus hauv lub Koom Txoos lub tuam rooj sab laj thaum lub Plaub Hlis Ntuj 1998 (saib Conference Report, Plaub Hlis Ntuj 1998, 105–6; los sis *Ensign*, Tsib Hlis Ntuj 1998, 80–81).

KEV KHO TEJ TEEB MEEM LOS NTAWM KEV SIB TXUAS LUS ZOO

5

COV TSWV YIM RAU KEV NRUAB RAU HAUV YUS LUB NEEJ

Raws li koj xav tau thiab toob kas qhia, ua raws li ib los sis ob qho tswv yim no.

- Hauv zaj dab neeg nram no, Txwj Laug Joe J. Christensen hais tias: “Neeg tsawg tsawg xwb thiaj tau pauv lawv tus cwj pwm vim hais tias lwm tus neeg pheej tsim txom los sis yws yws txog lawv. Yog tias peb tsis xyuam xim, ib txhia yuav xav tias peb cov *lus ntuas* yog ib yam uas *xeeb txob* lawv xwb. Tej thaum, yuav zoo dua yog tias peb tsis hais qhia tawm” (saib phab ntawv

19). Hauv lub lim tiam tom ntej no, ua tib zoo xyuas koj tej kev xav thiab tej yam koj hais rau lwm tus neeg. Sim ua siab zoo thiab hais tej lus uas txhawb pab tib neeg lub siab.

- Nrhiav tej yam zoo hauv koj tus khub tus cwj pwm. Sau tej no cia hauv ntawv, thiab qhia koj tus khub paub.

KEV NYEEM NTAWV

Kawm zaj dab neeg nram no. Yog tias koj muaj poj niam muaj txiv, nyeem thiab nrog koj tus khub sib tham txog zaj no.

KEV SIB YUAV THIAB TXOJ KEV ZOO SIAB

Txwj Laug Joe J. Christensen
Los ntawm Pawg Xya Caum

Kuv thiab Barbara tau koob hmoov vim wb tau muaj rau tus me nyuam. Ob peb xyoos tas los lawm, thaum wb tau coj lawv mus xyuas lawv pog thiab yawg, kuv txiv tau hais tias, “Joe kuv xav tias koj thiab Barbara tau pib ib yam dab tsi uas neb tsum tsis tau.”

Thaum lub caij nco txog Yexus txoj Kev Sawv Rov Los peb tshaj tawm rau tag nrho lub ntiaj teb tias Yexus yog tus Khetos thiab tias dhau ntawm Nws lub pov thawj hwj dawb huv thiab lub hwj chim muab tej yam sib khi, tej kev sib yuav thiab tsev neeg tsis tas tsum tsis muaj—thiab yuav tsis paub qhov kawg li.

Hnub no kuv xav qhia nej sawv daws txog txoj kev sib yuav. Nov yog yim lub tswv yim uas, tej zaum yuav pab nej ntxiv dag ntxiv zog rau nej txoj kev sib yuav, rau tam sim no thiab yav tom ntej.

Nco Qab Ntsoov tias Kev Sib Yuav Tseem Ceeb Npaum Li Cas

1. Nco qab qhov tseem ceeb tshaj plaws ntawm neb txoj kev sib yuav. Cia li mloog Txwj Laug Bruce R. McConkie cov lus uas piav tias kev sib yuav tseem ceeb npaum li cas rau peb Leej Txiv saum Ntuj Ceeb Tsheej “txoj kev zoo siab” (Amas 42:8):

“Txij thaum yug los ua neej nyob txog thaum peb sib yuav hauv lub tuam tsev, txhua txhia yam uas

peb muaj hauv txoj moo zoo yog kom pab npaj peb thiab pab kom peb tsim nyog nkag mus hauv ib txoj kev sib yuav dawb huv uas ua kom peb ua ib tug txiv thiab ib leej niam hauv lub neej no thiab hauv lub ntiaj teb tom ntej no....

Tsis muaj ib yam dab tsi hauv lub ntiaj teb no uas tseem ceeb dua ntais txoj kev tsim thiab kho ib yim neeg kom zoo tag nrho” (Salvation Is a Family Affair,” *Improvement Era*, Rau Hli Ntuj 1970, 43–44).

Thov Vajtswv Pab Kom Koj txoj Kev Sib Yuav Mus Tau Zoo

2. Thov Vajtswv pab kom koj txoj kev sib yuav mus tau zoo. Ntau xyoo tas los lawm, thaum cov Tuam Thawj Coj tau mus xyuas tej qhov chaw tshaj tawm txoj moo zoo thiab xam phaj txhua tus tub txib, Txwj Laug Spencer W. Kimball, uas yog ib tug ntawm Pawg Kaum Ob Tug Thwj Tim, tab tom mus xyuas ib tug txwj laug uas tab tom ua tub txib yuav tiav.

“Txwj laug es, thaum koj mus tsev koj yuav ua dab tsi?”

“Au, kuv npaj siab yuav rov qab mus kawm ntawv qib siab os.” Thiab ces luag nyav thiab hais tias, “Ces xav nrhiav ib tug hlub ces mam li sib yuav.”

Txwj Laug Kimball tau ntuas nws li no hais tias: “Es, tsis txhob thov Vajtswv kom thiaj yuav tau tus ua koj hlub xwb. *Tiam sis, thov Vajtswv kom nws pab koj hlub tus uas koj yuav lawm.*”

Peb yuav tsum thov Vajtswv pab peb kom muaj lub siab zoo, txawj xav, txo hwj chim, ua siab ntev,

zam txim, thiab, *qhov tseem ceeb tshaj plaws*, txhob ua qias dub.

Yog tias peb yuav pom tau tej teeb meem los sis tej kev qaug zog hauv peb tus kheej uas tab kaum peb kom thiaj ua tsis tau ib tug txiv los sis ib tug poj niam zoo hauv ib khub niam txiv, ces peb yuav tsum thov tus Tswv kom peb thiaj tau tej yam zoo hauv Phau Ntawv Maumoos kev cog lus uas hais tias: “Thiab yog tib neeg los cuag kuv kuv yuav ua kom lawv paub txog lawv tej kev tsis muaj zog...; vim yog lawv txo lawv tej hwj chim rau, thiab muaj txoj kev ntseeg nyob hauv kuv, ces kuv yuav ua kom tej uas tsis muaj zog rais los mus muaj zog rau lawv” (Ethaws 12:27).

Ces yog li ntawd peb yuav tsum thov Vajtswv. Coob tus thawj koj ntawm lub Koom Txoos thiab cov neeg uas qhuab ntuas tej khub niam txiv tau qhia tias lawv tsis tau pom ib khub niam txiv twg uas tseem thov Vajtswv ua ke txhua hnuv uas muaj teeb meem loj ntawm nkawd. Thaum twg muaj teeb meem thiab ib khub niam txiv yuav sib nrauj, txoj kev thov Vajtswv ua ke yuav pab kho nkawd tej teeb meem.

Mloog Koj tus Khub Lus

3. Mloog. Nrhiav sij hawm kom thiaj mloog tau koj tus khub cov lus; tej zaum yuav tau teem sij hawm tseg. Neb yuav tau sib xyuas thiab ib leeg qhia ib leeg seb neb txoj kev sib yuav mus zoo li cas.

Tij Laug Brent Barlow tau nug ib co kwv tij hauv lub pov thawj hwj hais tias: “Nej leej twg yuav xav txais ib txoj kev tshwm sim?” Txhua tus tau tsa tes. Ces nws tau tias sawv daws yuav tau mus tsev thiab nug lawv tus poj niam seb lawv yuav tsum ua dab tsi thiaj ua tau ib tug txiv zoo dua. Ces nws hais ntxiv tias, “Kuv twb ua raws li kuv cov lus ntuas no, thiab tau nrog [kuv tus poj niam] Susan sib tham rau li ib xuab moos tawm hnuv ntawd!” (“To Build a Better Marriage,” *Ensign*, Cuaj Hli Ntuj 1992, 7). Ib txoj kev sib tham li ntawd yuav yog ib txoj kev tshwm sim rau peb txhua tus.

Kuv cov kwv tij nej leej twg puas tau hnov nej tus poj niam los hais nej hais tias: “Joe, koj puas hnov kuv?” Nws tsis yog tib tug neeg uas xav paub seb kuv puas tab tom mloog thiab. Tau ntev tas los lawm kuv tab tom tsaug zog thiab peb tus ntxhais xeeb ntxwv Allison los qhib kuv qhov muag thiab hais tias, “Yawg, koj puas nyob hauv ko?” Peb yuav tsum “nyob hauv” thiab teb peb tus poj niam.

Tsis Txhob Hais Lus Nkaug Nkaug Lwm tus Neeg

4. Tsis txhob “hais lus nkaug nkaug lwm tus neeg.” Tsis txhob pheej hais txog lwm tus neeg tej kev txhaum. Yus yuav tsum to taub tias peb leej twg los yeej tsis zoo tag nrho. Peb yuav tau ua ntau tsav

ntau yam kho peb tus kheej peb thiaj yuav rais los mus ua neeg zoo li Khetos ib yam li peb cov thawj koj tau hais kom peb ua.

Raws li Thawj Tswj Hwm Spencer W. Kimball kev “hais lus nkaug nkaug lwm tus neeg” yuav ua rau ib txoj kev sib yuav puas tsuaj (“Marriage and Divorce,” *1976 Devotional Speeches of the Year* [1977], 148). Feem ntau peb sawv daws yeej mob siab vim peb muaj tej kev qaug zog, thiab peb tsis tas muaj neeg hais qhia peb txog tej ntawd. Neeg tsawg tsawg xwb thiaj tau pauv lawv tus cwj pwm vim hais tias lwm tus neeg pheej tsum txom los sis yws yws txog lawv. Yog tias peb tsis xyuam xim, ib txhia yuav xav tias peb cov *lus ntuas* yog ib yam uas *xeeb txob* lawv xwb.

Tej thaum, yuav zoo dua yog tias peb tsis hais qhia tawm. Thaum nyuam qhuav sib yuav, Muam Lola Wlatters tau nyeem ib phau ntawv uas hais tias yog yus xav kom ntxiv zog rau ib khub niam txiv, nkawd yuav tsum muaj tej lub sij hawm, thaum nkawd nyob sib tham qhia seb ib leeg ua dab tsi rau ib leeg uas xeeb txob. Nws sau hais tias:

“Wb yuav tau sau tsib yam uas xeeb txob, thiab kuv tau pib....Kuv tau hais tias kuv tsis nyiam nws txoj kev noj txiv lws zoov. Nws muab tev thiab noj zoo li nws noj txiv kab ntxwv! Tsis muaj lwm tus neeg uas noj txiv lws zoov li ko. Es ib tug poj niam yuav ua li cas thiaj ua neej nyob, thiab tas mus ib txhis, saib nws tus txiv noj ib lub txiv lws zoov zoo li ib lub txiv kab ntxwv?...”

“Tom qab kuv hais tas [kuv tsib yam], ces txog nws thib yuav qhia seb nws tsis nyiam dab tsi txog kuv. [Nws] tau hais tias, ‘Kuv tus me qab zib es, tam li kuv xav mas, kuv tsis paub ib yam dab tsi uas kuv tsis nyiam txog koj.’”

“Nqus pa.

“Kuv txawm tig kuv nrob qaum rau nws, vim kuv tsis paub yuav ua li cas thiaj piav tau tias vim li cas kuv kua muag teev yees thiab poob dawb vog.”

Muam Walters xaus nws cov lus hais tias, “Thaum twg kuv hnov txog tej khub niam txiv uas tsis sib haum, kuv xav paub seb lawv puas tab tom raug qhov teeb meem uas kuv hu ua Qhov Txiv Lws Zoov” (“The Grapefruit Syndrome,” *Ensign*, Plaub Hlis Ntuj 1993, 13).

Tej thaum, yeej yuav zoo dua yog tias yus tsis txhob hais qhia tawm.

Neb Yuav Tsum Pheej Sib Tham

5. Neb yuav tsum pheej sib tham. Nrhiav sij hawm rau neb tau ua tej yam ua ke—ua neb ob leeg nkaus xwb. Txoj kev siv sij hawm nrog nej cov me nyuam ua ib tse neeg yeej tseem ceeb, tiam sis neb los yuav tau siv sij hawm ua ke neb ob leeg xwb txhua lub lim tiam. Thaum teem caij ua li no neb

thiaj qhia neb cov me nyuam tias neb xav tias neb txoj kev sib yuav tseem ceeb heev neb thiaj tau tu kom loj hlob. Yuav tsum rau siab ua, npaj siab, thiab teem sij hawm tseg.

Yus tsis tas siv nyiaj ntau. Qhov tseem ceeb tshaj plaws yog siv sij hawm ua ke xwb.

Muaj ib zaug thaum kuv yawm txiv noj su tas es tab tom sawv kev yuav rov qab mus tom teb, kuv niam tais tau hais tias, “Albert, koj cia li rov qab los tom no thiab qhia kuv tias koj hlub kuv.” Nws luag nyav thiab luag hais tias, “Elsie, thaum wb sib yuav, kuv twb qhia koj tias kuv hlub koj, thiab yog tias qhov ntawd pauv li cas, kuv mam li qhia koj paub.” Yus yeej hais tsis tau kab lus “kuv hlub koj” ntau dhau. Cia li hais txhua txhua hnuv.

Yuav Tsum Hais “Kuv Thov Txim” Sai Li Sai Tau

6. Yuav tsum hais, “kuv thov txim” sai li sai tau. Txawm hais tias yuav nyuaj nyuaj hais los, yus yuav tsum hais, “Kuv ua txhaum lawm, thiab thov koj zam txim pub rau kuv,” sai li sai tau tab txawm koj tsis yog tus uas tau ua txhaum tag nrho. Txoj kev hlub tiag tiag tsuas loj hlob tuaj mus yog tias tib neeg kam lees txim thiab tej kev txhaum.

Thaum twg muaj tej kev tsis sib haum, qhov uas yus muaj cuab kav sib tham thiab kho tej ntawd yog ib yam tseem ceeb heev, tiam sis yeej muaj tej lub sij hawm thaum zoo dua yog yus ntsiag tos xwb. Qhov uas yus tsis txhob hais ib yam dab tsi thiab suav mus txog kaum los sis ib pua yog ib yam tseem ceeb. Thiab tej thaum, cia lub hnuv poob thaum koj tseem npau taws thiab tos txog tag kis sawv ntxov thaum uas koj twb so, nyob tiaj tu, thiab yuav muaj cuab kav kho qhov teeb meem ntawd.

Qee zaum peb hnov luag hais tias, “Tab sis mas, wb twb sib yuav tau tsib caug xyoo lawm, thiab wb tsis tau muaj kev tsis sib haum dua li.” Yog tias twb muaj li ntawd lawm tiag, ces ib tug neeg ntawd tau quab yuam tus i los sis, zoo li luag tej tau hais, nws yeej tsis paub qhov tseeb. Ib khub niam txiv twg uas txawj ntse yeej yuav muaj tej kev xav uas sib txawv. Peb qhov teeb meem yog kom paub seb peb yuav ua li cas thiaj kho tau tej ntawd. Qhov ntawd yog qhov uas kom ib txoj kev sib yuav zoo yuav loj hlob tuaj mus.

Tsuas Siv Nyiaj uas Yus Muaj Xwb

7. Kawm kom tsuas siv nyiaj uas yus muaj xwb. Tej qhov teeb meem loj tshaj plaws ntawm ib khub niam txiv yog ntawm nyiaj txiag. “Amelikas lub Koom Haum Rau cov Kws Lis Choj...tau hais tias ntawm tej kev sib nrauj 89 feem pua yog vim muaj kev sib cav thiab kev liam txog nyiaj txiag” (Marvin J. Ashton, “One for the Money,” *Ensign*, Xya Hli Ntuj 1975, 72). Yuav tsum kam laug sij hawm los sis

tsis txhob yuav tej yam khoom xwv kom siv nyiaj raws li yus muaj xwb. Yuav tsum xub them koj ib feem kaum, thiab tsis txhob qiv nyiaj thaum twg koj tsis tas qiv. Nco qab ntsoov tias txoj kev tsis siv tsib caug daus las tauj ib hlis uas yus tsis muaj yuav ua kom yus muaj kev zoo siab thiab txoj kev siv tsib caug daus las uas yus tsis muaj yuav ua kom yus muaj kev txom nyem. Tej zaum koj yuav tau muab rab txiab thiab koj cov npav qiv nyiaj (credit card) thiab ua li Txwj Laug Jeffery R. Holland tau hais tias “muab txiav tawm” (“Things We Have Learned—Together,” *Ensign*, Rau Hli Ntuj 1986, 30).

Sib Faib lub Tsev thiab Tsev Neeg tej Ntiag Tug Hauj Lwm

8. Yuav tsum sib koom tes ua tej ntiag tug hauj lwm tom tsev thiab hauv yus tsev neeg. Tsis txhob ua ib tug txiv tsev uas zaum twj ywm tos luag tej tu nws, es xav tias nws txoj hauj lwm yog kom mus khwv nyiaj thiab nws tus poj niam tib leeg xwb yuav tau tu vaj tu tsev thiab zov cov me nyuam. Txoj kev tu vaj tu tsev thiab tsev neeg tsis yog ib tug neeg txoj ntiag tug hauj lwm xwb.

Nco qab ntsoov tias neb ua ib khub niam txiv. Barbara thiab kuv twb kawm paub tias wb tsuas siv ib na this txhua tag kis sawv ntxov kho txaj ces txoj hauj lwm ntawd twb tiav tas lawm. Nws qhia kuv tias nws cia kuv pab ua li ntawd kom kuv thiaj xav tias kuv yog ib tug neeg zoo, thiab kuv xav tias qhov ntawd muaj tseeb.

Yuav tsum nrhiav sij hawm kawm vaj lug kub ua ke, thiab ua raws li Thawj Tswj Hwm Kimball cov lus ntuas: “Thaum ib tug txiv thiab ib tug poj niam mus rau hauv lub tuam tsev ntau zaus ua ke, txhos caug thov Vajtswv ua ke hauv tsev ua ib tse neeg, sib tuav tes mus koom tej kev sib ntsib teev ntuj, ua kom nkawd lub neej dawb huv, hais txog sab paj hlwb thiab sab cev nqaij daim tawv tib si,...thiab ob leeg ua hauj lwm txhim tsa Vajtswv lub nceeg vaj, ces nkawd yuav muaj kev zoo siab” (*Marriage and Divorce* [1976], 24).

Ces yog muaj tshab xyuas ces muaj li no:

- Nco qab ntsoov neb txoj kev sib yuav yog ib qho tseem ceeb tshaj plaws.
- Thov Vajtswv pab kom koj txoj kev sib yuav mus tau zoo.
- Mloog.
- Tsis txhob “hais lus nkaug nkaug lwm tus neeg.”
- Nej yuav tsum pheej sib tham.
- Yuav tsum hais, “kuv thov txim” sai li sai tau.
- Kawm kom tsuas siv nyiaj uas yus muaj xwb.
- Yuav tsum sib koom tes ua tej ntiag tug hauj lwm tom tsev thiab hauv yus tsev neeg.

Kuv hais lus tim khawv tias Yexus yog tus Khetos, tias hnuv thib peb ntawd yeej tsis tau muaj leej twg nyob hauv lub ntxa, thiab tias “sawv daws muaj kev ploj kev tuag rau qhov sawv daws yog Adas roj ntshav, ib yam nkaus li ntawd sawv daws yuav tau sawv hauv qhov tuag rov qab los rau qhov sawv daws nrog Yexus Khetos koom ib txog sia” (1 Kaulithaus 15:22). Yog li ntawd peb muaj kev ris txiaj vim muaj lub hwj chim muab sib khi ua ke hauv Yexus Khetos txoj moo zoo uas muab txum

tim rov qab los lawm, peb thiaj nrog tus kws sau paj huam hais tau tias, “Kuv yuav haj yam hluv koj tom qab tso lub neej no tseg” (Elizabeth Barrett Browning, *Sonnets from the Portuguese*, naj npawb 43, kab lus 14).

Los ntawm Txwj Laug Christensen ib zag lus hauv lub Koom Txoos tuam rooj sab laj thaum lub Plaub Hlis Ntuj 1995 (saib Conference Report, Plaub Hlis Ntuj 1995, 84–87; los sis *Ensign*, Tsib Hlis Ntuj 1995, 64–66).

NTXIV DAG NTXIV ZOG RAU IB KHUB NIAM TXIV LOS NTAWM KEV NTSEEG THIAB KEV THOV VAJTSWV

6

COV TSWV YIM RAU KEV NRUAB RAU HAUV YUS LUB NEEJ

Raws li koj xav tau thiab toob kas qhia, ua raws li ib los sis ob qho tswv yim no.

- Xaiv ib yam uas koj ua tau uas yuav ntxiv dag ntxiv zog rau koj txoj kev ntseeg Leej Txiv Saum Ntuj Ceeb Tsheej thiab Yexus Khetos.
- Teem ib lub sij hawm tseg txhua hnub rau koj tau thov Vajtswv nrog koj tus khub.

KEV NYEEM NTAWM

Kawm zaj dab neeg nram no. Yog tias koj muaj poj niam muaj txiv, nyeem thiab nrog koj tus khub sib tham txog zaj no.

NRHIAV KEV XYIV FAB HAUV LUB NEEJ NO

Txwj Laug Richard G. Scott
Los ntawm Pawg Kaum Ob tug Thwj Tim

KEV SIB TXAWV HAUV KEV TSI TXAWJ HLOOV

Tsis ntev tas los lawm kuv tau sawv tom ntug dej hiav txwv Pacific hauv ib koog pov txwv ntsia lub hnub tawm tuaj. Kuv xav tsis thoob vim cov nplaim dej pheej los thoob daim av. Nws ua rau kuv nco qab tias tus Tswv txoj hau kev pheej nyob ruaj khov, uas muaj ib txoj kev cai uas kav mus ib txhis, tsis txawj pauv, thiab yus paub tias yuav muaj kev txim lij thiab kev hlub tshua thaum yus mloog lus. Kuv pom tej nplaim dej nyias txawv nyias thaum nws los tshoob daim av. Ib txhia tau los tshoob cov pob zeb, es cov dej phwj los. Es lwm cov nplaim dej nyias ua nyias ib tug qauv hauv cov xuav zeb. Cov nplaim dej tau ua rau cov xuav zeb ntub tas, ces tau ua ib co npuas thaum saus mus nram hiav txwv.

Kuv tau xav txog txhua yam tsav uas tus Tswv muab pub rau peb. Peb muaj kev ywj siab ntau heev, muaj ntau lub cib fim kom peb thiaj kho tau peb tus cwj pwm thiab tej kev txawj kom zoo dua, peb lub cim xeeb, peb tej hauj lwm. Vim hais tias pom tsis tau dej hiav txwv ntxiv li lawm, kuv tau sim xav seb ib tsam lub hnub yuav ci ntsa iab zoo nkauj npaum li cas. Thaum kuv ntsia li no kuv nyob tswm xeeb, ces txawm pom ib qho kaj ntawm cov huab; lub hnub tau tawm plaws ntawm cov huab, ua rau txhua yam tsav ci ntsa iab, pom txhua yam xim, txhua yam txawm muaj sia zees nyob. Zoo nkaus li tus Tswv tau xav faib ib txoj koob hmoov ntxiv, ib lub cim txog qhov kaj ntawm Nws tej kev qhia uas

ci mus rau txhua qhov chaw thiab pab sawv daws muaj chaw cia siab. Kuv txawm los kua muag vim kuv muaj kev ris txiaj rau lub ntiaj teb uas peb nyob hauv, vim muaj txhua yam zoo nkauj uas Leej Txiv Saum Ntuj Ceeb Tsheej muab pub rau peb cov uas kam qhib qhov muag ntsia. Tiag tiag mas, lub neej no yeej zoo nkauj heev.

MUAJ KEV RIS TXIAJ RAU TEJ YAM ZOO NKAUJ HAUV LUB NEEJ NO

Txhua txhua hnub koj puas siv sij hawm nrhiav seb koj lub neej zoo npaum li cas? Lub sij hawm tas los lawm uas koj tau ntsia lub hnub poob yog thaum twg—es pom tej qhov kaj tshwm plaws ntawm cov huab, cov ntoo, tej toj roob hauv pes, thiab tej tiaj nrag, tej thaum cia li poob ntsiag tos, ho tej thaum pom tej qhov kaj ci laim lug ua ntau yam xim?

Es hmo uas tsis muaj huab li thaum uas tus Tswv qhib tej yam zoo nkauj hauv Nws lub ntuj ceeb tsheej rau peb pom—pom cov hnub qub, thiab lub hli ci ntsa iab—xwv kom peb yuav pom tau Nws lub hwj chim thiab yeeb koob?

Ib qho zoo heev yog thaum yus cog ib lub noob hauv av thiab pom lub noob loj hlob, muaj zog, thiab nthaw kaus me me. Ces yus ua siab ntev pom nws loj hlob thiab muaj nws ib tug cwj pwm, ces loj hlob raws li tus Tswv tau teem tseg. Yog tias ua tib zoo tu ces nws yuav loj hlob ua yam uas nws yuav tsum ua: ib lub paj dauj npuas, uas zoo nkauj thiab ntxim nyiam; ib tsob pum hub; ib lub txiv duaj; ib lub txiv qab rog; los sis ib re paj nyias txawv nyias yam, zoo nkauj, thiab tsw qab ntxiag.

Lub sij hawm tas los lawm uas koj pom ib lub co dauj kub lag pib tawg yog thaum twg? Txhua hnuv nws loj hlob thiab muaj ib yam tshiab, nws zoo nkauj tuaj thiab tawg ua ib re paj dauj kub lag.

Koj yog ib yam zoo kawg nkaus uas Vajtswv tau tsim. Nws xav kom koj lub neej yuav zoo kawg tab txawm koj raug xwm zoo li cas. Thaum uas koj ris nws txiaj thiab mloog lus, koj yuav rais los mus ua tus neeg uas Vajtswv xav kom koj ua.

Txoj Kev Xyiv Fab nyob ntawm Yus txoj Kev Cia Siab rau Vajtswv

Kev tu siab, poob siab, thiab tej kev cov nyom yog tej *xwm* uas yus raug hauv lub neej no, tsis yog lub neej no kiag. Tsis yog kuv hais tias tej *xwm* no tsis nyuaj. Tej no kav tau ntev heev, tiam sis yuav tsum tsis txhob cia tej *xwm* no nyob hauv plawv txhua yam koj ua. Tus Tswv tau tshoov Lihais lub siab kom nws thiaj hais tias “Muaj tib neeg, xwv kom lawv yuav muaj kev xyiv fab.”¹ Txoj kab lus ntawd yog ib kab lus uas tsuas muaj yog tias yus ua ib yam: “*xwv kom lawv yuav muaj kev xyiv fab.*” Nws tsis yog li ntawd rau tus Tswv. Nws xav kom peb txhua tus yuav nrhiav kom tau kev xyiv fab. Nws yuav tsis yog li ntawd rau koj thaum uas koj ua raws li cov lus txib, muaj kev ntseeg txog tus Xib Hwb, thiab txhua yam tsav kom koj thiaj yuav muaj kev xyiv fab hauv lub ntiaj teb no.

Koj txoj kev xyiv fab hauv lub neej no nyob ntawm seb koj tso siab npaum li cas rau Leej Txiv Saum Ntuj Ceeb Tsheej thiab Nws Leej Tub Dawb Huv, koj txoj kev rau siab ua raws li nkawd txoj hauv kev zoo siab yuav koj kev xyiv fab los rau koj. Thaum xav txog nkawd cov lus qhuab qhia yus yuav muaj kev xyiv fab ntawm lub ntiaj teb thiab yuav nrog lwm tus neeg sib raug zoo. Nws yuav pab koj tau kev nplij siab, thiab ib lub dag lub zog ntawm kev thov Vajtswv rau Leej Txiv saum Ntuj Ceeb Tsheej thiab tau Nws cov lus teb.

Kev Tsom Ntsoov thiab Ua Siab Ntev

Yog tias yuav tuav ib lub pob zeb me me rau ntawm yus lub qhov muag ces lub pob zeb ntawd yuav zoo nkaus li ib yam loj heev. Cia li cuam rau hauv av, thiab yus txawm tsom tau tias nws luaj li cas tiag. Ib yam li ntawd, cov teeb meem los sis kev cov nyom hauv peb lub neej yuav tsum muab tsum raws li cov lus qhuab qhia hauv cov vaj lug kub hais. Tsis li ntawd ces tej ntawd yuav ua rau peb pom kev tsis khav, ua rau peb qaug zog, thiab ua kom peb tsis muaj kev xyiv fab thiab tej kev zoo nkauj uas tus Tswv xav kom peb txais yuav hauv lub ntiaj teb no. Qee leej yeej zoo li ib co pob zeb uas yus cuam rau hauv hiav txwv uas muaj teeb meem ntau. Lawv cia li tog mus hauv tej teeb meem ntawd. Thov kom ua ib yav ntoo uas txawj ntab.

Thaum twg ntsib ib yam teeb meem, cia li tawm tsam qhov ntawd thiab ntab mus rau saum tej ntawd thiab muaj kev zoo siab dua.

Nej nyob hauv ntiaj teb no vim muaj ib lub ntsiab uas los saum ntuj los. Lub ntsiab ntawd tsis yog kom muaj kev lom zem los sis muaj kev zoo siab tas mus li. Nej nyob ntawm no koj thiaj raug kev sim siab, kom qhia tseeb seb nej puas tsim nyog tau Vajtswv cov koob hmoov ntxiv uas nws xav muab rau nej.² Yuav tsum muaj lub siab ntev.³ Yus yuav txais ib txhia koob hmoov hauv lub neej no; es lwm cov tsuas los tom qab dhau daim ntaub thaiv.

Tus Tswv xav kom nej yuav loj hlob thiab tawg paj txi txiv. Yuav haj yam loj hlob zoo thaum nej cia Nws koj nej kev hauv txhua yam uas nej raug, txawm hais tias nej xav los sis tsis xav kom nws pab. Thaum nej tso siab rau tus Tswv, thaum nej qhib nej siab nej ntsws es tsom ntsoov seb Nws lub siab xav li cas, thaum nej thov tus Ntsuj Plig koj nej kev ua raws li Nws lub siab nyiam, nej yeej yuav txais kev zoo siab hauv lub neej no thiab yuav kawm ntau yam hauv lub ntiaj teb no. Yog tias nej xav paub seb yog vim li cas yuav tau ua txhua yam, los sis pheej tawm tsam thaum twg muaj tej kev cov nyom, nej thiaj ua kom haj yam nyuaj nyuaj rau tus Tswv foom koob hmoov rau nej.⁴

Nej txoj kev ywj siab, uas yog txoj cai uas cia nej xaiv, tsis yog rau nej tau xaiv tej yam uas nej lub siab nyiam xwb. Txoj koob hmoov no yog kom pab nej xaiv tej yam uas nej Leej Txiv saum Ntuj Ceeb Tsheej xav kom nej ua. Ua li no Nws thiaj pab koj nej kev mus ua tus neeg uas Nws xav kom nej ua.⁵ Txoj kev ntawd yuav koj nej mus rau kev xyiv fab thiab kev zoo siab.

Ua Neej Nyob Muaj Kev Xyiv Fab Thaum Muaj Teeb Meem

Kawm tej yam los ntawm cov neeg uas tau nrhiav kev thaj yeeb nyab xeeb thaum lawv muaj tej kev cov nyom thiab tau muaj kev xyiv fab thaum lawv muaj teeb meem. Ib tug poj niam uas muaj ib yam kab mob es yuav tso lub neej no tseg tau nrhiav kev xyiv fab hauv nws lub neej. Nws tau to taub txoj hauv kev zoo siab, nws tau txais tej kab ke hauv lub tuam tsev, thiab sim ua neej nyob kom thiaj tsim nyog txais yuav tej koob hmoov. Nws sau ntawv hauv nws phau ceev xwm txheej tias:

“Hnuv no yog ib hnuv zoo nkauj thaum lub caij nplooj ntoo zeeg. Kuv tau mus nqa cov ntawv los thiab tau zaum hauv lub viav vias. Kuv muaj kev zoo siab heev thaum kuv ziab tshav ntawd, hnia tej paj thiab nplooj ntoo tsw qab ntxiag. Kuv tau zaum thiab tau muaj kev zoo siab vim kuv tseem ua neej nyob hauv lub ntiaj teb zoo nkauj no....Tus Tswv ua zoo kawg nkaus rau kuv. Kuv ua nws tsaug vim kuv tseem muaj sia nyob thiab xis nyob heev. Kuv zoo

siab kawg kiag ces ua rau kuv xav quaj qw thiab dhia paj paws hauv kuv lub tsev thaum lub hnuv ci ntsa iab tuaj rau ntawm tej qhov rais. Kuv nyiam ua neej nyob.”

Ib leej niam uas muaj ib yam kab mob tseem siv ntau pua xuab moos xaws ib daim paj ntaub loj heev. Nws yog ib qho khoom plig nws xav muab rau ib khub niam txiv uas tab tom muaj kev cov nyom. Rau khub niam txiv ntawd daim paj ntaub ntawd muaj nuj nqi heev, nws pab nkawd nco tias lawv yuav tau tej yam zoo yog tias lawv ua siab loj tiv mus kom dhau tej teeb meem, daim paj ntaub ua ib lub cim rau nkawd nco txog kev cia siab vim muaj kev hlub thiab kev tua theem.

Nrhiav Kev Xyiv Fab hauv Tej Yam uas Koj Yeej Muaj Lawm

Cov me tub me nyuam pab qhia peb seb peb nrhiav tau kev xyiv fab txawm peb tab tom raug teeb meem loj. Cov me nyuam tsis txawj nyuaj siab txog tej yam uas lawv tsis tau muaj. Lawv nrhiav kev xyiv fab hauv tej yam uas lawv muaj. Kuv nco txog ib tug tub uas tab tom ua si tom ntug dej. Nws muaj ib txoj hlua khi rau ntawm ob poom dej pev xij. Nws muab ib poom cuam saum ib ceg ntoo, ces nchuav dej rau hauv. Ces nws mam li rub poom uas tsis muaj dej, ces mam li tso. Lub uas hnyav mam li poob los es lwm sab mam li nce mus saud. Nws txawm luag nthe thiab dhia paj paws.

Tej yam me me, uas ntxiv tau dag zog rau peb yeej nyob ib ncig peb. Tej no yuav pab peb dim pa thiab txhawb nqa peb tus ntsuj plig. Tsis txhob tsoom ntsoov rau tej yam yus tsis muaj los sis tej yam uas twb xiam lawm. Tus Tswv tau cog lus tias cov uas mloog nws lus yuav tau txhua yam tsav uas Nws muaj. Tej zaum hauv lub neej no nej yuav tsis muaj txhij txhua, tiam sis hauv lub neej tom ntej, yog tias nej rau siab ua neeg zoo, nej yuav tau txhua nrho ua nej txoj koob hmoov.

Nrhiav lwm txoj koob hmoov hauv nej lub neej, thaum uas tus Tswv xav tias tsis tsim nyog rau nej tau yam ntawd, txawm nej xav xav tau yam ntawd. Rau cov neeg dig muag los sis laj ntseg, Nws pab kom lawv txawj hnov lwm yam. Rau cov neeg mob, Nws pab kom lawv ua siab ntev, nkag siab, thiab haj yam ris lwm tus neeg txiaj vim lawv ua siab zoo. Thaum xiam ib tug neeg uas yus hlub, Nws pab kom yus haj yam muaj kev hlub, nco txog tej yam qub, thiab pab yus cia siab rau yav tom ntej. Nej yuav nrhiav tau lwm cov koob hmoov thaum uas nej kam ua raws li tus Tswv lub siab nyiam thiab rau siab ntseeg Nws.⁶

Rau Amas cov neeg uas txom nyem, tus Tswv tau hais tias:

“Kuv kuj yuav ua rau tej nra uas nyob saum nej tej xub pwg kom yooj yim...xwv kom nej yuav tsis

hnov tias lawv nyob saum nej nraub qaum...; thiab kuv yuav ua li no xwv kom nej yuav sawv ua tim khawv rau kuv txij li no mus, thiab xwv kom nej yuav paub tseeb tias kuv, tus Tswv uas yog Vajtswv, yeej los saib xyuas kuv cov neeg thaum lawv muaj kev txom nyem.

“Thiab...tej nra hnyav...raug ua kom sib; muaj tseeb tiag, tus Tswv tau txhawb lawv lub dag lub zog ces lawv ris tau tej nra hnyav sib sib, thiab lawv tau kam ua zoo siab hlo thiab ua siab ntev nyiaj rau tag nrho tej uas tus Tswv lub siab nyiam.”⁷

Kev Muaj Tswv Yim Yuav Pab Nej Muaj Kev Xyiv Fab Hauv lub Neej No

Txoj kev sim muaj tswv yim yuav coj kev xyiv fab los. Tom qab tus Muam Camilla Kimball, Amelia McConkie, thiab Helen Richard cov khub tso lub neej no tseg lawv tau kawm thas xim. Tsis yog lawv ua cov duab no xwb, tiam sis tsam no txhua yam yuav txawv heev thaum lawv ntsia pom lub hnuv poob, pom ib lub ntsej muag, los sis ib tsob ntoo. Nim no lawv pom tej yam xim uas ib nyuag txawv thiab zoo siab rau tej yam ib ncig lawv.

Xaiv ib yam zoo li cov nkauj, kev ua los voos, puab mlom, los sis sau paj huam. Thaum muaj tej tswv yam zoo li no nej yuav muaj kev zoo siab. Tej ntawd pab yus muaj kev ris txiaj. Nws pab kom yus txawj ua ub no, pab kom nej yuav txawj xav, ua tej yam, thiab nrhiav ib lub hom phiaj rau lub neej no. Nws pab kom kev kho siab thiab nyuaj siab ploj mus. Nws pab kom yus yug dua tshiab, nyiam ua neej nyob, thiab muaj dag muaj zog.

Kev Pab Tib Neeg: Lub Hauv Paus rau Kev Zoo Siab

Txoj kev ua siab zoo pab tib neeg yog lub hauv paus uas ua rau yus muaj kev zoo siab uas kav mus ib txhis. Thawj Tswj Hwm Spencer W. Kimball tau hais tias: “Vajtswv paub peb, thiab nws saib xyuas peb. Tiam sis feem ntau twb yog nws kom lwm tus tib neeg tuaj pab peb. Yog li ntawd, peb ib leeg yuav tsum pab ib leeg.”⁸

Kuv paub txog ib tug poj niam uas muaj kev zoo siab heev. Txhua tag kis sawv ntxov nws tau thov nws Leej Txiv saum Ntuj Ceeb Tsheej kom coj nws kev mus ntsib ib tug uas nws pab tau. Nws tau lus teb rau zaj lus thov ntawd ntau zaus. Tib neeg coob uas muaj tej nra hnyav txawm ev tej yam uas sib lawm thiab lawv tau muaj kev zoo siab. Nws pheej tau koob hmoov vim nws ua tus Tswv ib tug cuab yeej cuab tam.

Yeej Muab Tau tej Kev Nyuaj Pauv los ua Kev Loj Hlob Zoo

Kuv paub tias txhua yam kev nyuaj siab uas peb raug hauv lub neej no, txawm yog tej uas los rau peb vim peb tsis ua tej yam zoo los sis ua txhaum,

tus Tswv muab tau tej ntawd pauv los ua tej yam uas pab peb loj hlob, zoo li peb nce ib tug ntaiv.⁹ Kuv tsis yog hais kom nej ua txhaum kom nej thiaj loj hlob mus. Nws yog ib yam uas nyuaj, mob yus siab, thiab yus tsis tas ua li ntawd. Nws yeej zoo dua thiab yooj yim dua yog tias yus taug txoj kev ncaj ncees. Tiam sis yog tias ua tib zoo hloov siab lees txim, muaj kev ntseeg rau ntawm tus Tswv Yexus Khetos, thiab ua raws li Nws cov lus txib, txawm yus poob siab vim tau ua txhaum los yus muaj cai muab qhov ntawd pauv ua kev zoo siab.

Sau ib daim ntawv txog tej yam uas yuav pab koj muaj kev zoo siab, zoo li:

- Ntsuam xav txog cov vaj lug kub kom thiaj to taub tau txoj kev zoo siab.
- Thov Vajtswv muaj kev ntseeg txog Yexus Khetos.
- Hlub thiab pab lwm tus neeg.
- Txais lub tuam tsev tej kab ke. Rov qab tuaj pab foom koob hmoov rau lwm tus neeg.
- Mloog tus yaj saub cov lus thiab ua raws li nws cov lus ntuas.
- Muaj kev ris txiaj rau tej uas nej muaj.
- Haj yam luag nyav.

Koj daim ntawv no yuav qhia seb yuav tau ua li cas thiaj xis nyob thiab muaj kev xyiv fab.

Kev Cov Nyom Kav Ib Ntus Xwb tiam sis Kev Zoo Siab Kav Mus Ib Txhis Li

Cov neeg Brazil muaj ib zaj nkauj uas qhia txog ib yam cuav uas tib neeg coob ntseeg: Kev tu siab tsis paub qhov kawg, tiam sis kev zoo siab yeej paub. Kuv hais lus tim khawv tias thaum yus muaj kev ntseeg rau tus Cawm Seej thiab ua raws li Nws cov lus qhia, kev zoo siab tsis paub qhov kawg, tiam sis kev tu siab yeej paub.

Txawm tias koj los sis ib tug uas koj hlub muaj kev nyuaj siab npaum li cas los, tej ntawd yuav tsum tsis txhob kav kiag yus lub neej thiab ua lub hauv paus rau txhua yam yus ua. Tej kev cov nyom tsuas pab yus loj hlob mus, ib qho uas kav ib ntus hauv lub neej zoo siab no. Tsis txhob tsum ntsoov

rau ib yam li no ces yus txawm xav tsis tau txog lwm yam los sis tu tsis tau yus tus kheej los sis cov neeg uas vam yus. Nco ntsoov tias, zoo nkaus li thaum yus lub cev zoo mob zoo nkees, txoj kev kho yus sab ntsuj plig thiab sab paj hlwb yuav siv sij hawm thiab.

Tus Tswv tau hais tias, “Ua siab ntev nyiaj tej kev txom nyem, vim nej yuav raug ntau; tiam sis nyiaj tej ntawd, vim, saib seb, kuv nrog nej nyob, twb nyob txog thaum nej tas sim neej no.”¹⁰ Thaum nej ua siab ntev, nej thiaj yuav nkag siab kab lus uas hais tias. “Kuv nrog nej nyob” txhais tau li cas tiag. Vajtswv txoj kev hlub koj kev thaj yeeb nyab xeeb thiab kev xyiv fab los.

Nej txoj kev ntseeg Yexus Khetos ua rau lub neej no muaj ib lub ntsiab uas kav mus ib txhis. Nco ntsoov tias nej tab tom taug kev yuav mus rau txoj kev tsa nto. Tej thaum nej raug tej yam uas ua rau nej muaj kev zoo siab dua lwm yam, tiam sis tus Tswv yeej muaj ib lub ntsiab rau txhua yam no.¹¹

Xws li kuv yog ib tug tim khawv txog tus Cawm Seej, kuv ntuas nej kom zam txim rau cov uas tau ua txhaum rau nej lawm. Yog tias nej tau ua txhaum, cia li hloov siab lees txim, xwv kom tus Xib Hwb thiaj kho tau nej lub siab.

Ua nej Leej Txiv saum Ntuj Ceeb Tsheej thiab Nws Tib Leeg Tub tsaug vim muaj txoj kev zoo siab thiab txoj moo zoo tej ntsiab cai uas ua lub hauv paus rau kev zoo siab ntawd. Ua nkawd tsaug rau tej kab ke thiab kev khi lus hauv txoj moo zoo. Kuv hais lus tim khawv tias tej ntawd muaj hwj chim uas yuav pab kom nej muaj kev thaj yeeb nyab xeeb thiab kev xyiv fab, thiab kom lub neej no muaj ib lub ntsiab thiab ib lub hom phiaj. Nej yuav kawm paub tias kev tu siab thiab kev poob siab tsuas kav ib nyuag ntu xwb. Kev zoo siab yuav kav mus ib txhis li vim muaj Yexus Khetos. Kuv hais lus tim khawv tias Nws muaj sia nyob, tias Nws hlub nej, thiab tias Nws yuav pab nej.

Los ntawm Txwj Laug Scott ib zag lus hauv lub Koom Txoos lub tuam rooj sab laj thaum lub Plaub Hlis Ntuj 1996 (saib Conference Report, Plaub Hlis Ntuj 1996, 31–35; los sis *Ensign*, Tsib Hlis Ntuj 1996, 24–26).

LUS CIM

1. 2 Nifais 2:25.
2. Saib Anplaham 3:25.
3. Saib Mauxiyas 3:19.
4. Saib 1 Nifais 3:7.
5. Saib phau Lus Qhuab Qhia thiab Kev Khi Lus 58:26–32.
6. Saib Orson F. Whitney, tus uas hais nws cov lus yog Spencer W. Kimball, *Faith Precedes the Miracle* (1972), 98.
7. Mauxiyas 24:14–15.
8. *The Teachings of Spencer W. Kimball*, tus kws kho ntawv yog Edward L. Kimball (1982), 252.
9. Saib Yaxayas 40:31.
10. Phau Lus Qhuab Qhia thiab Kev Khi Lus 24:8.
11. Saib Joseph F. Smith, *Gospel Doctrine*, phau 5 (1939), 177.

LUB HWJ CHIM NTAWM KEV ZAM TXIM UAS KHO TAU TIB NEEG

7

COV TSWV YIM RAU KEV NRUAB RAU HAUV YUS LUB NEEJ

Raws li koj xav tau thiab toob kas qhia, ua raws li ib los sis ob qho tswv yim no.

- Kawm txog cov yam ntxwv rau kev zam txim uas nyob hauv tej nqe vaj lug kub nram qab no: Lukas 23:33–34; Cov Tub Txib 7:58–60; 1 Nifais 7:8–21.
- Cog lus rau koj tus kheej tias koj yuav haj yam zam txim rau tib neeg thiab yuav tsim nyog kom thiaj tau lwm tus neeg txoj kev zam txim pub rau koj.

KEV NYEEM NTAWV

Kawm zaj dab neeg nram no. Yog tias koj muaj poj niam muaj txiv, nyeem thiab nrog koj tus khub sib tham txog zaj no.

“RAU NTAWM NEJ CES NEJ YUAV TSUM ZAM LUAG TXIM”

Thawj Tswj Hwm Gordon B. Hinckley
Tus Pab Cuam Thib Ib hauv Thawj Pawg Thawj
Tswj Hwm

Ib qho tseem ceeb heev hauv Yexus Khetos txoj moo zoo yog kom muaj tus ntsuj plig xav zam txim thiab muaj lub siab xav hlub thiab muaj kev khuv leej rau cov neeg uas tau ua txhaum rau peb lawm. Peb txhua leej txhia tus xav tau ib tug ntsuj plig zoo li no. Lub ntiaj teb tag nrho xav tau qhov no. Tus Tswv tau qhia kom peb ua li no. Nws tau ua yam ntxwv zoo tshaj txhua leej txhia tus txog qhov no.

Thaum Nws raug kev tsum txom saum tus ntoo khaub lig ntawm lub Roob Khaub Khaum Taub Hau, muaj cov neeg siab phem thiab cov uas ntxub Nws sawv ntawm nws, muaj cov uas tau coj Nws los raug ntsia saum tus ntoo khaub lig, Nws qw hais tias, “Txiv es, thov koj zam txim rau lawv; rau qhov lawv tsis paub hais tias lawv ua dab tsi” (Lukas 23:34).

Peb leej twg tsis raug hu los zam txim rau tib neeg ntau npaum li no, tiam sis peb txhua tus yuav tsum ua raws li cov lus txib uas los saum ntuj los hais tias peb yuav tsum zam txim rau luag thiab muaj kev hlub tshua. Tus Tswv tau qhia kev tshwm sim hais tias: “Yav thaum ub, kuv cov thwj tim, tau muaj lus sib hais thiab ib leeg tsis tau zam txim rau ib leeg; thiab vim muaj kev phem li no lawv thiaj raug kev txom nyem thiab mag cem.

“Yog li ntawd, kuv hais rau nej tias, nej ib leeg yuav tsum zam txim rau ib leeg; rau qhov tus uas tsis zam txim rau nws tus kwv tij tej kev txhaum cais tus ntawd yuav muaj txim txhaum rau ntawm tus

Tswv; rau qhov tus ntawd muaj ib qho kev txhaum loj dua.

“Kuv, tus uas yog tus Tswv, yuav zam txim rau tus uas kuv xav zam txim rau, tiam sis nej yuav tsum zam txim rau txhua tus neeg.

“Thiab nej yuav tsum xav hauv nej nruab siab li no hais tias—cia Vajtswv ua tus uas txiav txim rau ntawm kuv thiab koj, thiab muab nqi zog rau yus nyob ntawm seb yus tau ua hauj lwm zoo li cas” (Q&K 64:8–11).

Peb yeej xav kom tib neeg ua raws li Vajtswv txoj ntsiab cai no thiab xav tau txoj ntsiab cai no tus khub, uas yog kev hloov siab lees txim! Peb xav tau qhov no hauv peb tej vaj tej tsev, vim tej yam me me thaum tsis sib haum yuav loj hlob kawj tej teeb meem loj heev. Peb xav tau qhov no ntawm cov neeg zej zog, vim tej yam me me yuav loj hlob ua kev tsis sib haum xeeb. Peb xav tau qhov no hauv kev ua lag ua luam vim tej kev sib cav sib ceg thiab tsis kam sib pab thiab sib zam txim, thaum uas, feem ntau, yog tias lawv kam los zaum ua ke thiab sib tham ib leeg rau ib leeg ces, yuav kho tau qhov teeb meem ntawd kom sawv daws txaus siab. Es tsis txhob muaj chaw sib chim thiab npaj tswv yim seb yuav pauj lawv li cas.

Hauv thawj lub xyoo uas tau txhim tsa lub Koom Txoos, thaum tus Yaj Saub Yauxej Xamiv pheed raug ntes thiab raug liam txog tej yam tsis tseeb vim luag tej xav ua rau nws raug mob, tus Tswv tau hais lus tshwm sim rau nws hais tias, “Leej twg uas coj koj mus hais plaub ntug kuj yuav raug txim ntawm txoj kev cai” (Q&K 24:17). Kuv twb pom hauv peb lub caij lub nyoog hais tias muaj ib txhia uas pheed nrhiav caij pauj luag tej. Tej tus neeg uas twb ua pauj lwm tus neeg nrhiav tsis tau kev thaj yeeb nyab

xeeb li, thiab txawm tias lawv tau nyiaj txiag rov qab los, lawv tau xiam ib yam uas muaj nuj nqi ntau dua tej nyiaj ntawd.

Tsis Txhob Muaj Chaw Tu Siab

Guy de Maupassant, ib tug kws sau ntawv uas yog neeg Fab Kis, piav ib zag dab neeg txog ib tug neeg pluag hu ua Hauchecome uas tuaj kav kiab kav khw hauv zos. Thaum nws taug kev hauv nroog, nws pom ib txoj hlua nyob ntawm kev. Nws tau tsawv nkaus txoj hlua ntawd thiab muab ntsaws rau hauv nws hnab ris. Tus kws ua eeb nees hauv zos pom nws ua li ntawd, thaum ub nkawd tau muaj kev sib cav sib cev lawm.

Thaum yav tav su ib tug neeg tau hais tias nws tau xiam nws hnab nyiaj. Ces lawv tau ntes Hauchecome vim tus kws ua eeb nees liam tias nws tau nyiaj. Nws raug koj mus ntsib tus hau zos, ces Hauchecome hais tias nws tsis tau ua txhaum li, ces tau cev txoj hlua uas nws tau nqa hlo. Tiam sis lawv tsis ntseeg nws thiab tau luag thuam nws.

Hnub tom qab ntawd lawv nrhiav tau lub hnab nyiaj, thiab txawm pom tias Hauchecome tsis tau ua txhaum li. Tiam sis, nws chim siab vim nws raug kev liam tsis tseeb ntawd, nws txawm tu siab thiab tsis kam cia li xwb. Nws tsis kam zam txim thiab tso tseg, nws pheej xav txog thiab tham txog qhov ntawd. Txawm nws mus qhov twg los, nws qhia txhua tus neeg uas nws tau ntsib txog kev tsis ncaj ntawd. Nruab hnub thiab nruab hmo nws pheej xav ntsoov txog qhov ntawd. Nws pheej xav txog kev tu siab ntawd, ces nws raug mob thiab tau tso lub neej no tseg. Thaum nws feeb tsis meej es tab tom yuav tuag, nws pheej yws yws hais tias, “Ib nyuag txoj hlua, ib nyuag txoj hlua xwb” (*The Works of Guy de Maupassant* [tsis paub hnub twg], 34–38).

Vim hais tias tib neeg nyias muaj nyias tus cwj pwm thiab tus yeeb yam, yeej muaj tau ib zag dab neeg zoo li ntawd hauv peb lub caij lub nyoog no. Nws nyuaj npaum li cas rau peb zam txim rau ib tug uas ua raug peb lub siab lawm. Peb txhua tus yeej yuav xav ntau heev txog tej yam phem uas luag tau ua rau peb. Txoj kev xav ntawd yuav loj hlob ua kiav txhab. Hauv peb lub caij nyoog no puas muaj ib qho tsim txiaj uas peb xav tau ntau tshaj qhov kev zam txim thiab tsis nco qab tej kev phem? Muaj qee leej uas yuav xav tias kev zam txim yog ib txoj kev qaug zog xwb. Puas yog li ntawd? Kuv xav tias yus tsis tas muaj zog los sis txawj ntse yus thiaj txawj chim rau tej kev phem no, muaj lub siab xav pauj luag tej cov kev txhaum, kom thiaj tsis txawj npaj siab pauj txiaj ntsim li. Tsis muaj kev thaj yeeb nyab xeeb thaum khaws kev chim siab cia. Tsis muaj kev zoo siab yog tias yus ua neej nyob kom thiaj muaj hnub uas yuav “pauj qhov kev phem.”

Pov Lauj tau hais txog “tej kev qaug zog thiab tsis zoo” hauv peb lub neej (saib Kalatias 4:9). Puas muaj dab tsi uas yog kev qaug zog thiab tsis zoo ntau tshaj txoj kev pheej xav txog tej kev phem thiab ntaus tswv yim seb yuav pauj cov neeg uas tau ua txhaum rau peb li cas?

Joseph F. Smith tau koj kav lub Koom Txoos thaum tib neeg coob tsim txom peb cov neeg. Neeg coob tau liam nws, twb muaj neeg hauv nws koog zej zog sau ntawv liam nws tsis ncaj. Luag tau luag thuam, thas duab tsis zoo, thiab tsim txom nws. Mloog seb nws hais li cas rau cov neeg uas tau luag thuam nws: “Tsis txhob hais li cas rau lawv. Cia lawv ua lawv. Cia lawv muaj kev ywj siab rau lawv tej lus. Cia lawv hais lawv zaj, thiab sau ntawv kom lawv tau kev puas tsuaj” (*Gospel Doctrine*, phau 5 [1939], 339). Thiab ces, tau muaj ib tug ntsuj plig xav zam txim thiab tso tseg, nws tau thawb mus tom ntej koj lub Koom Txoos loj hlob tuaj mus thiab ua tej yam zoo. Thaum nws tso lub neej no tseg, coob tug neeg uas tau luag thuam nws tau sau ntawv qhuas nws lub npe.

Kuv nco txog ib lub sij hawm thaum ib khub niam txiv zaum ntawm kuv lub rooj. Nkawd tau muaj kev tsis sib haum. Kuv paub tias thaum i nkawd tau sib hlob heev. Tiam sis nkawd ob leeg tau pheej nrhiav tej kev txhaum hauv lwm tus neeg ntawd. Ib leeg tsis kam zam txim rau ib leeg txawm tias lawv tsuas ua tej yam uas peb sawv daws ua, thiab pheej tsis kam tso tej yam ntawd tseg thiab muaj lub siab zoo sawv siab tshaj tej ntawd, nkawd ib leeg pheej thuam ib leeg txog thaum nkawd tau muab kev hlob zais cia. Nkawd txoj kev ua ib khub niam txiv twb puas tsuaj lawm ces tau muaj kev sib nrauj uas “tsis yog tim ib tug twg li.” Nim no tsuas muaj kev kho siab thiab sib liam ib leeg rau ib leeg. Kuv xav tias yog tias nkawd tau hloov siab lees txim thiab zam txim me me xwb, ces nkawd tseem yuav nyob ua ke, ua ib khub niam txiv uas muaj kev sib hlob li yav nram ntej.

Kev Thaj Yeeb Nyab Xeeb dhau ntawm Kev Zam Txim

Yog tias nej leej twg uas muaj lub siab tsis zoo es muaj chaw chim siab rau lwm tus neeg, kuv taj thov kom nej yuav thov tus Tswv pab nej zam txim. Txoj kev xav li no yuav yog lub hauv paus rau koj txoj kev hloov siab lees txim. Tej zaum yuav tsis yooj yim, thiab tej zaum yuav tsis los sai sai. Tiam sis yog tias nej yuav mob siab nrhiav thiab tu qhov no, ces nws yeej yuav los. Thiab txawm tus uas koj zam txim rau lawm pheej caum nej qab thiab tsim txom nej, nej yuav paub tias nej tau ua txhua yam nej ua tau kho qhov teeb meem ntawd. Ces nej thiaj yuav tau kev thaj yeeb nyab xeeb hauv nej lub siab

uas yog tias nej tsis ua li no nej yeej yuav nrhiav tsis tau li. Qhov thaj yeeb nyab xeeb ntawd yog kev thaj yeeb nyab xeeb ntawm Nws tus uas tau hais tias:

“Yog nej zam txim rau tus uas tau ua txhaum rau nej lawm, nej Leej Txiv Saum Ntuj Ceeb Tsheej nws thiaj yuav zam txim rau nej:

“Tiam sis yog nej tsis zam txim rau lwm tus, nej Leej Txiv yuav tsis zam txim rau nej thiab” (Mathais 6:14–15).

Tus Tub Uas Yuam Kev Lawm

Kuv tsis paub ib zag dab neeg uas zoo npaum li zaj dab neeg hauv phau Lukas tshooj kaum tsib. Nws yog ib zag dab neeg txog ib tug tub uas tau hloov siab lees txim thiab nws leej txiv ho zam txim rau nws. Nws yog zaj dab neeg uas piav txog ib tug tub uas siv tag nrho nws tej nyiaj uas nws txiv muab rau nws ua lwj ua liam, tsis ua raws li nws txiv ntuas, tsis nco qab txog cov neeg uas hlub nws. Thaum nws siv cov nyiaj tas, nws tshaib plab thiab tsis muaj phooj ywg lawm, thiab “thaum nws nco dheev txog nws tej kev txom nyem” (Lukas 15:17), nws tig hlo los rau nws txiv, uas pom nws puag deb deb ces txawm, “khiav tiaj lias mus puag nkaus tus tub caj dab nwj” (Lukas 15:20).

Kuv thov kom nej rov qab nyeem zaj dab neeg ntawd. Txhua tus niam thiab txiv yuav tsum nyeem zaj ntawd ntau zaus. Nws muaj txaus txhua yim neeg, thiab yeej loj txaus duav noob neej sawv daws, rau qhov peb sawv daws yeej yog cov tub thiab ntxhais uas ua yuam kev lawm thiab peb yuav tsum hloov siab lees txim thiab txais yuav peb Leej Txiv Saum Ntuj Ceeb Tsheej txog kev hlub tshua thiab ua raws li Nws tus yam ntxwv?

Nws Tib Leeg Tub, peb tus Txhiv Dim, ncav tes mus pab peb txais kev zam txim thiab kev hlub tshua, tiam sis thaum nws ua li ntawd Nws txib kom peb hloov siab lees txim. Yog tias hloov siab lees txim tiag tiag ces yuav muaj ib tug ntsuj plig uas xav zam txim rau luag tej thiab. Tus Tswv tau hais tias—thiab cov lus no los ntawm ib qho kev tshwm sim uas nws tau muab rau tus Yaj Saub Yauxej:

“Yog li ntawd kuv txib kom nej hloov siab lees txim—hloov siab lees txim, tsam kuv hais lus tawm tsam nej, thiab kuv txoj kev npau taws, thiab kuv txoj kev chim siab, thiab nej yuav sab heev—nej tsis paub yuav sab npaum li cas, nej tsis paub yuav mob npaum li cas, muaj tseeb tiag, nej tsis paub txoj kev tiv tej no yuav nyuaj npaum li cas.

“Vim saib seb, kuv, tus uas yog Vajtswv, tau raug tej yam no rau sawv daws, xwv kom lawv thiaj tsis

tas raug kev tsim txom yog tias lawv yuav hloov siab lees txim;

“Tiam sis yog lawv yuav tsis hloov siab lees txim lawv yuav raug txim ib yam li kuv;

“Kev txom nyem ntawd ua rau kuv kias, tus uas yog Vajtswv, tus uas muaj hwj chim loj tshaj plaws, tau tshee hnyo vim mob heev, thiab ntshav nrog ntawm txhua lub qhov hws, thiab lub cev thiab sab ntsuj plig tib si tau mob . . .

“Cia li kawm txog kuv, thiab mloog kuv cov lus; taug kev txo hwj chim mloog kuv tus Ntsuj Plig, thiab nej thiaj yuav muaj kev thaj yeeb nyab xeeb hauv kuv” (Q&K 19:15–18, 23).

Twb muaj lus txib li ntawd lawm, thiab Nws tau cog lus lawm, Nws tus uas yog tus yam ntxwv zoo tshaj plaws rau kev thov Vajtswv hais tias, “Txiv es, . . .thov koj zam txim rau peb ib yam li peb twb zam txim rau txhua tus uas tau ua txhaum rau peb lawm” (Mathais 6:9, 12).

“Kho...Tej Qhov Mob”

Abraham Lincoln cov lus yeej ntxim nyiam thaum uas nws hais txog tej kev txom nyem ntawm kev tsov rog hais tias: “Tsis muaj chaw chim siab ib leeg rau ib leeg, muaj lub siab hlub tshua rau txhua tus, . . .cia peb . . .kho . . .tej qhov mob” (hauv John Bartlett, *Familiar Quotations* [1968], 640).

Kuv cov kwv tij thiab cov muam, cia peb kho tej qhov mob—au, muaj ntau yam mob vim tib neeg hais lus phem, vim tib neeg ua siab tawv, vim tib neeg ntaus tswv yim seb “yuav pauj txiaj ntsim” li cas rau cov uas tau ua txhaum rau peb lawm. Peb sawv daws yeej muaj lub siab xav pauj lwm tus neeg. Peb muaj hmoov, vim peb muaj hwj chim sawv siab tshaj tej no, thiab yog tias peb yuav “muab lub siab hlub tshua coj los hnav, zoo li ib lub tsho, ces yuav muaj kev sib haum xeeb thiab kev thaj yeeb nyab xeeb” (Q&K 88:125).

“Kev ua txhaum los ntawm tib neeg los, es kev zam txim los saum ntuj los” (Alexander Pope, *An Essay on Criticism*, 2:1711). Tsis muaj kev thaj yeeb nyab xeeb yog tias pheej xav txog kev mob siab rau yav tas los. Tsuas muaj kev thaj yeeb nyab xeeb hauv kev hloov siab lees txim thiab kev zam txim. Nov yog kev thaj yeeb nyab xeeb hauv Khetos, tus uas tau hais tias, “Tus uas ua rau neeg nyob sib haum tus ntawd yuav tau koob hmoov: Vajtswv yuav hu hais tias nws yog Vajtswv tus me nyuam” (Mathais 5:9).

Nyob hauv phau *Ensign* lub Rau Hli Ntuj 1991, phab 2–5.

SAIB XYUAS TSEV NEEG TEJ NYIAJ TXIAG

8

COV TSWV YIM RAU KEV NRUAB RAU HAUV YUS LUB NEEJ

Raws li koj xav tau thiab toob kas qhia, ua raws li ib los sis ob qho tswv yim no.

- Sau ib daim ntawv seb tau ob peb hlis no tau yuav dab tsi thiab dab tsi. Sau ib tug tsiaj ntawv *N* rau ntawm txhua yam uas neb yuav tsum tau yuav. Sau ib tug *W* rau txhua yam uas yog tej yam uas neb tsuas xav yuav xwb. Siv daim ntawv no kuaj xyuas seb neb siv nyiaj li cas. Yog tias neb tab tom siv nyiaj ntau heev rau tej yam uas neb tsuas xav yuav xwb, ntaus tswv yim seb yuav siv nyiaj rau tej yam uas tsim nyog siv.
- Nrog koj tus txiv los sis tus poj niam, npaj seb yuav siv nyiaj li cas rau ib lub caij—ib yam li rau ib los sis ob lim tiam. Sim xav seb puas xav siv qhov piv txwv uas nyob hauv phab ntawv 32 ua ib tug qauv rau neb. Sib koom tes kom thiaj siv nyiaj raws li neb tau teem tseg.

KEV NYEEM NTAWV

Kawm zaj dab neeg nram no. Yog tias koj muaj poj niam muaj txiv, nyeem thiab nrog koj tus khub sib tham txog zaj no.

TXOJ KEV RUAJ KHOV THAUM PHEEJ MUAJ KEV PAUV

Thawj Tswj Hwm N. Eldon Tanner
Tus Pab Cuam Thib Ib hauv Thawj Pawg Thawj
Tswj Hwm

Hnub no kuv xav qhia me ntsis txog tej ntsiab cai uas nyob ruaj khov thiab ua lub hauv paus, uas yog yus ua raws li tej ntawd, yus yuav tau kev pov hwm thiab kev thaj yeeb nyab xeeb *tab txawm* raug xwm txheej li cas ntawm nyiaj txiag.

“Xub Nrhiav Vajtswv lub Nceeg Vaj”

Qhov xub thawj mas, kuv xav txhim tsa lub hauv paus thiab tsa tej kev cai rau txoj kev ua raws li tej ntsiab cai saib xyuas nyiaj txiag li no.

Muaj ib hnub kuv tus tub xeeb ntxwv hais rau kuv tias: “Kuv tau pom koj thiab lwm cov txiv neej uas tau ua lag luam zoo, thiab kuv tau txiav txim siab tias kuv xav ua tau zoo hauv lub neej no thiab. Kuv xav xam phaj cov neeg uas tau ua zoo xyuas seb lawv ua li cas thiaj tau ua zoo. Ces, Yawg es, tam li koj tau pom, koj xav tias yam twg thiaj tseem ceeb tshaj plaws kom koj thiaj tau ua lag luam zoo?”

Kuv qhia nws tias tus Tswv tau qhia txoj kev cai zoo tshaj plaws uas kuv paub thaum nws hais tias: “Tiam sis nej yuav tsum xub nrhiav Vajtswv lub nceeg vaj, thiab nws txoj kev ncaj ncees tso; thiab tag nrho tej yam no yeej yuav raug muab ntxiv rau nej” (Mathais 6:33).

Ib txhia cav tias tib neeg yuav tau nyiaj txiag yog tias lawv *tsis* xub nrhiav Vajtswv lub nceeg vaj. Nov muaj tseeb. Tiam sis tus Tswv *tsis* yog cog lus tias yuav muaj nyiaj txiag ntau xwb yog tias peb xub nrhiav tau lub nceeg vaj. Kuv paub li no vim kuv twb pom lawm hauv kuv lub neej. Ib yam li Henrik Ibsen tau hais: “Tej zaum nyiaj txiag yog ib yam tseem ceeb, tiam sis nws *tsis* yog lub hauv paus hauv ntsis. Nyiaj pab yuav zaub mov noj, tiam sis *tsis* yog yam uas ua rau yus tshaib plab; tshuaj, tiam sis *tsis* yog kev noj qab nyob zoo; cov neeg uas yus paub, tiam sis *tsis* yog phooj ywg tiag; cov tub qhe, tiam sis *tsis* yog mob siab ua; muaj tej hnub xyiv fab, tiam sis *tsis* yog kev thaj yeeb nyab xeeb los sis kev zoo siab” (hauv *The Forbes Scrapbook of Thoughts on the Business of Life* [1968], 88).

Tej koob hmoov hauv ntiaj teb yog ib qho hauv txoj moo zoo yog tias yus tau nyiaj txiag raws kev raws cai thiab muab siv rau tej yam ncaj. Kuv nco txog ib zag dab neeg txog Thawj Tswj Hwm Hugh B. Brown. Thaum nws tseem ua ib tug tub rog hluas hauv Kev Tsov Rog Thoob Ntiaj Teb Zaum I, nws tau mus xyuas ib tug phooj ywg laus hauv lub tsev kho mob. Tus phooj ywg no muaj ntau plhom daus las, nws muaj yim caum xyoo, es tab tom yuav tso lub neej no tseg. Nws tus poj niam uas tau nrauj nws lawm thiab nws tsib tus me nyuam twb *tsis* tau xav tuaj xyuas nws hauv lub tsev kho mob. Thaum Thawj Tswj Hwm Brown xav txog tej yam uas nws tus phooj ywg “tau xiam lawm uas yog tej yam uas nyiaj txiag yuav *tsis* tau thiab pom tias nws txom nyem thiab muaj kev nyuaj siab npaum li cas,” nws

tau nug nws tus phooj ywg seb nws yuav pauv nws lub neej li cas yog tias nws tau rov qab ua neej nyob dua.

Tus yawg laus, uas tau tas sim neej ob peb hnuv tom qab ntawd, tau hais tias: “Thaum kuv xav rov qab txog kuv lub neej tej yam tseem ceeb tshaj plaws thiab muaj nuj nqi heev uas kuv khaws tau tiam sis kuv tau xiam thaum kuv khwv nyiaj txiag ntau, *yog txoj kev ntseeg uas kuv niam muaj txog Vajtswv thiab qhov uas yus tus ntsuj plig tsis txawj tuag.*

“...Koj tau nug kuv seb qhov tseem ceeb tshaj plaws hauv lub neej no yog dab tsi. Kuv xav tias tus kws sau paj lug teb lo lus nug ntawd zoo kawg,” Nws tau thov Thawj Tswj Hwm Brown kom muab ib phau ntawv dhau los ntawm nws lub hnab es tau nyeem ib zag paj lug hu ua “Kuv yog ib tug neeg nyob nrug deb.”

Kuv yog ib tug neeg nyob nrug deb txoj kev ntseeg uas kuv niam qhia rau kuv,

Kuv yog ib tug neeg qhua rau tus Vajtswv uas tau hnov kuv niam thaum nws quaj,

Kuv yog ib tug neeg nyob nrug deb kev nplij siab tias, “Nim no yuav pw tsaug zog,” pab kuv,

Rau txhais caj npab uas tau khaws kuv txiv thaum nws tso lub neej no tseg.

Thaum lub ntiaj teb los thiab hu kuv, kuv tso sawv daws tseg yuav raws lawv qab,

Vim kuv dig muag kuv thiaj tsis nco qab pom tias kuv tau tshem kuv txhais tes ntawm Nws li,

Tsis nco qab xav tias kev nto moo tsis muaj nuj nqi hlo li,

Tej nyiaj tej kub pauv los ua hlau, vim kuv twb kawm paub li ntawd lawm.

Kuv tau siv tag nrho kuv lub neej nrhiav tej yam uas kuv twb tso tseg lawm,

Kuv tau siv zog thiab tau nqi zog ntau zaus,

Tiam sis kuv yuav tso *tag nrho* tej ntawd, kev nto moo thiab nyiaj txiag thiab kev lom zem tseg,

Yog tias kuv tau *kev ntseeg* uas yog lub hauv paus rau kuv niam tus cwj pwm.

“Qhov ntawd yog tib tug txiv neej uas tab tom yuav tso lub neej no tseg zaj lus tim khawv nws twb yug los rau hauv lub Koom Txoos thiab tau txav lawm deb. Tus txiv neej ntawd kho siab heev txawm tias nws muaj nyiaj ntau heev nws yuav tau txhua yam tsav nws xav tau, tiam sis tau xiam tej yam tseem ceeb heev hauv lub neej no kom nws thiaj khwv tau tej yam hauv lub ntiaj teb” (*Continuing the Quest* [1961], 32–35; tau ntxiv cov ntawv qaij).

Nyob hauv Phau Ntawv Maumoo, tus yaj saub Yakhauj tau ntuas peb txog qhov no hais tias:

“Tiam sis ua ntej uas nej nrhiav txoj kev nplua nuj, nej yuav tsum nrhiav Vajtswv lub nceeg vaj tso.

“Thiab tom qab uas nej tau muaj ib txoj kev cia siab nyob hauv Khetos lawm nej yuav tau txais kev nplua nuj, *yog nej nrhiav tej ntawd*; thiab nej tsuas yuav nrhiav tej ntawd cia ua qhov zoo—muab ris tsho rau tej neeg liab qab hnav, thiab pub rau tej neeg tshaib plab noj, thiab tso tej neeg raug txhom kom dim, thiab pab tej neeg muaj mob thiab tej neeg txom nyem kom dim pa” (Yakhauj 2:18–19; tau ntxiv cov ntawv qaij).

Yog li ntawd lub hauv paus thiab lub ntsiab yog li no: Peb yuav tsum xub nrhiav lub nceeg vaj, ua hauj lwm thiab npaj thiab ua tib zoo siv nyiaj, npaj rau yav tom ntej, thiab siv tej nyiaj uas peb tau lawm kom thiaj pab txhim tsa lub nceeg vaj. Thaum ua raws li lub ntsiab uas kav ib txhis no thiab txhim tsa rau lub hauv paus ruaj khov no, peb thiaj yuav muaj siab loj ua peb tej hauj lwm thiab peb tej tes tej num hauv peb lub neej, peb yuav tsum ua tib zoo npaj thiab rau siab ntso.

Raws li lub ntsiab no kuv xav piav txog tsib txoj ntsiab cai uas pab kom nyiaj txiag tsis pauv li.

Them Tag Nrho Yus Ib Feem Kaum

Qhov uas Nyob Ruaj Khov Thib #1: Them tag nrho ib feem kaum. Kuv xav paub seb peb puas paub tias peb txoj kev them ib feem kaum tsis yog peb muab khoom plig rau tus Tswv thiab lub Koom Txoos. Kev them ib feem kaum tsuas yog kev them tus nqi uas peb tshuav rau tus Tswv rov qab. Tus Tswv yog tus uas muab txhua txoj koob hmoov rau peb, kuj hais txog txoj sia kiag.

Txoj kev them ib feem kaum yog ib txoj lus txib, ib txoj lus txib uas muaj kev cog lus rau peb. Yog tias peb ua raws li txoj lus txib no, ces peb tau lus cog tseg hais tias peb yuav “huaj vam nyob rau hauv thaj av.” Txoj kev huaj vam no tsis yog ntawm tej khoom hauv ntiaj teb no xwb—tej zaum yuav yog kev noj qab nyob zoo thiab muaj ib lub paj hlwb zoo thiab. Yeej yog txoj kev uas yus tsev neeg nyob ruaj khov thiab loj hlob ntawm sab ntsuj plig. Kuv cia siab tias nej cov uas tsis them nej ib feem kaum yuav muaj kev ntseeg thiab muaj zog txaus thiaj ua tau li ntawd. Thaum nej ua raws li nej txoj kev lav ris rau tus uas tau Tsim nej no, nej haj yam yuav nrhiav kev zoo siab, ib txoj kev zoo siab uas tsuas yog cov uas rau siab ntseeg ua raws li lo lus txib no thiaj tau.

Ua Tib Zoo Siv Nyiaj

Qhov uas Nyob Ruaj Khov Thib #2: Siv nyiaj tsawg dua qhov uas yus khwv tau. Kuv twb kawm paub tias yus yeej khwv tsis tau nyiaj *ntau tshaj* yus txawj siv. Kuv paub tias txoj kev thaj yeeb nyab xeeb tsis los

rau yus thaum yus khwv tau ntau tiam sis yus muaj kev thaj yeeb nyab xeeb thaum yus txawj tswj kav yus cov nyiaj. Nyiaj ua tau yus tus tub qhe zoo tiam sis nws yeej ua tau tug neeg nyaum heev. Cov uas tseg me ntsis nyiaj rau lawv lub neej, yeej tswj kav lawv lub neej. Cov uas siv nyiaj ntau tshaj qhov uas lawv khwv tau raug nyiaj txiag tswj kav lawv lub neej. Lawv ua tub mag ua tub qhev. Thawj Tswj Hwm Heber J. Grant tau hais tias: “Yog tias muaj ib yam dab tsi uas coj kev thaj yeeb nyab xeeb thiab kev sib haum xeeb los rau tib neeg lub siab, thiab rau ib tse neeg, qhov ntawd yog siv nyiaj raws li yus muaj xwb. Thiab yog tias muaj ib yam dab tsi tsis zoo thiab ua rau yus poob siab thiab ua rau yus tsis zoo siab li, qhov ntawd yog kev tshuav lwm tus nqi thiab them tsis tau yus tej nqi” (*Gospel Standards*, tus kws sau ntawv G. Homer Durham [1941], 111).

Qhov uas yuav pab kom siv tsawg tshaj qhov yus khwv tau yeej yooj yim ua—nws hu ua kev tswj hwm. Txawm yog thaum ntxov los sis lig, peb sawv daws yuav tsum kawm tswj hwm peb tus kheej, peb txoj kev ntshaw, thiab peb txoj kev xav siv nyiaj txiag. Tus uas kawm siv tsawg tshaj qhov nws khwv tau yuav tau koob hmoov thiab tseg ib co rau thaum muaj kev xav tau.

Muab tej Yam Yuav Tsum Muaj thiab tej Yam Yus Xav Tau Sib Cais

Qhov uas Nyob Ruaj Khov Thib #3: Kawm muab tej yam yus yuav tsum muaj thiab tej yam yus xav tau sib cais. Tib neeg tsim tej yam uas lawv ntshaw. Peb txoj kev ua lag ua luam tau tsim ntau yam khoom thiab kev pab uas ua rau peb ntshaw thiab xav tau tej yam zoo siv thiab tej yam uas pab kom yus xis nyob. Kuv tsis yog luag thuam tej ntawd los sis txoj kev yuav cov khoom thiab tej kev pab no. Kuv tsuas txhawj tsam peb cov neeg tsiav txim siab zoo txog tej yam lawv yuav. Peb yuav tsum kawm paub tias kev tua them yog ib yam tseem ceeb rau peb txoj kev tswj hwm rau tas mus ib txhis.

Nyob hauv lub teb chaws no thiab lwm cov, coob tug niam txiv thiab me nyuam uas tau yug los txij thaum Kev Tsov Rog Thoob Ntiaj Teb Zaum Ob tsuas pom txoj kev huaj vam xwb. Neeg coob tau kawm tias lawv nrhiav tau kev zoo siab tam sim ntawd. Tau muaj hauj lwm ntau rau cov neeg uas muaj cuab kav ua hauj lwm. Tej yam uas yus tau nag hmo yog tej yam pab kom yus xis nyob xwb niaj hnub no neeg coob xav tias yuav tsum muaj tej ntawd xwb xwb li.

Peb pom muaj li no thaum tej khub niam txiv hluas xav kom muaj vaj muaj tsev uas muaj txhij txhua thaum lawv *xub* sib yuav, tej ntawd yog tej yam uas lawv niam txiv tau khwv ntau xyoo lawv thiaj khwv tau txaus yuav vim lawv tau tua them. Thaum xav tau ntau yam thaum ntxov, tej khub

niam txiv hluas yuav pib npaj tswv yim mus yuav, ces yuav mus tiv nqi ntau heev. Thaum ua li no lawv yuav tsis muaj nyiaj txaus thiaj ua tau raws li lub Koom Txoos hais kom khaws zaub mov cia thiab npaj rau lwm yam xwm txheej.

Txoj kev siv ntau dhau thiab tsis saib xyuas nyiaj zoo yuav yog ib qho teeb meem loj rau ib khub niam txiv. Feem ntau cov niam txiv tej teeb meem, muaj hauv paus hauv ntsis rau ntawm nyiaj txiag—tej zaum yog vim tsis muaj txaus txhawb nqa yus tsev neeg los sis tsis saib xyuas cov nyiaj uas twb khwv tau lawm.

Ib tug txiv hluas tau tuaj ntsib nws tus npis sov kom tau lus ntuas txog nyiaj txiag thiab tau hais qhia ib zag dab neeg uas peb feem coob tau hnob dua: “Npis sov, kuv twb kawm ua ib txoj hauj lwm zoo, thiab kuv tau nyiaj ntau tsawv. Zoo nkaus li kuv mus kawm ntawv kom thiaj khwv tau nyiaj, tiam sis tsis tau muaj leej twg qhia kuv paub tias yuav saib xyuas cov nyiaj ntawd li cas.”

Peb yeej xav kom txhua tus tub kawm ntawv kawm ib hoob txog kev siv nyiaj, tiam sis qhov tseem ceeb tshaj yog kom niam txiv qhia. Niam thiab txiv tso txoj kev qhuab qhia no rau lwm tus neeg tsis tau los sis muab tsis tau rau lub tsev kawm ntawv tau qhia.

Ib qho tseem ceeb heev rau txoj kev qhia no yog txoj kev piav txog kev tiv nqi. Rau peb feem coob muaj ob qho kev tiv nqi—tiv nqi yuav khoom thiab kev tiv nqi tso peev los sis ua lag ua luam. Kev tiv nqi yuav khoom yog thaum tus tiv nqi yuav tej yam uas peb siv los sis niaj hnub siv hauv peb lub neej. Piv xam hais tias yog kev tiv nqi yuav khaub ncaws, tub yees qhov cub tej, rooj tog, thiab ntxiv. Kev tiv nqi yuav khoom yog yuav tej yam tsuas siv cov nyiaj uas peb tseem yuav khwv tau. Qhov no muaj tau xwm txheej heev. Yog tias peb poob hauj lwm, xiam hoob khab, los sis raug xwm txheej loj heev, peb muaj teeb meem es them tsis tau peb tej nqi no. Txoj kev tiv nqi yuav khoom li no yeej kim tshaj plaws. Yus yuav tsum ntxiv qhov dauj npiab rau tus nqi rau yam khoom ntawd thiab lwm cov nqi uas lawv sau thiab.

Kuv to taub tias tej yim neeg hluas yuav tsum tiv nqi yuav khoom. Tiam sis peb ceeb toom nej kom tsis txhob yuav ntau tshaj yus yuav tsum muaj xwb thiab hais kom nej yuav them tej ntawd rov qab sai li sai tau. Thaum twg tsis tshua muaj nyiaj siv, tsis txhob tiv nqi yus thiaj tsis tas them qhov dauj npiab thiab.

Kev tiv nqi tso peev yuav tsum yog cov nyiaj uas tsis ua li cas rau yus tsev neeg cov nyiaj siv. Tsis txhob lam tau lam tso peev rau tej yam yus tsis paub txog. Txoj kev tso peev yog ib yam uas yus cia li quav tau thiab. Neeg coob tau xiam tag nrho lawv

cov nyiaj vim lawv pheej xav tau nyiaj ntxiv ces tsis ceev faj. Cia peb kawm los ntawm cov neeg thaum ub thiab tsis txhob siv peb lub sij hawm, dag zog, thiab kev noj qab nyob zoo kom thiaj yuav tau tej yam khoom ntiaj teb ntau heev.

Thawj Tswj Hwm Spencer W. Kimball tau hais lus ntuas zoo zoo hais tias:

“Tus Tswv tau foom koob hmoov rau peb ntau tshaj yav tas los lawm. Tej yam uas peb muaj cai siv hauv lub caij no yog rau tej yam zoo, thiab pab kom peb thiaj ua tau peb tej hauj lwm hauv ntiaj teb no. Tiam sis kuv ntshai tias peb coob tug uas tau ntau pab yaj thiab tsiaj txhu thiab liaj ia thiab nkuaj tsiaj txhu ntau tau pib pe hawm tej no ua cov vaj tswv cuav, thiab tej no muaj hwj chim los kav peb. Peb puas muaj tej yam zoo no ntau tshaj peb txoj kev ntseeg thev tau? Neeg feem coob siv lawv lub sij hawm kho lawv tus kheej kom muaj nqi vim hais tias lawv muaj nyiaj txaus, yuav tau cov stocks, bonds, tso nyiaj peev, thaj av, cov npav tiv nqi, rooj tog, cov tshab, thiab lwm yam zoo li ntawd *kom thiaj* tau ib lub neej xis nyob, lawv cia siab tias, yuav muaj ib lub neej muaj kev zoo siab tas mus li. Es txawm tsis nco qab tias peb txoj hauj lwm yog kom siv tej yam khoom no hauv peb tsev neeg thiab tej pawg pov thawj hwj kom thiaj txhim tsa tau Vajtsv lub nceeg vaj” (“The False Gods We Worship,” *Ensign*, Rau Hli Ntuj 1976, 4).

Kuv xav hais lus tim khawv, ntxiv rau Thawj Tswj Hwm Kimball cov lus. Kuv tsis paub txog ib yam dab tsi uas yus haj yam tau kev zoo siab thiab kev thaj yeeb nyab xeeb thaum yus yuav tau khoom ntau tshaj qhov yus tsev neeg xav tau thiab yuav tsum muaj.

Kev Npaj Yuav Siv Nyiaj Li Cas

Qhov uas Nyob Ruaj Khov Thib #4: Npaj thiab siv nyiaj raws li tau npaj tseg. Kuv ib tug phooj ywg tus ntxhais tau mus kawm ntawv txawv teb chaws hauv BYU rau ib lub caij. Tus ntxhais pheej sau ntawv rau niam thiab txiv thov nyiaj ntxiv. Txiv txhawj heev nws thiaj hu xov tooj kev deb thiab nug seb vim li cas nws xav tau nyiaj ntxiv. Thaum nkawd sib tham tus ntxhais tau piav li no hais tias, “Txiv es, kuv qhia tsis tau rau koj hais tias kuv tau siv txhua lub npib nyiaj rau yam dab tsi.”

Txiv teb tias, “Koj tsis to taub li. Kuv xav kom koj npaj siab seb yuav siv nyiaj li cas—ib txoj kev npaj siab seb yuav siv li cas—tsis yog qhia tias cov uas twb siv tas tau mus qhov twg lawm.”

Tej zaum peb cov uas ua niam ua txiv yuav tsum ua zoo li tus tsev uas muaj ib tug tub hluas uas tau mus kawm ntawv qib siab uas sau ntawv li no, “Tsis muaj nyiaj, tsis muaj kev lom zem, sau npe koj

tus tub.” Nws txiv sau ntawv teb nws hais tias, “Tu siab kawg, tsis zoo kiag, sau npe koj txiv.”

Tau ntau xyoo no kuv tau kawm paub thaum kuv xam phaj tib neeg tias neeg feem coob tsis npaj siab seb yuav siv nyiaj li cas thiab tsis tau tswj hwm lawv tus kheej kom siv raws li no. Neeg coob xav tias txoj kev npaj yuav siv li cas tsuas yog tshem lawv txoj kev ywj siab xwb. Tiam sis, cov neeg uas tau ua zoo lawm twb kawm tias txoj kev npaj siab seb yuav siv nyiaj li cas tsuas pab kom lawv muaj kev ywj siab rau nyiaj txiag xwb.

Txoj kev npaj thiab saib xyuas nyiaj tsis yog ib yam nyuaj los sis tsis tas siv sij hawm ntau. Muaj ib zag dab neeg uas hais txog ib tug txiv tsev uas yog neeg tawg rog uas tau muab nws tej nqi khaws cia hauv ib lub thawv ntim khau, cov uas tshuav nws nqi rau ib tug kauv ntawv, thiab nws cov nyiaj ntsuab hauv lub thawv ntim nyiaj.

Nws tus tub tau hais tias, “Kuv xav tias tsis tsim nyog koj khiav koj txoj hauj lwm li no, koj ua li cas thiaj paub tias koj tau paj ntau npaum li cas?”

Tus kws ua lag luam no teb tias, “Me tub, thaum kuv caij nkoj tuaj txog teb chaws no, kuv tsuas muaj lub ris uas kuv hnav hnuv no. Niaj hnuv no koj tus muam yog ib tug xib hwb qhia kev kos duab, koj tus tij laug yog ib tug kws kho mob, thiab koj yog ib tug kws suav nyiaj. Kuv muaj ib lub tshab, ib lub tsev, thiab ib tsev lag luam zoo. Twb them txhua tus nqi tas lawm. Ces cia li suav txhua yam tsav, tshem lub ris tawm, thiab qhov uas seem tshuav yog kuv qhov paj.”

Cov kws txawj ntuas txog nyiaj txiag qhia tias muaj plaub yam rau ib txoj kev npaj siab seb yuav siv nyiaj li cas. Qhov *xub thawj* yuav tsum npaj rau tej yam tseem ceeb zoo li zaub mov, khaub ncaws, thiab ntxiv; *qhov thib ob*, tus nqi tshaj qhov yus tshuav rau yus lub tsev; *qhov thib peb*, rau kev xwm txheej zoo li nyiaj tseg cia, isalas [insurance] kho mob, thiab isalas tas sim neej; thiab, *qhov thib plaub*, kev tso peev zoo thiab tseg khoom rau yav tom ntej.

Kuv xav hais me ntsis txog ob yam no. Tsis muaj ib yam ruaj khov hauv peb lub neej tsuas yog qhov uas yus yuav raug tej yam uas yus tsis paub txog. Vim cov nqi kho mob pheej nce, isalas kho mob yog tib qho kev pab uas pab tej yim neeg them nqi thaum raug mob loj heev, raug kab mob, los sis them nqi thaum xeeb tub, qhov kim tshaj plaws yog thaum yug me nyuam ntxov. Isalas tas ib sim neej muab nyiaj thaum ib tug neeg tuag thaum ntxov. Txhua yim neeg yuav tsum yuav isalas kho mob thiab tas sim neej.

Tom qab yuav tej yam no tas, peb yuav tsum ua tib zoo saib xyuas nyiaj kom thiaj tseg tau ib co rau kev tso peev. Kuv twb pom tias neeg tsawg tsawg

xwb tau tso peev kom thiaj tau paj ntau yog tias lawv tsis tau pib tseg ib co puag ntxov. Yog muaj li no yuav tsum tswj hwm thiab ua tib zoo txiav txim. Muaj ntau txoj kev tso peev. Kuv tsuas ntuas kom nej ua tib zoo xaiv cov neeg uas pab ntuas nej tias yuav tau tso peev li cas. Yuav tsum yog neeg uas nej tso siab tau rau vim lawv twb tso peev es tau paj ntau lawm rau yav tas los lawm.

Ua Ncaj

Qhov uas Nyob Ruaj Khov Thib #5: Ua ncaj rau nej txhua txoj kev siv nyiaj. Txoj kev ncaj ncees tsis yog ib yam rau yav tas los lawm xwb. Nws yog ib yam uas peb yuav tsum ua. Cov uas ua thawj coj thiab mej zeej hauv lub Koom Txoos, yuav tsum ua tus yam ntxwv zoo txog kev ncaj ncees.

Cov kwv tij thiab cov muam, dhau ntawm tsib txoj ntsiab cai no, kuv tau sim piav seb yuav ua li cas thiaj tsim ib tug qauv rau txoj kev siv thiab saib xyuas nyiaj txiag.

Kuv cia siab tias peb sawv daws yuav tau tej yam zoo thaum muab tej ntsiab cai no nruab rau hauv peb lub neej. Kuv hais lus tim khawv tias tej no muaj tseeb thiab tias lub Koom Txoos no thiab txoj hauj lwm uas peb ua no muaj tseeb tiag.

Los ntawm Thawj Tswj Hwm Tanner ib zag lus hauv lub tuam rooj sab laj rau kev pab nyiaj thaum lub Kaum Hli Ntuj 1979 hauv lub Koom Txoos ib lub tuam rooj sab laj (saib Conference Report, Kaum Hli Ntuj 1979, 117–21; los sis *Ensign*, Kaum Ib Hlis Ntuj 1979, 80–82).

NYIAJ TXIAG	NPAJ YUAV SIV LI CAS	TAU SIV LI CAS LAWM
Nyiaj khwv tau tom qab them se		
Lwm cov nyiaj		
Tau nyiaj ntau npaum li cas		
COV NQI	NPAJ YUAV SIV LI CAS	TAU SIV LI CAS LAWM
Kev them ib feem kaum		
Lwm cov nyiaj pub rau lub Koom Txoos		
Kev tseg nyiaj rau yav tom ntej		
Kev tseg nyiaj rau thaum muaj xwm txheej		
Zaub mov		
Nqi tsev los sis nqi xaub tsev		
Nqi fai fab		
Nqi tsheb		
Nqi rau txoj kev tiv nqi		
Isalas		
Tej nqi kho mob		
Khaub ncaws		
Lwm yam		
Lwm yam		
Lwm yam		
Lwm cov nqi		

KEM B
NIAM TXIV TXOJ KEV LAV RIS YUAV TAU
NTXIV DAG NTXIV ZOG RAU TSEV NEEG



“ME NYUAM YOG TEJ PAJ TSHAB UAS TUS TSWV PUB RAU NEEG”

9

COV TSWV YIM RAU KEV NRUAB RAU HAUV YUS LUB NEEJ

Raws li koj xav tau thiab toob kas qhia, ua raws li ib los sis ob qho tswv yim no.

- Cog lus tias yuav siv sij hawm nrog neb txhua tus me nyuam los sis ib tug me nyuam hauv neb tsev neeg. Thaum neb nrog txhua tus me nyuam sib tham, sim kawm ib yam tshiab txog tej yam uas tus me nyuam nyiam ua, nws tej kev xav tau, thiab tej teeb meem.
- Siv sij hawm nrog koj tus khub sib tham txog neb cov me nyuam. Xav txog txhua tus me nyuam tej yam zoo thiab tej teeb meem. Xyuas seb neb ua tau dab tsi koj thiaj pab tau txhua tus me nyuam.

KEV NYEEM NTAWV

Kawm zaj dab neeg nram no. Yog tias koj muaj poj niam muaj txiv, nyeem thiab nrog koj tus khub sib tham txog zaj no.

COV ME NYUAM TSIM TXIAJ, IB QHO KHOOM PLIG LOS NTAWM VAJTSWV

Thawj Tswj Hwm Thomas S. Monson
Tus Pab Cuam Thib Ib hauv Thawj Pawg Thawj
Tswj Hwm

Los ntawm phau Mathais peb kawm tias tom qab Yexus thiab Nws cov thwj tim nqis los ntawm lub Roob ntawm Cev Hloov Hlo los, lawv nres tim Kalilais, ces tau tuaj txog lub moos Kalena-us. Cov thwj tim tau hais rau Yexus tias, “Leej twg thiaj muaj hwj chim loj dua ntais hauv lub nceeg vaj saum ntuj ceeb tsheej?”

“Thiab Yexus hu ib tug me nyuam yaus los sawv ntawm cov thwj tim xub ntiag,

“Thiab hais tias, Kuv qhia tseeb rau nej hais tias, Yog tias nej tsis hloov nej lub siab kom zoo li ib tug me nyuam yaus lub, cais Vajtswv yeej yuav tsis los kav nej lub siab, nej yuav tsis tau nkag mus hauv lub nceeg vaj saum ntuj ceeb tsheej.

“Tus uas muaj lub siab mos siab muag li tus me nyuam yaus no, tus ntawd yog tus uas muaj hwj chim loj dua ntais hauv lub nceeg vaj saum ntuj ceeb tsheej.

“Thiab tus uas saib taus tus me nyuam yaus no kuj yog tus ntawd saib taus kuv thiab mloog kuv lus.

“Tiam sis yog leej twg ua rau cov me nyuam yaus uas ntseeg kuv no ib tug yuam kev ua txhaum, cais yuav cia li muab ib txhib niag zeb los dai rau tus ntawd caj dab, thiab muab nws pov rau hauv hiav txwv kuj yuav zoo dua li cia nws nyob.”¹

Tam li kuv xav ib qho tseem ceeb heev yog qhov uas Yexus hlub cov me nyuam yaus uas tsis ntev tas los no tau ncaim tawm ntawm lub neej ua ntej lub ntiag teb no. Cov me nyuam yaus tsis hais cov thaum ub los sis cov niaj hnuv no kuj ua tau koob hmoov rau peb lub neej, txhib kom peb muaj kev hlub, thiab yaum kom peb ua tej yam zoo.

Yog li ntawd peb yuav xav tsis thoob thaum peb hnov tus kws sau paj huam Wordsworth cov lus txog kev yug los uas hais tias: “Peb los ntawm cov huab cua uas muaj yeeb koob los / Los ntawm Vajtswv los, tus uas yog peb lub tsev.”²

Feem ntau cov me nyuam yaus no los rau cov niam txiv uas tos ntsoov lawv, tej niam thiab txiv uas muaj kev zoo siab vim lawv pom ib qho txuj ci loj thiab tseem ceeb uas yog kev yug los. Tsis muaj ib txoj kev txi loj dhau, tsis muaj ib qho mob uas mob dhau, tsis muaj kev tos uas ntev dhau.

Yog vim li ntawd peb thiaj xav tsis thoob thaum hnov xov ntawm ib lub nroog hauv Amelikas teb uas hais tias “ib tug ntxhais mos liab raug qhwv hauv ib daim ntawv thiab tau muab pov hauv thoob khib nyiab tab tom pw tom tsev kho mob. Ib tug ntawm lub tsev kho mob tau hais tias, tus me nyuam kuj nyob zoo. ‘Nws zoo ntxim hlub heev, thiab noj qab nyob zoo.’ Cov tub ceev xwm hais tias tus neeg nqa khib nyiab nrhiav pom tus me nyuam mos liab tom qab lawv nchuav cov khib nyiab rau hauv lawv lub tsheb thiab pom ib yam dab tsi nti nti. Cov tub ceev xwm tab tom nrhiav kom tau nws niam.”

Twb yog peb txoj hauj lwm dawb huv, peb ntiag tug—kuj yog peb lub cib fim dawb ceev—kom zoo

siab tos txais cov me nyuam uas los rau hauv peb tej tsev thiab lub siab.

Peb cov me nyuam muaj peb hoob kawm hauv lawv lub neej nyias txawv nyias. Kuv hais txog hoob kawm tom tsev kawm ntawv, hoob kawm tom lub koom txoos, thiab hoob kawm hauv tsev.

Hoob Kawm tom Tsev Kawm Ntawv

Lub Koom Txoos ib txwm txhawb nqa tej kev kawm ntawv thiab yaum kom nws cov mej zeej yuav koom tej qhov uas niam txiv nrog cov xib hwb ua hauj lwm ua ke thiab lwm yam uas yuav pab peb cov me nyuam kev kawm ntaub kawm ntawv.

Tsis muaj lwm yam ntawm kev kawm ntaub kawm ntawv uas tseem ceeb npaum tus xib hwb uas hlub, qhuab qhia, thiab txhib cov tub thiab ntxhais hluas. Thawj Tswj Hwm David O. McKay tau hais tias: “Kev qhia yog txoj hauj lwm uas muaj yeeb koob ntau tshaj plaws hauv lub ntiaj teb. Yog tias lub tsev yuav dawb huv thiab nyob ruaj khov thiab lub teb chaws yuav vam meej thiab tsis muaj kev xwm txheej yuav tsum ua tib zoo qhia cov me nyuam yaus.”³ Kuv ntseeg tias peb yuav pom tias cov xib hwb thiab lawv txoj hauj lwm tseem ceeb npaum li cas thiaj ua tau tej tsev zoo rau lawv, muab cov ntawv zoo, thiab them nyiaj zoo kom lawv paub tias peb ris lawv txiaj thiab ntseeg lawv siab npaum li cas.

Peb txhua leej txhia tus nco ntsoov cov xib hwb peb muaj thaum peb tseem hluas. Kuv tus xib hwb qhia kev ntaus nkauj hu ua Niam Sharp. Nws ua rau nws cov tub kawm nyiam cov nkauj thiab tau qhia kom peb paub tej suab nkauj. Kuv nco txog Niam Ruth Crow uas qhia txog kev noj qab nyob zoo. Txawm tias yog ib lub caij muaj kev txom nyem ntau los, nws tau pab kom txhua tus uas kawm hoob rau ntawd tau ib daim ntawv txog kev kuaj hniav. Nws tau kuaj txhua tus tub kawm cov hniav thiab tau pab kom txhua tus tau kev kho hniav txawm tias tau siv cov nyiaj luam los sis nws cov los xij peem. Thaum Niam Burkhaus, tus uas qhia txog lub ntiaj teb, tau nthuav cov pheem thib txog lub ntiaj teb thiab siv ib tug pas qhia peb txog cov teb chaws thiab lawv cov nroog loj thiab lawv yam lus thiab tej kev cai, kuv yeej tsis tau xav los sis ua npau suav tias yuav muaj ib hnuv tom ntej uas kuv yuav tau mus xyuas cov teb chaws thiab cov neeg no li.

Cov xib hwb rau peb cov me nyuam no tseem ceeb npaum li cas, lawv pab qhuab qhia thiab txhib kom cov me nyuam ua neeg zoo!

Hoob Kawm tom lub Koom Txoos

Hoob kawm tom lub koom txoos ntxiv ib yam tseem ceeb rau cov me nyuam yaus los sis cov tub ntxhais hluas kev kawm ntawv. Nyob ntawm no

txhua tus xib hwb pab tau cov uas mloog nws tej zaj lus qhia yuav hnov tau nws zaj lus pov thawj. Nyob hauv Koom Haum Me Nyuam Yaus, Hnuv Caij Kev Kawm Vaj Lug Kub, Koom Haum Ntxhais Hluas tej kev sib ntsib, thiab cov ntawm lub Pov Thawj Hwj Aloos, cov xib hwb uas tau ua tib zoo npaj lawm, uas raug hu los ntawm Vajtswv kev tshwm sim los, pab tau txhua tus me nyuam, thiab yuav txhib kom lawv txhua tus yuav “nrhiav...cov lus txawj ntse hauv tej ntawv zoo; nrhiav kom tau kev kawm, uas yog kev kawm ntawv thiab kev rau siab ntseeg.”⁴ Hais lus txhawb pab li no thiab qhia tej yam ntawm sab ntsuj plig yuav pab lawv lub neej thiab yuav tshem tej ntawd ntawm lawv tus ntsuj plig tsis tau li.

Ntau xyoo tas los lawm, nyob hauv lub Koom Txoos ib lub rooj noj mov, wb tau nrog Thawj Tswj Hwm thiab Muam Harold B. Lee zaum. Thawj Tswj Hwm Lee tau hais rau peb tus ntxhais Ann tias: “Tus Tswv tau muab koob hmoov rau koj lawm, koj tau ib lub cev thiab ntsej muag zoo nkauj heev. Thov kom koj yuav ua tib zoo xyuas kom sab hauv kom yuav zoo nkauj ib yam nkaus, koj thiaj yuav muaj kev zoo siab tiag tiag li.” Tus xib hwb zoo no qhia Ann tias nws yuav tau ua li cas thiaj mus txog peb Leej Txiv Saum Ntuj Ceeb Tsheej lub nceeg vaj xilethi-aus.

Tus xib hwb uas muaj siab mos siab muag nyob hauv hoob kawm tom lub Koom Txoos pab tau cov tub kawm kom lawv thiaj nyiam cov vaj lug kub. Tus xib hwb coj tau cov Thwj Tim thaum ub thiab tus Cawm Seej rau lub ntiaj teb los nyob hauv hoob kawm thiab lawv kuj yuav nyob hauv peb cov me nyuam lub siab, lub paj hlwb, thiab hauv lawv cov ntsuj plig thiab.

Hoob Kawm Hauv Tsev

Tej zaum hoob kawm tseem ceeb tshaj plaws yog hoob kawm hauv tsev. Vim twb yog nyob hauv tsev peb tau peb tej kev xav, peb tej kev ntseeg. Nyob hauv tsev kev cia siab loj hlob tuaj los sis yuav puas tsuaj mus. Peb tej tsev yog chaw tsim peb lub neej. Tej yam peb ua hauv no coj peb lub neej txoj hau kev thaum peb tawm ntawm peb lub tsev mus. Dr. Stuart E. Rosenberg hauv nws phau ntawv *The Road to Confidence* sau hais tias, “Txawm muaj tej yam tshiab uas luag tau tsim, tej yam luag xav tias haib heev, yeej tsis tau muaj leej twg tau tsim, los sis yeej yuav tsis tsim, ib yam dab tsi uas pauv tau yus tsev neeg chaw.”⁵

Ib lub tsev uas muaj kev zoo siab tsuas yog lub ntuj ceeb tsheej. Thawj Tswj Hwm George Albert Smith tau nug tias, “Peb puas xav kom peb tej tsev muaj kev zoo siab? Yog tias peb xav tau qhov ntawd, cia muaj kev thov Vajtswv ntau, muaj kev ris txiaj thiab xav ua Vajtswv tsaug.”⁶

Muaj tej thaum cov me nyuam uas los nyob hauv ntiab teb no yuav xiam hoob khab me ntsis. Txawm peb xav ntau npaum li cas los, yus yeej paub tsis tau yog vim li cas muaj li ntawd. Kuv qhuas cov niam txiv uas tsis yws li tiam sis puag nkaus tus me nyuam ntawd thiab koj lawv los rau hauv lawv lub neej thiab haj yam hlub thiab tu Leej Txiv Saum Ntuj Ceeb Tsheej tus me nyuam ntawd.

Muaj ib hnuv thaum kuv nyob pem roob hu ua Aspen Grove Chaw Ua Si Rau Tsev Neeg [Aspen Grove Family Camp], kuv pom ib leej niam tab tom pub ib tug ntxhais hluas noj tus no xiam hoob khab txij thaum nws yug los. Niam tau hais ib diav mov rau nws, ces muab me ntsis dej rau nws haus, nws maj mam tuav nws tus ntxhais caj dab. Kuv txawm xav rau kuv tus kheej tias, *Tau 17 xyoo diam, Niam tau pab nws tus ntxhais li no thiab tau ua lwm yam rau nws thiab, yeej tsis xav txog nws tus kheej, nws txoj kev zoo siab, los sis nws cov zaub mov kiag li.* Thov kom Vajtswv yuav foom koob hmoov rau cov niam zoo li no, cov txiv zoo li no, cov me nyuam zoo li no. Thiab Nws yeej yuav ua li ntawd.

Me Nyuam Yaus Tsis Muaj Txim Li

Cov niam txiv nyob qhov txhia chaw paub tias tej kev xav tob tob yeej tsis los ntawm tej qhov loj loj hauv lub ntiab teb no, los sis nrhiav tsis tau tej no hauv cov ntawv los yog ntawv qhia keeb kwm, tiam sis tej kev xav no tsuas los thaum ib tug niam los sis txiv ntsia nws tus me nyuam uas tab tom pw tsaug zog.

Thaum ua li no, yus thiaj xav txog Charles M. Dickinson cov lus uas muaj tseeb uas hais tias:

Rau cov uas hlub lawv thiab hauv tsev ces lawv zoo li cov mlom!

*Lawv yog Vajtswv cov tim tswv uas ua zam lawm;
Lawv ci ntsa iab zoo li Vajtswv nyob ntawm lawv ib ncig,*

*Nws lub yeeb koob tseem ci ntawm lawv qhov muag los;
Cov me nyuam uas nyob sab nraum tsev thiab ntawm Ntuj Ceeb Tsheej,*

Lawv tau ua rau kuv ua siab mos siab muag dua yav tas los;

Thiab kuv paub tias Yexus ua li cas thiaj piv tau Vajtswv lub nceeg vaj rau ib tug me nyuam. ⁷

Niaj hnuv thaum peb nrog peb cov me nyuam, peb pom tias lawv txawj ntse heev thiab feem ntau qhia tej qhov tseeb. Charles Dickens, tus kws sau phau ntawv *A Christmas Carol*, piav txog qhov no thaum nws hais txog Bob Cratchit tsev neeg pluag pluag uas sib sau ua ke yuav noj rooj mov rau Christmas. Bob, uas yog leej txiv, tab tom ev nws tus tub Tiny Tim uas muaj mob heev los tsev. Tiny Tim "nqa nws tus pas nrig thiab muaj tej kav hlau txheem nws ob sab ceg." Bob tus poj niam nug nws tias, "Thiab tus me nyuam Tim no puas tsim txiaj?"

Bob tias, "Nws tsim txiaj kawg, zoo tshaj nyiaj thiab kub. Tej thaum nws txawj xav, feem ntau nws zaum nws ib leeg xwb, thiab xav txog tej yam txawv heev. Thaum wb tab tom los tsev nws hais rau kuv tias nws cia siab tias cov neeg tom lub koom txoos yuav pom nws, vim nws yog neeg tuag taw, ces lawv yuav zoo siab vim thaum Hnuv Christmas lawv mam li nco qab tias leej twg tau ua rau tus neeg tuag taw mus kev thiab tus dig muag rov pom kev." ⁸

Charles Dickens kuj tau hais tias, "Kuv hlub cov neeg me me no, thiab tsis yog ib yam me me, thaum lawv cov uas nyuam qhuav ncaim ntawm Vajtswv los, hlub peb ib yam."

Cov me nyuam yaus yeej ua tej yam txawv txawv thiaj qhia tau lawv txoj kev hlub. Ntau xyoo tas los lawm thaum txog kuv hnuv yug, ib tug me nyuam ntxhais tau sau ib daim ntawv nco txog kuv hnuv yug thiab tso ib lub ntsuas phoo rau hauv ib hnab ntawv, nws nyiam lub ntawd heev thiab tau xav tias kuv yuav muaj kev zoo siab yog tias tau lub no ua ib qho khoom plig.

"Muaj ntau yam zoo nkauj heev hauv lub ntiab teb, yeej tsis muaj dab tsi zoo nkauj tshaj thaum ib tug me nyuam yaus tab tom muab pub ib yam dab tsi. Txawm yog ib yam me me los. Tus me nyuam muab lub ntiab teb rau yus. Nws qhib lub ntiab teb rau yus zoo nkaus li ib phau ntawv uas koj tsis tau nyeem dua. Tiam sis thaum yus tau qhov khoom plig, nws yeej muaj tej yam txawv txawv, tau muab dab tsi lo rau tiam sis nws qaij tod,...ces tus tim tswv zoo nkaus li ib tug roj hmab lawm. Tus me nyuam tsis tshuav muaj dab tsi nws pub tau, rau qhov nws tsis paub tias nws twb muab tag nrho txhua yam rau yus lawm." ⁹

Qhov khoom plig uas Jenny muab rau kuv yeej zoo li ntawd.

Cov me nyuam yaus yeej muaj kev ntseeg lawv Leej Txiv Saum Ntuj Ceeb Tsheej thiab lawv paub tias Nws yeej xav thiab yuav teb lawv tej lus thov. Tam li kuv tau pom, thaum ib tug me nyuam yaus thov Vajtswv, Nws yeej mloog.

Cia kuv hais rau nej txog Barry Bonnell thiab Dale Murphy, uas yog ob tug txawj siv pas ntaus pob thiab thaum i tau ua si nrog pab Atlanta Braves. Ob leeg ntawd tau los ntseeg lub Koom Txoos no, Barry Bonnell tau muab Dale Murphy ua kev cai raus dej.

"Muaj ib qho xwm thaum xyoo 1978 uas Barry piav tias tau 'pauv nws lub neej.' Nws tab tom ntaus pob tsis tshuav zoo pes tsawg. Vim nws ua tsis zoo kiag li, nws chim siab rau nws tus kheej thiab nyuaj siab heev. Thaum Dale Murphy thov nws nrog nws mus xyuas lub tsev kho mob nws tsis tau xav mus li, tiam sis nws tseem tau mus. Nyob ntawd nws tau ntsib Ricky Little, ib tug tub uas nyiam pab Atlanta Braves heev, tiam sis tus tub no muaj ib yam mob

uas nws lub cev tsis muaj ntshav dawb txaus. Yus yeej pom tau tias tsis ntev ces nws yuav tso lub neej no tseg. Barry ua tib zoo xav seb yuav hais li cas thiaj nplij tau nws lub siab tiam sis xav tsis tawm ib yam dab tsi li. Thaum kawg ces nws nug tias puas muaj dab tsi nws ua tau. Tus me nyuam xav ib pliag, ces nws nug seb nkawd puas kam ntaus ib qho home run lwm zaus lawv ntaus pob. Yav tom ntej Barry tau hais tias, 'qhov ntawd yuav tsis nyuaj rau Dale, vim hmo ntawd nws twb ntaus ob qho home run lawm, tiam sis tau ib ntu no kuv ntaus tsis tshuav zoo thiab xyoo no tsis tau ntaus ib qho home run kiag li. Ces kuv txawm nyob sov siab sov thiab tau hais rau Ricky tias wb mam ua li.' Hmo ntawd Barry tau ntaus nws tib qho home run rau xyoo ntawd." ¹⁰ Ib tug me nyuam yaus txoj kev thov Vajtswv twb raug teb lawm, tus me nyuam tau li nws lub siab xav.

Xav Tau Chaw tsis Muaj Kev Xwm Txheej

Yog tias txhua tus me nyuam tau muaj niam txiv uas hlub lawv, tej tsev tsis muaj xwm txheej, thiab cov phooj ywg uas hlub lawv thiab, lub ntiaj teb no yuav zoo kawg. Qhov tu siab mas, yog vim txhua tus me nyuam tsis muaj hmoov li no. Ib txhia pom lawv leej txiv ntaus lawv niam, lwm cov mag niam txiv ntaus lawv. Qhov ntawd phem heev, yog kev txhaum loj kawg, ib qho txaj muag kawg!

Tej tsev kho mob nyob qhov txhia chaw tos txais cov me nyuam yaus li no, mag ntaus thiab doog ntshav tas, thiab luag tab meeg dag tias tus me nyuam "tau mus tsoos phab ntsa" los sis "tau poob ntaiv." Neeg dag, cov neeg siab phem uas ntaus cov me nyuam, yeej yuav muaj ib hnuv twg thaum lawv yuav raug txim rau lawv tej kev txhaum. Tus me nyuam uas raug mob, tu siab, thiab tej thaum raug luag ua phem ua qias rau yuav tsum txais kev pab.

Ib tug txiav txim sau ib tsab ntawv rau kuv thiab tias: "Kev ua phem ua qias rau cov me nyuam yaus yog txoj kev txhaum loj tshaj plaws hauv lub neej no. Haj yam muaj kev ntaus, kev hais lus tsis zoo, thiab kev ua phem ua qias rau cov me nyuam yaus. Tej tsev hais plaub ntug muaj tej kev txhaum li no puv nkaus."

Lub Koom Txoos tsis pom zoo rau tej kev phem no. Tiam sis peb tab meeg tawm tsam cov neeg uas ua li no rau Vajtswv cov me nyuam. Cia peb pab tus me nyuam dim qhov no, ces tu, hlub, thiab kho nws. Cia coj tus neeg txhaum los txais kev txim lij, kev lav ris, thiab kev pab kho nws kom nws tsis txhob ua phem li no ib zaug ntxiv li. Thaum koj los sis kuv paub txog kev phem li no thiab tsis ua ib yam dab tsi kho nws, ces peb thiaj yog ib qho ntawm qhov teeb meem no. Peb muaj ib qho txhaum lawm thiab. Peb yuav raug ib qho txim thiab.

Kuv cia siab tias kuv tsis tau hais lus mob nej siab, tiam sis kuv hlub cov me nyuam yaus heev thiab paub tias tus Tswv los hlub lawv thiab. Tsis muaj lwm zaj dab neeg uas qhia txoj kev hlub no ntau npaum thaum Yexus foom koob hmoov rau cov me nyuam yaus li piav hauv Nifais phau 3. Nws piav txog Yexus txoj kev kho cov neeg mob, qhuab qhia cov neeg, thiab thov Leej Txiv Saum Ntuj Ceeb Tsheej kom pab lawv. Ces cia kuv hais ob peb lo ntawm zaj no uas hais tias:

"Yexus tau coj lawv cov me nyuam ib leeg dhau ib leeg, thiab tau foom koob hmoov rau lawv, thiab tau thov Leej Txiv pab lawv.

"Thiab thaum nws ua li no tas lawm nws tau los kua muag dua;

"Thiab nws tau hais rau pab neeg coob, thiab hais rau lawv tias: Cia li ntsia nej cov me nyuam.

"Thaum lawv ntsia saib lawv tsa muag ntsia saum ntuj, thiab tau pom rooj ntuj qhib plho, thiab lawv tau pom cov tim tswv nqis saum ntuj los zoo nkaus li yog ib nplaim hluav taws;...thiab cov tim tswv tau foom koob hmoov rau lawv." ¹¹

Tej zaum nej yuav nug tias, *Es niaj hnuv nim no puas muaj tej xwm zoo li ntawd?* Cia kuv hais ib zag txog ib tug pog thiab yawg laus uas ua tub txib ob peb xyoo tas los lawm thiab qhov no piav txog kev foom koob hmoov rau nkawd tus tub xeeb ntxwv. Tus yawg laus uas ua tub txib sau hais tias:

"Kuv tus poj niam Deanna wb tab tom ua tub txib hauv Jackson, Ohio. Qhov uas peb txhawj txog tshaj plaws thaum peb yuav los ua tub txib yog wb tsev neeg. Vim wb yuav tsis nyob ntawd thaum lawv muaj teeb meem.

"Ua ntej wb sawv kev mus ua tub txib, wb tus tub xeeb ntxwv, R. J., uas muaj ob xyoo tawm, tau mus phais qhov muag vim nws laj muam. Nws niam tau thov kuv nrog lawv mus vim R. J. thiab kuv tau ua phooj ywg zoo heev. Twb phais tau zoo lawm, tiam sis R. J. tau quaj ua ntej thiab tom qab kev phais vim tsis muaj ib tug ntawm nws tsev neeg uas mus tau hauv hoob phais, thiab nws ntshai heev.

"Ze li rau hlis tom qab ntawd, thaum wb tseem ua tub txib, R. J. tau mus phais lwm sab qhov muag. Nws niam hu xov tooj qhia wb thiab tau qhia tias nws xav kom kuv nyob ntawd thiab. Vim wb nyob deb deb ua tub txib kuv thiaj mus tsis tau. Deanna wb tau yoo mov thiab thov tus Tswv kom nplij peb tus tub xeeb ntxwv lub siab thaum nws mus phais qhov muag.

"Tsis ntev tom qab phais tas wb tau hu mus thiab kawm tias R. J. tau nco lub sij hawm tas los lawm thiab tsis tau xav ncaim nws niam txiv. Tiam sis thaum nws nkag kiag mus hauv hoob phais, nws

txawm nyob ntsiag to. Nws tau pw ntawm lub rooj ntawd, tau hle nws tsom iav, thiab tau raug phais qhov muag tsis ntshai hlo li. Wb tau muaj kev ris txiaj heev; Vajtswv tau teb peb cov lus thov.

Ob peb hnuv tom qab ntawd, wb tau hu mus nrog wb tus ntxhais tham thiab nug txog R. J. Nws twb zoo zog lawm, thiab nws niam qhia peb li no: Tom qab nws raug phais tas lawm, R. J. tsim los thiab qhia nws niam tias nws Yawg tau nrog nws nyob thaum nws raug phais qhov muag. Nws tias, ‘Yawg tau nyob ntawd thiab tau pab kom txhua yam mus zoo.’ Rau tus tub hluas ntawd tus Tswv tau ua rau tus neeg xa tshuaj tsaug zog lub ntsej muag zoo li nws yawg lub, tiam sis nws pog thiab yawg twb nyob deb li 2,897 kis laus mev mus ua tub txib.”

R. J., tej zaum yawg tsis tau nyob ntawm koj sab txaj, tiam sis koj tau nyob hauv nws cov lus thov Vajtswv thiab hauv nws tej kev xav. Tus Tswv tau tuav koj hauv nws txhais tes thiab koj tau koob hmoov los ntawm peb sawv daws Leej Txiv.

Kuv cov kwv tij nkauj muam sawv daws, thov kom cov me nyuam yaus tej kev luag nyav uas rau peb muaj kev zoo siab. Cia siab tias cov me nyuam txoj kev ntseeg yuav nplij peb tej siab. Thov kom cov me nyuam txoj kev hluv yuav txhib kom peb ua tej yam zoo. “Cov me nyuam yog tus Tswv ib qho txiaj ntsim.”¹² Thov kom peb Leej Txiv Saum Ntuj Ceeb Tsheej yuav foom koob hmoov rau cov ntsuj plig tsim txiaj no, cov uas yog tus Xib Hwb cov phooj ywg zoo.

Los ntawm phau *Ensign* thaum lub Rau Hli Ntuj 2000, phab 2—5.

LUS CIM

1. Mathais 18:1–6.
2. “Ode: Intimations of Immortality from Recollections of Early Childhood.”
3. *Gospel Ideals* (1954), 436.
4. Phau Lus Qhuab Qhia thiab Kev Khi Lus 88:118.
5. *The Road to Confidence* (1959), 121.
6. Hauv Conference Report, Plaub Hlis Ntuj 1944, 32.
7. Los ntawm *The Children*, hauv Jack M. Lyon thiab lwm cov neeg kho ntawv, *Best Loved Poems of the LDS People* (1996), 21.
8. *A Christmas Carol and Cricket on the Hearth* (tsis sau hnuv twg), 50–51.
9. Margaret Lee Runbeck, *Bits & Pieces*, Cuaj Hlis Ntuj tim 20, 1990.
10. James L. Ison, *Mormons in the Major Leagues* (1991), 21.
11. 3 Nifais 17:21–24.
12. Paj Lug 127:3.

NIAM THIAB TXIV TXOJ NTIAG TUG HAUJ LWM DAWB CEEV

10

QHOV 1: LEEJ TXIV TXOJ HAUJ LWM

COV TSWV YIM RAU KEV NRUAB RAU HAUV YUS LUB NEEJ

Raws li koj xav tau thiab toob kas qhia, ua raws li ib los sis ob qho tswv yim no.

- Tshab xyuas leej txiv thiab leej niam tej hauj lwm raws li sau tseg hauv nqe xya hauv “Tsev Neeg: Ib Zaj Lus Tshaj Tawm rau lub Ntiaj Teb” (saib phab ntawv iv). Thov Vajtsv seb yuav muab tej lus

ntuas no nruab rau hauv nej lub neej li cas tom tsev thiab nej yuav ua li cas thiaj ua tau raws li tej no qhia.

- Sau ib tsab ntawv mus rau koj txiv los sis yawg.

KEV NYEEM NTAWV

Kawm zaj dab neeg nram no. Yog tias koj muaj poj niam muaj txiv, nyeem thiab nrog koj tus khub sib tham txog zaj no.

RAU COV TXIV TSEV HAUV IXAYEES

Thawj Tswj Hwm Ezra Taft Benson
Tus Thawj Tswj Hwm thib 13 hauv lub Koom Txoos

Kuv cov me kwv tij uas kuv hlub, kuv zoo siab tuaj nrog nej sib koom ua ke nrog cov uas tuav Vajtsv lub pov thawj hwj. Kuv thov kom tus Tswv tus Ntsuj Plig yuav nrog nraim kuv thiab nej thaum uas kuv hais lus rau nej txog ib yam uas tseem ceeb heev. Hmo no kuv xav hais lus rau cov txiv tsev uas tuaj koom hauv no thiab thoo plaws lub Koom Txoos hais ntsig txog lawv txoj hauj lwm dawb ceev.

Kuv cia siab tias nej cov tub hluas kuj yuav ua tib zoo mloog thiab, vim rau qhov nej tab tom npaj yuav ua cov txiv tsev hauv lub Koom Txoos rau yav tom ntej.

Ib txoj Hauj Lwm uas Kav Mus Ib Txhis

Cov txiv tsev es, nej txoj ntiag tug hauj lwm yeej kav mus ib txhis thiab nej yeej yuav tsis raug tso tawm ib zaug li. Tej hauj lwm hauv lub Koom Txoos, txawm tias tej ntawv tseem ceeb npaum los, tej ntawd tsuas kav ib nyuag ntu xwb, thiab yuav raug tso tawm raws kev raws cai. Tiam sis txoj hauj lwm ua txiv tsev yeej kav mus ib txhis, thiab nws tseem ceeb tshaj plaws li. Nws yog ib txoj hauj lwm rau lub sij hawm no thiab tas mus ib txhis.

Thawj Tswj Hwm Harold B. Lee tau hais tias “tus Tswv txoj hauj lwm tseem ceeb tshaj plaws uas nej [cov txiv tsev] yuav ua yeej nyob sab hauv nej vaj nej tsev. Kev mus qhia tom tsev, ua tus npis sov txoj hauj lwm, thiab lwm yam hauv lub Koom Txoos yeej tseem ceeb, tiam sis txoj hauj lwm tseem ceeb tshaj plaws yog sab hauv nej vaj nej tsev”

(*Strengthening the Home* [me nyuam phau ntawv, 1973], 7).

Dab tsi no, ces, ib leej txiv txoj kev lav ris dawb ceev yog nyob rau hauv nws vaj tsev los? Kuv xav qhia tias muaj ob txoj kev lav ris rau txhua tus txiv tsev hauv Ixayees.

Muab tej Khoom Uas Yuav Tsum Muaj

Qhov xub thawj, koj muaj ib txoj kev lav ris dawb ceev kom muab tau tej khoom uas koj tsev neeg yuav tsum muaj.

Tus Tswv qhia meej meej hais tias leej twg yuav tsum saib xyuas thiab tu ib co tub ki ncaj ncees. Puag thaum chiv keeb, Adas, tsis yog Evas, uas raug ntuas kom mus khwv noj khwv haus.

Tus Thwv Tim Pov Lauj ntuas cov txiv tsev thiab cov niam hais tias, “Tus neeg uas tsis pab nws kwv nws tij los sis nws tsev neeg, nws tsis txhob hais tias nws yog tus ntseeg, nws haj yam siab phem dua tej neeg tsis ntseeg thiab” (1 Timautes 5:8).

Nyob hauv lub Koom Txoos uas muab txum tim rov qab los zaj liv xwm, tus Tswv tau txib kom cov txiv neej yuav tsum saib xyuas lawv tus poj niam thiab tsev neeg. Thaum lub Ib Hlis Ntuj xyoo 1832 nws tau hais tias, “Muaj tseeb tiag kuv hais rau nej, tias txhua tus txiv neej yuav tsum saib xyuas nws tsev neeg, cia nws ua li ntawd, ua li ces nws thiaj yuav tsis xiam nws lub yeeb koob” (Q&K 75:28). Peb lub hlis tom qab ntawd tus Tswv tau hais dua tias, “Cov poj niam muaj cai kom thiaj tau lawv tus txiv saib xyuas lawv, mus txog thaum twg tsis muaj lawv tus txiv” (Q&K 83:2). Nov yog tus poj niam thiab leej niam txoj cai uas los saum ntuj los. Thaum uas nws saib xyuas thiab tu cov me nyuam hauv tsev,

nws tus txiv mus khwv noj khwv haus rau nws tsev neeg, kom tus poj niam thiaj tau tu cov me nyuam.

Nyob hauv ib lub tsev uas tus txiv muaj cuab kav, nws yuav tsum yog tus uas khwv noj khwv haus. Tej thaum peb hnov txog cov txiv uas, vim tsis tshua muaj hauj lwm ua, lawv thiaj tau poob lawv txoj hauj lwm ces xav kom tus poj niam tawm mus nrhiav hauj lwm ua, txawm tias tus txiv tsis muaj cuab kav saib xyuas nws tsev neeg. Thaum muaj li no, peb yaum kom cov txiv tsev ua txhua yam nws ua tau kom nws tus poj niam thiaj nyob twj ywm hauv tsev tu cov me nyuam es nws tseem saib xyuas nws tsev neeg zoo npaum li nws ua tau, tab txawm nws txoj hauj lwm tsis zoo heev thiab nws tsev neeg tau tswj hwm lawv cov nyiaj me ntsis.

Tsis tas li ntawd xwb, txoj kev xav mus kawm ntawv los sis yuav khoom tsis tsim nyog kom thiaj laug sij hawm muaj me nyuam xwv kom tus poj niam tseem ua hauj lwm pab khwv nyiaj txiag.

Thawj Tswj Hwm Kimball cov Lus Ntuas

Kuv nco txog peb tus yaj saub Spencer W. Kimball cov lus ntuas rau cov niam txiv hluas uas tseem mus kawm ntawv. Nws tau hais tias: “Kuv tau qhia ntau txhiab neeg hluas tias thaum lawv sib yuav lawm lawv yuav tsum tsis txhob tos kawm ntawv tiav thiab yuav ub yuav no tas tso mam li pib yug me nyuam...Lawv yuav tsum nyob ua ke thiab cia li yug me tub me nyuam. . . .

Thawj Tswj Hwm Kimball hais ntxiv tias, “Kuv tsis paub txog ib nqe vaj lug kub twg uas tso cai rau ib tug poj niam hluas kom tsis txhob muaj me nyuam xwv kom nws thiaj ua tau hauj lwm txhawb pab nws tus txiv txoj kev kawm ntawv. Muaj ntau txhiab tus txiv tsev uas tib txhij tau ua hauj lwm, kawm ntawv thiab saib xyuas lawv tsev neeg” (“Marriage Is Honorable,” hauv *Speeches of the Year, 1973* [1974], 263).

Ib Leej Niam txoj Hauj Lwm hauv lub Tsev

Cov kwv tij hauv lub pov thawj hwj, kuv pheej ntuas nej tias qhov uas leej niam nyob hauv tsev tu, saib xyuas, thiab qhuab qhia cov me nyuam txog tej ntsiab cai ncaj ncees yog ib qho uas tseem ceeb heev.

Thaum kuv mus xyuas tag nrho lub Koom Txoos, kuv xav tias cov niam ntawm Haiv Neeg Ntseeg hauv Hnub Nyoog Kawg feem ntau yeej xav ua raws li cov lus ntuas no. Tiam sis peb paub tias tej thaum ib leej niam ua hauj lwm sab nraum lub tsev vim hais tias nws tus txiv yaum los sis yuam kom nws ua li ntawd. Nws yog tus uas xav tau qhov no kom thiaj tau nyiaj ntxiv yuav ub yuav no. Yog muaj li no tsis yog tsev neeg yuav raug tej yam tsis zoo xwb, kuv cov kwv tij ‘es, tiam sis kuj yuav ua rau yus tsis loj hlob ntawm sab ntsuj plig thiab. Kuv hais rau nej

txhua tus tias, tus Tswv tau txib kom cov txiv neej yuav tau saib xyuas lawv tsev neeg xwv kom tus poj niam thiaj muaj cai ua raws li nws txoj kev lav ris ua leej niam hauv tsev.

Niaj Hnub No txoj Kev Npaj Rau Tsev Neeg Haj Yam Tseem Ceeb Heev

Nej cov txiv tsev, ib qho tseem ceeb heev rau nej txoj kev saib xyuas nej tsev neeg kuj yog txoj kev npaj nej tsev neeg rau tej lub sij hawm muaj kev xwm txheej. Kev npaj rau tsev neeg yog ib txoj ntsiab cai qub rau kev noj qab nyob zoo. Niaj hnub no txoj ntsiab cai no haj yam tseem ceeb heev.

Kuv xav nug nej tias, nej puas tau npaj tseg zaub mov, khaub ncaws, thiab qhov twg uas ua tau roj av txaus kav ib xyoos? Txoj kev tshem sim kom ua thiab khaws zaub nov cia yeej tseem ceeb npaum li peb txoj kev ua neej nyob npaum li txoj kev nyob hauv lub nkoj hauv Nau-es lub caij nyoog.

Thiab, nej puas tab tom ua neej nyob raws li nej khwv tau thiab tseg me ntsis cia?

Nej puas ua ncaj rau tus Tswv thaum nej them nej ib feem kaum? Txoj kev ua raws li txoj kev cai no yuav coj koob hmoov ntawm sab ntsuj plig thiab sab cev nqaij tawv tib si los rau nej.

Muaj tseeb tiag, kuv cov kwv tij es, nej cov uas ua txiv tsev hauv Ixayees nej muaj kev lav ris ntau yuav tsum saib xyuas nej tsev neeg thiab npaj kom txaus thaum twg muaj xwm txheej thiab.

Ua Thawj Coj ntawm Sab Ntsuj Plig

Qhov thib ob, nej muaj kev lav ris dawb ceev kom ua thawj coj ntawm sab ntsuj plig rau nej tsev neeg thiab.

Nyob hauv ib phau ntawv uas Pawg Kaum Ob tug Thwj Tim tau luam tawm ob peb xyoos tas los lawm, peb tau hais tias: “Kev ua leej txiv yog kev ua thawj coj, txoj kev ua thawj coj uas tseem ceeb tshaj plaws. Nws ib txwm muaj li ntawd; thiab yuav yog li ntawd tas mus li. Leej txiv, nrog rau nws tus khub rau tas mus ib txhis txoj kev pab thiab kev sib sab laj thiab kev txhawb pab, nej yog tus coj kav hauv tsev” (*Father, Consider Your Ways* [me nyuam phau ntawv, 1973], 4–5).

Tiam sis, nrog rau txoj kev tswj kav ntawd yeej muaj tej kev lav ris tseem ceeb heev. Tej thaum peb hnov txog cov txiv neej, twb muaj ib txhia hauv lub Koom Txoos, uas xav tias vim lawv yog tus thawj coj hauv tsev lawv siab dua cov thiab ua rau lawv muaj cai quab yuam thiab tswj hwm lawv tsev neeg.

Tus Thwj Tim Pov Lauj tau hais tias “tus txiv yog tus kav tus poj niam, *ib yam li* Yexus Khetos yog tus kav cov ntseeg” (Efexaus 5:23; tau ntxiv cov ntawv qaij). Qhov ntawd yog tus qauv uas peb yuav tsum

yoog thaum coj kav hauv tsev. Peb tsis pom tus Cawm Seej coj lub Koom Txoos ua ib tug neeg nyaum los sis tsis ua siab zoo. Peb tsis pom tus Cawm Seej saib tsis tau Nws lub Koom Txoos rau nqi los sis tsis saib xyuas li. Peb tsis pom tus Cawm Seej yuam los sis quab yuam tib neeg kom thiaj ua raws li Nws lub siab nyiam. Peb yeej tsis pom tus Cawm Seej ua ib yam dab tsi tsuas yog txhawb pab, txhawb nqa, nplij, thiab pab lub Koom Txoos tau kev tsa nto. Cov kwv tij es, kuv hais lus mos mos rau nej tias, Nws yog tus yam ntxwv zoo uas peb yuav tsum raws qab thaum uas peb ua tus thawj coj ntawm sab ntsuj plig rau peb tsev neeg.

Hais txog txoj kev sib raug zoo nrog koj tus poj niam ces qhov no haj yam muaj tseeb.

Hlub Koj tus Poj Niam

Xav hais tus Thwj Tim Pov Lauj cov lus ntuas thaum nws hais txog ib lub ntsiab zoo. Nws tau hais li no hais tias, “Nej cov uas yog txiv nyias yuav tsum hlub nyias tus poj niam, ib yam nkaus li Yexus Khetos hlub cov ntseeg” (Efexaus 5:25).

Hauv kev tshwm sim hauv hnub nyoog kawg no tus Tswv hais ntxiv txog kev lav ris no. Nws tau hais tias: “Nej yuav tsum hlub nej tus poj niam tag siab tag ntsws, thiab yuav tsum muab siab npuab nws tib leeg xwb” (Q&K 42:22). Tam li kuv paub mas tsuas muaj ib yam ntxiv hauv cov vaj lug kub uas peb raug txib kom hlub tag siab tag ntsws, thiab tus ntawd yog Vajtswv ntag. Nej sim xav seb qhov ntawd txhais tau li cas!

Nej qhia tau nej txoj kev hlub rau nej tus poj niam ua ntau tsav ntau yam. Qhov xub thawj thiab qhov tseem ceeb tshaj plaws, tsis muaj ib yam dab tsi tsuas tshuav Vajtswv nkaus xwb uas tseem ceeb dua nej tus poj niam hauv nej lub neej—hauj lwm, kev ua si, ua ub ua no tej no puav leej tsis tseem ceeb dua. Nej tus poj niam yog nej tus kws pab rau tas mus ib txhis, uas muaj nuj nqi heev—nej tus khub ntag

Kev hlub ib tug neeg tag siab tag ntsws txhais tau li cas? Nws txhais tau tias hlub tiag tiag thiab muab siab npuab rau nws ib leeg xwb. Thaum nej hlub nej tus poj niam tag siab tag ntsws, nej yuav tsis thuum nws, cem nws, nrhiav nws tej qhov txhaum, los sis hais tej lus tsis zoo, quab yuam, los sis ntaus nws.

“Txoj kev muab siab npuab rau nws” txhais tau li cas? Nws txhais tau tias nyob ze nws, ua ncaj thiab kom nws tso siab tau rau nej, nrog nws sib tham, thiab qhia nej txoj kev hlub rau nws.

Kev hlub txhais tau tias txawj xav thiab saib tau nws. Nws xav kom nej nco qab xav txog nws thiab hlub nws. Nws xav kom nej yuav qhia nws tias nej xav tias nws tsim txiaj thiab zoo nkauj thiab tseem ceeb rau nej. Kev hlub txhais tau tias txoj kev pab

kom nws noj qab nyob zoo thiab pab nws xav tias nws muaj nuj nqi yog ib yam tseem ceeb hauv nej lub neej.

Nej yuav tsum muaj kev ris txiaj vim nws yog nej cov me nyuam leej niam thiab yog niam vaj ntxwv rau nej vaj tsev, ris txiaj vim nws tau xaiv los ua niam tsev thiab ua ib leej niam—tau yug, tau tu, tau hlub, thiab qhuab qhia nej cov me nyuam—ua txoj hauj lwm tseem ceeb tshaj plaws.

Cov txiv, nej yuav tsum nco qab tias nej tus poj niam txawj ntse thiab nws txawj nrog koj sib sab laj txog nej tsev neeg, tsev neeg tej kev ua si, thiab saib xyuas tsev neeg cov nyiaj. Tsis txhob ua qias dub nrog nej sij hawm los sis nej cov khoom.

Cia nws muaj caij loj hlob ntawm sab paj hlwb, lub siab, thiab kev muaj phooj ywg thiab sab ntsuj plig thiab.

Cov kwv tij es, nco qab ntsoov tias yus tu thiab saib xyuas tau txoj kev hlub thaum ua tej yam me me xwb. Ib re paj thaum tej hnub tseem ceeb yog ib yam zoo, tiam sis txoj kev pab ntxuav tais diav, hloov cov mos liab daim pawj, sawv thaum nruab hmo pab tu ib tug me nyuam uas quaj, tso lub TV los sis daim ntawv xov xwm tseg thiab pab nws ua hmo noj. Tej yam me me li no qhia nws tias “Kuv hlub koj.” Tej yam me me li no muaj nuj nqi loj heev.

Txoj kev ua siab hlub ua thawj coj ntawm lub pov thawj hwj li no kuj hais txog koj cov me nyuam thiab tus poj niam tib si.

Leej Txiv txoj Hauj Lwm hauv lub Tsev

Leej niam txoj hauj lwm yog ua lub plawv rau lub tsev, tiam sis yeej tseem ceeb ntau npaum leej txiv txoj hauj lwm, uas yog ua txiv tsev, thaum tu, qhuab qhia, thiab hlub cov me nyuam.

Ua tus yawg suab hauv tsev, nej muaj ntiag tug hauj lwm ua tus coj nej cov me nyuam txoj hau kev. Nej yuav tsum pab txhim tsa ib lub tsev uas tus Tswv tus Ntsuj Plig yuav nyob tau. Koj txoj hauj lwm yog kom coj kav nej tsev neeg lub neej. Nej yuav tsum pab tsim tsev neeg tej kev cai thiab coj kav lawv.

Nej vaj tsev yuav tsum yog ib qho chaw uas muaj kev thaj yeeb nyab xeeb thiab xyiv fab rau nej tsev neeg. Yuav tsum tsis txhob muaj ib tug me nyuam uas yuav ntshai nws txiv—thiab nov haj yam muaj tseeb rau ib leej txiv uas tuav lub pov thawj hwj. Ib leej txiv txoj hauj lwm yog kom pab nws lub tsev muaj kev zoo siab thiab xyiv fab. Nws ua tsis tau li no thaum muaj kev sib cav, sib ceg, tsis sib haum xeeb, los sis coj kav tsis ncaj. Ua ib leej txiv ncaj nces yuav yog ib tug yam ntxwv zoo txog kev qhuab qhia thiab kev coj qhia, tu thiab hlub xwv kom nws cov me nyuam sab ntsuj plig yuav loj hlob zoo.

Coj ntawm Sab Ntsuj Plig

Vim kuv hlub cov txiv hauv Ixayees, kuv xav hais txog kaum yam uas yuav pab cov txiv coj lawv cov me nyuam ntawm sab ntsuj plig:

1. Muab leej txiv txoj koob hmoov rau nej cov me nyuam. Muab nej cov me nyuam ua kev cai raus dej thiab kev pom zoo. Muab nej cov tub tsa rau lub pov thawj hwj. Tej no yuav yog tej yam zoo ntawm sab ntsuj plig rau nej cov me nyuam lub neej.

2. Coj nej tsev neeg txoj kev thov Vajtswv, kev nyeem vaj lug kub txhua hnuv, thiab tsev neeg hmo ua ke txhua lub lim tiam. Thaum nej koom tej no nej thiaj yuav qhia rau nej cov me nyuam tias tej yam no tseem ceeb npaum li cas.

3. Thaum twg ua tau, mus koom lub Koom Txoos tej kev sib ntsib ua ib tse neeg. Nej txoj kev ua thawj coj rau nej tsev neeg txoj kev teev ntuj tseem ceeb heev rau nej cov me nyuam kev noj qab nyob zoo ntawm sab ntsuj plig.

4. Mus nrog nej cov ntxhais ua si thiab txiv yuav tau nrog cov tub mus ua ke thiab. Ua ib tse neeg, mus pw pem roob thiab noj mov, mus rau tej kev ncaws pob thiab ntaus nkauj, mus saib cov khoos kas tom tsev kawm ntawv, thiab tej yam zoo li no. Yog tias Txiv nyob ntawd qhov ntawd yuav pab heev.

5. Yuav tsum nrhiav sij hawm rau tsev neeg mus yos teb chaws thiab ua si thiab saib ub no. Nej cov me nyuam yuav nco txog tej no tas mus li.

6. Nrog nej txhua tus me nyuam sib ntsib ib leeg rau ib leeg. Nrog lawv sib tham txog tej yam lawv xav ua. Qhia lawv txog txoj moo zoo tej ntsiab cai. Qhia lawv txog tej yam tsim txiaj. Thaum nej siv sij hawm nrog lawv nej cov me nyuam thiaj yuav paub tias Txiv xav tias yam twg thiaj tseem ceeb.

7. Qhia nej cov me nyuam kom ua hauj lwm, thiab qhia lawv tias txoj kev siv zog ua hauj lwm kom thiaj ncav cuag ib lub hom phiaj tseem ceeb npaum li cas. Txoj kev tseg nyiaj rau kev mus ua tub

txib thiab kev mus kawm ntawv qhia lawv tias Txiv xav tias yam twg thiaj tseem ceeb.

8. Yaum kom lawv mloog nkauj zoo thiab saib duab zoo thiab nyeem cov ntawv zoo hauv nej vaj nej tsev. Tej tsev uas muaj ib tug ntsuj plig zoo thiab zoo nkauj yuav foom koob hmoov rau nej cov me nyuam tas mus li.

9. Thaum ua tau, mus rau lub tuam tsev ntau nrog nej tus poj niam. Nej cov me nyuam thiaj yuav to taub tias kev sib yuav hauv lub tuam tsev tseem ceeb npaum li cas thiab tej kev khi lus ntawm lub tuam tsev tseem ceeb rau ib tse neeg uas xav nyob ua ke mus ib txhis.

10. Cia nej cov me nyuam pom tias nej tau kev xyiv fab thiab zoo siab li cas thaum ua hauj lwm pab hauv lub Koom Txoos. Nov yuav txawj ki rau lawv, ces lawv kuj yuav xav ua hauj lwm hauv lub Koom Txoos thiab yuav nyiam lub nceeg vaj no.

Koj txoj Hauj Lwm Tseem Ceeb Tshaj Plaws

Au, cov txiv tsev thiab cov leej txiv hauv Ixayees, nej ua tau ntau kom thiaj pab nej tsev neeg tau kev cawm dim thiab kev tsa nto! Nej tej hauj lwm yeej tseem ceeb heev.

Nco qab tias nej txoj hauj lwm ua ib leej txiv hauv Ixayees dawb ceev npaum li cas—yeej yog nej txoj hauj lwm tseem ceeb tshaj plaws hauv lub sij hawm no thiab tas mus ib txhis—ib txoj hauj lwm uas nej yeej yuav tsis raug tso tawm li.

Thov kom nej yuav pab muab tej yam uas nej tsev neeg xav tau thiab, nrog nej tus khub rau tas mus ib txhis nyob ntawm nej ib sab, nej thiaj ua tau txoj hauj lwm dawb ceev no kom ua ib tug thawj coj rau sab ntsuj plig hauv nej vaj nej tsev.

Los ntawm Thawj Tswj Hwm Benson ib zag lus uas nws tau hais hauv tuas rau lub pov thawj hwj thaum lub Kaum Hli Ntuj xyoo 1987 hauv lub Koom Txoos lub tuam rooj sab laj (saib Conference Report, Kaum Hli Ntuj 1987, 59–63; los sis *Ensign*, Kaum Ib Hlis Ntuj 1987, 48–51).

NIAM THIAB TXIV TXOJ NTIAG TUG HAUJ LWM DAWB CEEV

11

QHOV 2: LEEJ NIAM TXOJ HAUJ LWM

COV TSWV YIM RAU KEV NRUAB RAU HAUV YUS LUB NEEJ

Raws li koj xav tau thiab toob kas qhia, ua raws li ib los sis ob qho tswv yim no.

- Nyob hauv lus tshaj tawm rau tsev neeg, peb raug ntuas tias “cov niam thiab txiv ib leeg yuav tsum pab ib leeg ua ib khub uas nyob sib txig” (saib phab *iv* hauv phau ntawv kawm no). Nrog koj tus khub, tshab xyuas Thawj Tswj Hwm Ezra Taft Benson 10 lub tswv yim rau cov txiv tsev, hauv phab ntawv 41-42 hauv phau kawm no, thiab nws 10 lub tswv yim rau cov niam tsev, hauv phab ntawv 45-47. Sib tham seb neb ua tau li cas thiaj sib koom tes thiab ib leeg txhawb pab ib leeg hauv tej hauj lwm no.
- Sau ib tsab ntawv mus rau koj niam los sis pog los yog niam tais laus.

KEV NYEEM NTAWV

Kawm zaj dab neeg nram no. Yog tias koj muaj poj niam muaj txiv, nyeem thiab nrog koj tus khub sib tham txog zaj no.

“VIM RAU QHOV NWS YOG IB LEEJ NIAM”

Txwj Laug Jeffrey R. Holland
Los ntawm Pawg Kaum Ob tug Thwj Tim

Kev Qhuas cov Leej Niam

Muaj ib co lus uas Victor Hugo tau sau hais tias:

“Nws muab cov khob cij lov uas ob daim thiab muab rau nws ob tug me nyuam noj, nkawd rawm noj. Tus nom tub rog yws yws tias, ‘nws tsis tau khaws ib daim rau nws tus kheej li.

“Ib tug tub rog txawm hais tias, ‘vim nws tsis tshaib plab li.’

“Ces tub nom tub rog teb hais tias, ‘Tsis yog, yeej yog vim nws yog ib leej niam.’

Xyoo no xws li peb ua koob tsheej nco txog cov neeg uas tau hla Iowa, Nebraska, thiab Wyoming kev ntseeg thiab kev rau siab ntso, kuv xav qhuas cov leej niam rau cov pioneer ntawd uas nyob hauv peb lub caij lub nyoog no, vim lawv tau saib xyuas, thov Vajtswv rau, thiab coob tug tseem tau muab lawv cov me nyuam faus cia tom kev. Xav hais rau cov poj niam uas hnov tau kuv lub suab uas xav ua ib tug niam thiab tseem tsis tau yog, kuv hais rau nej txawm nej thiab peb quaj los, nyob tom ntej Vajtswv tseem yuav coj, “kev cia siab los rau tus uas nyuaj siab.”¹ Ib yam li cov yaj saub tau hais ntau zaus los ntawm lub sam thiaj no, yeej “yuav tsis txwv ib qho koob hmoov twg” rau cov uas rau siab ntseeg, kuj yuav muab tej koob hmoov uas tsis los

tam sim ntawd.² Es tam sim no peb yuav tsum muaj kev zoo siab rau txoj kev raug hu los pab tu cov uas tsis yog yus roj yus ntshav.

Thaum kuv hais lus rau tej leej niam li no kuv tsis yog tsis nco qab txog, leej txiv txoj hauj lwm uas tseem ceeb thiab, kuv yeej nco txog tej vaj tsev uas tsis muaj txiv li uas yog “qhov teeb meem loj tshaj plaws hauv peb lub xam khoo.”³ Muaj tseeb tiag, txoj kev tsis muaj txiv tsev ua tau ib qho teeb meem tab txawm txiv yeej nyob hauv tsev—lam nyob noj mov thiab tsaug zog, zoo nkaus li “lam nyob saib ub no xwb.” Tiam sis zaj lus hais rau lub pov thawj hwj yuav hais lwm hnuv tso. Hnuv no kuv xav qhuas cov niam uas tau puag lawv cov mos liab thiab, dhau ntawm lawv txoj kev ncaj ncees tau qhia lawv cov me nyuam tias, lawv nyob hauv nruab plawv tus Tswv lub ntsiab rau peb lub neej no.

Thaum hais li no kuv xav hais Pov Lauj cov lus, uas tau sau ntawv qhuas Timautes “lub nplooj siab dawb paug ntseeg..., ib yam li,” nws tau hais “koj pog hu ua Lau-is, thiab koj niam hu ua Yunikes muaj thiab.”⁴ Pov Lauj hais ntxiv tias, “txij thaum koj tseem yog me nyuam yaus koj yeej kawm Vajtswv tej lus.”⁵ Peb ua Vajtswv tsaug vim muaj tag nrho cov leej niam thiab pog uas qhia tej qhov tseeb txij thaum ua me nyuam yaus los.

Cov Leej Niam Hluas tej Kev Txi

Thaum hais lus rau tag nrho tej leej niam, kuv xav xav qhuas thiab txhawb nqa cov leej niam

hluas. Leej niam txoj hauj lwm yeej nyuaj kawg, feem ntau ua tej hauj lwm uas luag tej tsis saib tej ntawd rau nqi. Thaum tseem hluas li no es feem ntau tus txiv los sis tus poj niam—los sis nkawd ob leeg—tseem tab tom kawm ntawv los sis yog tej xyoo thaum tus txiv tsis khwv tau nyiaj txiag ntau pes tsawg. Tsis tshuav muaj nyiaj los sis tsis muaj nyiaj kiag li. Yus tsev tsuas muaj ob peb yam xws li—cov rooj tog los ntawm lub kiab khw khib nyiab los sis cov txee twb tsis muaj zaub mov noj hlo li. Lub tshieb, yog tias muaj ib lub, muaj cov log uas du dai thiab tsis muaj roj li. Tiam sis vim tau pub me nyuam mos liab mis thaum nruab hmo thiab lawv sawv quaj vim hniav plhis, qhov teeb meem loj tshaj plaws rau cov leej niam hluas yog txoj kev sab lim xwb. Nyob hauv tej xyoo no, cov niam tsis tshua tsaug zog thiab haj yam ua hauj lwm pab luag tej es tsis tau nqi zog rov qab. Ces yog vim li ntawd tej thaum lawv lub qhov muag saus thiab os os vim nkees tas li.

Thiab qhov tsis zoo yog thaum ntawd peb xav hu tus muam ntawd los ua hauj lwm—los sis yuav tsum hu nws los ua hauj lwm—pab pawg ntseeg thiab ceg txheem ntseeg cov koom haum pab. Qhov ntawd ntxim ua. Vim puas muaj leej twg uas tsis xav tau cov neeg hluas zoo li Timautes pog Lau-is thiab nws niam Yunikes txoj kev pab? Sawv daws, cia li ua txawj ntse. Nco ntsoov tias yus tsev neeg yog qhov tseem ceeb tshaj plaws, thiab nws haj yam tseem ceeb thaum tej xyoo ntxov ntxov li no. Txawm li ntawd los, cov niam hluas yuav tseem rau siab ntseeg ua tej hauj lwm hauv lub Koom Txoos, ib yam li luag tej ua hauj lwm pab thiab ntxiv zog rau lawv thiab lawv tej yim neeg thiab.

Cia li ua zoo npaum li nej ua tau thaum tej xyoo no, cia li muaj kev zoo siab rau txoj hauj lwm uas yog nej li xwb thiab nws yeej yog ib txoj hauj lwm uas lub ntuj yuav xa nws cov tim tswv los saib xyuas nej thiab nej cov me nyuam yaus. Cov txiv tsev—tiag tiag cov txiv tsev—thiab lub Koom Txoos cov thawj coj thiab cov phooj ywg, cia li pab lawv thiab txawj xav thiab ua neeg txawj ntse. Nco qab ntsoov tias, “Txhua yam tsav xwm uas muaj hauv ntiaj teb no, puav leej muaj raws li tej caij nyoog uas Vajtswv teem tseg.”⁶

Cov niam, peb pom thiab saib nej txoj kev ntseeg rau nqi thaum nej thawb mus tom ntej. Thov kom nej yuav paub tias tej ntawd muaj nuj nqi heev, tam sim no, thiab tas mus li. Thiab yog, muaj xwm dab tsi, koj cia li ua txoj hauj lwm no koj tib leeg xwb, es tsis muaj ib tug txiv sawv ntawm nej ib sab, ces peb haj yam thov Vajtswv pab nej, thiab peb yuav rau siab ntso ncav tes mus pab nej.

Cov Niam Ua Vajtswv tej Hauj Lwm

Tsis ntev tas los no ib tug niam hluas tau sau ntawv tuaj rau kuv qhia kuv tias nws muaj peb yam uas ua rau nws txhawj heev. Ib qho yog thaum twg nws hnov tej zaj lus hais txog kev ua leej niam hauv Tsoom Haiv Neeg Ntseeg hauv Hnub Nyoog Kawg, nws txhawj vim nws xav tias nws tsis zoo npaum li lawv hais los sis yuav tsis txawj ua tej hauj lwm ntawd. Qhov thib ob, nws tau xav tias lub ntiaj teb xav kom nws qhia nws cov me nyuam kom txawj nyeem ntawv, sau ntawv, kho duab, lus Latees, ua leb, thiab xyuas qhov Internet—yuav tsum ua tej no ua ntej tus me nyuam mos liab hais tau lo lus, “kuv kuv.” Qhov thib peb, nws tau xav tias feem ntau tib neeg luag thuam, tsis yog lawv txhob txwm ua, vim hais tias lawv cov lus ntuas los sis cov lus qhuas tsis hais txog nws txoj kev siv paj hlwb, txoj kev siv sab ntsuj plig thiab lub siab ntsws, thaum nruab hmo, nruab hnub, ua txhua tsav txhua yam kom thiaj ua tau tus leej niam uas Vajtswv xav kom nws ua.

Tiam sis nws tau hais tias, yam uas pab nws thawb mus tom ntej yog: “Txawm muaj tej yam phem thiab zoo los, thiab tej thaum kuv los kua muag, *kuv paub hauv kuv nruab siab tias kuv tab tom ua Vajtswv tej hauj lwm*. Kuv paub tias hauv kuv txoj kev ua leej niam kuv tab tom nrog Nws sib koom tes tas mus ib txhis li. Kuv xav tsis thoob vim Vajtswv lub ntsiab tseem ceeb tshaj plaws yog ua ib leej txiv, tab txawm Nws cov me nyuam ib txhia ua rau Nws los kua muag.

Nws hais tias, “Thaum kuv paub li no kuv thiaj nco qab txog tej hnub nyuaj nyuaj thaum zoo nkaus li kuv yuav maj tsis yeej tej no. Tej zaum vim peb tsis muaj cuab kav thiab muaj kev txhawj xeeb peb thiaj xav ncav tes mus rau Nws es Nws thiaj ncav tes mus pab peb. Tej zaum Nws cia siab hais tias peb *yuav* muaj kev txhawj xeeb, thiab *yuav* thov Nws txoj kev pab. Ces kuv xav tias, Nws thiaj qhia tau cov me nyuam no, dhau ntawm peb, tsis muaj txoj kev tawm tsam li.” Nws xaus cov lus ntawd hais tias, “Kuv nyiam lub tswv yim ntawd, qhov ntawd pab kuv muaj kev cia siab. Yog tias kuv ua neeg ncaj ncees rau ntawm kuv Leej Txiv Saum Ntuj Ceeb Tsheeb ces, tej zaum yuav tsis muaj dab tsi tab kaum Nws txoj kev coj peb cov me nyuam. Tej zaum qhov ntawd yuav yog Nws txoj hauj lwm thiab Nws lub yeeb koob tiag tiag li.”⁷

Nej cov Me Nyuam Yuav Tau Koob Hmoov

Thaum xav txog kab lus ntawd, yus thiaj paub tias cov qhov muag uas saus thiab os os tsis yog vim hloov cov me nyuam daim pawj tas li thiab xa cov me nyuam mus ub mus no xwb tiam sis yeej muaj

tej hmo thaum nyob ib tag hmo ntsuam xav txog yus tus kheej, nrhiav seb yuav ua li cas thiaj tu tau cov me nyuam no kom ua zoo li Vajtswv xav kom lawv ua. Vim xav rau siab thiab mob siab ua li ntawd, kuv thiaj xav hais lus sawv tus Tswv cev hais tias cov niam nej yeej zoo kawg nkaus. Nej tab tom ua zoo heev. Qhov uas nej tau kev lav ris no qhia tseeb tias Leej Txiv Saum Ntuj Ceeb Tsheej tso siab plhuav rau nej ntag. Nws paub tias nej txoj kev yug ib tug me nyuam tsis ua rau nej cia li paub txhij txhua. Yog tias nej thiab nej tus txiv yuav sim hlub Vajtswv thiab ua raws li txoj moo zoo qhia; yog tias nej yuav taij thov kom tau kev coj qhia thiab kev nplij siab los ntawm tus Vaj Ntsuj Plig Dawb Huv uas nws tau cog tseg rau cov uas rau siab ntseeg; yog tias nej yuav mus hauv lub tuam tsev nrog nws sib cog lus tseg txog tej kev khi lus dawb ceev tshaj plaws uas ib tug poj niam los sis txiv neej khi tau tseg hauv lub ntiaj teb no; yog tias nej yuav qhia luag tej, kuj hais txog nej cov me nyuam, tias nej hlub, muaj kev khuv leej, kev xav zam txim ib yam li nej xav kom lub ntuj ceeb tsheej ua rau nej; yog nej yuav sim ua tus niam los sis txiv uas nej ua tau, nej thiaj tau ua txhua yam uas tib neeg ua tau thiab txhua yam uas Vajtswv xav kom nej ua.

Tej thaum tej yam uas ib tug me nyuam los sis me nyuam xeeb ntxwv txiav txim siab ua yuav ua rau nej nyuaj siab. Tej thaum yuav tsis ua raws li koj lub siab nyiam. Txhua leej txiv thiab leej niam txhawj txog qhov ntawd. Thawj Tswj Hwm Joseph F. Smith, ib leej txiv uas siab zoo heev tau taij li no, “Au, Vajtswv thov koj pab kom kuv tsis txhob xiam kuv ib tug me nyuam li.”⁸ Txhua tus niam txiv thov li ntawd, thiab txhua tus niam txiv yeej ntshai tsam muaj li ntawd. Tiam sis yus yeej tsis poob qab yog tias yus pheej sim ua thiab thov Vajtswv. Nej yeej muaj cai txais yuav kev txhawb pab thiab paub tias nej cov me nyuam yuav qhuas nej lub npe, zoo ib yam li tej tiam neeg thaum ub uas tau muaj tib co kev cia siab thiab kev ntshai uas nej muaj.

Nej muaj tib co kab lig kev cai uas Evas tau muaj, tus uas yog niam rau tag nrho tib neeb sawv daws, tus uas to taub tias nws thiab Adas *yuav tsum* poob mus xwv kom “thiaj yuav muaj taus txiv neej [thiab poj niam]”⁹ thiab yuav muaj kev xyiv fab. Nej yuav ua cov neeg zoo li Xalas thiab Lenpekas thiab Laxeas, yog tsis tau muaj lawv ces yuav tsis tau muab tej koob hmoov rau cov yawg suab Anplaham, Ixaj, thiab Yakhaus uas muab koob hmoov rau peb txhua tus. Nej zoo li Lau-is thiab Yunikes thiab cov niam rau 2,000 tus tub rog. Nej yeej zoo li Maiv Liag, raug xaiv thiab raug tsa ua ntej ntuj tsim teb raug, yuav xeeb tub, tihab yug Vajtswv Leej Tub. Peb ua nej sawv daws tsaug, kuj hais txog peb leej niam thiab, thiab qhia nej tias tsis muaj ib yam uas tseem

ceeb dua hauv ntiaj teb no ntau npaum li txoj kev pab uas Vajtswv tej hauj lwm thiab kom nws tau yeeb koob, kom thiaj pab tau Nws cov tub thiab ntxhais yug los ua neeg thiab ua neej nyob hauv lub ntiaj teb, xwv kom lawv thiaj yuav tsis txawj tuag thiab muaj tau txoj sia nyob mus ib txhis hauv lub ntuj ceeb tsheej xilethi-aus.

Tso Siab Plhuav rau tus Cawm Seej Tas Mus Li

Thaum nej tau txo hwj chim thiab muaj siab mos siab muag rau ntawm tus Tswv thiab, ib yam li ib leej niam tau hais, “tau khob lub ntuj ceeb tsheej lub qhov rooj taij kom tau, thov kom tau, kom thiaj tau kev cob qhia thiab kev txawj ntse thiab kev pab kom ua tau txoj hauj lwm no,” ces nws txawm qhib plho rooj ntug kom thiaj pab tau nej rau tas mus ib txhis. Cia li txais yuav tus Cawm Seej rau lub ntiaj teb tej lus cog tseg. Thov kom nej tau txoj kev nplij siab los ntawm kev Theej Txhoj rau tej yam uas xeeb txob nej los sis nej cov me nyuam. Yuav tsum paub tias vim muaj kev ntseeg ces yuav kho kom txhua yam mus zoo txawm nej ua li cas los xij peem, yeej yuav zoo tshaj yav tas los lawm vim nej tau pab.

Nej ua tsis tau tej no nej tib leeg xwb, tiam sis nej *yeej* muaj kev pab. Tus Xib Hwb rau lub Ntuj Ceeb Tsheej thiab lub Ntiaj Teb nyob no foom koob hmoov rau nej—Nws yog tus uas mus nrhiav cov yaj uas ploj mus lawm, nrhiav kom tau npib nyiaj uas poob lawm, tos ntsoov tus tub loj leeb rov qab los. Nej txoj hauj lwm yog kev cawm tib neeg dim, thiab yog li ntawd nej yuav tau kev pab, tau kev ntxiv zog, ua zoo tshaj nej ua tau thiab tau ua yav tas los lawm yog tias nej rau siab ntso, tab txawm tej thaum zoo nkaus li nej ua tsis tau ib qho zoo hlo li.

Nco ntsoov, nco ntsoov nej txoj kev ua ib leej niam: “Nej tsis tau los deb npaum li no yog tsis muaj Khetos txoj lus uas nrog txoj kev ntseeg nraim hauv nws, vam khom tag nrho rau tej hauj lwm zoo ntawm nws tus uas muaj hwj chim cawm tau.”¹⁰

Vam khom rau Nws. Vam khom rau Nws tag nrho. Vam khom rau nws tas mus li. Thiab “thawb mus lawm tom hauv ntej nrog txoj kev ntseeg khov kho hauv Khetos, muaj ib txoj kev cia siab uas ci kawg nkaus.”¹¹ Nej tab tom ua Vajtswv txoj hauj lwm. Nej tab tom ua zoo kawg nkaus. Nws tab tom foom koob hmoov rau nej thiab Nws yuav foom koob hmoov ntxiv, tab txawm—tsis yog, *yuav haj yam*—thaum uas koj muaj tej hnuv thiab tej hmo uas nyuaj tshaj plaws li. Zoo li tus poj niam uas nyiag khiav, muaj siab mos, ib nyuag txaj muag nrog cov tib neeg sib phoom kom nws thiaj tau khov tus Xib Hwb zoo lub tsho, ces Khetos yuav hais rau cov poj niam uas muaj kev txhawj xeeb thiab xav tsis thoob thiab tej thaum los kua muag

vim muaj kev lav ris ntau ua ib leej niam ces yuav hais tias, “Me ntxhais, koj tsis txhob txhawj; koj tus mob zoo lawm twb yog vim koj ntseeg.”¹² Thiab nws yuav ua kom nej cov me nyuam zoo thiab tiag.

Los ntawm Txwj Laug Holland ib zag lus thaum lub Plaub Hlis Ntuj 1997 lub tuam rooj sab laj hauv lub Koom Txoos (saib Conference Report, Plaub Hlis Ntuj 1997, 46–49; los sis *Ensign*, Tsib Hlis Ntuj 1997, 35–37).

LUS CIM

1. Ixayees tus Cawm Dim,” *Cov Nkauj*, naj npawb. 6; saib 3 Nifais 22:1 thiab.
2. Saib Joseph Fielding Smith, *Doctrines of Salvation*, tus kws sau yog Bruce R. McConkie, 3 phau ntawv (1954–56), 2:76; Harold B. Lee, *Ye Are the Light of the World: Selected Sermons and Writings of President Harold B. Lee* (1974), 292; thiab Gordon B. Hinckley, hauv Conference Report, Plaub Hlis Ntuj 1991, 94.
3. Tom Lowe, “Fatherlessness: The Central Social Problem of Our Time,” Claremont Institute Home Page Editorial, Ib Hlis Ntuj 1996.
4. 2 Timautes 1:5.
5. 2 Timautes 3:15.
6. Tub Laj Lim 3:1.
7. Ib tsab ntawv.
8. Joseph F. Smith, *Gospel Doctrine*, phau 5 (1939), 462.
9. 2 Nifais 2:25.
10. 2 Nifais 31:19.
11. 2 Nifais 31:20.
12. Mathais 9:22.

RAU COV LEEJ NIAM HAUV XI-OOS

Thawj Tswj Hwm Ezra Taft Benson
Tus Thawj Tswj Hwm Thib 13 hauv lub Koom Txoos

Cov niam hauv Xi-oos, txoj hauj lwm uas Vajtswv tau muab rau nej yeej tseem ceeb kom thiaj tau kev tsa nto thiab pab kom nej tsev neeg tau kev cawm dim thiab kev tsa nto. Ib tug me nyuam xav tau ib leej niam ntau tshaj txhua yam khoom uas nyiaj yuav tau. Txoj kev siv sij hawm nrog nej cov me nyuam yog qhov khoom plig zoo tshaj plaws.

Vim kuv hlub cov leej niam hauv Xi-oos, tam sim no kuv xav qhia nej txog kaum lub tswv yim uas yuav pab cov niam siv sij hawm zoo nrog lawv cov me nyuam.

Nyob hauv nej tus me nyuam lub neej. Qhov xub thawj, siv sij hawm nrog nej cov me nyuam nyob txawm lawv los los sis mus—thaum lawv mus thiab los ntawm lub tsev kawm ntawv los, thaum lawv mus thiab los ntawm kev ua si los, thaum lawv coj lawv cov phooj ywg los tsev. Nyob ntawd thaum nej cov me nyuam muaj rau xyoo los sis kaum rau xyoo. Hauv phau paj lug peb nyeem hais tias, “Yog cia me nyuam ywj siab nws yuav ua rau leej niam txaj muag” (Paj Lug 29:15). Ib qho teeb meem loj heev hauv peb lub xam khoo yog cov me nyuam coob leej uas nyob tsev tsis muaj niam thiab txiv zov lawv thaum lawv lawb kawm ntawv, vim hais tias niam thiab txiv tseem ua hauj lwm.

Ua ib tug Phooj Ywg Zoo. Qhov thib ob, cov niam, cia li siv sij hawm ua nej cov me nyuam ib tug phooj ywg zoo. Mloog nej cov me nyuam lus, ua tib zoo cuab pob ntseg mloog. Nrog lawv sib tham, luag thiab tuaj dab ros nrog lawv, nrog lawv hu nkauj,

nrog lawv ua si, nrog lawv quaj, khawm lawv, ua tib zoo qhuas lawv. Yuav tsum siv sij hawm nrog nej txhua tus me nyuam neb ob leeg xwb. Ua nej cov me nyuam ib tug phooj ywg zoo.

Nyeem Ntawv rau Nej cov Me Nyuam. Qhov thib peb, cov niam, cia li siv sij hawm twm ntawv rau nej cov me nyuam. Pib thaum lawv tseem ua mos liab, nyeem ntawv rau nej cov tub thiab cov ntxhais. Nco ntsoov tus kws sau paj huam cov lus uas hais tias:

Tej zaum nej muaj nyiaj txiag ntau ua luaj li;
Muaj cov pov hum thiab kub puv tej txhab.
Nej yeej tsis nplua nuj tshaj kuv li as—

Vim kuv tau muaj ib leej niam uas tau twm ntawv rau kuv.

(Strickland Gillilan, “The Reading Mother.”)

Nej yuav pab kom lawv nyiam cov ntawv zoo thiab yuav nyiam nyeem vaj lug kub yog tias nej yuav nrog nej cov me nyuam nyeem ntawv ua ke ntau zaus.

Nrog Nej cov Me Nyuam Thov Vajtswv. Qhov thib plaub, siv sij hawm nrog nej cov me nyuam thov Vajtswv. Kev thov Vajtswv ua ib tse neeg, thaum leej txiv coj lawv kev, yuav tsum ua txhua tag kis sawv ntxov thiab yav tsaus ntuj. Nej cov me nyuam puas tau pom nej txoj kev ntseeg thaum uas nej hu kom lub ntuj ceeb tsheej foom koob hmoov rau lawv. Xav hais Yakaunpaus cov lus, “Txoj kev...mob siab thov Vajtswv ntawm ib [leej niam] ncaj ncees yeej muaj hwj chim kawg” (Yakaunpaus 5:16). Kom nej cov me nyuam koom tsev neeg kev thov Vajtswv ua ke thiab thov lawv ib leeg, thiab txais yuav Leej Txiv Saum Ntuj Ceeb Tsheej cov lus uas zoo kawg nkaus.

Muaj Tsev Neeg Hmo Ua Ke Txhua lub Lim Tiam. Qhov thib tsib, siv sij hawm txhua lub lim tiam

muaj tsev neeg hmo ua ke. Thaum koj tus txiv coj, kev koom tsev neeg hmo ua ke yuav pab txhawb nqa tsev neeg sab ntsuj plig txhua lub lim tiam. Kom nej cov me nyuam koom tej no thiab. Qhia lawv txog tej ntsiab cai tseeb. Ua kom qhov no ua ib txoj kab lig kev cai hauv koj tsev neeg. Cia li nco qab txog Thawj Tswj Hwm Joseph F. Smith kev cog lus thaum xub qhia lub Koom Txoos txog tsev neeg hmo ua ke: “Yog tias ib Tsoom Haiv Neeg Ntseeg yuav ua raws li tej lus ntuas, peb cog lus tias nej yuav tau koob hmoov ntau heev. Yuav haj yam muaj kev hlub tom tsev thiab yuav mloog niam thiab txiv lus. Cov neeg hluas hauv Ixayees txoj kev ntseeg yuav loj hlob tuaj, thiab lawv yuav muaj hwj chim txaus lawv thiaj tawm tsam tau kev phem thiab kev ntxias uas nyob ib puag ncig” (hauv James R. Clark, phau, *Messages of the First Presidency of the Church of Jesus Christ of Latter-day Saints*, 6 phau ntawv [1965–75], 4:339). Niaj hnuv no tseem muaj txoj kev cog lus li ntawd thiab.

Nyob Ua Ke thaum Noj Mov. Qhov thib rau, siv sij hawm noj mov ua ke ntau npaum li ua tau. Nov haj yam nyuaj thaum cov me nyuam loj hlob thiab nej lub neej tsis khoom li. Tiam sis thaum sib tham muaj kev zoo siab, sib tham seb yuav ua dab tsi hnuv ntawd, thiab muaj caij sib qhia thaum noj mov ua ke vim niam thiab txiv thiab cov me nyuam sim sib pab li no.

Txhua Hnuv Nyeem Vaj Lug Kub. Qhov thib xya, siv sij hawm txhua hnuv nyeem vaj lug kub ua ib tse neeg. Kev nyeem vaj lug kub yus ib leeg xwb yeej tseem ceeb thiab, tiam sis kev nyeem vaj lug kub ua ib tse neeg yog qhov tseem ceeb tshaj plaws. Kev nyeem Phau Ntawv Maumoos ua ib tse neeg yuav pab coj tus ntsuj plig los rau hauv nej lub tsev thiab yuav pab niam thiab txiv thiab cov me nyuam muaj hwj chim tiv tau tej kev ntxias thiab yuav muaj tus Vaj Ntsuj Plig Dawb Huv los ua lawv tus khub tas mus li. Kuv cog lus tias Phau Ntawv Maumoos yuav pauv nej tsev neeg lub neej.

Ua tej Yam Ua Ib Tse Neeg. Qhov thib yim, siv sij hawm ua tej yam ua ib tse neeg. Nrog tsev neeg mus ua si thiab noj mov pem roob thiab ua koob tsheej nco txog tej hnuv yug thiab mus yos teb chaws thiab tej yam uas sawv daws yuav nco txog. Thaum twg ua tau ua ib tse neeg mus koom tej yam uas ib tug hauv tsev neeg ua, zoo li thaum ua yeeb yam tom tsev kawm ntawv, ncaws pob, hais lus rau ib pab neeg, los sis ntaus nkauj. Mus koom lub koom txoos tej kev sib ntsib ua ke thiab zaum ua ke ua ib tse neeg thaum nej ua tau. Cov niam uas pab tej tsev neeg thov Vajtswv thiab ua si ua ke yuav nyob ua ke thiab yuav foom koob hmoov rau lawv cov me nyuam lub neej tas mus li.

Qhia Nej Cov Me Nyuam. Qhov thib cuaj, cov niam, yuav tau siv sij hawm qhia nej cov me nyuam. Nrhiav sij hawm qhia lawv. Yeej ua tau li no thaum twg los tau—thaum tab tom noj mov, thaum lam sib tham, los sis thaum tej lub sij hawm tshwv xeeb, thaum nyob ntawm lawv taw txaj yuav mus pw tsaug zog, los sis thaum taug kev ua ke thaum yav sawv ntxov. Cov niam es, nej yog nej cov me nyuam tus xib hwb zoo tshaj plaws. Tsis txhob muab txoj kev lav ris no rau tej chaw zov me nyuam los sis cov neeg zov me nyuam. Ib leej niam txoj kev hlub thiab kev txhawj txog nws cov me nyuam yog qhov tseem ceeb tshaj plaws ntawm nws txoj kev qhuab qhia.

Qhia cov me nyuam txog txoj moo zoo tej ntsiab cai. Qhia lawv tias lawv yuav tau nqi zog yog tias lawv ua neeg zoo. Qhia lawv tias tsis muaj chaw uas tsis muaj xwm txheej thaum muaj kev txhaum. Qhia kom lawv hlub Yexus Khetos txoj moo zoo thiab kom muaj ib zaj lus tim khawv tias nws los saum ntuj ceeb tsheej los.

Qhia nej cov tub thiab ntxhais kom hnav khaub ncaws zoo, thiab kom lawv saib txiv neej thiab poj niam rau nqi. Qhia nej cov me nyuam kom ua dawb huv ntawm kev ua nkauj ua nraug, kom tham hluas nkauj hluas nraug raws tej kev cai zoo, sib yuav hauv lub tuam tsev, mus ua tub txib, thiab tias txoj kev txais yuav thiab rau siab ua tej hauj lwm hauv lub Koom Txoos tseem ceeb npaum li cas.

Qhia kom lawv nyiam ua hauj lwm thiab tias kev kawm ntawv muaj nuj nqi li cas.

Qhia kom lawv yuav xaiv tej yam kev ua si uas zoo, kuj hais txog cov yeeb yaj kiab uas lawv saib thiab cov vis dis aus thiab cov nkauj thiab cov ntawv zoo. Sib tham txog tej yam phem ntawm cov duab liab qab thiab cov tshuaj phem, thiab qhia lawv tias txoj kev ua neej huv huv muaj nuj nqi li cas.

Nej cov leej niam, nej yuav tsum qhia txoj moo zoo rau nej cov me nyuam hauv tsev, muaj kev qhuab qhia. Nov yog txoj kev qhuab qhia zoo tshaj plaws uas nej cov me nyuam yuav tau. Nov yog tus Tswv txoj kev qhia. Lub Koom Txoos qhia tsis tau zoo npaum li nej qhia. Lub tsev kawm ntawv ua tsis tau thiab. Chaw zov me nyuam ua tsis tau. Tiam sis nej yeej muaj cuab kav qhia, thiab tus Tswv yuav txhawb nqa nej. Nej cov me nyuam yuav nco ntsoov nej tej kev qhia tas mus li, thiab thaum lawv laus lawm, lawv yuav tsis txav deb ntawm tej ntawd. Lawv yuav qhuas nej lub npe—lawv leej niam uas yog ib tug tim tswv ntag.

Cov niam es, txoj kev ua ib leej niam uas qhuab qhia zoo li cov uas nyob saum ntuj qhia yog ib yam yus yuav tau siv sij hawm thiaj qhia tau—siv sij

hawm ntau heev. Tsis yog ib yam yus lam ua xwb. Yuav tsum ua tas li xwv kom nej thiaj cawm tau thiab tsa tau nej cov me nyuam nto. Nov yog nej txoj hauj lwm uas los saum ntuj los.

Hlub Nej cov Me Nyuam Tiag Tiag. Qhov thib kaum thiab qhov kawg, cov niam, nej yuav tsum siv sij hawm hlub nej cov me nyuam tiag tiag. Ib leej niam txoj kev hlub yeej zoo npaum li Khetos txoj kev hlub.

Nov yog ib txoj kev uas ib tug tub qhuas nws niam: “Kuv tsis paub nws nyiam pov ntawv li cas; thiab nws xav li cas txog kev qhuab qhia cov me nyuam, kev noj mov, thiab xav li cas txog kev tu me nyuam, kuv tsis nco qab li. Tam sim no qhov uas kuv nco qab yog qhov uas nws tau hlub kuv tiag tiag li. Nws tau nyiam pw ntawm cov nyom thiab qhia dab neeg rau kuv, los sis khiav mus nkaum nrog peb cov me nyuam. Nws yeej ib txwm khawm kuv tas li. Thiab kuv tau nyiam qhov ntawd. Nws luag nyav. Rau kuv ces nws zoo li Vajtswv, thiab muaj tus cwj pwm uas ib tsoom haiv neeg ntseeg hais tias Nws muaj. Thiab hu nkauj! Txhua txoj kev zoo siab hauv kuv lub neej yeej piv tsis tau rau txoj kev zoo siab uas kuv muaj thaum kuv zaum ntawm nws ncej puab thiab zaum ua viav vias es nws hu nkauj xwv kuv tsaug zog. Thaum xav txog qhov no,

kuv xav paub seb niaj hnuv no cov poj niam, cov uas muaj hauj lwm ntau thiab tsis khoom kiag li, puas to taub tias lawv ua dab tsi kho lawv tus me nyuam lub neej li cas. Kuv xav paub seb nws puas paub tias nws txoj kev hlub tseem ceeb npaum li cas rau nws tus me nyuam lub neej.”

Cov niam es, nej cov tub thiab ntxhais hluas yeej xav tau kev hlub thiab sij hawm thiab. Feem ntau cov niam thiab txiv qhia tau lawv txoj kev hlub rau lawv cov me nyuam thaum lawv tseem hluas, tiam sis nyuaj nyuaj rau lawv qhia thaum cov me nyuam laus zog. Thov Vajtswv pab nej kho qhov no. Tej tiam neeg tsis tas nyob sib nrug deb. Thiab yog yuav muaj li no yuav tsum muaj kev hlub. Peb cov neeg hluas xav tau kev hlub thiab sij hawm, tsis xav tau ntau. Lawv xav tau kev khuv leej thiab kev to taub lawm, tsis xav tau niam thiab txiv uas tsis nco qab txog lawv li. Lawv xav tau niam thiab txiv lub sij hawm. Ib leej niam txoj kev qhuab qhia thiab hlub thiab tso siab rau nws tus tub los sis ntxhais hluas yeej cawm tau lawv dim ntawm lub ntiaj teb uas phem.

Los ntawm Thawj Tswj Hwm Benson ib zag lus hauv ib txoj kev sib ntsib rau cov niam txiv thaum lub Ob Hlis Ntuj hnuv tim 22 xyoo 1987.

QHIA COV ME NYUAM LOS NTAWM YUS TUS YAM NTXWV THIAB KEV QHUAB QHIA

12

COV TSWV YIM RAU KEV NRUAB RAU HAUV YUS LUB NEEJ

Raws li koj xav tau thiab toob kas qhia, ua raws li ib los sis ob qho tswv yim no.

- Ntsuam xav seb nej cov me nyuam xav tau dab tsi los sis cov me nyuam xeeb ntxwv, cov lawm ntxhais thiab tub, los sis lwm cov me nyuam uas nej paub xav tau dab tsi. Npaj rau tej lub cib fim rau nej tau qhia cov me nyuam no los ntawm tej yam nej ua thiab tej lus nej hais.
- Tshab xyuas tej yam uas pab qhia txog tsev neeg hauv phau ntawv *Teaching, No Greater Call* (36123), phab 127–43, thiab *Tsev Neeg Phau Ntawv Qhia Kev* (31180), phab 4–10. Yog tias nej muaj poj niam muaj txiv, nrog nej tus khub nyeem thiab sib tham txog tej no.

KEV NYEEM NTAWV

Kawm zaj dab neeg nram no. Yog tias koj muaj poj niam muaj txiv, nyeem thiab nrog koj tus khub sib tham txog zaj no.

QHOV UAS NYUAJ TSHAJ PLAWS HAUV LUB NTIAJ TEB—UA NIAM THIAB TXIV ZOO

Txwj Laug James E. Faust
Nyob hauv Pawg Kaum Ob tug Thwj Tim

Txoj Kev Ua Niam thiab Txiv Yog ib txoj Hauj Lwm uas Los Saum Ntuj Los

Kuv xav tham me ntsis txog ib yam uas kuv tau txiav txim siab hu hais tias qhov uas nyuaj tshaj plaws hauv lub ntiaj teb. Nws yog lub cib fim thiab kev lav ris ua niam thiab txiv zoo. Hais txog qhov no ces muaj ntau ntau lub tswv yim twb muaj coob npaum li tej niam txiv hauv ntiaj teb no, tiam sis tsuas muaj tsawg leej uas cav tias lawv paub txhua nrho. Kuv tsis yog ib tug neeg uas xav tias kuv paub tag nrho.

Kuv xav tias niaj hnuv no hauv peb cov neeg haj yam muaj cov tub hluas thiab ntxhais hluas uas zoo tshaj yav tas los lawm hauv kuv lub neej. Tsuas muaj li no vim hais tias cov neeg hluas no tau loj hlob hauv tej tsev zoo uas muaj cov niam txiv uas rau siab ntso thiab hluv lawv. Txawm muaj li ntawd los, cov niam txiv uas txawj xav tseem xav tias lawv tau ua yuam kev ntau lawm thiab. Kuv nco txog ib lub sij hawm, thaum kuv tsiab tau txawj xav es, kuv nco qab hnov kuv niam hais tias, “kuv tau ua yuam kev qhov twg lauj?”

Tus Tswv tau txib peb lawm hais tias, “Coj nej cov me nyuam taug kev hauv qhov kaj thiab qhov

tseeb” (Q&K 93:40). Tam li kuv xav mas, tsis muaj ib yam uas tseem ceeb npaum qhov no hauv tib neeg tej hauj lwm.

Txoj kev ua ib leej txiv los sis ib leej niam tsis yog ib qho nyuaj xwb, nws twb yog ib txoj hauj lwm uas los saum ntuj los ntag. Nws yog ib yam uas yus yuav tsum fij tseg. Thawj Tswj Hwm David O. McKay tau hais txog kev ua niam thiab txiv tias “nws yog qhov uas Vajtswv qhia tias nws tso siab plhuav rau tib neeg” (*The Responsibility of Parents to Their Children* [me nyuam phau ntawv, tsis sau hnuv tim twg], ¹).

Tsim tej Vaj Tsev Zoo

Tib neeg tsis tshua muaj teeb meem nyuaj npaum li txoj kev ua niam thiab txiv zoo, tsis muaj tej lub sij hawm uas coj tau kev xyiv fab los ntau npaum qhov no. Tsis muaj ib txoj hauj lwm hauv ntiaj teb no uas tseem ceeb npaum li txoj kev npaj peb cov me nyuam los ua Vajtswv haiv neeg, muaj kev zoo siab, txaus hwm, thiab ua hauj lwm zoo. Cov niam txiv yuav tsis muaj kev zoo siab ntau npaum thaum lawv cov me nyuam hwm lawv thiab ua raws li lawv tej kev qhia. Qhov ntawd yog lub yeeb koob ntawm txoj kev ua niam txiv. Yauhas tau hais lus tim khawv tias, “Tsis muaj ib yam dab tsi ua rau kuv zoo siab tshaj qhov uas kuv hnov hais tias kuv cov me nyuam mloog Vajtswv lus” (3 Yauhas 1:4). Tam li kuv xav, txoj kev qhia, kev tu, thiab qhuab qhia cov me nyuam xav tau tswv yim, txoj kev paub, lub siab mos siab muag, dag zog, kev txawj ntse, kev txawj

mloog tus ntsuj plig, kev rau siab ntso, thiab tau siv zog ua hauv lwm ntau tshaj lwm qhov teeb meem hauv peb lub neej. Nov haj yam tseem ceeb heev thaum tej kev cai hais txog txoj kev hwm thiab ua neeg zoo hauv peb lub ntiaj teb no tab tom puas tsuaj mus. Yog peb yuav muaj tej tsev zoo, yuav tsum qhia txoj kev tsim txiaj, thiab yuav tsum muaj tej kev cai, yuav tsum muaj tej kev cai coj ua, thiab yuav tsum muaj tej kev tseeb. Ntau lub xam khoo tsis tshua txhawb pab niam txiv txoj kev qhuab qhia thiab saib tau txoj kev tsim txiaj rau nqi. Ntau haiv neeg tsis coj tej kev cai zoo lawm, thiab cov neeg hluas hauv cov xam khoo no tsis ua neeg tsim txiaj.

Thaum cov xam khoo tau puas tsuaj puas ntsoog thiab tsis paub coj kev cai thiab tej vaj tej tsev tau puas tsuaj thiab, peb txoj kev cia siab yog rau siab ntso thiab pab qhuab qhia tiam neeg tom ntej—uas yog peb cov me nyuam. Yog ua tau li no, peb yuav tsum xub txhawb pab cov xib hwb rau cov me nyuam. Cov uas tseem ceeb tshaj plaws yog niam thiab txiv thiab lwm cov neeg hauv tsev neeg, thiab qhov chaw zoo tshaj ua li no yog hauv tsev. Yuav tsum ua li cas, ua dab tsi, kom thiaj siv zog pab kom peb tej vaj tej tsev yuav muaj zog kom thiaj ua chaw dawb huv tawm tsam tej kev phem, tej yam tsis zoo uas nyob ib puag ncig peb. Kev sib haum xeeb, kev zoo siab, kev thaj yeeb nyab xeeb, thiab kev hlub hauv tsev yuav pab cov me nyuam muaj zog kom thiaj tiv tau lub neej no tej teeb meem. Ob peb hlis tas los no Barbara Bush, [Teb Chaws Amelikas] tus Thawj Tswj Hwm George Bush, tus poj niam, tau hais rau cov tub kawm ntawv hauv Wellesley College tias:

“Tiam sis txawm yog tiam neeg twg, txawm yog lub caij nyoog twg, muaj ib yam uas tsis txawj hloov: Cov niam thiab txiv, yog tias nej muaj me nyuam, lawv yuav tsum ua qhov xub thawj hauv nej lub neej. Nej yuav tsum nyeem ntawv rau nej cov me nyuam thiab nej yuav tsum khawm nej cov me nyuam thiab nej yuav tsum hlub nej cov me nyuam. Koj tsev neeg yuav zoo, peb lub xam khoo yuav zoo, vim tej yam uas nej ua hauv nej vaj nej tsev tsis yog nyob ntawm seb peb ua dab tsi hauv lub Tsev Dawb” (*Washington Post*, hnub tim 2 Rau Hli Ntuj 1990, 2).

Yog tias yuav ua ib leej txiv thiab leej niam zoo niam thiab txiv yuav tsum tso tej yam uas lawv nyiam thiab tej yam uas lawv xav tau tseg kom thiaj pab tau lawv cov me nyuam. Vim tua theem li no, cov niam thiab txiv uas txawj xav no muaj ib tug cwj pwm zoo thiab kawm ua raws li tej kev tseeb no ib yam li tus Cawm Seej Kiag tau qhia.

Kuv yeej saib cov niam uas tsis muaj ib tug txiv thiab cov txiv uas tsis muaj ib tug poj niam rau nqi vim lawv siv zog thiab tua theem, yeej siv zog kawg

kiag kom thiaj pab tau lawv tsev neeg nyob ua ke. Yuav tsum hwm lawv thiab txhawb pab lawv ua li no. Tiam sis ib leej niam los sis leej txiv txoj hauv lwm yeej yooj yim dua thaum muaj nkawd ob leeg hauv tsev. Cov me nyuam yeej thab thiab ua rau niam thiab txiv ob leeg sab thiab kawg tswv yim.

Nej Thov Vajtswv Ua Ib Tse Neeg Ntau Npaum Li Cas?

Ob peb xyoos tas los lawm, Npis Sov Stanley Smoot raug xam phaj los ntawm Thawj Tswj Hwm Spencer W. Kimball. Thawj Tswj Hwm Kimball tau nug hais tias, “Nej thov Vajtwv ua ib tse neeg ntau npaum li cas?”

Npis Sov Smoot teb hais tias, “Peb sim thov Vajtswv ua ib tse neeg li ob zaug txhua hnub, tiam sis feem ntau peb tsuas thov ib zaug xwb.”

Thawj Tswj Hwm Kimball teb hais tias, “Tej zaum yav tas los lawm, yog tias thov Vajtswv ua ib tse neeg ib zaug txhua hnub yeej zoo thiab. Tiam sis yav tom ntej li ntawd yuav tsis txaus yog tias peb xav cawm peb tsev neeg.”

Kuv xav paub seb yav tom ntej yog tias peb lam muaj tsev neeg hmo ua ke tej lub sij hawm xwb puas yuav pab kom thiaj txhawb pab tau peb cov me nyuam. Yav tom ntej, txoj kev lam kawm vaj lug kub ua ib tse neeg yuav tsis tiv thaiv peb cov me nyuam kom lawv thiaj txawj tawm tsam tej kev phem hauv ntiaj teb no. Cov me nyuam yuav kawm txog kev coj dawb huv, ua ncaj ncees, ua neeg zoo, thiab txawj xav qhov twg hauv lub ntiaj teb no? Yeej yuav pab qhia txog tej no hauv lub koom txoos, tiam sis niam thiab txiv txoj kev qhuab qhia haj yam tseem ceeb.

Niam Thiab Txiv Yuav Tsum Ua Ib tug Yam Ntxwv

Thaum niam txiv sim qhia lawv cov me nyuam kom tsis txhob kov kev xwm txheej, nws tsis zoo yog tias niam txiv hais rau lawv cov me nyuam tias, “Peb yeej txawj thiab muaj tswv yim hauv ntiaj teb no, ces peb thiaj mus tau ze dua ntawm qhov tsuas uas nej ua tau.” Thaum niam txiv hais ib yam ces ua lwm yam cov me nyuam tsis tso siab thiab tsis ntseeg tej yam uas lawv kawm hauv tsev. Piv xam hais tias, thaum niam thiab txiv mus saib tej zaj yeeb yaj kiab uas lawv txwv tsis pub cov me nyuam saib, lawv yuav tsis tso siab ntseeg niam thiab txiv. Yog tias xav kom cov me nyuam ua ncaj ncees, niam thiab txiv kuj yuav tsum ua ncaj ncees thiab. Yog tias xav kom cov me nyuam tsim txiaj, niam thiab txiv yuav tsum tsim txiaj thiab. Yog tias xav kom cov me nyuam ua zoo kom txaus qhuas, neb yuav tsum ua zoo kom txaus qhuas thiab.

Hais txog tej kev tsim txiaj uas yuav tsum qhia cov me nyuam ces yuav tsum qhia kom lawv saib

tau lwm tus neeg rau nqi, pib saib niam thiab txiv thiab tsev neeg rau nqi; saib tej cim rau kev ntseeg ntuj thiab lub teb lub chaws rau nqi; yuav tsum saib txoj kev cai thiab tseem fwv rau nqi; yuav tsum saib lwm tug neeg tej khoom rau nqi; yuav tsum saib txoj cai rau nqi thiab. Pov Lauj qhia peb tias cov me nyuam yuav tsum “xub kawm ua neeg tsim xiaj tom tsev” (1 Timau-tes 5:4).

Kev Qhuab Ntuas cov Me Nyuam

Ib qho uas nyuaj tshaj plaws rau niam thiab txiv yog txoj kev qhuab ntuas lawv cov me nyuam zoo. Txhua tus me nyuam nyias muaj nyias txoj kev tu zoo. Txhua tus me nyuam nyias yeej txawv nyias li. Ib yam uas pab ib tug me nyuam tej zaum yuav tsis pab lwm tus. Kuv tsis paub leej twg uas txawj ntse txaus thiaj hais tau tias qhov twg nyaum dhau los sis tsis tau qhuab ntuas txaus tsuas yog tus ntawd niam thiab txiv xwb, cov uas hlub lawv tshaj plaws. Nws yog ib yam uas niam thiab txiv yuav tsum ua tib zoo thov Vajtsv txog. Txoj ntsiab cai uas tseem ceeb tshaj plaws thiab uas ua lub hauv paus rau txoj kev qhuab ntuas cov me nyuam yuav tsum yog vim yus hlub es tsis yog vim yus xav rau txim. Brigham Young tau ntuas li no hais tias, “Yog tias koj tau cem leej twg, tsis cem ntau tshaj koj txoj kev hlub uas koj muab tau rau tus ntawd kom koj thiaj pab kho tau lawv tom qab” (*Discourses of Brigham Young*, tus kws sau John A. Widtsoe [1954], 278). Tiam sis, kev cob qhia thiab qhuab ntuas, yog ib yam ntawm txoj kev tu cov me nyuam. Yog tias niam thiab txiv tsis qhuab ntuas lawv cov me nyuam, ces luag tej yuav qhuab ntuas lawv ua tej yam ua niam thiab txiv tsis nyiam li. Yog tias tsis muaj kev qhuab ntuas, cov me nyuam yuav tsis saib tej kev cai hauv tsev los sis hauv lub xam khoo rau nqi li.

Ib lub ntsiab ntawm txoj kev qhuab qhia yog qhia kom lawv mloog lus. Thawj Tswj Hwm David O. McKay tau hais tias: Cov niam txiv uas tsis qhia lawv cov me nyuam kom mloog lus, thiab yog tias lawv tsis kawm mloog lus hauv tsev ces lub xam khoo yuav yuam kom cov me nyuam mloog lus. Yog li ntawd yuav zoo dua rau nej lub tsev, vim nyob hauv muaj kev hlub, kev khuv leej thiab ib leeg to taub ib leeg ces thiaj qhuab qhia tau cov me nyuam kom mloog lus nws thiaj tsis raug tej kev phem thiab kev quab yuam hauv lub xam khoo vim hais tias tsis tau kawm mloog lus hauv tsev” (*The Responsibility of Parents to Their Children*, ³).

Qhia cov Me Nyuam Ua Hauj Lwm

Ib qho tseem ceeb ntawm txoj kev qhia cov me nyuam kom txawj tswj hwm lawv tus kheej thiab txawj lav ris yog kom pab lawv kawm ua hauj lwm. Thaum peb loj hlob, peb feem coob ua zoo li ib tug

txiv neej hais, “Kuv nyiam hauj lwm; nws yog ib yam uas ua rau kuv xav tsis thooob. Kuv los zaum thiab ntsia tej hauj lwm ntawd tau ntau ntau xuab moos” (Jerome Klapka Jerome, hauv *The International Dictionary of Thoughts*, tus kws muab sau ua ke John P. Bradley, Leo F. Daniels, thiab Thomas C. Jones [1969], 782). Thiab ntxiv, cov xib hwb zoo tshaj plaws rau txoj ntsiab cai rau kev ua hauj lwm yog niam thiab txiv ntag. Rau kuv mas, kev ua hauj lwm thiaj lom zem thaum kuv ua nrog kuv txiv, yawg, txiv hlob txiv ntxawm, thiab cov kwv tij. Kuv paub tias feem ntau kuv tsuas xeeb txob lawv xwb, tiam sis kuv tseem nco qab ntsoov tej yam ntawd thiab tau kawm tej yam zoo heev. Cov me nyuam yuav tsum kawm kom txawj lav ris thiab vam lawv tus kheej. Peb cov uas ua niam ua txiv puas siv sij hawm qhia thiab koj thiab ua tib zoo piav xwv kom cov me nyuam yuav ua tau li Lihais tau qhia, “muaj cuab kav ua raws li lawv lub siab nyiam thiab yuav tsis...raug yuam kom ua ub ua no”? (2 Nifais 2:26).

Luther Burbank, ib tug neeg uas txawj ua teb uas nto moo hauv lub ntiaj teb, tau hais tias, “Yog tias peb tau saib xyuas peb tej tsoob paj ntau npaum li peb tau saib xyuas peb cov me nyuam, tam sim no ces peb yuav nyob hauv hav nroj hav tsuag xwb” (hauv *Elbert Hubbard's Scrap Book* [1923], 227).

Tej Teeb Meem Tshwj Xeeb rau Niam Txiv

Cov me nyuam yeej muaj kev ywj siab xaiv ib yam li peb sawv daws muaj kom thiaj thawb mus tom ntej, loj hlob thiab kawm tej yam tshiab. Txoj kev ywj siab ntawd kuj cia cov me nyuam xaiv kev qias dub, kev nkim sij hawm, kev ntshaw khoom, thiab ua rau lawv tus kheej puas tsuaj. Feem ntau cov me nyuam siv kev ywj siab no thaum lawv tseem hluas.

Cia cov niam txiv uas tau txawj xav, hlub, thiab muaj kev txhawj thiab cov uas tau ua raws li tej ntsiab cai ntawm kev ncaj ncees zoo npaum li lawv ua tau paub tias lawv tau ua niam txiv zoo tab txawm lawv cov me nyuam tau ua tej yam dab tsi. Cov me nyuam no muaj kev lav ris yuav tau mloog lus, ua raws li, thiab tau kawm lawm. Cov niam txiv tsis tas ris tag nrho lawv cov me nyuam tej kev txhaum vim lawv yuam tsis tau cov me nyuam kom ua zoo. Tej tug me nyuam kuj yuav kawg Xaulaumoos lub tswv yim thiab Yauj lub siab ntev.

Muaj ib qho teeb meem txawv heev rau tej niam txiv uas ua neeg nplua nuj los sis pub txhua yam tsav rau cov me nyuam. Tiag tiag mas, tej tus me nyuam uas nyob hauv cov tsev zoo li no yuam niam txiv uas lawv qhev es tsis kam ua raws li niam thiab txiv hais tsuas yog niam thiab txiv kam muab ntau yam khoom rau lawv. Txwj Laug Neal A. Maxwell tau hais tias, “Cov uas ua ntau dhau rau lawv cov

me nyuam yuav kawm paub tias lawv tswj hwm tsis tau lawv cov me nyuam. Coob tus me nyuam twb tau ntau dhau ces zoo nkaus li lawv yuav luag puas tsuaj tas” (hauv Conference Report, Plaub Hlis Ntuj 1975, 150; los sis *Ensign*, Tsib Hlis Ntuj 1975, 101). Zoo nkaus li tib neeg saib tsis tau tej khoom nuj nqi tsuas yog peb tau khwv kom thiaj tau tej ntawd peb tus kheej.

Ib qho uas ua rau kuv xav tsis thoob yog vim cov niam thiab txiv xav xav kom lawv cov me nyuam cov phooj ywg yuav nyiam lawv; tiam sis tib cov niam txiv no ntshai tsam lawv cov me nyuam tab tom ua tej yam uas lawv cov phooj ywg ua.

Pab cov Me Nyuam Ua Neeg Tsim Txiaj

Feem ntau, cov me nyuam uas tau txiav txim siab thiab tau cog lus tias yuav tsis noj cov tshuaj phem, haus dej cawv, thiab pw ua ke yog cov uas ua neeg tsim txiaj thiab ua raws li niam thiab txiv tau qhia. Thaum twg raug kev ntxias lawv haj yam yuav ua raws li niam thiab txiv tej kev qhia es tsis raws lawv cov phooj ywg tus yam ntxwv qab los sis ua raws li tej kev qhauj tawm hauv TV uas qhia tias txoj kev haus dej haus cawv, pw ua ke, ua kev plees kev yis, ua tsis ncaj, thiab lwm yam tsuas yog kev lom zem xwb. Lawv zoo li Hilamas ob txhiab tus tub rog hluas uas “tau raug qhia los ntawm lawv niam, tias yog lawv tsis txhob ua xyem xyav, Vajtswv yuav cawm lawv dim” kev tuag (Amas 56:47). “Thiab lawv tau rov qab hais...lawv niam tej lus hais tias: Peb yeej tsis ua xyem xyav peb niam yeej paub lawm” (Amas 56:48).

Qhov uas yuav pab niam thiab txiv tej kev qhia thiab nuj nqi nyob ruaj khov hauv lawv cov me nyuam lub neej yog ib txoj kev ntseeg Vajtswv uas ruaj khov. Thaum txoj kev ntseeg no tob mus hauv nruab plawv, lawv thiaj muaj dag muaj zog. Ces yog li ntawd, hais txog txhua yam uas yuav tsum qhia, qhov twg thiaj tseem ceeb tshaj plaws. Cov vaj lug kub qhia peb tias niam thiab txiv yuav tsum qhia lawv cov me nyuam txog “kev ntseeg Khetos uas yog Vajtswv tib Leeg Tub, thiab txog kev cai raus dej thiab lub txiaj ntsim ntawm tus Vaj Ntsuj Plig Dawb Huv,” thiab “tej lus qhuab qhia txog kev hloov siab lees txim” (Q&K 68:25). Yuav tsum qhia tej kev tseeb no hauv tsev. Qhia tsis tau tej no tom tsev kawm ntawv, thiab tseem fwm los sis lub xam khoov yeej yuav tsis txhawb nqa tej kev qhia no. Lub Koom Txoos cov khoos kas yeej yuav pab, tiam sis txoj kev qhuab qhia zoo tshaj plaws yog hauv vaj hauv tsev.

Ntau Txhiab txoj Kev Hlub

Niam txiv tej kev qhia tsis tas ua tej yam loj los sis tseem ceeb los sis muaj zog zis. Peb kawm paub li no los ntawm tus Xib Hwb Zoo. Charles Henry Parkhurst tau hais tias:

“Qhov zoo kawg nkaus hauv Khetos lub neej tsuas yog tej yam me me uas zoo kawg nkaus—li thaum nrog tus poj niam tham ntawm lub qhov dej;...qhia tus nom hluas txog tej kev xav hauv nws nruab siab uas yuav tiv thaiv tsis pub nws mus hauv Vajtswv lub nceeg vaj;...kev qhia nws cov ntseeg tias lawv yuav tsum thov Vajtswv li cas;...rauv taws thiab ci nqaij ntse rau nws cov thwj tim tau noj tshais thaum lawv los tsev tom qab mus nuv ntses ib tag hmo es no, sab sab, thiab tau poob siab. Nej yeej pom tias, tej yam no cia peb kawm paub tias Yexus Khetos lub siab xav li cas, nws tsom ntsoov, xav txog tej yam me me, yeej rau siab ntso rau tej yam ntawd” (“Kindness and Love,” hauv *Leaves of Gold* [1938], 177).

Thiab cov niam txiv yuav tsum ua li ntawd thiab. Tej yam me me yog tej yam loj loj uas muab tsev neeg khi ua kv hauv kev hlub, kev ntseeg, kev tswj hwm, kev txi, kev ua siab ntev, thiab ua hauj lwm.

Cov Me Nyuam los ntawm Kev Khi Lus

Muaj tej kev cog lus ntawm sab ntsuj plig uas pab tau cov niam txiv uas rau siab ntseeg hauv lub Koom Txoos no. Cov me nyuam uas yug los hauv kev sib khi nyob mus ib txhis yuav tau tej koob hmoov zoo uas twb cog tseg rau lawv poj koob yawm txwv uas tau ua raws li tej kev khi lus lawm. Yog li ntawd cov me nyuam thiaj tau tej yam zoo thiab yog cov uas tau qub txeeg qub teg vim muaj tej kev khi lus thiab cog lus no. Nov yog vim rau qhov lawv yog cov me nyuam los ntawm kev khi lus (saib Orson F. Whitney, hauv Conference Report, Plaub Hlis Ntuj 1929, 110–11).

Thov Vajtswv foom koob hmoov rau cov niam txiv zoo hauv ntiaj teb no uas tab tom siv zog, tua theem, uas txaus hwm. Thov kom Nws yuav saib tau cov niam txiv uas rau siab ntseeg tej kev khi lus thiab saib xyuas cov me nyuam los ntawm kev khi lus.

Los ntawm Txwj Laug Faust ib zaj lus thaum lub Kaum Hli Ntuj 1990 lub tuam rooj sab laj hauv lub Koom Txoos (saib Conference Report, Kaum Hli Ntuj 1990, 39–43; los sis *Ensign*, Kaum Ib Hlis Ntuj 1990, 32–35).

IB LUB ROOJ MOV UAS MUAJ KEV HLUB NYOB PUAG NCIG

Txwj Laug LeGrand R. Curtis
Uas nyob hauv Pawg Xya Caum

Twb tau sau ntau heev txog lub ntsiab rau lub tsev. Txwj Laug Marion G. Romney tau qhia peb tias “nyob hauv nruab nrab tej teeb meem hauv ntiaj teb no yog qhov uas tej tsev neeg tsis nyob ruaj khov.”¹ Peb paub tias tej lub tsev yeej loj heev, zoo nkauj kawg, thiab muaj tej khoom zoo. Lwm cov yog cov me me thiab tsis zoo pes tsawg, tsis muaj rooj tog ntau. Txawm li cas los puam chawj txhua lub yeej “ua tau ib qho ntawm lub ntuj ceeb tsheej hauv ntiaj teb no thaum tej no muaj kev hlub puv npo,...ib qho chaw xis nyob rau peb,” ib yam li peb ib zag nkauj qhia peb.²

Ib qho tseem ceeb heev hauv txhua lub tsev yog lub rooj noj mov. Txawm nws me me, los yog loj loj, los yog ib qho ces kaum uas nyuam qhuav txaus tso cov mov thiab tais diav rau. Lub ntsiab rau lub rooj noj mov yog ua chaw rau tsev neeg tau sib khoom noj mov ua ke.

Thaum lub sij hawm no kuv xav kom nej yuav xav txog lwm lub ntsiab, tej zaum tseem ceeb dua rau lub rooj noj mov, uas yog ua ib qho chaw uas peb tau ntau tshaj txoj kev yug sab cev nqaij daim tawv xwb.

Txoj Kev Sib Tham Txog txoj Moo Zoo Ib Ncig lub Rooj Noj Mov

Feem ntau ib tse neeg muaj cov laus thiab cov hluas, tiam sis tsev neeg yuav tau sib ntsib ua ke—tsis yog noj mov ua ke xwb tiam sis thov Vajtswv, sib tham, ib leeg mloog ib leeg lus, sib raug zoo, sib kawm, thiab loj hlob ua ke. Thawj Tswj Hwm Gordon B. Hinckley tau hais tias:

“Kuv taij—thiab xav kom kuv thiaj hais tau ib co lus zoo nkauj heev—tias xav xav kom cawm cov me nyuam dim. Lawv coob leej ua neej nyob ntshai thiab mob siab, muaj kev kho siab thiab nyuaj siab. Cov me nyuam xav tau lub hnuv qhov kaj. Lawv xav tau kev zoo siab. Lawv xav tau kev hlub thiab kev tu. Lawv xav tau kev ua siab zoo thiab txhawb pab thiab kev hlub tshua. Txhua lub tsev, txawm nws luaj npaum li cas los, yeej ua tau chaw uas muaj kev hlub uas yuav pab tib neeg tau kev cawm dim.”³

Feem ntau cov neeg hauv ib tse neeg raug txhua txoj kev ntxias hauv lub ntiaj teb sab nraum lub tsev, thiab kuj raug tej yam phem hauv vib thaj nyub, TV, kab xev, thiab lwm yam uas peb coj los tsev.

Cia li xav txog ib tse neeg uas zaum ib ncig ib lub rooj, tej zaum yog lub rooj noj mov, es sib tham txog txoj moo zoo, sib tham txog tej kev sib ntsib noj lub cim nco txog, tej zaj lus, sib tham txog tej zaj lus hauv phau *Ensign* los sis phau *New Era*, sib tham txog tej yam hauv tsev kawm ntawv, sib tham txog lub tuam rooj sab laj, sib tham txog Hnuv Caiv Kev Kawm Vaj Lug Kub tej zaj lus, mloog tej zaj nkauj zoo, sib tham txog Yexus Khetos thiab Nws tej kev qhia. Tseem hais tau tej yam ntxiv thiab. Tsis yog niam thiab txiv xwb tiam sis txhua tus neeg hauv tsev neeg yuav tsum cia txhua leej txhia tus muaj cai hais lus thiab sib koom sib tham li no.

Thov Vajtswv Ua Ib Tse Neeg Nyob Ib Ncig lub Rooj

Cia li xav seb yuav muaj xwm li cas thaum ib tse neeg txhos caug ib ncig ib lub rooj (tsis qhib TV li) thov Vajtswv, taij thov kom tau kev pab, ua Leej Txiv tsaug rau tej koob hmoov—es pab qhia txhua tus neeg tias peb Leej Txiv saum Ntuj Ceeb Tsheej uas hlub peb tseem ceeb npaum li cas. Kev thov Vajtswv ua ib tse neeg yuav pab cov hluas thaum lawv loj tuaj muaj lawv tsev neeg thiab ces yuav los thov Vajtswv nrog lawv tsev neeg thiab.

Txwj Laug Thomas S. Monson tau hais tias:

“Tus Tswv tau hais kom peb thov Vajtswv ua ib tse neeg thaum nws hais tias: ‘Thov rau Leej Txiv nyob hauv nej tsev neeg tas mus li los ntawm kuv lub npe, xwv kom nej tej poj niam thiab nej tej me nyuam yuav tau koob hmoov.’ (3 Nifais 18:21.)

“Koj sim nrog kuv saib seb ib tse neeg hauv Ib Tsoom Haiv Neeg Ntseeg hauv Hnuv Nyooog Kawg thov rau tus Tswv li cas? Leej txiv, leej niam, thiab txhua tus me nyuam txhos caug, nyo hau, thiab qi qhov muag. Muaj tus ntsuj plig ntawm kev sib hlub, sib koom siab, thiab kev thaj yeeb nyab xeeb puv npo hauv lub tsev. Thaum leej txiv hnov nws tus tub thov Vajtswv kom nws txiv yuav ua tej yam zoo thiab ua raws li tus Tswv hais, nej puas xav tias ib leej txiv puas yuav xav ua raws li nws tus tub thov? Thaum ib tug ntxhais hluas hnov nws niam taij tus Tswv kom nws tus ntxhais yuav xaiv ib tug khub zoo, xwv kom nws yuav npaj nws tus khee sib yuav hauv lub tuam tsev, nej puas xav tias ib tug ntxhais hluas li no puas yuav sim hwm ib leej niam uas txo hwj chim thov li no, vim nws yeej hlub nws niam heev? Thaum niam, txiv, thiab txhua tus me nyuam rau siab thov Vajtswv tias cov tub hauv tsev neeg yuav ua neeg tsim nyog thiaj raug hu mus ua tub txib sawv tus Tswv lub cev hauv lub Koom Txoos, ua li ces puas yog peb thiaj yuav pom cov tub hluas tiav nraug es muaj lub siab xav mus ua tub txib?”⁴

Ib yam li neeg coob tau hais, “Nej cov uas ua niam ua txiv yuav ua li cas xa nej cov me nyuam tawm mus hauv lub ntiaj teb txhua hnuv tsuas yog nej xub tau muab lawv sau ua ke thiab nrog tus Tswv tham?” Cov niam txiv zoo yuav saib xyuas lawv tau teem caij li cas thiab teem ib lub sij hawm tseg txhua hnuv uas lawv tau coj lawv tsev neeg los ua ke ua ib tse neeg thov Vajtswv foom koob hmoov rau lawv. Tsis ntev ces, yuav kawm sib pauv na thib thiab kawm tias kev thov Vajtswv ua ib tse neeg muaj nuj nqi li cas.

Ua Kom lub Tsev Ua Chaw Muaj Kev Zoo Siab

Kuv twb hais lawm tias “lub tsev yuav tsum ua chaw uas muaj kev zoo siab vim sawv daws sib pab kom muaj li ntawd. Luag hais tias kev zoo siab yog ib yam uas tsim tau hauv tsev, thiab peb yuav tsum sim ua kom peb tej tsev muaj kev zoo siab thiab yuav xis nyob rau peb sawv daws thiab peb cov me nyuam. Ib lub tsev uas muaj kev zoo siab yog ib lub uas ua raws li txoj moo zoo tej kev qhia. Yog yuav muaj li no, sawv daws yuav tsum siv zog ua.”⁵

Ib tug tub hluas uas tsis khoom li hauv ib tse neeg loj tsawv tau yws yws vim tau siv sij hawm ntau heev thov Vajtswv ua ib tse neeg. Hnuv tom qab ntawd thaum nws niam thov Vajtswv, nws txhob txwm tsis thov Vajtswv rau tus tub hluas ntawd. Thaum nws xaus zaj lus thov Vajtswv, tus tub hluas uas tsis khoom li tau hais tias, “Niam, koj tsis tau thov Vajtswv rau kuv li as!” Leej niam tau piav tias nws tsuas ua raws li tus tub hluas tau hais lawm xwb. Ces tus tub hluas tau yws hais tias, “Tsis txhob tso kuv tseg li.”

Kawm Vaj Lug Kub ncig ib lub Rooj

Sim xav txog ib tse neeg zaum ib ncig ib lub rooj qhib phau vaj lug kub cia, sib tham txog tej kev tseeb thiab kawm tej zaj lus hauv. Nov yeej yog ib lub rooj uas muaj kev hlub tiag!

Cov neeg qhia ntawv hais tias cov me nyuam yuav tsum nyeem ntawv sab nraum lub tsev kawm ntawv. Peb muab tau koob hmoov rau peb cov me nyuam txhua hnuv uas peb nrog lawv nyeem vaj lug kub—nyob ntawm lub rooj noj mov.

Tej zaum yuav tau kho nej lub neej ntau kom thiaj muaj sij hawm ua ib tse neeg los zaum ntawm lub rooj noj mov, tiam sis puas muaj lwm yam uas tseem ceeb tshaj kom tsev neeg thiaj koom ib lub siab, kom tsev neeg loj hlob ntawm sab ntsuj plig, kom cov neeg hauv tsev neeg sib tuam choj ua ke thaum lawv sib tham, mloog, thiab sib raug zoo, muaj kev hlub nyob puag ncig? Peb yuav ua tau tej yam zoo thaum sim ua—ua ntau zaus.

Ua Kom Tsev Neeg Muaj Zog

Niaj hnuv no muaj ntau yam hauv ntiaj teb no uas sim ua rau tsev neeg thiab lub tsev puas tsauj puas ntsoog. Cov niam txiv uas txawj ntse yuav sim ua kom tsev neeg muaj zog, kom haj yam muaj tus ntsuj plig hauv tsev, thiab tsoom ntsoov rau Yexus Khetos thiab tej hauj lwm ntawm lub tuam tsev. Thawj Tswj Hwm Howard W. Hunter tau qhia peb tias:

“Kuv thov kom peb ib leeg yuav haj yam ua siab zoo, muaj siab hlub, txo hwj chim thiab ua siab ntev thiab zam txim rau ib leeg. . . .

“Qhov thib ob, thaum muaj ib tug ntsuj plig zoo li ntawd, kuv caw cov mej zeej hauv lub Koom Txoos kom txhim tsa tus Tswv lub tuam tsev ua lub cim qhia tias lawv ua mej zeej thiab yog ib qho chaw zoo rau tej kev khi lus dawb ceev. Txoj kev xav hauv kuv nruab siab yog kom txhua tus mej zeej hauv lub Koom Txoos yuav tsim nyog nkag mus hauv lub tuam tsev.”⁶

Yuav haj yam txawj ua li Thawj Tswj Hwm Hunter cov lus ntuas no yog tias ua tej yam zoo ib ncig lub rooj noj mov.

Nyob hauv peb tej vaj tsev peb yuav tsum xyaum ua zoo rau lwm tus neeg. Ib yam li tus kws sau paj huam Goethe tau hais, “Yog tias yus ua rau ib tug neeg li yus ib txwm ua, tiam sis yog tias yus ua rau nws zoo li tej yam tus neeg yuav txawj ua...zoo li ib tug neeg uas nws peem tau los ua, nws yuav [peem los ua ib tug neeg zoo li ntawd ntag].”⁷

Ua Kom Vaj Tsev Muaj Kev Hwm

Txwj Laug Boyd K. Packer tau hais tias: “Thaum coj tej yam uas los saum ntuj ceeb tsheej los rau hauv tsev yuav pab kom txhua tus neeg hauv tsev neeg koom lub koom txoos. Tsev neeg hmo ua ke, yeej yog txoj kev pab ua li no—ib txoj kev sib ntsib hauv tsev uas pab tau txhua yam tsav; thiab qhov ntawd tseem zoo npaum li lub koom txoos ib txoj kev sib ntsib, los sis yeej ua tau, ib yam li tej yam uas ua hauv lub koom txoos.”⁸

Txwj Laug Dean L. Larsen kuj pom zoo rau tej lus ntuas no nws tau qhia peb tias: “Peb cov tsev hauv lub koom txoos tsis yog tib qho chaw rau peb tau teev ntuj xwb. Peb cov tsev yuav tsum yog tej qhov chaw uas muaj kev hwm. Yuav zoo heev yog tias txhua hnuv peb yuav ‘mus tsev thiaj txog lub koom txoos.’ Yuav tsum tsis txhob muaj lwm qhov chaw rau tus Tswv tus Ntsuj Plig tau nyob ntau npaum li hauv peb tej vaj tej tsev.”⁹

Thaum peb siv zog kom muaj li no hauv peb lub tsev, peb yuav tsum nco qab ntsoov Thawj Tswj Hwm Harold B. Lee cov lus: “Nco qab ntsoov tias tus

Tswv txoj hauj lwm tseem ceeb tshaj plaws uas nej [thiab kuv] yuav ua...yeej nyob sab hauv peb vaj peb tsev."¹⁰

Hnub no kuv taj thiab thov kom peb sawv daws yuav ntsia peb vaj peb tsev thiab lub rooj noj mov

thiab sim coj lub ntuj ceeb tsheej los tsev thiab los cuag Yexus Khetos.

Los ntawm Txwj Laug Curtis ib zag lus thaum lub Plaub Hlis Ntuj 1995 hauv lub Koom Txoos lub tuam rooj sab laj (saib Conference Report, Plaub Hlis Ntuj 1995, 109–11; los sis *Ensign*, Tsib Hlis Ntuj 1995, 82–83).

LUS CIM

1. "Scriptures As They Relate to Family Stability," *Ensign*, Ob Hlis Ntuj 1972, 57.
2. "Home Can Be a Heaven on Earth," *Hymns*, naj npawb 298.
3. Hauv Conference Report, Kaum Hli Ntuj 1994, 74–75; los sis *Ensign*, Kaum Ib Hlis Ntuj 1994, 54.
4. *Pathways to Perfection* (1973), 26–27.
5. Hauv Conference Report, Kaum Hli Ntuj 1990, 13; los sis *Ensign*, Kaum Ib Hlis Ntuj 1990, 12.
6. Hauv "President Howard W. Hunter: Fourteenth President of the Church," *Ensign*, Xya Hli Ntuj 1994, 4–5.
7. Hauv Emerson Roy West, *Vital Quotations* (1968), 171.
8. "Begin Where You Are—At Home," *Ensign*, Ob Hlis Ntuj 1972, 71.
9. Hauv Conference Report, Kaum Hli Ntuj 1989, 78; los sis *Ensign*, Kaum Ib Hlis Ntuj 1989, 63.
10. *Strengthening the Home* (phau ntawv, 1973), 7.

QHIA TXOJ MOO ZOO TEJ NTSIAB CAI RAU COV ME NYUAM

13

QHOV 1

COV TSWV YIM RAU KEV NRUAB RAU HAUV YUS LUB NEEJ

Raws li koj xav tau thiab toob kas qhia, ua raws li ib los sis ob qho tswv yim no.

- Nyeem phau Lus Qhuab Qhia thiab Kev Khi Lus 68:25–28. Thaum koj tab tom nyeem, nrhiav cov ntsiab cai thiab tej kab ke uas tus Tswv tau txib kom niam thiab txiv qhia lawv cov me nyuam. Npaj tej tswv yim uas nej ua tau thiaj qhia tej ntsiab cai thiab kab ke no rau nej cov me nyuam thiab cov xeeb ntxwv, cov lawm tub thiab ntxhais, los sis lwm cov me nyuam uas koj paub.
- Thaum koj nyeem zaj lus nram no, xaiv ib ob lub tswv yim uas Txwj Laug Robert D. Hales tham txog. Thaum raug tej xwm, sim xav txog lwm cov tswv yim hauv zaj lus no.

KEV NYEEM NTAWV

Kawm zaj dab neeg nram no. Yog tias koj muaj poj niam muaj txiv, nyeem thiab nrog koj tus khub sib tham txog zaj no.

KEV NTXIV DAG ZOG RAU TSEV NEEG: PEB TXOJ NTIAG TUG HAUJ LWM DAWB CEEV

Txwj Laug Robert D. Hales
Los ntawm Pawg Kaum Ob tug Thwj Tim

Tus Ntsuj Plig Pab Ntxiv Dag Zog Rau tej Yim Neeg

Cov niam txiv, cov me nyuam, cov kwv tij neej tsa, cov thawj coj, cov xib hwb, thiab cov mej zeej hauv lub Koom Txoos txoj ntiag tug hauj lwm dawb ceev yog kom ntxiv dag zog rau tej tsev neeg.

Yeej qhia meej meej hauv cov vaj lug kub tias txoj kev ntxiv dag zog rau tsev neeg sab ntsuj plig tseem ceeb heev. Leej Txiv Adas thiab Leej Niam Evas tau qhia txoj moo zoo rau lawv cov tub thiab cov ntxhais. Tus Tswv tau pom zoo rau Anpees tej kev txi, vim nws hlub tus Tswv. Tiam sis, Kayees ho “hlub Ntxwng Nyoog ntau tshaj nws hlub Vajtswv” thiab tau ua tej kev txhaum loj heev. Adas thiab Evas “tu siab nrho rau ntawm tus Tswv, vim Kayees thiab nws cov kwv tij,” tiam sis lawv tsis tau tso txoj kev qhia txoj moo zoo rau lawv cov me nyuam tseg (saib Mauxes 5:12, 18, 20, 27; 6:1, 58).

Peb yuav tsum to taub tias peb txhua tus me nyuam nyias muaj nyias tej kev txawj thiab tus cwj pwm. Ib txhia zoo li Anpees, muaj kev ntseeg txij thaum yug los. Lwm cov pheej txiav txim siab tsis tau. Peb cov uas ua niam thiab txiv, yuav tsum tsis txhob poob siab los sis tso kev ntseeg tus Tswv tseg vim hais tias peb cov me nyuam muaj kev nyuaj siab thiab tshawb nrhiav ub no.

Amas tus Hluas, thaum “raug kev tsim txom...[thiab] los ntawm txoj kev nco qab txog [nws] tej kev txhaum ntau,” txawm nco qab nws txiv tej kev qhia txog “Yexus Khetos, Vajtswv ib tug tub, yuav los theej ntiaj teb tej kev txhaum” (Amas 36:17). Nws txiv tej lus tau pab nws hloov siab los ntseeg. Ua li ntawd, peb cov me nyuam yuav nco qab ntsoov peb tej kev qhia thiab zaj lus tim khawv.

Hilamas 2,000 tus tub rog tau hais lus tim khawv tias lawv cov niam uas ncaj ncees tau ua tib zoo qhia txoj moo zoo tej ntsiab cai rau lawv (saib Amas 56:47–48).

Thaum Enos xav ntau heev txog tej yam ntawm sab ntsuj plig nws tau hais tias, “Tej lus uas kuv nquag nquag hnov kuv txiv hais txog txoj sia nyob mus ib txhis...tau tog mus tob rau hauv kuv lub siab” (Enos 1:3).

Nyob hauv phau Lus Qhuab Qhia thiab Kev Khi Lus tus Tswv hais tias cov niam txiv yuav tsum qhia lawv cov me nyuam “kom to taub txoj lus qhuab qhia ntawm kev hloov siab lees txim, kev ntseeg Khetos uas yog Vajtswv tib Leeg Tub, thiab txog kev cai raus dej thiab lub txiaj ntsim ntawm tus Vaj Ntsuj Plig Dawb Huv los ntawm kev tso tes, thaum nto txog yim xyoo. . . .

“Thiab lawv kuj yuav qhia lawv cov me nyuam kom thov Vajtswv, thiab sawv ntsug taug kev rau ntawm tus Tswv” (Q&K 68:25, 28).

Txoj Kev Qhia txoj Moo Zoo Ntxiv Dag Ntxiv Zog Rau tej Tsev Neeg

Thaum peb qhia txoj moo zoo rau peb cov me nyuam los ntawm peb cov lus thiab tus yam ntxwv, peb tsev neeg sab ntsuj plig yuav muaj dag muaj zog thiab tau kev pov hwm.

Cov yaj saub uas muaj sia nyob cov lus yeej piav meej meej tias peb ntiag tug hauj lwm dawb ceev kom ntxiv dag zog rau peb tsev neeg sab ntsuj plig yog li cas. Thaum xyoo 1995 Thawj Pawg Thawj Tswj Hwm thiab Pawg Kaum Ob Tug Thwj Tim tau hais lus tshaj tawm rau lub ntiag teb tias “tsev neeg yog lub ntsiab ntawm tus Tsim lub tswv yim rau Nws cov me nyuam txoj hmoov nyob mus ib txhis li.... Ib nkawg niam txiv twg muaj ib txoj kev lav ris tseem ceeb kom ib tug hlub thiab saib xyuas ib tug thiab kom hlub thiab saib xyuas nkawd cov me nyuam....Niam txiv muaj ib lub luag hauj lwm tseem ceeb dawb ceev kom cob nkawd cov me nyuam raws li kev hlub thiab kev ncaj ncees, kom npaj muab raws li lawv toob kas ntawm sab nqaj daim tawv thiab sab ntsuj plig, kom qhia lawv sib hlub thiab sib pab, kom ua raws li Vajtswv tej lus txib” (“Tsev Neeg: Ib Zaj Lus Tshaj Tawm Rau lub Ntiag Teb,” *Ensign*, Kaum Ib Hlis Ntuj 1995, 102).

Thaum lub Ob Hlis Ntuj xyoo no, Thawj Pawg Thawj Tswj Hwm tau hu kom txhua tus niam thiab txiv yuav “rau siab ntso qhia thiab tu lawv cov me nyuam hauv txoj moo zoo tej ntsiab cai uas yuav pab lawv nyob ruaj khov hauv lub Koom Txoos. Lub tsev ua lub hauv paus rau ib lub neej ncaj ncees, thiab tsis muaj lwm yam dab tsi uas pauv tau nws chaw los sis ua nws tej hauj lwm uas Vajtswv tau muab rau niam txiv ua no.”

Nyob hauv tsab ntawv thaum lub Ob Hlis Ntuj no, Thawj Pawg Thawj Tswj Hwm tau qhia tias thaum qhia thiab tu cov me nyuam hauv txoj moo zoo tej ntsiab cai, niam thiab txiv pov hwm tau lawv tsev neeg los ntawm tej yam phem. Lawv kuj ntuas cov niam thiab txiv thiab cov me nyuam “kom rau siab thov Vajtswv ua ib tse neeg, muaj tsev neeg hmo ua ke, kawm thiab qhia txoj moo zoo, thiab ua tej yam zoo nrog yus tsev neeg. Txawm tias lwm yam tsim nyog thiab lwm txoj hauj lwm tseem ceeb npaum li cas los, tej ntawd yuav tsum tsis txhob tab kaum tej yam uas niam thiab txiv thiab tsev neeg nkaus xwb thiaj ua tau” (Thawj Pawg Thawj Tswj Hwm ib tsab ntawv, Ob Hlis Ntuj hnuv tim 11, 1999; sau hauv *Church News*, Ob Hlis Ntuj hnuv tim 27, 1999, 3).

Thaum muaj tus Tswv kev pab thiab Nws cov lus qhuab qhia, ib tse neeg thiaj yuav to taub thiab kov yeej lawv txhua qhov teeb meem. Txawm tsev neeg xav tau dab tsi los, peb ntxiv tau dag zog rau peb tsev neeg thaum peb ua raws li cov yaj saub cov lus ntuas.

Qhov uas yuav pab ntxiv dag zog rau peb tsev neeg yog muaj tus Tswv tus Ntsuj Plig hauv peb vaj peb tsev. Lub hom phiaj rau peb tsev neeg yuav tsum yog nyob rau hauv txoj kev ti thiab nqaim.

Cov Tswv Yim uas Pab Ntxiv Dag Zog Rau tej Yim Neeg

Peb yeej ua ntau tsav ntau yam hauv peb vaj peb tsev kom thiaj pab ntxiv dag zog rau tsev neeg. Kuv xav qhia ob peb tswv yim uas peb tsev neeg xav tau kom peb thiaj muaj dag muaj zog. Kuv qhia tej no xwv kom thiaj txhawb pab tau nej, kuv los kuj paub tias txhua tsev neeg—thiab txhua tus neeg hauv tsev neeg—yeej nyias txawv nyias tus.

Cov Tsev Yuav Tsum Ua Chaw uas Tsis Muaj Xwm Txheej

- Ua kom peb lub tsev tsis muaj xwm txheej xwv kom txhua tus neeg hnov tau kev hlub thiab xav tias lawv tsim nyog nyob hauv peb tsev neeg. Yuav tsum to taub tias txhua tus me nyuam nyias muaj nyias tej kev txawj thiab khoom plig; txhua tus xav tau kev hlub thiab kev tu.
- Nco qab ntsoov, “tej lus mos lus muag tav tau luag txoj kev chim” (Paj Lug 15:1). Thaum kuv thiab kuv tus hlub raug muab khi ua ke hauv lub Tuam Tsev Salt Lake, Txwj Laug Harold B. Lee tau ntuas peb zoo zoo hais tias. “Peb yuav tsum tsis txhob muaj kev chim siab es thiaj tsis kam qhib peb lub siab los sis lub tsev rau peb cov me nyuam. Zoo li tus tub uas ua yuam kev, peb cov me nyuam yuav tsum paub tias thaum lawv nco dheev lawv tau txhaum li cas lawm lawv thiaj los cuag peb thiab peb yuav hlub thiab ntuas lawv.
- Siv sij hawm nrog peb cov me nyuam, cia lawv xaiv tej yam lawv xav ua thiab xav tham txog. Tshem tej yam uas yuav tab kaum qhov no.

Qhia cov Me Nyuam Kev Thov Vajtswv, Nyeem cov Vaj Lug Kub, thiab Mloog cov Nkauj Zoo

- Yaum kom peb cov me nyuam teev ntuj lawv ib leeg, zoo nkaus li thov Vajtswv lawv ib leeg xwb, kawm vaj lug kub lawv ib leeg, thiab yoo mov rau tej yam tseem ceeb. Ntsuas lawv txoj kev loj hlob ntawm sab ntsuj plig thaum ntsuas seb lawv coj cwj pwm li cas, hais lus, thiab ua zoo npaum li cas rau lwm tus neeg.
- Txhua hnuv thov Vajtswv nrog peb cov me nyuam.
- Nyeem cov vaj lug kub ua ke. Kuv nco txog thaum kuv niam thiab kuv txiv tau nyeem cov vaj lug kub thaum peb cov me nyuam tau zaum hauv av thiab mloog. Tej thaum nkawd tau nug hais tias, “Nqe vaj lug kub no txhais tau li cas?” los sis “Nqe ntawd ua rau koj xav li cas?” Ces nkawd

yuav mloog peb hais thaum peb teb nkawd lo lus nug ntawd.

- Nyeem cov yaj saub uas muaj sia nyob cov lus thiab lwm zaj lus uas tshoov siab nyob hauv tej phau ntawv xov xwm ntawm lub Koom Txoos rau cov me nyuam, cov tub hluas thiab ntxhais hluas, thiab cov laus tau mloog.
- Peb qhib tau tej nkauj zoo heev hauv peb tsev thaum peb hu nkauj ua ke hu tej nkauj qhuas Vajtsv thiab cov nkauj hauv *Cov Me Nyuam Phau Nkauj*.

Muaj Tsev Neeg Hmo Ua Ke thiab Tsev Neeg Pawg Sab Laj

- Txhua lim tiam muaj tsev neeg hmo ua ke. Tej thaum, peb cov uas ua niam ua txiv txaj muag qhia los sis hais lus tim khawv rau peb cov me nyuam. Kuv twb ua li ntawd hauv kuv lub neej thiab. Peb yuav tsum qhia peb tej kev xav ntawm sab ntsuj plig rau peb cov me nyuam thiab yuav tau qhia thiab hais lus tim khawv rau lawv.
- Muaj tsev neeg tej pawg sab laj kom thiaj sib tham tau txog tsev neeg tej hauv lwm thiab tej teeb meem. Tej thaum qhov kev sab laj uas yuav zoo tshaj yog thaum ib leeg hais lus rau ib leeg. Pab peb cov me nyuam to taub tias lawv tej tswv yim yeej tseem ceeb thiab. Mloog lawv hais thiab kawm los ntawm lawv thiab.

Faib txoj Moo Zoo, Txhawb Nqa lub Koom Txoos cov Thawj Coj, thiab Koom ua ib Tse Neeg

- Caw cov tub txib los qhia cov neeg uas tsis tshua muaj siab ntseeg los sis cov phooj ywg uas tsis yog mej zeej hauv peb vaj peb tsev.
- Qhia tias peb yeej txhawb nqa thiab pom zoo rau lub Koom Txoos cov thawj coj.
- Noj mov ua ke thaum twg ua tau, thiab sib tham txog tej yam uas tseem ceeb thaum tab tom noj mov.
- Ua hauv lwm ua ib tse neeg, tab txawm yuav ceev dua thiab yooj yim dua ua yus tus kheej. Nrog peb cov tub thiab ntxhais sib tham thaum peb tab tom ua hauv lwm. Kuv twb muaj cib fim ua li ntawd txhua hnuv Saturday nrog kuv txiv.

Qhia Kom cov Me Nyuam Ua Phooj Ywg Zoo thiab Npaj rau Yav Tom Ntej

- Pab peb cov me nyuam kom txawj ua phooj ua ywg zoo thiab kom lawv cov phooj ywg yuav xis nyob hauv peb lub tsev. Cia li ntsib peb cov me nyuam cov phooj ywg niam thiab txiv.

- Ua yam ntxwv qhia peb cov me nyuam yuav tau siv sij hawm thiab nyiaj txiag li cas. Pab lawv kawm paub tias kev vam yus tus kheej thiab npaj rau yav tom ntej tseem ceeb npaum li cas.

Qhia Txog Tsev Neeg Zaj Liv Xwm thiab tej Kab Lig Kev Cai

- Qhia peb cov me nyuam txog peb pog koob yawm txwv zaj keeb puam thiab txog peb tsev neeg zaj keeb puam thiab.
- Tsim tsev neeg tej kab lig kev cai. Npaj thiab mus yos teb chaws ua ke, sim xav seb cov me nyuam xav tau dab tsi, muaj kev txawj li cas, muaj cuab kav li cas. Pab kom lawv muaj kev zoo siab, haj yam txawj ua ub ua no, thiab pab kom lawv paub tias lawv yog neeg tsim txiaj.

Qhia Lawv txoj Kev Ua Raws Li cov Lus Txib thiab Txais tej Kab Ke Tseem Ceeb Npaum Li Cas

- Los ntawm peb cov lus thiab tus yam ntxwv, cia li qhia txog tej kev tsim txiaj thiab yuav ua raws nraim li cov lus txib.
- Tom qab kuv tau ua kev cai raus dej thiab kev pom zoo tas, kuv niam tau los nug kuv hais tias, "Koj xav li cas?" Kuv tau piav hais tias kuv tau nyob sov siab sov thiab muaj kev thaj yeeb nyab xeeb, kev nplij siab, thiab kev zoo siab. Kuv niam tau piav tias tej kev xav ntawd yog lub txiaj ntsim uas kuv tau txais lawm, uas yog lub txiaj ntsim ntawm tus Vaj Ntsuj Plig Dawb Huv. Nws tau piav rau kuv hais tias yog tias kuv ua neej tsim nyog ces, kuv yuav muaj lub txiaj ntsim ntawd tas mu li. Qhov kev qhia ntawd tau nyob nraim hauv kuv nruab siab hauv tag nrho kuv lub neej.

Qhia peb cov me nyuam tias kev cai raus dej thiab kev pom zoo, txoj kev txais yuav lub txiaj ntsim ntawm tus Vaj Ntsuj Plig Dawb Huv, kev noj lub cim nco txog, kev hwm lub pov thawj hwj, thiab khi thiab ceev tej kev khi lus hauv lub tuam tsev muaj nuj nqi npaum li cas. Lawv yuav tsum paub tias txoj kev ua neej nyob kom thiaj tsim nyog yuav ib daim ntawv tso cai nkag mus tuam tsev thiab npaj siab rau txoj kev sib yuav hauv lub tuam tsev tseem ceeb npaum li cas.

- Yog nej tsis tau raug muab sib khi rau nej tus poj niam los sis tus txiv los sis nej cov me nyuam hauv lub tuam tsev, cia li sib koom tes npaj mus txais tej koob hmoov hauv lub tuam tsev. Ua ib tse neeg cia li tsa tej hom phiaj rau lub tuam tsev.
- Cov kwv tij es, ua neeg kom thiaj tsim nyog tau lub pov thawj hwj uas nej tuav, thiab siv lub pov thawj hwj foom koob hmoov rau nej tsev neeg. . . .

Yuav Tsum Paub txog Koog Zej Zog, Tsev Kawm Ntawv, thiab lub Koom Txoos tej Kev Ua Si

Yeej muaj tej yam sab nraum lub tsev. Txoj kev ua tib zoo siv tej no yuav ntxiv dag zog rau peb tsev neeg.

- Yaum peb cov me nyuam kom ua hauj lwm hauv lub Koom Txoos thiab koog zej zog.
- Nrog peb cov me nyuam cov xib hwb, cov nais rau tej pab ncaws pob, cov pab cuam, cov thawj tswj hwm, thiab lub Koom Txoos cov thawj coj tham txog peb tej kev txhawj xeeb thiab tias peb cov me nyuam xav tau dab tsi.
- Peb yuav tsum paub tias peb cov me nyuam ua dab tsi thaum tsis tshua muaj dab tsi ua. Yaum kom lawv xaiv tej zaj yeeb yaj kiab, TV, thiab cov kab xev zoo. Yog tias lawv txuas tau rau lub Internet, nej yuav tsum paub tias lawv saib tej yam dab tsi. Yuav tsum pab kom lawv saib tej yam zoo xwb.
- Yaum kom lawv ua tej yam zoo hauv tsev kawm ntawv. Yuav tsum paub hais tias peb cov me nyuam tab tom kawm txog dab tsi. Pab lawv ua lawv tej ntaub ntawv. Pab kom lawv to taub tias txoj kev kawm ntaub kawm ntawv thiab npaj yuav ua hauj lwm thiab vam lawv tus kheej tseem ceeb npaum li cas.
- Cov ntxhais hluas: Mus koom lub Koom Haum Niam Tsev thaum nej nto txog 18 xyoo. Nej ib txhia yuav txaj muag ua li no. Tej zaum nej ntshai tias nej yuav tsis swm lawv. Kuv cov muam hluas es, nov tsis muaj tseeb. Muaj ntau tsav ntau yam hauv lub Koom Haum Niam Tsev uas yuav zoo rau nej. Nws ua tau ib qho koob hmoov hauv tag nrho nej lub neej.
- Cov tub hluas: Hwm lub Pov Thawj Hwj Aloos. Nws yog lub pov thawj hwj uas npaj nej lub siab, npaj nej los txais yuav lub Pov Thawj Hwj Mekhixedes. Mus koom pawg txwj laug thaum nej raug tsa los rau lub Pov Thawj Hwj Mekhixedes. Txoj kev ua kwv ua tij no, kev qhuab qhia hauv pawg, thiab lub cib fim los ua hauj lwm pab luag tej yuav foom koob hmoov rau nej thiab nej tsev neeg lub neej.

Ua Raws Li tus Tswv tus Yam Ntxwv txog Kev Hlub

Txhua tsev neeg txais tau dag zog yog tias yus coj tus Tswv tus Ntsuj Plig los rau hauv peb vaj peb tsev thiab yog peb qhia los ntawm Nws tus yam ntxwv.

- Muaj kev ntseeg; tsis txhob muaj kev ntshai. Thaum peb cov tub hluas thiab ntxhais hluas pib sim peb tsev neeg tej cai, niam thiab txiv yuav tsum thov Vajtswv coj lawv txoj hau kev kom thiaj pab tau txhua tus neeg hauv lawv tsev neeg. Thaum ntawd ces yog lub sij hawm uas yuav

tsum haj yam hlub thiab txhawb pab thiab ntxiv zog rau nej tej kev qhia txog txoj kev txiav txim siab. Txoj kev cia yus cov me nyuam kawm los ntawm lawv tej kev yuam kev yeej tsaus ntshai kawg, tiam sis thaum lawv kam xaiv ua raws li tus Tswv lub siab nyiam thiab raws li tsev neeg tej kev cai hais yuav pab lawv ntau tshaj qhov uas peb yuam kom lawv ua. Tus Tswv txoj kev hlub thiab zoo siab tos txais neeg yeej zoo tshaj Ntxwv Nyoog txoj kev yuam thiab quab yuam, nws haj yam zoo rau cov tub thiab ntxhais hluas.

- Nco ntsoov tus Yaj Saub Yauxej Xamiv cov lus: “Tsis muaj ib yam dab tsi uas yuav pab tib neeg tso tej kev txhaum tseg ntau npaum li txoj kev mus tuav lawv txhais tes, thiab ua tib zoo saib xyuas lawv. Thaum tib neeg ua siab zoo thiab hlub kuv, qhov ntawd kav nkaus kuv lub siab, tiam sis qhov fab ntxeev thaum lawv ua tsis zoo ces yus thiaj muaj kev npau taws thiab nyuaj siab” (*Teachings of the Prophet Joseph Smith*, tus kws xaiv ntawv yog Joseph Fielding Smith [1976], 240).

Cov Me Nyuam uas Ua Yuam Kev Yuav Rov Qab Los

- Txawm peb poob siab thaum uas, peb twb ua ntau npaum li peb ua tau, peb ib co me nyuam yuav tawm ntawm txoj kev ncaj ncees los, Orson F. Whitney cov lus yuav pab nplij peb siab nws hais tias: “Txawm hais tias ib co yaj twb ploj mus lawm, tus Yug Yaj tseem saib xyuas lawv, thiab nyob nyob ces lawv yuav hnov lub Ntuj Ceeb Tsheej ncav tes mus rub lawv rov qab los rau hauv pab yaj. Txawm yog hauv lub neej no los sis hauv lub neej tom ntej, lawv yeej yuav rov qab los. Lawv yuav tsum them tus nqi rau kev txim lij; lawv yuav raug kev tsim txom rau lawv tej kev txhaum; thiab tej zaum lawv yuav taug ib txoj kev uas muaj pos; tiam sis yog tias thaum kawg yuav coj lawv, taug kev ib yam li tus Tub Loj Leeb, mus txog tsev uas muaj niam thiab txiv uas hlub nws thiab zam txim rau nws, ces tej kev txom nyem ntawd yuav pauv los ua ib qho zoo. Thov Vajtswv pab peb cov me nyuam uas ua yuam kev thiab tsis mloog lus; muab peb txoj kev ntseeg puag rawv lawv. Muaj kev cia siab, rau siab ntseeg, txog thaum nej pom Vajtswv txoj kev cawm seej” (hais Yauxej Xamiv cov lus, hauv Conference Report, Plaub Hlis Ntuj, 1929, 110).

Cov Neeg Laus uas Tsis Tau Yuav Poj Niam Yuav Txiv thiab cov Kwv Tij Neej Tsa Ntxiv Tau Dag Zog

- Yuav ua dab tsi yog tias yus tsis tau yuav poj niam yuav txiv los sis tsis tau muaj me nyuam li? Nej puas tas txhawj txog cov lus ntuas txog tej yim neeg no? Aws. Nws yeej yog ib yam uas peb sawv daws yuav tsum kawm hauv lub neej hauv ntiaj teb no. Cov mej zeej laus uas tsis tau yuav poj

niam yuav txiv ntxiv tau dag zog rau tsev neeg, ua ib qho chaw txhawb pab, tos txais, thiab hlub lawv tsev neeg thiab tej yim neeg ib ncig lawv.

- Coob tug neeg laus hauv ib tse neeg pab ua niam thiab txiv thiab. Pog yawg, cov dab laug thiab cov phauj, cov nus muam, cov lawm tub thiab ntxhais, cov kwv tij, thiab nej tsa sawv daws pab tau tsev neeg ntau heev. Kuv xav ua tag nrho cov neeg hauv kuv tsev neeg tsaug vim lawv tau ua yam ntxwv rau kuv yoog thiab tau ua tim khawv rau kuv saib. Tej thaum cov neeg hauv tsev neeg hais tau tej yam uas niam txiv hais tsis tau tsuas yog muaj kev sib cav sib ceg thiab. Tom qab ib tug ntxhais hluas tau nrog nws niam sib tham tus ntxhais tau hais tias: “Kuv yuav txaj muag qhia koj thiab Txiv tias kuv tau ua ib yam phem lawm. Tiam sis yuav haj yam tsis zoo yog tias kuv tau qhia Niam Dab Laug Susan txog qhov ntawd. Kuv tsis xav kom nws yuav xav li cas txog kuv.”

Tsis Muaj Ib Tse Neeg Twg uas Zoo Tag Nrho

Vim peb paub tias hauv lub neej no peb yuav kawm ntau tsav ntau yam thiab yuav kawm kom muaj kev ntseeg, peb yuav tsum to taub txhua yam tsav nyias muaj nyias qhov fab ntseeg. Thaum kuv tsev neeg tau los sib sab laj ua ke, kuv tus poj niam tau hais tias, “Thaum nej xav tias leej twg muaj ib tse neeg uas zoo tag nrho, twb yog nej tsis paub lawv zoo txaus xwb.”

Ua Kom lub Tsev thiab Tsev Neeg Muaj Kab Muaj Kev

Cov kwv tij nkauj muam sawv daws, peb cov uas ua niam ua txiv yuav tsum ua raws li cov lus ntuas, twb yog cov lus cem tsim tsawv, uas tus Tswv tau hais rau Yauxej Xamiv thiab lub Koom Txoos cov thawj coj thaum xyoo 1833 kom “txhim tsa [peb]

lub tsev kom muaj kab muaj kev” (Q&K 93:43).

“Kuv twb txib kom nej tu nej cov me nyuam hauv qhov kaj thiab qhov tseeb” (Q&K 93:40). “Txhim tsa [peb] tsev neeg kom muaj kab muaj kev, thiab yaum kom lawv rau siab ntso thiab txhawj txog lub tsev, thiab thov Vajtswv tsis tu tsis tseg, los yog lawv yeej yuav raug rho tawm ntawm lawv qhov chaw” (Q&K 93:50).

Cov yaj saub hauv peb lub caij lub nyoog no tau ntuas thiab ceeb toom cov niam cov txiv kom txhim tsa lawv tsev neeg kom muaj kab muaj kev thiab. Thov kom peb yuav tau kev tshoov siab thiab kev hlub kom thiaj muaj kev ntseeg tiv tau kev fab ntseeg. Ces peb thiaj yuav paub tias peb tej teeb meem yuav rub peb los nyob ze tus Tswv thiab peb tsev neeg. Thov kom peb yuav cuab pob ntseg mloog tus yaj saub lub suab thiab txhim tsa peb lub tsev kom muaj kab muaj kev (saib Q&K 93:41–49). Tsev neeg yuav haj yam muaj zog thaum peb txav los nyob ze tus Tswv, thiab txhua tus neeg hauv peb tsev neeg yuav tau dag zog thaum peb txhawb nqa thiab ntxiv dag zog thiab hlub thiab ib leeg tu ib leeg. “Koj tsa kuv thiab kuv yuav tsa koj, thiab wb mam li nce mus saum ua ib ke” (Cov neeg Quaker ib zag paj lug).

Thov kom peb yuav muaj cuab kav tos txais thiab pab tus Tswv tus Ntsuj Plig nyob nraim hauv peb lub tsev xwv kom thiaj ntxiv tau dag zog rau peb tsev neeg. Xwv kom txhua tus neeg hauv peb tsev neeg yuav nyob nraim rau hauv “txoj kev ti thiab nqaim uas yuav coj mus rau txoj sia nyob mus ib txhis” (2 Nifais 31:18), kuv thov Vajtswv kom muaj li ntawd.

Los ntawm Txwj Laug Hales ib zag lus thaum lub Plaub Hlis Ntuj 1999 hauv lub tuam rooj sab laj ntawm lub Koom Txoos (saib Conference Report, Plaub Hlis Ntuj 1999, 39–44; los sis *Ensign*, Tsib Hlis Ntuj 1999, 32–34).

QHIA TXOJ MOO ZOO TEJ NTSIAB CAI RAU COV ME NYUAM

14

QHOV 2

COV TSWV YIM RAU KEV NRUAB RAU HAUV YUS LUB NEEJ

Raws li koj xav tau thiab toob kas qhia, ua raws li ib los sis ob qho tswv yim no.

- Ua ib tse neeg, cia li npaj mus ua hauj lwm pab lwm tus neeg.
- Tu vaj tu tsev nrog nej ib tug me nyuam los sis ib tug me nyuam xeeb ntxwv, ib tug lawm tub los sis ntxhais, los sis lwm tus me nyuam hauv nej tsev neeg. Nrog tus me nyuam ntawd sib tham thaum neb tab tom ua hauj lwm. Sim qhia lawv tiam sis tsis txhob hais tias tus me nyuam tu tsis tau zoo qhov twg.
- Nyeem tej kem nram qab no hauv me nyuam phau ntawv *Kev Ntxiv Dag Zog rau Cov Tub thiab Ntxhais Hluas* (34285): “Tej Yeeb Yam: Zaj Mus Vim, TV, Vib Thab Nyub, Kab Xev, Tej Ntawv, thiab Ntawv Qhauj Tawm” (phab 11–12), “Cov Nkauj thiab Ua Los Voos” (phab 13–14), thiab “Coj Dawb Huv Ntawm Kev Pw Ua Ke” (phab 14–16). Tom qab koj tau tshab xyuas cov ntaub ntawv no, txiav txim siab seb nej cov me nyuam twg thiaj yuav tau nyeem thiab nrog koj sib tham txog tej ntawv no.

KEV NYEEM NTAWV

Kawm zaj dab neeg nram no. Yog tias koj muaj poj niam muaj txiv, nyeem thiab nrog koj tus khub sib tham txog zaj no.

QHIA COV ME NYUAM

Thawj Tswj Hwm Boyd K. Packer
Tus Sawv Cev rau tus Thawj Tswj Hwm hauv Pawg
Kaum Ob tug Thwj Tim

Cov neeg coob coob uas tuaj sib sau ua ke hauv no thiab hauv lwm qhov chaw qhia tseeb tias cov mej zeej hauv Yexus Khetos lub Koom Txoos ntawm Tsoom Haiv Neeg Ntseeg hauv Hnub Nyoog Kawg yeej xav tau qhov tseeb.

Thaum kuv thov Vajtsv seb hnuv no tsim nyog kuv hais dab tsi rau nej, kuv txawm xav tias tshuav li peb lim tiam xwb kuv yuav muaj 75 xyos thiab ua ib tug neeg hu ua cov neeg laus tsim tsawv.

Kuv twb ua ib tug xib hwb qhia ntawv tau 50 xyoo tawm. Kab hais tias kuv tau kawm tej yam uas yuav pab nej sawv daws thiab.

Kuv twb ua neej nyob ntev ces tau kawm hais tias: Lub neej no yeej yuav qhia peb tej yam uas peb yeej tsis tau muaj lub siab xav kawm. Tej yam nyuaj nyuaj no yog tej yam uas qhia peb ntau tshaj plaws.

Kuv twb kawm lwm yam thaum kuv tab tom loj hlob ua ib tug ntawm *cov neeg laus tsim tsawv*. Nej

sim xav txog thaum ib tug kws kho mob thiab tus neeg mob tau sib tham li no:

Kws Kho Mob: “Koj xav kom kuv pab koj li cas? Koj muaj teeb meem dab tsi?”

Tus Neeg Mob: “Kws kho mob es, twb yog kuv lub cim xeeb. Kuv nyeem ib yam dab tsi tas, tiam sis pheej tsis nco qab tias tau nyeem dab tsi lawm. Kuv tsis nco qab vim li cas kuv los rau hauv ib chaw tsev li. Kuv tsis nco qab kuv tso tej yam khoom qhov twg.”

Kws Kho Mob: “Ua li, koj sim piav seb koj tau muaj qhov teeb meem no hov ntev lawm?”

Tus Neeg Mob: “Kuv tau muaj yam teeb meem dab tsi hov ntev nawj?”

Nim no, yog tias koj luag, koj ces muaj 60 xyoo rov hauv los sis koj tab tom luag koj tus kheej.

Qhia cov Me Nyuam Thaum Lawv Tseem Yaus

Thaum koj loj hlob tuaj lawm, koj kawm tsis tau ntawv los sis cim tsis tau tej yam ib yam li thaum peb tseem hluas. Puas yog vim li ntawd tus yaj saub Amas tau ntuas li no hais tias, “Kawm txoj kev txawj ntse thaum koj tseem hluas; muaj tseeb tiag, kawm coj Vajtsv tej lus txib thaum koj tseem hluas”¹

Kuv haj yam tsis txawj cim cov vaj lug kub thiab tej paj lug cia hauv kuv lub paj hlwb. Thaum kuv tseem hluas kuv tsuas tas hais ib yam li ob peb zaug xwb ces txawm cim tau. Yog tias kuv hais ob peb zaug, los sis muaj sau cia hauv ntawv, ces qhov ntawd yuav nyob nraim rau hauv kuv lub paj hlwb.

Yeej yooj yim dua yog tias kawm thaum tseem hluas. Yog vim li ntawd txij thaum chiv keeb cov thawj coj hauv lub Koom Txoos txhawj txog cov xib hwb rau cov me nyuam thiab cov tub thiab ntxhais hluas.

Vim li ntawd yuav tsum qhia txoj moo zoo thiab tej yam tseem ceeb hauv lub neej no rau cov me nyuam thiab cov tub thiab ntxhais hluas.

Tus Tswv kom niam txiv lav ris qhov no ces nws thiaj tau ceeb toom hais tias:

“Thaum uas cov niam txiv muaj me nyuam hauv Xi-oos,...cov uas tsis qhia cov me nyuam kom to taub cov lus qhuab qhia rau kev hloov siab lees txim, kev ntseeg Khetos uas yog Vajtswv uas muaj txoj sia nyob tib Leeg Tub, thiab txog kev cai raus dej thiab lub txiaj ntsim ntawm tus Vaj Ntsuj Plig Dawb Huv los ntawm txoj kev tso tes, thaum lawv nto txog yim xyoo, ces kev txhaum ntawd yuav nyob ntawm niam txiv taub hau.”²

Thawj lub ntsiab rau lub Koom Txoos no yog kom qhia cov tub thiab ntxhais hluas: xub ua tom tsev ces ua hauv lub koom txoos.

Khaws cov Tswv Yim Cia hauv Paj Hlwb

Ib qho ntxiv uas kuv tau kawm yog kom nco ntsoov tej yam uas peb tau kawm thaum peb tseem hluas. Tej tswv yim uas yus muab khaws cia hauv paj hlwb thaum tseem hluas yuav nyob ntawd thaum yus laus es xav tau cov tswv yim ntawd.

Cia kuv piav me ntsis. Kuv txhawj heev vim cov mej zeej tsis quav ntsej tus npis sov cov lus ntuas los sis, qhov uas haj yam tsis zoo, yog vam tus npis sov ntau dhau.

Kuv tau txiav txim siab yuav hais txog cov npis sov hauv lub tuam rooj sab laj no.

Kuv tau thov Vajtswv npaj rau qhov no, ces kuv txawm nco txog ib co lus uas kuv tau hnov 50 xyoo tas los lawm. Qhov ntawd tau pab kuv txoj kev ua xib hwb—tau pab ntau kawg. Tam sim no kuv yuav hais cov lus ntawd ib yam li kuv twb hais hauv lub tuam rooj sab laj:

“Ntau xyoo tas los lawm kuv tau nyob hauv ib ceg txheem ntseeg pawg sab laj hlob nrog Emery Wight. Emery tau ua tus npis sov rau 10 xyoo lawm

hauv Pawg Ntseeg Harper. Nws tus poj niam, Lucille, tau sawv los uas tus thawj tswj hwm rau ceg txheem ntseeg lub Koom Haum Niam Tsev.

“Lucille tau qhia kuv tias muaj ib tag kis thaum ib tug neeg zej zog tuaj khob qhov rooj thiab xav nrog Emery tham. Lucille hais tias nws tseem mus laij teb. Ces tus neeg zej zog pib txhawj heev. Tag kis ntawd nws tau mus nram teb thiab pom Emery ob tug nees sawv ntawm tiaj nrag tsis muaj leej twg saib xyuas ob tug nees. Tsis pom Emery nyob qhov twg li. Tus neeg zej zog tsis tau xav dab tsi txog thaum nws rov qab mus nram teb thaum ib tav su, thiab ob tug nees tsis tau txav mus qhov twg li. Nws tau hla txoj laj kab thiab mus xyuas ob tug nees. Tseem tsis pom Emery nyob qhov twg. Nws txawm khiav tiaj lias mus tom tsev nug Lucille seb muaj xwm dab tsi.

“Lucille tsis txhawj ces teb hais tias, ‘Au, koj tsis tas txhawj li. Tej zaum leej twg muaj teeb meem es lawv tuaj thov tus npis sov mus pab xwb os.’

“Qhov uas yus pom ob tug nees ntawd sawv twj ywm nram teb tau ntau xuab moos ua ib lub cim txog cov npis sov hauv lub Koom Txoos txoj kev rau siab ntso thiab txog lawv cov pab cuam uas sawv ntawm lawv ib sab. Yog muab piv ces, txhua tus npis sov thiab txhua tus pab cuam, tso lawv cov nees twj ywm hauv ib thaj teb uas tsis tau laij tas thaum twg leej twg xav tau kev pab.”³

Kuv tsis tau hais zaj dab neeg ntawd dua hauv ib zag lus—yeej tsis tau xav txog qhov ntawd li.

Kuv tau ntsuam xav txog qhov ntawd ua ntej kuv tau hais tawm hauv lub rooj sab laj, ces kuv thiaj li tau nrhiav Emery Wight ib tug ntxhais. Nws hais tias nws mam li ntsib kuv tom lawv qub tsev thiab mam li coj kuv mus xyuas thaj av uas nws txiv tau mus laij hnuv ntawd.

Muaj ib Hnuv Caiv thaum yav sawv ntxov kuv ib tug tub coj kuv mus xyuas lawv. Nws tau thaj ntau daim duab.

Yog ib tag kis zoo nkauj heev thaum lub caij nplooj ntoo hlav. Nyuam qhuav laij teb tas, zoo ib yam li ntau xyoo tas los lawm. Cov noog tau ya los noj cov noob hauv av.

Txoj kev ua yus cia li nco txog ib co lus, tsis yog ib yam tshiab rau kuv. Nws qhia qhov tseeb ntawm cov vaj lug kub—ib nqe, uas kuv tau muab cim cia hauv paj hlwb thaum kuv tseem hluas—

“Tsis txhob xav txog tej yam uas koj yuav hais, tiam sis muaj cov lus uas cawm neeg txoj sia khaws cia rau hauv paj hlwb, thiab thaum txog moos ces yus yuav tau txhua nrho uas txhua tus neeg xav tau.”⁴

Ces muaj lus cog tseg rau cov uas khaws tswv yim cia:

“Leej twg uas tos txais nej, kuv los yuav nyob ntawd thiab, vim kuv yuav ua nej ntej. Kuv yuav nyob ntawm nej sab xis thiab sab laug, thiab kuv tus Ntsuj Plig yuav nyob hauv nej lub siab, thiab kuv cov tim tswv yuav nyob ib puag nej ncig, yuav txhawb nqa nej.”⁵

Nws yog ib zag lus zoo rau kuv, tiam sis zaj lus tsis tau xaus li ntawd.

Kuv tau thas xim thiab tws ntoo thaum kuv tseem hluas. Kuv tau kawm ua li ntawd kuv tus kheej. Thaum cov me nyuam tab tom loj hlob, kuv tau siv sij hawm qhia lawv txog tej yam uas kuv tau kawm txog lub neej no thiab txog kev tws ntoo thiab thas xim thaum kuv tseem hluas.

Tom qab lawv loj hlob tas, kuv tau rov qab pib tws ntoo kom kuv thiaj tau chaw so. Kuv tau tws cov noog thiab tau siv ntau xuab moos tws ntoo. Thaum luag nug hais tias, “Koj tau siv pes tsawg xuab moos tws qhov ntoo no?” Kuv pheej teb hais tias, “Kuv tsis paub. Yog tias kuv paub lawm ces, kuv yuav tsum tsis ua ntxiv li.”

Thaum kuv siv ntau xuab moos tws ntoo li no, kuv tau ntsuam xav txog tej yam uas lub ntuj tau tsim, thiab kuv txawm tau kev tshoov siab. Thaum kuv tws ntoo, kuv twb tau ntaus tswv yim rau kuv tej zaj lus.

Kev tws ntoo ua rau kuv tau chaw so. Qee zaum thaum kuv nyuaj siab thiab kus kes, kuv tus poj niam yuav hais rau kuv tias, “Koj yuav tau pib tws ib yam ntoo tshiab.”

Kuv xav tias yog *cov neeg laus tsim tsawv* li kuv muaj ib lub cim xeeb zoo ces, kuv yuav taw tes tau rau ib qho uas kuv tws tas thiab yuav qhia nej tias nws ua piv txwv txog zaj lus twg. Kuv tau kawm tias thaum nyob ntsiag to li ntawd kuv ua tau ob yam tib txhij ntawd.

Sau Qoob Loos ntawm txoj Kev Qhia

Tam sim no kuv tsis muaj cuab kav tws ntoo li thaum ub. Rau qhov kuv pom kev tsis khav thiab kuv cov ntiv tes txhav tas vim kuv tau raug ib yam kab mob thaum kuv tseem ua me nyuam yaus. Tsis tas li ntawd xwb, vim kuv ua hauj lwm ntau heev hauv txoj hauj lwm no kuv tsis muaj sij hawm tws ntoo thiab npaj kuv tej zaj lus.

Tsam no kuv tsis txawj tws ntoo lawm, tiam sis wb cov me nyuam tseem txawj. Wb tau qhia lawv thaum lawv tseem hluas.

Kuv tseem nco tau txog ob tug nees uas sawv ntawm thaj teb ntawd. Kuv tau xav tias kuv yuav thas tau ib daim duab txog tus npis sov ob tug nees sawv ntawm thaj teb pom cov hlua dai ntawm rab laij teb.

Kuv xav tias yuav ua tsis tau vim twb muaj li cuaj xyoo txij thaum kuv tau thas xim. Kuv ob tug phooj ywg uas txawj thiab tau kev tshoov siab tau hais tias nkawd mam li pab kuv thas tus npis sov ob tug nees, ces thaum lub Xya Hli Ntuj kuv tau sij hawm phav me ntsis, ces kuv tau pib thas.

Kuv tau kawm ntau yam los ntawm ob tug phooj ywg ntawd, thiab tiag tiag nkawd nyob hauv kuv daim duab ntawd. Tiam sis kuv ob tug tub tau pab kuv ntau tshaj plaws. Kuv ib tug tub tau thaj cov duab txog thaj teb uas lawv twb laij tas, vim rau qhov thaum twg kuv siv *ntoo* los sis thas ib *daim duab* los sis hais *ib co lus* kuv xav kom yam ntawd zoo ib yam li muaj tiag.

Qhov ntawd yog lwm zaj lus. Kuv tau ib yam los ntawm peb cov me nyuam uas lawv tau kawm thaum lawv tseem hluas.

Kuv lwm tus tub tau txiav txim siab puab ib tug mlom txog tus npis sov ob tug nees es yuav siv tooj dag uas yuav phim kuv daim duab. Wb tau siv ntau xuab moos sib koom tes ua hauj lwm ua ob yam no.

Nws tau tshem ob txoj hlua cob nees ntawm lub nkuaj tsiaj txhu uas peb tsis tau siv rau 50 xyoo lawm. Nws tau muab so thiab coj mus tsev. Nws tau muab dai ntawm ib tug nees uas muaj lub siab ntev. Tus nees tau sawv twj ywm thaum nws kho cov hlua kom zoo thiab tau thas ib daim duab txog tus nees.

Nws ib tug neeg zej zog muaj ntau rab laij teb. Nws ho muaj ib rab laij teb uas zoo ib yam li tus npis sov li, nws tau thas ib daim duab txog rab laij teb.

Ua li ces ob tug tub ntawd thiaj txawj ua tej yam uas wb tau qhia nkawd thaum nkawd tseem ua me nyuam yaus. Zoo li wb lwm cov me nyuam, nkawd haj yam txawj ua tej yam uas niam thiab txiv tau qhia lawv thaum lawv tseem hluas. Thiab yog tias peb ua neej nyob ntev mus hauv ntiaj teb no peb yuav tau sau qoob loos zaum thib ob—peb cov me nyuam xeeb ntxwv—thiab kab hais tias yuav sau qoob loos zaum thib peb thiab.

Pab Txhib Kom Rov Qab Ua Raws Li tej Kev Txawj

Kuv twb rov qab kawm ib yam ntxiv thiab. Yav thaum kuv ua tub hluas kuv tau thas ib daim duab vim kuv tau hnov ib co lus uas tau tshoov kuv lub siab. Nws yog ib daim duab txog cov Roob Willard.

Kuv tau hnov cov laus hu cov roob no ua *Pawg Thawj Tswj Hwm*. Peb lub roob loj loj no, sawv ruaj khov ib yam li cov thawj koj hauv lub Koom Txoos.

Ze li cuaj xyoo tas los lawm. Kuv tus tub tau koj kuv mus nram lub zos Willard, Utah, thiab tau thajj duab txog cov roob no. Wb tau rov qab mus dua ib zaug thaum yuav muaj ib co duab ntxoov.

Tom qab ntau ntau xyoo kuv yuav tsum nco qab txog tej yam qub. Thaum nyuam qhuav pib ua nws yeej nyuaj kawg. Kuv twb hais ob peb zaug tias kuv yuav tsum. Kuv ib tug phooj ywg tau yaum kuv hais tias, “Kav tsij ua! Yeej muaj chaw dav heev puag hauv qab.”

Kuv tsis tau tsum, rau qhov kuv tus poj niam tsis tso lus rau kuv ua li ntawd. Tam sim no, kuv zoo siab kuv tsis tau tsum. Tej zaum, vim tam sim no kuv nyiam ua ntxiv, tej thaum kuv mam li ua dua lwm daim thiab—yus yeej tsis paub li.

Kuv xav tias txoj kev rov qab pib thas duab yeej zoo li thaum ib tug neeg uas tsis tshua tuaj rau lub Koom Txoos tau ntau xyoo lawm es nws txiav txim siab rov qab tuaj. Muaj lub sij hawm thaum pib rov qab ua ib yam dab tsi uas yav tas los lawm yus tau txawj ua tiam sis ntev lawm tsis tau ua xwb. Thiab yuav pab yog tias yus muaj ib ob tug phooj ywg uas pab yus.

Qhov ntawd yog lwm txoj ntsiab cai rau kev kawm—uas yog kom siv tej yam yus twb kawm hauv lub neej no.

Tsis ntev kuv yuav ua daim duab txog *Tus Npis Sov Ob Tug Nees* tiav tas. Yuav muab cov tooj dag nchuav saum kuv tus tub tus mlom.

Tiag tiag mas, nws tus mlom yeej zoo tshaj kuv daim duab. Yuav tsum yog li ntawd. Nws cov ntiv tes thiab paj hlwb uas tseem hluas txawj tshaj kuv li.

Thaum peb loj hlob ua *cov neeg laus tsim tsawv* peb kawm tau hais tias cov pob txha laus laus tsis txav li, cov pob qij txha tsis txav ceev ceev. Yus khi tsis tau yus txoj hlua khau thaum yus laus tshaj 60 xyoo—vim zoo nkaus li daim av qis dua.

Ces txawm pom zaj lus qhia ntawd dua, “Kawm txoj kev txawj ntse thaum koj tseem hluas; muaj tseeb tiag, kawm koj Vajtsv wv tej lus txib thaum koj tseem hluas.”⁶

“Vajtsv wv lub yeeb koob yog kev txawj ntse, los sis, ua lwm yam lus hais, qhov kaj thiab qhov tseeb.”⁷

“Kuv tau txib kom nej yuav tu nej cov me nyuam kom loj hlob hauv qhov kaj thiab qhov tseeb.”⁸

Peb cov me nyuam txais yuav lub vaj txiaj ntsim ntawm tus Vaj Ntsuj Plig Dawb Huv thaum lawv muaj yim xyoo.

“Tus Pab ntawd, yog Vajtsv wv tus Ntsuj Plig uas kuv Txiv txib sawv kuv cev los, nws yuav *qhia txhua yam* rau nej, thiab pab kom nej *cim ntsoov ib puas tsav yam* uas kuv twb qhia rau nej lawm.”⁹

Cia li xav txog ob lo lus *qhia* thiab *cim ntsoov*.

Txoj kev qhia cov me nyuam yeej koj ib tug nqi zog los. Nej tsis tau kawm tias thaum nej qhia nej haj yam kawm ntau tshaj qhov uas nej qhia nej cov me nyuam los?

Kawm los ntawm Tej Yam ntawm Sab Ntsuj Plig uas Tau Cim Ntsoov

Txoj kev kawm ntawm lub ntiaj teb thiab kev kawm ntawm sab ntsuj plig nyias txawv nyias. Cov tub kawm ntawv kawm paub li ntawd hnuv uas lawv xeeb ntawv. Nws yeej nyuaj nyuaj nco txog ib yam dab tsi uas yus tsis tau kawm ua ntej.

Hais txog tej kev kawm hauv ntiaj teb no qhov ntawd yeej muaj tseeb, tiam sis hais txog sab ntsuj plig ces yus xav txog yav nram ntej ua ntej yug los. Peb yuav haj yam txawj to taub tej yam uas peb tsis to taub thaum peb tseem hluas.

Tus kws sau paj huam Wordsworth tau xav li cas txog lub neej ua ntej yug los thaum nws sau hais tias,

Peb txoj kev yug los tsuas yog kev tsaug zog thiab kev tsis nco qab:

Tus Ntsuj Plig uas sawv los hauv peb, uas yog peb txoj sia,

Twb nyob hauv lwm qhov chaw lawm,

Thiab tuaj deb deb tuaj:

Tsis yog hnov qab txhua nrho li as,

Thiab tsis yog nyob liab qab,

Tiam sis peb nqi los saum tej huab cua los nrog yeeb koob

*Los ntawm Vajtsv wv los, uas yog peb chaw nyob.*¹⁰

Kuv tau nco qab txog cov lus no, vim kuv twb muab cov lus cim cia hauv paj hlwb thaum kuv kawm hoob As Kiv hauv lub tsev kawm ntawv qib siab.

Peb kawm tej yam tseem ceeb tshaj plaws thaum ua neej nyob xwb.

Tej tus neeg tos txog thaum hnov dab tsi loj loj ntawm sab ntsuj plig qhia qhov tseeb txog lawv zaj lus tim khawv. Nws tsis yog li ntawd. Nws twb yog tej kev tshoov siab me me thiab tej kev xav hauv nruab siab uas qhia peb paub tias peb yeej yog Vajtsv wv cov me nyuam. Peb tsis ua neej nyob raws li peb txoj cai thaum peb nrhiav kom tau cov cim

thiab “nrhiav tej uas dhau kev cai”¹¹ kom tau tej xwm loj heev.

Peb yog Vajtsv cov me nyuam, vim hais tias peb tau nrog Nws nyob hauv lub neej ua ntej yug los. Tej lub sij hawm yuav qhib daim ntaub thaiv. Peb cia li kawm paub tias peb yog leej twg thiab yog muab piv rau lub ntuj uas nyob mus ib txhis li peb paub tias peb nyob qhov twg. Hu qhov ntawd ua lub cim xeeb los sis tej kev xav ntawm sab ntsuj plig, nws yog ib qho tim khawv tias Yexus Khetos txoj moo zoo muaj tseeb. Yus tau tej kev tshwm sim ntawd thaum yus qhia neeg.

Muaj ib zaug kuv tau hnov Thawj Tswj Hwm Marion G. Romney (1897–1988) hais tias, “Kuv yeej paub thaum twg kuv tau tus Vaj Ntsuj Plig Dawb Huv kev tshoov siab vim thaum ntawd kuv kawm ib yam dab tsi los ntawm tej lus kuv tau hais.”

Tus Tswv tau qhia cov txwj laug tias:

“Nes tsis yog raug txib kom tau kev qhia, tiam sis yuav tsum qhia noob neej sawv daws tej yam uas kuv tus Ntsuj Plig lub hwj chim tau tso rau hauv nej txhais tes;

“Thiab nej raug qhia los saum ntuj los. Ua kom nej tus kheej dawb huv thiab nej yuav tau hwj chim, xwv kom nej tau yam uas kuv twb hais lawm.”¹²

Txawm tias cov tub txib nrhiav tsis tau neeg coob, lawv sab ntsuj plig thiab lub Koom Txoos yuav muaj hwj chim vim lawv kawm los ntawm lawv tej kev qhia.

Tus thawj tswj hwm rau ib pawg dis kas yuav tsum sab laj thiab qhia nws lwm cov dis kas.¹³ Tus thawj tswj hwm rau ib pawg txwj laug yuav tsum qhia cov neeg hauv nws pawg raws nraim li tej kev khi lus.¹⁴

Pov Lauj tau qhia Timau-tes tias, “Koj yuav tsum muab tej lus uas koj thiab muaj ntau leej hnov kuv qhia, tso rau hauv cov neeg uas koj cia siab tau hais tias, lawv yuav txawj qhia tej ntawd rau lwm tus.”¹⁵

Nws tau hais cuaj lo lus uas qhia tias txoj kev qhia muaj nqi zog li cas:

“*Nej twb qhia lwm tus ne, ua cas nej ho tsis qhia nej?* nej qhia hais tias tsis txhob ua tub sab, tiam sis nej puas ua tub sab?”

“Nes hais tias tsis txhob deev luag poj luag txiv, tiam sis nej puas deev?”¹⁶

Muaj lub Siab Kam Ua Tub Kawm

Hnub i kuv tau ib tsab ntawv uas luag thov txim ntawm kuv, kuv twb tau ntau tsab ntawv li ntawd.

Nws yog ib tug neeg uas kuv tsis paub uas tau sau ntawv tuaj. Tsab ntawv no piav ib tug mej zeej uas chim siab thiab tu siab rau kuv ib zag lus uas kuv tau hais lawm. Nws sau ntawv thov txim ntawm kuv.

Kuv yeej muaj lub siab xav zam txim. Kuv tsuas yog ib tug neeg uas sawv cev los hais lus thiab muab kev zam txim.

Cov vaj lug kub hais ntau heev yeej “nyuaj” heev rau cov neeg Ixayees thiab cov neeg Nifais tau tiv cov yaj saub thiab cov thwj tim tej kev qhia. Nws yeej yooj yim rau yus tiv tej kev qhia thiab ho ntub tus xib hwb. Txij thaum chiv keeb los cov yaj saub thiab cov thwj tim raug xwm zoo li ntawd.

Muaj ib nqe uas qhia tias:

“Thaum luag ua saib tsis taus nej, tsim txom nej, thiab hais nej plig vim nej yog kuv cov thwj tim, thaum ntawd nej yuav tau koob hmoov.

“Nes cia li zoo siab, rau qhov Vajtsv twb npaj nqi zog ntau kawg cia rau nej puag saum ntuj ceeb tsheej: thaum ub twb muaj neeg tsim txom cov yaj saub ib yam nkaus li no lawm thiab.”

Feem ntau cov ntawv thov txim ntawd hais tias, “Kuv tsis to taub yog vim li cas koj xav ua rau kuv txaj muag thiab xav tias kuv muaj txim.” Ces, tom qab muaj kev tsim txom, lawv kawm paub ib yam dab tsi, tau kev tshoov siab, kev to taub tau muaj xwm dab tsi lawm. Ces thaum kawg lawv nrhiav pom thiab to taub tias yog vim li cas txoj moo zoo yeej zoo li no.

Kuv xav ib yam ntxiv. Xwv kom ib tug muam yuav kawm paub yog vim li cas peb yaum kom leej niam nyob hauv tsev nrog lawv cov me nyuam. Nws yuav to taub tias tsis muaj ib txoj hauj lwm twg uas zoo tshaj txoj kev ua ib leej niam uas tsis ua qias dub. Nws tsis tas tso kev kawm ntawv los sis kev kawm kab lig kev cai tseg. Yuav tsum ua tej ntawd—raws caij raws nyoog—vim hais tias lawv yuav ua neeg tsim txiaj thaum lawv qhuab qhia lawv cov me nyuam.

Tsis muaj ib txoj kev qhia tseem ceeb npaum txoj no, tsis muab nqi zog ntawm sab ntsuj plig ntau npaum txoj no, los sis tsis tsa tib neeg nto ntau npaum qhov uas leej niam qhia nws cov me nyuam. Ib leej niam yuav xav tias nws tsis paub cov vaj lug kub zoo txaus vim nws tas zog qhia nws tsev neeg. Nws yuav tsis tau ib tug nqi zog me tshaj lwm tus neeg li.

Thawj Tswj Hwm Grant Bangerter tab tom nrog Thawj Tswj Hwm Joseph Fielding Smith sib tham txog cov lus qhuab qhia, thaum nws tuaj xyuas qhov chaw tshaj tawm txoj moo zoo hauv Brazil teb.

Tus Muam Bangerter mloog nkawd cov lus ces tau hais tias, “Thawj Tswj Hwm Smith, kuv tau tu cov me nyuam thiab tsis tau muaj caij kawm cov vaj lug kub li nws. Kuv puas yuav mus tau txog lub nceeg vaj xilethi-aus nrog Grant?”

Thawj Tswj Hwm Smith tau ua tib zoo xav thiab ces tau hais tias, “Tej zaum, yog tias koj ua ib qho ncuav rau nws noj.”

Ib tug txiv neej tsis tshua txawj ntawm sab ntsuj plig ntau npaum li nws tus poj niam vim nws kawm ua li ntawd thaum nws qhia nkawd cov me nyuam. Thiab yog tus txiv neej to taub txoj moo zoo, ces nws paub tias nws txais tsis tau kev tsa nto tsuas yog nws muaj nws tus poj niam.¹⁹ Nws tsuas yuav muaj kev cia siab yog tias nws txawj xav txog nws tus khub, thiab pab qhia nkawd cov me nyuam.

Koob Hmoov rau cov Xib Hwb

Nim no, cia li xav txog lo lus cog tseg no:

“Rau siab qhia thiab kuv txoj kev tshav ntuj yuav nrog nraim koj [tus xib hwb], xwv kom koj [tus xib hwb, leej niam, leej txiv] tau kev kawm ntxiv txog, tej ntsiab cai, tej kev qhuab qhia, thiab txog txoj moo zoo tej kev cai, thiab txhua tsav txhua yam hauv Vajtswv lub nceeg vaj, uas koj [leej niam, leej txiv] yuav tsum to taub.”²⁰

Yuav tsum paub tias kev cog lus ntawd yog rau tus xib hwb es tsis yog rau tus tub kawm ntawv.

Rau siab qhia thiab kuv txoj kev tshav ntuj yuav nrog nraim koj [cov uas qhia nej cov me nyuam los sis Koom Haum Me Nyuam Yaus, Hnub Caij Kev Kawm Vaj Lug Kub, Koom Haum Ntxhais Hluas, thiab Tub Hluas, lub pov thawj hwj, kev kawm vaj lug kub, Koom Haum Niam Tsev],” xwv kom nej yuav kawm paub tias:

“Tej yam saum ntuj ceeb tsheej thiab hauv ntiaj teb tib si, thiab hauv qab lub ntiaj teb; tej yam uas twb muaj los lawm, tej yam uas tseem nyob, tej yam uas tsis ntev yuav tshwm los; tej yam hauv yus tsev, tej yam uas nyob hauv pej kum teb chaws; tej kev tsov rog thiab tej teeb meem hauv tej lub teb chaws, thiab tej kev txiav txim hauv thaj av; thiab paub txog tej lub teb chaws thiab cov nceeg vaj—

“Xwv kom koj [cov uas qhia] yuav npaj txhua yam tsav thaum kuv yuav txib koj dua mus ua koj tej hauj lwm uas kuv tau txib kom koj ua lawm, thiab rau qhov hauj lwm uas kuv tau muab rau koj lawm.”²¹

Pov Lauj tau qhia rau Timau-tes uas tseem hluas tias “thaum txog tiam yuav kawg yuav muaj kev kub ntxhov heev.”²² Nws tau hais tias, “Cov neeg ua

phem thiab cov neeg ntxias lwm tus lawv tseem yuav ua phem heev zuj zus mus, txawm yog lawv mus ntxias lwm tus los, lawv twb tsis paub hais tias lwm tus twb ntxias lawv lawm thiab.”²³

Tiam sis peb tseem tau kev pov hwm. Peb tau kev pov hwm thaum peb qhia peb cov me nyuam:

“Tus me nyuam uas yus cob qhia ua neej: nws yeej yuav nco ntsoov mus txog hnub laus.”²⁴

Pov Lauj tau ntuas Timau-tes tias:

“Koj yuav tsum ua raws li txoj lus tseeb uas koj twb kawm thiab cia siab rau los lawm, koj yeej paub hais tias cov neeg qhia koj lawv tsis dag koj ib zaug li;

“Thiab koj paub hais tias txij thaum koj tseem yog *me nyuam yaus* koj yeej kawm Vajtswv cov *vaj lug kub dawb huv*, uas pub koj muaj lub tswv yim los ntseeg Yexus Khetos kom koj dim koj tej kev txhaum.”²⁵

Nov yog Yexus Khetos lub Koom Txoos. Twb yog Nws lub Koom Txoos. Nws yog peb tus Yam Ntxwv, peb tus Cawm Dim. Peb raug txib kom “ua neeg zoo ib yam li nws.”²⁶

Nws yog ib tug xib hwb rau cov me nyuam. Nws tau txib Nws cov thwj tim hauv Yeluxalees tias “cia li tso cov me nyuam ntawm nej los cuag kuv, tsis txhob txwv lawv rau qhov cov neeg uas Vajtswv kav lawm: lawv muaj lub siab mos siab muag ib yam li cov me nyuam yaus ntawm ko.”²⁷

Nyob hauv tus Cawm Seej txoj kev qhuab qhia cov neeg Nifais, peb pom tau tias Nws tus ntsuj plig xav li cas tiag tiag:

“Thiab tau muaj tias nws tau txib kom lawv yuav tsum coj lawv tej me nyuam yaus tuaj.

“Yog li ntawd lawv tau coj lawv tej me nyuam yaus tuaj thiab tau muab lawv tso rau hauv av ncig nws, thiab Yexus tau sawv ntsug hauv nruab nrab; thiab cov neeg coob coob tau cia kev kom lawv raug coj los cuag nws. . . .

“ . . . Nws tau quaj, thiab cov neeg coob coob tau ua tim khawv txog nws, thiab nws tau muab lawv tej me nyuam yaus, ib tug dhau ib tug, thiab tau foob koom hmoov rau lawv, thiab tau thov Leej Txiv rau lawv.

“Thiab thaum nws tau ua li no tas lawm nws tau rov quaj dua;

“Thiab nws tau hais rau cov neeg coob, thiab tau hais rau lawv tias: Saib seb nej tej me nyuam yaus.

“Thiab thaum lawv tau ntsia kom pom lawv tau ntsia lawv tej qhov muag mus rau saum ntuj, thiab lawv tau pom rooj ntug qhib, thiab lawv tau pom

rooj ntug qhib, thiab lawv tau pom tej tim tswv tau nqis tawm saum ntuj ceeb tsheej los zoo ib yam li nyob hauv plawv hluav taws; thiab lawv tau nqis los thiab tau vij ib puag ncig cov me nyuam ntawd, thiab lawv tau raug hluav taws vij ib puag ncig; thiab tej tim tswv tau muab kev pab rau lawv.

“Thiab cov neeg coob coob tau pom thiab tau hnov thiab tau ua tim khawv; thiab lawv paub tias

lawv tej lus tim khawv yeej muaj tseeb vim lawv txhua tus yeej tau pom thiab tau hnov.”²⁸

Kuv paub tias zaj no muaj tseeb. Kuv ua tim khawv txog Nws thiab foom koob hmoov rau nej txhua tus uas qhia cov me nyuam hauv Nws lub npe.

Los ntawm ib zag lus uas tau hais hauv lub Tsev Kawm Ntawv Qib Siab Brigham Young lub Lim Tiam Qhia Ntawv hauv ib lub rooj sab laj thaum lub Yim Hli Ntuj hnuv tim 17, 1999 (saib *Ensign*, Ob Hlis Ntuj 2000, 10–17).

LUS CIM

1. Amas 37:35.
2. Phau Lus Qhuab Qhia thiab Kev Khi Lus 68:25.
3. “The Bishop and His Counselors,” *Ensign*, May 1999, 57.
4. Phau Lus Qhuab Qhia thiab Kev Khi Lus 84:85.
5. Phau Lus Qhuab Qhia thiab Kev Khi Lus 84:88.
6. Amas 37:35.
7. Phau Lus Qhuab Qhia thiab Kev Khi Lus 93:36.
8. Phau Lus Qhuab Qhia thiab Kev Khi Lus 93:40.
9. Yauhas 14:26; tau ntxiv cov ntawv qaij.
10. “Ode: Intimations of Immortality,” nqe 5.
11. Yakhauj 4:14.
12. Phau Lus Qhuab Qhia thiab Kev Khi Lus 43:15–16.
13. Saib phau Lus Qhuab Qhia thiab Kev Khi Lus 107:85.
14. Saib phau Lus Qhuab Qhia thiab Kev Khi Lus 107:89.
15. 2 Timautes 2:2.
16. Loos 2:21–22; tau ntxiv cov ntawv qaij.
17. Saib Yauhas 6:60; 1 Nifais 16:2; 2 Nifais 9:40; Hilamas 14:10.
18. Mathais 5:11–12; kuj saib Lukas 21:12; Yauhas 15:20; 3 Nifais 12:12.
19. Saib phau Lus Qhuab Qhia thiab Kev Khi Lus 131:1–4, 132:19–21.
20. Phau Lus Qhuab Qhia thiab Kev Khi Lus 88:78; tau ntxiv cov ntawv qaij.
21. Phau Lus Qhuab Qhia thiab Kev Khi Lus 88:79–80.
22. 2 Timautes 3:1.
23. 2 Timautes 3:13.
24. Paj Lug 22:6.
25. 2 Timautes 3:14–15; tau ntxiv cov ntawv qaij.
26. 1 Yauhas 3:7.
27. Mathais 19:14.
28. 3 Nifais 17:11–12, 21–25.

COB QHIA COV ME NYUAM THAUM LAWV TXIAV TXIM SIAB

15

COV TSWV YIM RAU KEV NRUAB RAU HAUV YUS LUB NEEJ

Raws li koj xav tau thiab toob kas qhia, ua raws li ib los sis ob qho tswv yim no.

- Nyob hauv kev nyeem ntawv nram no, Txwj Laug M. Russell Ballard muab plaub lub tswv yim uas yuav pab peb, “muab kev ntseeg koj los txhim tsa ib lub vaj loog ncig peb lub tsev thiab...npaj peb cov hluas los uas neeg dawb huv thiab tsim txiaj thiab huv huv, kom thiaj tsim nyog nkag mus hauv lub tuam tsev.” Tshab xyuas nws cov tswv

- yim no thiab npaj seb nej yuav ua tau raws li tej tswv yim no li cas hauv nej lub tsev.
- Xav txog tej kev txiaj txim uas txhua tus me nyuam hauv nej tsev neeg yuav ntsib tom tsev kawm ntawv, tom tsev, thiab hauv lwm yam. Sim xav seb nej ua tau li cas thiaj pab npaj txhua tus me nyuam txiaj txim siab xaiv qhov ncaj ncees.

KEV NYEEM NTAWV

Kawm zaj dab neeg nram no. Yog tias koj muaj poj niam muaj txiv, nyeem thiab nrog koj tus khub sib tham txog zaj no.

ZOO LI NPLAIM HLUAV TAWS UAS TSI TSIS TXAWJ TUAG

Txwj Laug M. Russell Ballard
Los ntawm Pawg Kaum Ob tug Thwj Tim

Kev Xyiv Fab hauv Kev Sib Yuav Hauv lub Tuam Tsev

Twb muaj tej lub sij hawm thaum kuv tau koj kav tej hauj lwm hauv lub tuam tsev thaum ob tug neeg hluas uas tsim nyog tsaus tau los sib yuav thiab raug muab sib khi ua ke hauv tus Tswv lub tsev. Tej lub sij hawm no yeej tseem ceeb rau tsev neeg thiab cov phooj ywg. Thaum ntawd muaj kev zoo siab thiab kev xyiv fab rau tas mus ib txhis vim leej niam tau rau siab thov Vajtswv kom muaj ib hnub zoo li no. Yus pom muaj li ntawd hauv leej txiv lub qhov muag, vim tam sim no lawv tsis xav txog qhov uas yuav ua li cas them nqi. Tiam sis qhov uas yus pom ntau tshaj plaws yog tus nkauj nyab thiab nraug vauv tsim txiaj uas tau ua raws li tej kev qhia hauv txoj moo zoo, nkawd tau xyeej tej kev ntxias hauv lub ntiaj teb tseg. Muaj ib txoj kev xav zoo zoo hauv nruab siab vim lawv tau ua neej nyob huv huv thiab dawb ceev thiab dawb huv.

Tej Kev Cai Coj Dawb Huv Nyob Ruaj Khov

Peb cov tub hluas thiab ntxhais hluas coob dhau nyoo tej kev ntxias hauv lub ntiaj teb es pib ua tej yam phem thiab tsis koj kev cai dawb huv lawm.

Ntxwg Nyoog tab tom ntaus tsov ntaus rog kom thiaj kov yeej cov laus thiab cov hluas tib si, thiab neeg coob zuj zus swb. Tej kev cai hauv ntiaj teb pheej pauv li ub li no ib yam li thaum cov cua nplawm xuab zeb. Tej yam uas thaum i neeg yeej yuav tsis kam ua tam sim no ces sawv daws tab meeg ua. Lub ntiaj teb tau pauv ntau dhau ces lub ntiaj teb xav tias cov uas xav koj raws li tej kev cai qub es ua tsim txiaj ces lawv yog cov neeg txawv txav, es cuag li lawv yuav tsum piav yog vim li cas lawv thiaj xav ua raws li Vajtswv tej lus txib.

Tiam sis muaj ib qho uas tsis pauv li: cov lus txib tsis tau hloov li cas. Yuav tsum tsis txhob xav yuam kev. Qhov tseeb yeej yog qhov tseeb. Qhov yuam kev tseem yog qhov yuam kev, txawm muab zais li cas los sis muab kho li cas los xij. Peb ntseeg tias yuav tsum koj dawb huv ua ntej sib yuav thiab tsis txhob nrog lwm tus tom qab sib yuav tas. Txoj kev cai ntawd yog ib txoj kev cai tseeb. Nws tsis pauv txawm tib neeg xav li cas los sis muaj xwm dab tsi. Tsis tas yuav sib cav sib ceg txog qhov ntawd los sis txoj moo zoo lwm txoj kev cai.

Muab Kev Ntseeg Coj Los Tiv Thaiv lub Tsev

Tab sis mas cov niam txiv, cov thawj koj, thiab cov xib hwb yuav tsum pab peb cov hluas kawm kom thiaj txawj to taub, hlub, saib lawv rau nqi, thiab ua neej nyob raws li txoj moo zoo qhia. Cov niam txiv thiab cov hluas yuav tsum sawv ua ib ke tiv thaiv tus yeeb ncuab uas txawj ntse. Peb yuav

tsum rau siab ntso, txawj ua, thiab cog lus tias yuav ua neej nyob raws li txoj moo zoo ib yam li tus yeeb ncuab rau siab ntso kom txoj moo zoo puas tsuaj— thiab sim ua rau peb thiab.

Peb muaj ib qho teeb meem loj uas thaiv peb kev. Yog tias peb swb ces yuav xiam cov ntsuj plig uas peb hluv. Kuv xav qhia txog plaub lub tswv yim uas yuav pab peb muab kev ntseeg koj los txhim tsa ib lub vaj loog ncig peb lub tsev thiab yuav pab peb npaj peb cov hluas los uas neeg dawb huv thiab tsim txiaj thiab huv huv, kom thiaj tsim nyog nkag mus hauv lub tuam tsev.

Qhia txoj Moo Zoo Rau cov Me Nyuam

Qhov thib ib yog tej xov xwm hauv txoj moo zoo. Tej xov xwm uas tseem ceeb tshaj plaws hauv lub neej no, uas kuv paub txog yog qhov uas yus paub tias peb yeej yog Vajtswv peb Leej Txiv uas Nyob Mus Txhis cov me nyuam. Nov tsis yog ib co lus qhuab qhia xwb, tiam sis yog ib yam tseem ceeb heev rau peb sab ntsuj plig. Tus Cawm Seej tau hais hauv Nws ib zag lus thov Vajtswv sawv peb cev hais tias, “Txoj sia nyob mus ib txhis ntawd ,yog qhov uas neeg paub koj thiab paub hais tias, koj tib leeg yog Vajtswv thiab paub kuv, tus uas yog Yexus Khetos uas koj txib los” (Yauhas 17:3). Yog yuav paub Leej Txiv Saum Ntuj Ceeb Tsheej thiab to taub tias peb nrog Nws sib txheeb li cas ua peb Leej Txiv thiab peb tus Vajtswv yuav ua rau peb lub neej muaj hauv paus hauv ntsis thiab muaj kev cia siab rau lub neej tom ntej. Peb tsev neeg yuav tsum paub tias Nws yeej muaj sia nyob tiag, tias peb yog Nws cov tub thiab Nws cov ntxhais thiab yuav txais txhua yam uas Nws muaj, tam sim no thiab tas mus li. Thaum paub li ntawd lawm, tsev neeg sawv daws yuav tsis nrhiav tej yam tsis zoo tiam sis yuav nrhiav Vajtswv thiab yuav ua neej nyob mus (saib Teev Npe 21:8).

Ua Neej Nyob raws li Kev Khi Lus, Tsis Lam Tau Lam Ua

Peb yuav tsum ua li cas kom peb muaj ib zag lus tim khawv txog Yexus Khetos txoj moo zoo uas muaj zog ib yam li peb cov pog koob yawm txwv uas yog cov neeg pioneer. Nco qab ntsoov thaum Nauvoo poob thaum lub Cuaj Hli Ntuj xyoo 1846 thiab ib Tsoom Haiv Neeg Ntseeg tau raug kev txom nyem li cas hauv cov yeej. Nyob hauv Winter Quarters, thaum Brigham Young hnov txog lawv nws tau hu cov txwj laug los sib sau ua ke. Tom qab piav rau lawv tias tau muaj xwm dab tsi thiab rov qab qhia lawv tias lawv tau cog lus li cas hauv lub Tuam Tsev Nauvoo hais tias txawm leej twg xav nrog lawv tuaj, txawm lawv pluag npaum li cas los, yeej yuav tsis tso lawv tseg tom qab, nws tau txib kom lawv ua li no:

Nws hais tias, “Nim no twb txog lub caij yuav tau ua hauj lwm. *Cia txoj kev khi lus ntawd kub cuag li hluav taws vim koj twb cog lus tseg hauv tus Tswv lub Tsev, cia nws cig laim lug hauv nej nruab siab, kom cov nplaim hluav taws tsis txhob tuag mus*” (Hais rau Pawg Sab Laj Hlob hauv Council Point, Cuaj Hli Ntuj hnuv tim 27, 1846, Brigham Young Cov Ntawv, Qhov Chaw Khaws Keeb Puam, Yexus Khetos lub Koom Txoos ntawm Tsoom Haiv Neeg Ntseeg hauv Hnuv Nyoog Kawg, 1; tau ntxiv cov ntawv qaij). Ob peb hnuv tom qab ntawd, txawm muaj kev txom nyem ntau heev hauv Winter Quarters los, lawv tau cab ntau lub laub mus nram sab hnuv tuaj mus cawm ib Tsoom Haiv Neeg Ntseeg hauv cov yeej ntawm tus Dej Mississippi.

Peb yeej hnov ntau heev txog ib Tsoom Haiv Neeg Ntseeg ntawd tej kev txom nyem thiab tej kev txi, thiab peb ho nug peb tus kheej hais tias, Lawv ua li cas thiaj nyiaj tau? Vim li cas lawv thiaj muaj dag muaj zog ua luaj li? Thawj Tswj Hwm Young cov lus tau teb ob lo lus nug ntawd. Ib Tsoom Haiv Neeg Ntseeg ntawd tau nrog Vajtswv sib khi lus tseg, thiab tej kev khi lus ntawd nyob nraim hauv lawv nruab siab kub cuag li hluav taws uas tsis txawj tuag.

Tej thaum peb raug ntxias ua tej yam hauv lub neej no uas yooj yim ua tsis yog ua raws li tej kev khi lus. Txoj kev ua raws li txoj moo zoo tej kev cai thiab sawv tiv thaiv qhov tseeb thiab ua tim khawv txog Txoj Kev Txum Tim txoj Moo Zoo Rov Qab Los tsis yog ib yam yooj yim ua. Nws tsis yooj yim rau peb tau faib txoj moo zoo rau lwm tus neeg. Nws tsis yooj yim rau peb ua tej hauj lwm hauv lub Koom Txoos, thiab nws haj yam nyuaj thaum peb tsis tshuav muaj cuab kav. Tej lub cib fim rau peb tau pab luag tej, ib yam li peb tau khi lus tias peb yuav ua, tsis los rau yus thaum ib lub sij hawm zoo. Tiam sis yus yeej yuav tsis muaj zog ntawm sab ntsuj plig yog tias yus tsuas ua tej yam yooj yim xwb. Lub hwj chim ntawd los thaum peb ua raws li peb tej kev khi lus. Thaum peb xav txog ib Tsoom Haiv Neeg Ntseeg no lub neej, peb yuav pom tias lawv tej kev khi lus yog lub dag lub zog hauv lawv lub neej. Lawv tus yam ntxwv thiab qhov tim khawv muaj zog txaus pab lawv cov me nyuam ib tiam neeg dhau ib tiam neeg.

Qhia cov Me Nyuam txog Kev Coj Dawb Huv

Thaum peb cov me nyuam loj hlob tuaj mus, lawv xav kom niam txiv qhia meej meej txog tej yam lawv yuav tsum ua thiab tsis txhob ua. Niam thiab txiv yuav tsum qhia lawv cov me nyuam kom tsis txhob saib cov duab liab qab los sis mloog cov dab neeg tsis zoo. Niam thiab txiv yuav tsum qhia cov me nyuam thiab cov tub thiab ntxhais hluas tias tej yam duab liab qab yeej los ntawm dab ntxwv nyoog los; thiab yog tias leej twg lam kov tej ntawd,

ces tej ntawd muaj hwj chim txaus uas rau yus quav, tswj hwm, thiab ua rau tib neeg tus ntsuj plig puas tsuj mus. Lawv yuav tsum kawm kom tsis txhob hais lus dev thiab tsis txhob hais tus Tswv lub npe ua dog ua dig. Yuav tsum tsis txhob hais tej lus tuaj dab ros uas tsis zoo. Qhia tsev neeg kom tsis txhob mloog cov nkauj uas hais txog kev pw ua ke. Qhia lawv meej meej txog kev pw ua ke thiab txoj moo zoo tej kev qhia txog kev cai coj dawb huv. Cia cov me nyuam kawm tej no hauv tsev kom lawv thiaj to taub qhov yog. Txhua tus neeg hauv tsev neeg yuav tsum to taub tej kev cai thiab lawv sab ntsuj plig yuav tsum muaj zog txaus lawv thiaj coj tau raws li tej kev cai no. Thiab thaum twg lawv ua yuam kev, lawv yuav tsum to taub tus Tswv Yexus Khetos txoj Kev Theej Txhob thiab kam txais yuav tag nrho thiab yuav tsum ua raws li txoj kev hloov siab lees txim uas tej zaum yuav nyuaj, lawv thiaj yuav tau kev zam txim thiab muaj chaw cia siab rau yav tom ntej. Peb yuav tsum tsis txhob tso peb thiab peb tsev neeg lub hom phiaj kom tau txoj sia nyob mus ib txhis tseg li.

Qhov tu siab mas, yog vim niaj hnuv nim no coob tug niam thiab txiv tau tso txoj kev lav ris yuav qhia tej kev tsim txiaj no thiab lub Koom Txoos lwm cov lus qhuab qhia rau lawv tsev neeg tseg, vim lawv xav tias lwm tus neeg yuav qhia lawv: lawv cov phooj ywg, lub tsev kawm ntawv, lub Koom Txoos cov thawj coj thiab cov xib hwb, los sis tej yam yeeb yam. Txhua txhua hnuv peb cov me nyuam tab tom kawm tej yam tshiab, lawv lub siab thiab lub paj hlwb kawm tej yam thiab yuav pab kom lawv tsim lawv ib co kab lig kev cai.

Ib Leeg Pab Tiv Thaiv Ib Leeg ntawm tej Kev Pnem

Cov kwv tij thiab nkauj muam, peb ib leeg yuav tsum qhuab qhia ib leeg thiab pab kom peb haj yam muaj kev ntseeg xwv kom peb thiaj yuav muaj siab loj txaus ceev cov lus txib hauv ib lub ntiaj teb uas haj yam muaj kev pnem kev qias. Peb yuav tsum rau siab ntseeg Khetos txoj moo zoo xwv kom qhov hluav taws ntawm peb txoj kev khi lus yuav cig laim lug hauv peb nruab siab zoo li ib nplaim hluav taws uas tsis txawj tuag. Thiab thaum muaj kev ntseeg zoo li ntawd peb yuav ua tej yam peb yuav tsum ua kom thiaj ua ncaj ncees thiab tsim nyog.

Hais Qhov Tseeb Rau cov Me Nyuam

Qhov thib ob yog kev sib txuas lus. Tsis muaj ib yam uas tseem ceeb tshaj qhov kev sib txuas lus thiab hais qhov tseeb kom tsev neeg thiaj yuav sib raug zoo. Nov yeej tseem ceeb rau cov niam txiv uas tab tom sim qhia txoj moo zoo tej ntsiab cai thiab tej kev cai rau lawv cov me nyuam. Txoj kev sib sab laj nrog peb cov tub thiab ntxhais hluas—thiab tej zaum qhov uas tseem ceeb dua qhov ntawd, yog ua

tib zoo mloog lawv tej kev txhawj—yuav ua lub hauv paus rau kev sib raug zoo. Feem ntau tej yam uas peb pom hauv lawv qhov muag thiab hnov hauv peb nruab siab yuav qhia lawv ntau tshaj tej uas peb hais los sis hnov. Xav hais ib lo rau nej cov uas ua me nyuam: Nej yuav tsum hwm nej niam nej txiv. Nej yuav tsum kawm mloog lus, tiag tiag yuav tsum mloog niam thiab txiv thiab tus Ntsuj Plig tej kev tshoov siab. Peb yuav tsum nrhiav kom tau tej lub sij hawm uas peb qhia tau peb tsev neeg kom peb yuav sib raug zoo dua yav tas los lawm, thiab peb yuav tsum cog lus tias peb yuav muaj tsev neeg hmo ua ke txhua txhua Hnuv Monday thaum yav tsaus ntuj.

Muaj tej lub sij hawm sib txuas lus thaum peb thov Vajtswv ua ib tse neeg thiab nyeem vaj lug kub ua ib tse neeg. Cov vaj lug kub pab txhim tsa tsev neeg cov hom phiaj thiab tej kev cai, thiab thaum peb sib tham txog tej ntawd ces tsev neeg yuav kawm kom txawj vam lawv tus kheej, muaj zog ntawm sab ntsuj plig, thiab nyob ruaj khov. Yuav tsum siv sij hawm ntau kom thiaj ua tau li no, thiab ces peb yuav tsum sib sab laj seb yuav saib TV hov ntau, yuav siv sij hawm ntau npaum li cas saib tej zaj yeeb yaj kiab, kab xev, ua si, saib qhov Internet, los sis ua si sab nraum tsev.

Niam Txiv thiab cov Thawj Coj Yuav Tsum Pab Kho

Qhov thib peb yog txoj kev kho. Niam txiv muaj ntiag tug hauj lwm yuav tsum muab kho thaum lawv pom cov me nyuam ua yuam kev. Nov tsis yog hais tias niam txiv tsis pub cov me nyuam muaj kev ywj siab xaiv. Vim txoj kev ywj siab xaiv yog ib qho khoom plig uas los ntawm Vajtswv los, lawv yuav tsum xaiv seb lawv yuav ua li cas, lawv yuav coj cwj pwm li cas, thiab lawv yuav ntseeg dab tsi. Tiam sis peb cov uas ua niam ua txiv yuav tsum pab kom lawv to taub tias tus cwj pwm twg thiaj zoo thiab lawv yuav raug xwm zoo li cas yog tias lawv taug txoj kev tsis yog. Nco ntsoov tias, tsis muaj ib txoj kev cai uas txwv tsis pub peb tswj kav tej yam uas lawv ua hauv tsev. Cov yeeb yaj kiab, ntawv, TV, kab xev, qhov Internet, thiab lwm yam duab yog tej yam hauv peb tsev thiab peb yuav tsum cia tej yam uas peb pom zoo rau nyob hauv tsev xwb. Ua kom nej tsev uas ib qho chaw uas muaj kev thaj yeeb nyab xeeb thiab kev ncaj ncees. Tsis txhob cia tej yam pnem ua rau nej lub tsev uas muaj tus ntsuj plig ua chaw qias. Ua siab zoo, txawj xav, muaj siab mos siab muag, thiab hais lus zoo zoo ib leeg ua tej yam zoo rau ib leeg. Ua li ces tsev neeg sawv daws thiaj yuav xaiv ua raws li tsev neeg tej hom phiaj uas lawv tau tsa raws li txoj moo zoo tej kev cai hais.

Cov npis sov, cov xib hwb thiab lwm cov thawj coj hauv lub Koom Txoos yuav tsum ua raws li txoj ntsiab cai no thaum nej sim pab tej yim neeg. Nej

tsis tas nyob twj ywm thaum cov uas nej tau saib xyuas tab tom xaiv tej yam tsis zoo. Thaum ib tug neeg hluas nyob ntawm ib txoj kev sib tshuam hauv nws lub neej, yeej muaj ib tug uas nyob ntawm no—ib tug niam los sis txiv, ib tug thawj coj, ib tug xib hwb—yeej pab tau nws yog tias lawv hlub thiab ua siab zoo rau tus neeg hluas ntawd.

Ua Ib tug Yam Ntxwv Zoo Rau cov Me Nyuam Saib

Qhov thib plaub yog ua yam ntxwv. Zoo ib yam li ib tug neeg caij nkoj hla dej hiav txwv xav tau lub koob qhia kev nws thiaj tsis poob zoo, cov me nyuam thiab cov tub thiab ntxhais hluas tsis txawj nrhiav kev hauv lub neej no yog tias tsis muaj ib tug yam ntxwv zoo rau lawv tau saib thiab yoog. Peb tsis muaj cuab kav hais kom lawv ua tej yam zoo yog tias lawv pom lawv niam lawv txiv tsis ua raws li tej ntsiab cai thiab tsis ua neej nyob raws li txoj moo zoo hais.

Peb cov uas ua niam thiab txiv, cov xib hwb, thiab cov thawj coj, peb muaj ntiag tug hauj lwm ua ib tug yam ntxwv txoj kev ncaj ncees, ua siab loj, tua theem, ua hauj lwm tsis ua qias dub, thiab tswj hwm peb tus kheej. Tej cwj pwm no yuav pab peb cov hluas tuav raws tus pas hlau hauv txoj moo zoo thiab nyob nraim rau hauv txoj kev ti thiab nqaim.

Ua Neej Nyob Raws Li txoj Moo Zoo Pab Kom Peb Tsis Ua Yuam Kev

Kuv xav kom kuv thiaj qhia tau nej tias yog tias yus tsom ntsoov rau tej xov xwm, kev sib txuas lus, kev kho, thiab kev ua yam ntxwv ces yus yuav muaj ib tse neeg zoo tag nrho thiab muaj cov me nyuam zoo tag nrho uas tsis txhaum txoj moo zoo tej kev cai. Tiam sis, yeej tsis muaj li ntawd. Tiam sis tej yim neeg uas paub, qhia, thiab ua neej nyob raws li txoj moo zoo tej ntsiab cai thiab tej kev cai yuav haj yam

tsis ua yuam kev li. Thaum ua tib zoo sib txuas lus zoo thiab rau siab ua ib tug yam ntxwv zoo, ces nej haj yam yuav txawj sib sab laj txog tej teeb meem thiab sib pab kho nej lub neej xwv kom txhua tus hauv nej tsev neeg yuav tau koob hmoov.

Cia li mloog Vaj Ntxwv Npeyamis cov lus ntuas:

“Kuv tsis muaj peev xwm qhia nej tag nrho txhua yam uas [nej] ua yuav txhaum; vim muaj ntau txoj kev thiab ntau hom, twb muaj ntau heev uas kuv tsis muaj peev xwm suav lawv txheeb.

“Tiam sis kuv muaj peev xwm qhia nej npaum li no, tias yog nej tsis xyuas nej tus kheej, thiab nej tej kev xav, thiab nej tej lus, thiab tej uas nej ua, thiab ceev Vajtswv tej lus txib, thiab nyob nraim hauv txoj kev ntseeg uas nej tau hnov txog txoj kev uas peb tus Tswv yuav los, kom mus txog thaum nej txoj sia kawg, nej yuav tsum piam sij. Thiab nim no, Au neeg es, nco ntsoov, thiab tsis txhob piam sij” (Mauxiyas 4:29–30).

Kuv cov kwv tij nkauj muam sawv daws, thov Vajtswv foom koob hmoov rau peb txhua tus xwv kom qhov hluav taws ntawm peb txoj kev khi lus yuav cog laim lug hauv peb nruab siab zoo li ib nplaim hluav taws uas tsis txawj tuag. Thov kom peb yuav npaj peb sab ntsuj plig los rov qab sib khi lus dawb ceev txhua lub lim tiam thaum peb noj lub cim nco txog. Thov kom peb yuav hwm tus Tswv thiab yuav rau siab ntso ua peb tej hauj lwm hauv lub caij zoo kawg no, yuav txhim tsa Nws lub Koom Txoos thaum peb ntxiv dag ntxiv zog rau peb tsev neeg, kuv txo hwj chim thov Vajtswv kom muaj li ntawd.

Los ntawm Txwj Laug Ballard ib zag lus thaum lub Plaub Hlis Ntuj 1999 hauv lub tuam rooj sab laj hauv lub Koom Txoos (saib Conference Report, Plaub Hlis Ntuj 1999, 111–15; los sis *Ensign*, Tsib Hlis Ntuj 1999, 85–87).

TSEV NEEG KEV THOV VAJTSWV, TSEV NEEG KEV KAWM VAJ LUG KUB, THIAB TSEV NEEG HMO UA KE

16

COV TSWV YIM RAU KEV NRUAB RAU HAUV YUS LUB NEEJ

Raws li koj xav tau thiab toob kas qhia, ua raws li ib los sis ob qho tswv yim no.

- Yog tias nej tsev neeg muaj tsev neeg kev thov Vajtswv, tsev neeg kev kawm vaj lug kub, thiab tsev neeg hmo ua ke ntau, thov Vajtswv seb nej yuav kho ib los sis tej yam no kom zoo dua li cas. Yog tias nej tsev neeg tsis ua tej yam no, sim xav seb nej yuav ua li cas kom thiaj pib ua tej yam no hauv nej tsev.
- Ua ib tse neeg, cia li npaj ib yam kev ua si uas nej ua tau ua ke.
- Cia li tshab xyuas tej yam hauv phab ntawv 137—39 hauv *Kev Qhia, Tsis Muaj Ib txoj Hauj Lwm Tseem Ceeb Dua* (36123).

KEV NYEEM NTAWV

Kawm zaj dab neeg nram no. Yog tias koj muaj poj niam muaj txiv, nyeem thiab nrog koj tus khub sib tham txog zaj no.

TEJ KOOB HMOOV UAS LOS NTAWM TSEV NEEG KEV THOV VAJTSWV UA KE

Thawj Tswj Hwm Gordon B. Hinckley
Tus Pab Cuam Thib Ib hauv Thawj Pawg Thawj
Tswj Hwm

Tus Thwj Tim Pov Lauj tau hais rau Timautes hais tias:

“Koj yuav tsum nco ntsoov hais tias, thaum txog tiam yuav kawg yuav muaj kev kub ntxhov heev.

“Tej neeg nyias yuav xav txog nyias xwb, yuav muaj neeg ntshaw nyiaj txiag, khav txiv, muab hlob, nyiam thuam lwm tus, tsis mloog niam txiv lus, tsis ris lwm tus txiaj ntsig, saib tsis tau Vajtswv tej kev cai,

“Tsis sib hlob, tsis zam txim rau lwm tus, nyiam taug xaiv, ua nruj ua tsiv, ua neeg tsiv tsaim, tsis nyiam ua zoo,

“Ua neeg ntxeev siab, muaj lub siab heev, lawv saib lawv tsim txiaj dua lwm tus, nyiam kev lom zem heev dua nyiam Vajtswv tej kev cai” (2 Timautes 3:1–4).

Hauv peb lub caij nyoog no yuav tsum rov qab tshaj tawm txog kev ncaj ncees, ua neeg zoo, thiab saib tau lwm tus neeg rau nqi. Thaum peb ua raws li tej kev tsim txiaj no xwb peb thiaj yuav pauv peb lub caij lub nyoog no. Ces yuav nug hais tias, Peb yuav tsum pib ua qhov twg?

Kuv paub hais tias peb yuav tsum pib lees hais tias Vajtswv yog peb Leej Txiv Nyob Mus Ib Txhis, thiab tias peb nrog Nws sib txheeb li cas uas yog Nws cov me nyuam, nrog Nws sib txuas lus thiab lees tias Nws yog tus uas coj kav, thiab txhua txhua hnuv thov kom Nws yuav coj peb txoj hau kev.

Kuv xav hais tias yog peb yuav rov qab thov Vajtswv li yav tas los lawm, thov Vajtswv ua ib tse neeg, ces qhov ntawd yuav zoo li ib yam tshuaj uas txawj tua ib tug kab mob uas tab tom ua rau peb lub xam khoo puas tsuaj mus. Peb yuav tsis pom ib qho txuj ci loj heev hauv ib hnuv nkaus xwb, tiam sis hauv ib tiam neeg xwb ces yuav pom ib qho txuj ci loj.

Li ib ob tiam neeg tas los lawm, cov neeg uas ntseeg Yexus thoob plaws ntiaj teb tau thov Vajtswv ua ib tse neeg ntau npaum li lawv tau noj mov. Zoo nkaus li niaj hnuv no tsis tshua pom muaj li ntawd, ces tib neeg tau pib ua phem ua qias ib yam li tus Thwj Tim Pov Lauj tau hais.

Kuv xav hais tias tsis muaj ib yam dab tsi uas pauv tau txoj kev sib koom ua ke txhos caug chaw thaum uas yav sawv ntxov thiab yav tsaus ntuj—leej txiv, leej niam, thiab cov me nyuam ua ke. Qhov no yuav pab kom peb lub tsev zoo nkauj tshaj cov kas pev, cov ntaub pua qhov rais.

Txoj kev txhos caug xwb yeej tawm tsam tus cwj pwm uas Pov Lauj hais tias : “khav txiv...muaj lub siab heev, lawv saib lawv tsim txiaj dua lwm tus.”

Thaum niam thiab txiv thiab cov me nyuam txhos caug ua ke ces yuav ua rau lwm yam uas nws tau hais txog cia li ploj mus uas yog: “tsis mloog niam txiv lus,...tsis nyiam ua zoo.”

Txoj kev thov Vajtswv pab kom tib neeg tsis txhob hais lus saib tsis tau Vajtswv thiab tsis txhob nyiam kev lom zem heev dua nyiam Vajtswv txoj kev cai.

Pov Lauj tau hais tias tib neeg ib txwm yuav peem los ua neeg tsis dawb huv, tsis muaj kev ris txiaj, tiam sis kev thov Vajtswv ua ib tse neeg ua tus Tswv tsaug rau lawv txoj sia thiab kev thaj yeeb nyab xeeb thiab txhua yam uas lawv muaj yuav kom tej ntawd ploj mus. Thiab thaum lawv ua tus Tswv tsaug rau sawv daws, ces txhua tus neeg hauv tsev neeg ib leeg yuav saib tau ib leeg rau nqi, yuav haj yam muaj kev sib hlub.

Cov vaj lug kub hais tias: “Koj yuav ua tus Tswv koj tus Vajtswv tsaug rau txhua yam” (Q&K 59:7). Thiab ntxiv: “Tsis muaj ib yam dab tsi uas tub qaug Vajtswv, los sis yuav ua rau nws npau taws, tsuas yog cov uas tsis lees paub tias nws tau pab lawv” (Q&K 59:21).

Thaum yus nrog tus Tswv nco qab xav txog cov neeg pluag, cov uas xav tau ub no, thiab cov txom nyem, yus yuav pib muaj kev hlub rau lwm tus neeg, tsis xav txog yus tus kheej, yuav saib tau luag rau nqi, yuav muaj lub siab xav pab lawv. Yus thov tsis tau Vajtswv pab ib tug neeg zej zog uas nyuaj siab tsuas yog tus uas muaj lub siab xav pab tus neeg zej zog ntawd xwb. Yuav muaj tej txuj ci loj npaum li cas hauv cov me nyuam hauv lub ntiaj teb no lub neej yog tias lawv yuav tso lawv txoj kev qias dub tseg thiab pab lwm leej lwm tus. Ces lub noob ntawd yuav tawg paj thiab txi txiv es tsev neeg kev thov Vajtswv txhua txhua hnuv yuav pab tsob ntawd loj hlob tuaj mus.

Kuv tsis paub txog ib yam dab tsi uas yuav pab cov me nyuam hlub lawv lub teb lub chaws ntau npaum qhov uas lawv hnov lawv niam thiab txiv thov Vajtswv pab lawv lub teb chaws, thov Vajtswv foom koob hmoov ceev xyuas kev ywj siab thiab kev thaj yeeb nyab xeeb. Kuv tsis paub txog ib yam dab tsi uas yuav pab peb cov me nyuam kom saib tau txoj cai rau nqi ntau npaum li thaum tsev neeg txoj kev niaj hnuv thov Vajtswv kom txhawb pab cov thawj coj hauv peb txhua lub teb chaws tus tseem fvv.

Kuv nco qab pom ib daim paib tom kev uas hais tias, “Ib lub teb chaws uas thov Vajtswv yeej muaj kev thaj yeeb nyab xeeb.” Kuv ntseeg qhov ntawd.

Kuv tsis paub txog lwm yam dab tsi uas yuav pab tsev neeg txoj kev sib haum xeeb, uas yuav kom cov me nyuam hwm lawv niam lawv txiv ces yuav

mloog nkawd lus, uas yuav pab kom tib neeg tej ntsuj plig hloov siab lees txim thiab pab kom tej tsev neeg nyob ruaj khov, ntau npaum li txoj kev thov Vajtswv ua ke, sib koom siab lees txim rau ntawm tus Tswv, thiab thov tus Tswv foom koob hmoov rau lub tsev thiab rau sawv daws uas nyob hauv.

Kuv xav tsis thoob txog ib kab lus uas ib tug txiv neej uas tau tso lub neej no tseg ntev lawm tau hais. James H. Moyle tau sau ntawv mus rau nws cov me nyuam xeeb ntxwv hais txog kev thov Vajtswv ua ib tse neeg hauv lawv tsev. Nws tau hais tias: “Peb tsis tau mus pw tsaug zog txog thaum peb tau txhos caug thov Vajtswv coj lawv txoj hau kev thiab pom zoo rau lawv. Yeej yuav muaj tej kev tsis sib haum xeeb hauv tej yim neeg zoo tshaj plaws, tiam sis tej kev tsis sib haum ntawd yuav pib ploj mus...thaum muaj tus ntsuj plig uas los ntawm kev thov Vajtswv los.... Qhov ntawd yeej yuav pab kom tib neeg ua ncaj ncees. Nws pab kom muaj kev sib haum, kev hlub, kev sib zam txim, kev sib pab.”

Thaum xyoo 1872 tus Nom Tub Rog Thomas L. Kane, uas tau ua ib tug phooj ywg rau peb cov neeg thaum muaj kev kub ntxhov hauv Iowa thiab thaum lub sij hawm uas pab tub rog tau tuaj rau hauv lub Hav Salt Lake, tau nrog nws tus poj niam thiab ob tug tub tuaj rau sab hnuv poob. Lawv tau nrog Brigham Young mus nram St. George, txhua hmo lawv tau nres so hauv lub Koom Txoos cov mej zeej tej vaj tsev. Niam Kane tau sau tej tsab ntawv mus rau nws txiv uas nyob tim lub nroog Philadelphia. Hauv nws ib tsab ntawv nws tau sau hauv tias:

“Nyob hauv txhua qhov chaw uas peb tau nres so peb tau thov Vajtswv tom qab noj hmo tas, thiab tau thov Vajtswv dua ua ntej noj tshais. Txhua tus yeej nyob ntawd....Cov Neeg Maumoos...txhos caug ua ke, thaum tus tswv tsev, los sis lwm tus neeg thov Vajtswv rau sawv daws....Lawv tsis siv sij hawm piav seb Vajtswv zoo li cas, tiam sis thov kom tau kev pab, thiab ua Nws tsaug rau tej yam uas Nws twb muab rau lawv lawm....[Lawv] xav tias Vajtswv paub lawv txhua tus lub npe, thiab yuav [tuav tus neeg ntawd lub npe] thov ntuj foom koob hmoov rau lawv,...kuv nyiam ua li no tom qab ua ob peb zaug.”

Au, thov kom peb cov neeg yuav ua li no, uas yog ib yam tseem ceeb heev rau peb cov poj koob yawm txwv. Kev thov Vajtswv ua ib tse neeg yog ib qho ntawm kev teev ntuj ntau npaum li tej kev sib ntsib hauv lub Tsev Kheej. Los ntawm kev thov Vajtswv txhua hnuv li ntawd lawv txawm muaj kev ntseeg, lawv tau do nroj, tau ua ciav dej coj cov dej los rau tej liaj ia, ces tej tiaj nrag suab puam tau tawg paj txi txiv, lawv tau tswj hwm lawv tsev neeg nrog kev hlub, tau muaj kev thaj yeeb nyab xeeb, thiab lawv tau peem los ua ib co neeg zoo thaum lawv tau rau siab ntso ua hauj lwm pab lawv tus Vajtswv.

Tsev neeg yog pawg neeg tseem ceeb tshaj plaws rau lub xam khoo. Tsev neeg uas thov Vajtswv ua ke yog chaw vam khom rau lub xam khoo uas zoo thaum yav tom ntej. “Nej cia li tig hlo rov los cuag tus Tswv thiab thov nws, nim no nws nyob ze nej” (Yaxayas 55:6).

Peb ua puas tau kom peb vaj tsev zoo nkauj dua? Tau, thaum peb ua ib tse neeg thov lub Ntuj peb yuav nrhiav tau kev zoo nkauj. Peb ua puas tau kom lub xam khoo muaj zog thiab ua chaw uas xis nyob me ntsis? Tau, thaum peb txhos caug thiab thov tus uas Muaj Hwj Chim Loj Kawg Nkaus los ntawm Nws Tib Leeg Tub lub npe peb tsev neeg yuav haj yam tsim txiaj.

Txoj kev ua li no, teev ntuj ua ib tse neeg, tab tom puv tag nrho lub ntiaj teb, yeej yuav pab tshem tej yam hauv tiam neeg no uas tab tom ua rau peb puas tsuaj. Nws yuav coj kev ncaj ncees, kev sib

hwm, thiab lub siab uas muaj kev ris txiaj rov qab los rau tib neeg nruab siab.

Tus Xib Hwb Zoo tau tshaj tawm tias, “Nej yuav tsum thov, nej thiaj yuav tau; nej yuav tsum nrhiav, nej thiaj yuav ntsib; nej yuav tsum hu, Vajtswv thiaj yuav qhib qhov rooj rau nej” (Mathais 7:7).

Kuv hais lus tim khawv rau nej tias yog nej rau siab thov Vajtswv ua ib tse neeg, nej yeej yuav tau nqi zog. Tej zaum yuav tsis pom dab tsi hloov hlo tam sim ntawd. Tej zaum yuav yog tej yam me me xwb. Tiam sis yeej yuav muaj, vim Vajtswv “yog tus uas muab nqi zog rau cov uas rau siab nrhiav nws” (Hinplus 11:6).

Thov kom peb rau siab ua ib tug yam ntxwv rau lub ntiaj teb kom ua li no thiab yaum kom lwm tus yuav ua li ntawd thiab.

Los ntawm phau *Ensign* phab 2–5, thaum lub Ob Hlis Ntuj 1991.

“KUV RAUG QHIA LI NTAWD”

Txwj Laug L. Tom Perry
Los ntawm Pawg Kaum Ob tug Thwj Tim

Niam Txiv Zoo

Phau Ntawv Maumoos pib nrog cov lus no: “Kuv, Nifais, tau yug los ntawm niam txiv uas zoo, yog li ntawd kuv raug qhia kuv txiv tej yam txawj ntse huv tib si” (1 Nifais 1:1). Lub ntiaj teb no yuav txawv heev yog tias peb txhua tus uas yog Leej Txiv Saum Ntuj Ceeb Tsheej cov me nyuam tej phau ntawv ceev xwm txheej pib nrog tib cov lus no—muaj niam txiv zoo thiab tau raug nkawd tej kev qhia.

Peb nyob hauv ib lub caij zoo heev hauv tib neeg zaj liv xwm, uas yog ib lub sij hawm uas tus Tswv txoj moo zoo twb muab txum tim rov qab los tag nrho. Peb cov tub txib tab tom coob zuj zus thiab haj yam txawj qhia, yog li ntawd, peb tab tom qhia txoj moo zoo hauv ntau yam lus hauv ntau lub teb chaws thiab tsis tau muaj neeg coob npaum li no hnov txoj moo zoo dua. Thaum tej pawg ntseeg thiab ceg txheem ntseeg raug txhim tsa hauv txhua qhov chaw hauv ntiaj teb no, cov neeg txawj ntse tau tsim tej kev sib txuas lus uas yuav coj tau cov yaj saub tej lus mus rau tib neeg coob, neeg coob kawg tiag. Txoj moo zoo yuav coj tej kev cia siab los rau tib neeg uas yuav pab kom lawv muaj kev thaj yeeb nyab xeeb.

Tsev Neeg uas Muaj Teeb Meem

Zaj xov xwm ntawm txoj moo zoo yog lus qhuab qhia uas hais tias tsev neeg yuav nyob ua ke tas mus ib txhis. Peb tshaj tawm rau lub ntiaj teb tias tsev

neeg muaj nuj nqi thiab tseem ceeb npaum li cas, tiam sis peb pom hais tias tej kev kub ntxhov thiab kev nyuaj siab hauv lub ntiaj teb yeej yog vim tej tsev neeg tab tom puas tsuaj mus. Niam thiab txiv haj yam tsis qhuab qhia thiab coj lawv cov me nyuam hauv tsev.

Twb muab tej plua mov uas yooj yim ua thiab kev zaum saib TV ib hmo pauv tsev neeg uas muaj niam thiab txiv thiab cov me nyuam uas kawm, ua si, thiab ua hauv lwm ua ke chaw lawm. Thaum xyoo 1991 Lub Koom Haum rau Cov Xeev, tau sib sab laj hauv Salt Lake, lawv tau xav tias tsev neeg txoj kev puas tsuaj twb yog ib qho teeb meem loj heev hauv peb lub teb chaws ces lawv tau sib tham txog lawv tej teeb meem. Lawv tau sau tsib lub tswv yim uas yuav pab txhua tsev neeg ua zoo.

Qhov xub thawj, ntxiv zog rau tsev neeg los ntawm tej kev ua si; qhov thib ob, tsa tej kev cai thiab tej yam uas xav tau; qhov thib peb, pab kom sawv daws xav zoo zoo txog lawv tus kheej; qhov thib plaub, tsa tej lub hom phiaj; thiab qhov thib tsib, ntsuam xyuas tsev neeg tej yam zoo thiab tej yam uas lawv xav tau.

Cia yus thiaj pom hais tias peb cov yaj saub cov lus ceeb toom txij thaum chiv keeb yeej muaj hauv paus hauv ntsis tiag tiag li. Ib yam li peb tau qhuab qhia thiab yaum lawm, peb yuav tsum haj yam xav txog peb tsev neeg thiab ua cov tub txib pab coj qhov tseeb los thiab qhia tias tsev neeg muaj nuj nqi li cas.

Adas thiab Evas Kawm tias Niam Txiv Muaj Hauj Lwm Li Cas

Puag thaum chiv keeb, tus Tswv cov lus qhia rau Adas thiab Evas piav meej meej tias niam thiab txiv muaj ntiag tug hauj lwm li cas. Tau qhia tias nyias muaj nyias hauj lwm dab tsi. Tom qab lawv tau kev qhia los ntawm tus Tswv, peb pom nkawd ua raws li Nws cov lus ntuas thiab hais li no hais tias:

“Thiab hnuv ntawd Adas foom koob hmoov rau Vajtswv thiab muaj txhij txhua, thiab tau pib qhia tej uas yuav muaj los yav tom ntej rau txhua tsev neeg hauv ntiag teb, hais tias: Foom koob hmoov rau Vajtswv lub npe, vim kuv tej kev txhaum kuv thiaj qhib qhov muag, thiab hauv lub neej no yuav muaj kev xyiv fab, thiab yuav pom Vajtswv dua thaum kuv tseem muaj nqaij daim tawv.

“Thiab Evas, nws tus poj niam, tau hnov txhua yam no thiab tau muaj kev zoo siab, ces tau hais tias: Yog tias wb tsis tau ua txhaum ces peb yuav tsis tau muaj tub muaj ki, thiab yuav tsis tau paub qhov zoo thiab qhov phem, thiab kev xyiv fab los ntawm peb txoj kev cawm dim, thiab txoj sia nyob mus ib txhis uas Vajtswv muab rau txhua tus uas mloog lus.

“Thiab Adas thiab Evas tau koob hmoov los ntawm Vajtswv lub npe, thiab nkawd tau qhia txhua nrho rau nkawd cov tub thiab cov ntxhais” (Mauxes 5:10–12).

Qhia thiab Cob cov Me Nyuam

Txij thaum chiv keeb los niam txiv yeej muaj ntiag tug hauj lwm qhia lawv cov me nyuam tus Tswv kiag twb txib kom peb thawj nkawm niam txiv hauv ntiag teb kom ua li no.

Tej kev tshwm sim hauv lub Koom Txoos uas raug muab txum tim rov qab los hauv lub caij nyoog no twb rov qab qhia niam thiab txiv tias lawv muaj ntiag tug hauj lwm yuav tsum qhia thiab cob lawv cov me nyuam. Nyob hauv tshooj cuaj caum peb hauv phau Lus Qhuab Qhia thiab Kev Khi Lus peb pom tus Tswv cem ib co kwv tij vim lawv tsis ua lawv tej hauj lwm hauv lawv tsev neeg. Phau vaj lug kub hais tias:

“Tiam sis kuv twb txib kom nej yuav tu nej cov me nyuam hauv qhov kaj thiab qhov tseeb....

“Nej tsis tau qhia nej cov me nyuam qhov kaj thiab qhov tseeb, raws li cov lus txib; thiab tus dab phem muaj hwj chim, los kav nkaus nej, thiab vim li no nej thiaj raug txom nyem.

“Thiab nim no kuv txib nej—yog nej yuav tau kev cawm dim nej yuav tsa nej lub tsev kom muaj kab muaj kev, vim muaj ntau yam tsav hauv nej lub tsev uas tsis yog lawm” (Q&K 93:40, 42–43).

Qhov Tseem Ceeb ntawm Tsev Neeg Hmo Ua Ke

Ntau xyoo tas los lawm lub Koom Txoos tau ntuas cov niam txiv kom muaj tsev neeg hmo ua ke txhua txhua lim tiam. Niaj hnuv no tau ntuas lub Koom Txoos cov mej zeej kom ua li no. Twb tau tseg hmo Monday rau tsev neeg tau nyob ua ke. Yuav tsum tsis txhob muaj tej kev ua si hauv lub Koom Txoos los sis lwm yam kev ua si hmo ntawd. Peb tau lus cog tseg tias peb yuav tau koob hmoov yog tias peb tsev neeg yuav rau siab ntso ua li no.

Thawj Tswj Hwm Harold B. Lee tau ntuas peb hais tias:

“Nim no nco ntsoov li no; tias thaum yus to taub Eliyas txoj hauj lwm, cov me nyuam tej siab yuav tig mus rau lawv txiv, thiab cov txiv yuav tig mus rau cov me nyuam. Nov yeej hais txog ob sab ntawm ntaub thaiv tib si. Yog tias peb tsis quav ntsej peb tsev neeg thiab tsis muaj tsev neeg hmo ua ke thiab tsis ua raws li peb txoj ntiag tug hauj lwm no, lub ntuj yuav xav li cas txog peb vim peb tau xiam ib co vim peb tsis quav ntsej ua tej no? Lub ntuj ceeb tsheej yuav tsis ua lub ntuj ceeb tsheej txog thaum peb tau ua txhua yam peb ua tau pab cawm cov uas tus Tswv tau xa los nyob hauv peb caj peb ceg.”

Ces nws hais ntxiv tias:

“Yog li ntawd, nej cov niam thiab txiv tej siab yuav tsum tig mus rau nej cov me nyuam *tam sim no*, yog tias nej tau Eliyas tus ntsuj plig tiag tiag, ces yuav tsum paub tias nws tsis yog rau cov uas nyob sab nraum daim ntaub thaiv xwb. Cia nej tej siab tig mus rau nej cov me nyuam, thiab qhia nej cov me nyuam; tiam sis nej yuav tsum pib qhia lawv thaum lawv tseem hluas txaus lawv thiaj kawm tau. Thiab yog tias nej tsis muaj tsev neeg hmo ua ke, nej tsis ua lub hauv paus rau Eliyas txoj hauj lwm ib yam nkaus li yog tias nej tsis tshawb nrhiav nej caj nej ceg” (hauv *Relief Society Courses of Study, 1977–78* [1977], 2; tau ntxiv cov ntawv qaij).

Kuv twb xav ntau ntau txog tej lub sij hawm uas wb tau muaj kev zoo siab thaum wb tsev neeg tseem hluas thiab wb cov me nyuam tau nyob hauv tsev. Kuv tau tshab xyuas tej hnuv ntawd thiab tau xav seb kuv yuav pauv dab tsi thiab dab tsi hauv wb tsev neeg yog tias wb tau muaj caij rov qab ua dua. Muaj ob yam uas kuv xav pauv kom zoo dua yog tias kuv tau muaj caij muaj cov me nyuam hluas hauv wb lub tsev dua.

Qhov xub thawj kuv xav tau sij hawm ntxiv uas tus txiv thiab tus poj niam sib sab laj txog kev kawm, kev sib txuas lus, kev npaj, thiab txhim tsa txhua yam kom wb thiaj ua tau niam txiv zoo dua.

Qhov thib ob mas, yog tias kuv tau nyob hauv tej xyoo ntawd dua, kuv yuav xav kom kuv thiaj tau sij

hawm ntxiv nrog wb tsev neeg. Nov kuj hais txog muaj tsev neeg hmo ua ke uas muaj ib lub ntsiab zoo, thiab ua txhua txhua lub lim tiam.

Cov Tub thiab Ntxhais Hluas Pab Kom Ua Tau Zoo

Niam thiab txiv tsis yog tib co neeg uas yuav tsum npaj thiab ntaus tswv yim rau tsev neeg hmo ua ke. Tej hmo zoo tshaj plaws uas kuv tau pom yog tej hmo thaum cov tub thiab ntxhais hluas hauv ib tse neeg pab ua tej hauj lwm.

Kuv caw kom nej cov dis kas, cov xib hwb, thiab cov pov thawj, nej cov ntxhais hluas uas nyob hauv hoob Beehive, Mia Maids, thiab Laurel kom nej yuav pab nej tsev neeg hmo ua ke mus tau zoo. Nyob hauv ntau lub tsev nej ua tau tus neeg uas pab sawv daws ua qhov zoo. Tiag tiag mas, nej yog cov uas yuav kawm ntau tshaj plaws los ntawm tej no. Yog tias nej xav nyob hauv ib lub ntiaj teb uas muaj kev thaj yeeb nyab xeeb, tsis muaj kev ntshai, thiab muaj ntau lub cib fim, tsev neeg uas nej pab no yuav pab kom sawv daws, kuj hais txog tag nrho lub ntiaj teb tib si, muaj kev noj qab nyob zoo.

Kuv nco txog ib qho piv txwv thaum lub caij Christmas uas wb tau coj peb tug me nyuam xeeb ntxwv mus ua si. Xwv kom peb thiaj tau nyob ua ke, wb tau xaub ib lub tsheb loj me ntsis. Nyob hauv lub tsheb muaj Pog thiab Yawg, thiab kuv tus tub thiab nws peb tus me nyuam hlob. Kuv tus nyab nyob tsev zov cov me nyuam me me. Kuv tab tom tsav tsheb, thiab kuv tus poj niam tau zaum ntawm kuv ib sab ua tus cob kev. Nyob nram qab lub tsheb, kuv tau hnov Audrey, uas yog tus me nyuam hlob, tab tom nrog nws txiv sib tham. Nws tau hais tias, “Txiv es, peb ib lub hom phiaj rau xyoo no yog kom nyeem tag nrho Phau Ntawv Maumoos ua ib tse neeg. Hnub no yog hnub kawg rau xyoo no. Koj puas xav kom nyeem ua ke tam sim no kom tiav es peb thiaj yuav ncav cuag peb lub hom phiaj?”

Kuv zoo siab vim kuv tau hnov kuv tus tub thiab nws peb tus me nyuam, sib pauv nyeem tej tshooj kawg hauv Maulaunais thiab ncav cuag lawv lub hom phiaj uas yog kom nyeem tag nrho Phau Ntawv Maumoos. Nco qab ntsoov tias, twb yog ib tug ntxhais hluas uas tau yaum kom ua li no, tsis tau yog niam los sis txiv.

Kev Yaum cov Tub thiab Ntxhais Hluas

Nej yog ib tiam neeg tshwj xeeb—uas raug tseg rau lub caij zoo kawg no hauv tib neeg zaj liv xwm. Nej yeej ua tau ntau yam pab nej tsev neeg loj hlob thiab tawg paj txi txiv. Kuv yaum kom nej yuav sawv los pab nej tsev neeg, vim nej muaj ib tug ntsuj plig zoo thaum nej tseem hluas uas yuav pab

kom txoj moo zoo muaj sia nyob hauv nej vaj nej tsev. Nco ntsoov Thawj Tswj Hwm Joseph F. Smith cov lus ntuas uas hais li no tias:

“Kuv xav kom kuv cov me nyuam, thiab tag nrho cov me nyuam hauv Xi-oos, yuav paub tias tsis muaj ib yam dab tsi hauv lub ntiaj teb no uas muaj nuj nqi ntau npaum li txoj kev uas yus paub tias Txoj Moo Zoo twb muab txum tim rov qab los lawm hauv lub ntiaj teb dhau ntawm tus Yaj Saub Yauxej Xamiv. Tsis muaj ib yam dab tsi uas pauv tau nws chaw. Tsis muaj ib yam dab tsi uas zoo tshaj qhov uas yus paub txog Yexus Khetos. Yog li ntawd, cia txhua tus niam thiab txiv hauv Xi-oos saib xyuas lawv cov me nyuam, thiab qhia lawv txog Txoj Moo Zoo tej ntsiab cai, thiab siv zog pab kom lawv yuav ua lawv tej ntiag tug hauj lwm thiab—tsis yog lam tau lam ua, vim peb yaum kom lawv ua, tiam sis sim pab cov me nyuam kom muaj lub siab uas xav ua qhov tseeb thiab nyiam Txoj Moo Zoo tiag tiag, xwv kom lawv yuav ua lawv tej ntiag tug hauj lwm vim niam txiv xav kom lawv ua xwb, tiam sis yuav ua vim hais tias lawv nyiam ua li ntawd thiab” (hauv Brian H. Stuy, tus kws sau, *Collected Discourses Delivered by President Wilford Woodruff, His Two Counselors, the Twelve Apostles, and Others*, 5 phau ntawv [1987–92], 5:436).

Rov Qab Ntxiv Zog rau Tsev Neeg Hmo Ua Ke

Tsev neeg hmo ua ke yeej yog rau sawv daws, txawm yog ib lub tsev uas muaj niam thiab txiv tib si, tsuas muaj niam los sis txiv xwb, los sis tsuas muaj ib leeg uas yog mej zeej xwb. Cov neeg mus qhia tom tsev, peb caw kom nej yuav txhawb pab thiab yaum nej tej tsev neeg kom muaj tsev neeg hmo ua ke.

Peb tus yaj saub rau lub caij no, Thawj Tswj Hwm Ezra Taft Benson, tau rov qab qhia peb tias tsev neeg hmo ua ke yog ib yam tseem ceeb thiab yuav tsum ua li cas thiaj ua tau zoo. Nws tau hais tias:

“Tsev neeg hmo ua ke yog lub Koom Txoos ib qho khoos kas uas tseg ib hmo txhua lub lim tiam rau leej txiv thiab leej niam tau coj lawv cov tub thiab cov ntxhais los ua ke hauv tsev, ua li no thiaj yuav ntxiv dag ntxiv zog thiab pov hwm nej tsev neeg. Yuav thov Vajtswv, thiab hu nkauj, yuav nyeem vaj lug kub, thiab sib tham txog nej tsev neeg, yuav ua tej txuj ci, qhia txoj moo zoo tej ntsiab cai, thiab feem ntau yuav muaj kev ua si thiab noj tej yam khoom qab zib” (hauv Conference Report, Philippine Islands Area Conference 1975, 10).

Peb cia siab tias nej txhua tus yuav sau tus yaj saub cov tswv yim no cia hauv ntawv kom nej thiaj paub tias tsev neeg hmo ua ke yuav tsum zoo li cas.

Ces nws hais ntxiv tias: “Nim no, nov yog tej koob hmoov uas Vajtswv ib tug yaj saub cog lus rau nej tias nej yuav tau txais yog tias nej muaj tsev neeg hmo ua ke txhua txhua lub lim tiam: ‘Yog tias ib Tsoom Haiv Neeg Ntseeg yuav ua raws li tej lus ntuas, peb cog lus tias nej yuav tau koob hmoov ntau heev. Yuav haj yam muaj kev hlub tom tsev thiab yuav mloog niam thiab txiv lus. Cov neeg hluas hauv Ixayees txoj kev ntseeg yuav loj hlob tuaj, thiab lawv yuav muaj hwj chim txaus lawv thiaj tawm tsam tau kev phem thiab kev ntxias uas nyob ib puag ncig’” (hauv Conference Report, Philippine Islands Area Conference 1975, 10; kuj saib Improvement Era, Rau Hli Ntuj 1915, 734).

Peb yaum kom nej txhua tus yuav ua raws li peb tus yaj saub cov lus ntuas. Nyob hauv txhua yim

neeg hauv lub Koom Txoos, rov qab tshab xyuas seb nej muaj tsev neeg hmo ua ke ntau npaum li cas. Txoj kev ua raws li qhov khoos kas no hais yuav tiv thaiv thiab pov hwm nej ntawm tej kev phem hauv peb lub caij lub nyoog thiab yuav coj kev zoo siab los rau nej, thiab tag nrho nej tsev neeg, yeej hais txog tam sim no thiab rau tas mus ib txhis li.

Thov kom Vajtswv yuav foom koob hmoov rau peb thaum uas peb rov qab ntxiv dag ntxiv zog rau qhov khoos kas tseem ceeb no thiab nrog peb tsev neeg sib sab laj ua ke.

Los ntawm Txwj Laug Perry ib zag lus thaum lub Plaub Hlis Ntuj 1994 hauv lub tuam rooj sab laj ntawm lub Koom Txoos (saib Conference Report, Plaub Hlis Ntuj 1994, 47–51; los sis *Ensign*, Tsib Hlis Ntuj 1994, 36–38).

YEXUS KHETOS
LUB KOOM TXOOS
NTAWM TSOOM
HAIV NEEG NTSEEG
HAUV HNUB NYOOG KAWG

